

ՀՐԱՏԱՐԱԿՈՒԹԻՒՆ

ՄԱԼԱԹԻՈՅ ԿՐԹԱՍԻՐԱՑ ԸՆԿԵՐՈՒԹԵԱՆ





**ՊԱՏՄՈՒԹԻՒՆ**  
**ՄԱԼԱԹԻՈՅ ՀԱՅՈՑ**

ՏԵՂԱԳՐԱԿԱՆ, ՊԱՏՄԱԿԱՆ ԵՒ ԱԶԳԱԳՐԱԿԱՆ

ՀԱՄԱԴՐԵՑ՝  
ԱՐՇԱԿ ԱԼՊՈՅԱԶԵԱՆ

1961  
ՏՊ . ՍԵՒԱՆ  
ՊԷՅՐՈՒԹ



A PUBLICATION OF  
EDUCATIONAL SOCIETY OF MALATIA

**HISTORY**  
**OF THE ARMENIANS IN MALATIA**

With Topographical, Historical and Ethnographical Information

Edited by  
**ARSHAG ALBOYADJIAN**

Printed by  
**SEVAN PRESS**  
P. O. Box 2669  
BEIRUT (Lebanon)



# ՅԱՆԿ ՆԻԻԹԵՐՈՒ





Էջ

ՅԱՌԱՋԱԲԱՆ

ԺԱ

ՅՆԿ ՆԻԻԹԵՐՈՒ

ԺԷ

Ա. ՄԱՍ

## ԱՇԽԱՐՀԱԳՐԱԿԱՆ ՏԵՂԵԿՈՒԹԻՒՆՆԵՐ

Ա. Մալաթիա եւ շրջակայքը իբրեւ աշխարհամաս	1
Բ. Աշխարհագրական դիրք	2
Գ. Երկրաբանութիւն	4
Դ. Լեռնագրութիւն	5
Ե. Զրագրութիւն	6
Մելաս-Մելոս (թրք. Թոխմա) գետ	11
Սուլթան Սու (գետակ)	12
Զ. Բուսականութիւն	19
Է. Կենդանական հարստութիւն եւ անասնապահութիւն	26
Ը. Հանքային հարստութիւն	29
Թ. Կլիմայ	32
Ժ. Հաղորդակցութեան միջոցներ	36
ԺԱ. Վարչական բաժանումներ	46
ԺԲ. Հնութիւններ եւ պատմական յիշատակարաններ	56
Այրեր եւ նշանաւոր վայրեր	62
Անշարժ հնութիւններ, խաներ եւ այլն	63
Նուիրական հնութիւններ (կործանած կամ կանգուն)	63
Հին Մալաթիա քաղաքին հնութիւնները	73
Ասլան Թեփէ	74
Մրցորդ քրիստոնէութեան	82



Բ. ՄԱՍ

ՊԱՏՄԱԿԱՆ ԱՆՑԵԱԼ

ՄԱԼԱԹԻՈՅ ՀՆԱԽՕՍԱԿԱՆՆ ՈՒ ՊԱՏՄԱԿԱՆԸ՝ ՔԱՐԱՅԻՆ  
ՇՐՋԱՆԷՆ ՄԻՆՋԵՒ ԻՍԼԱՄԱԿԱՆ ԳՐԱԻՈՒՄԸ

Գրեց՝ ԵՂԻԱ Ս. ՔԱՍՈՒՆԻ

	Էջ
Ա. Փոքր Ասիոյ նախապատմութիւնը	85
Բ. Մալաթիա եին հաթեանց օրով	92
Գ. Անցումն Հաթեան շրջանէն դէպի Ասորեստանեանը	97
Դ. Մալաթիա բնիկ թագաւորաց ներքեւ	108
Ե. Մելիտինէ Ասորեստանեայց նահանգ	126
Զ. Հատեան Մալաթիոյ մշակոյթը	142
Քանդակագործութիւն	145
Մալդիյայի խմբանկար քանդակը	147
Մալդիյա եւ Ուրարտու	148
Մելիտինէի նոր-Հաթեան մշակոյթին նշանակութիւնը	149
Է. Կատաւոնիա եւ Մելիտինէ՝ Պարսկական եւ Յունական շրջաններուն	154
Ը. Մելիտինէ Հռովմայեցոց օրով. — Քրիստոնէութիւնը	
Մելիտինէի մէջ	161
Թ. Մալաթիա Արաբական շրջանին	176
Ժ. Արաբներու եւ Բիւզանդացիներու համար Մելիտինէի	
մասնաւոր կարեւորութիւնը	208
ԺԱ. Ասիական բարբարոսները Մելիտինէի շուրջ	213
ԺԲ. Մելիտինէ՝ Փիլարտոսի իշխանապետութեան մաս	222
ԺԳ. Մալաթիոյ նորտ իշխանները եւ Գաբրիէլ «Յոյն»ը	227
ԺԴ. Քեսունի իշխանութիւնը եւ այլ մանրապետութիւնք	
Եփրատացոց մէջ	241
ԺԵ. Մալաթիա Դանիշմենտեանց իշխանութեանց տակ (1124-1178)	253
ԺԶ. Մալաթիա Ռումի Սելնուկ տիրապետութեան տակ (1178-1315)	263
ԺԷ. Մալաթիա Թիւրքմէն կէս-անկախ իշխանութեան տակ (1315-1516)	277
ԺԸ. Մալաթիա Օսմանեան տիրապետութեան տակ	289



## Գ. ՄԱՍ

## ՀԱՅԵՐԸ ՄԵԼԻՏԻՆԷԻ ՄԷԶ

### (ՀԻՆ ՕՐԵՐԷՆ ՄԻՆՋԵԻ ՄԵՐ ՕՐԵՐԸ)

	<u>Էջ</u>
Ա. Հնագոյն ժամանակներէն մինչեւ Ալեքսանդր	307
Բ. Ալեքսանդրի աշխարհակալութենէն մինչեւ Հռոմէական տիրապետութիւն	309
Գ. Հռոմէական տիրապետութեան տակ	310
Դ. Բիւզանդական շրջան	315
Ե. Արաբական շրջանի Մելիտինէի Հայերը (Է — ԺԱ դար)	325
Զ. Ասիական բարբարոսներու արշաւանքները մինչեւ Օսմանեան տիրապետութիւն	336
Հայերու թիւը	341
Կրօնի ազատութիւն և հոգեւոր վարչութեան կազմակերպութիւն	345
Հայ տարրը եւ իր դերը այս շրջանին	351
Հայ արուեստներու դերը	355
Է. Մալաթիոյ Հայերը Օսմանեան թիւրքերու տիրապետութեան տակ	366

## Դ. ՄԱՍ

## ՄԱԼԱԹԻԱ ԵՒ ԹԵՄԻՆ ՀԱՅԱԲՆԱԿ ՎԱՅՐԵՐԸ

## Ա

### ՄԱԼԱԹԻԱ ՔԱՂԱՔԸ

Ա. Քաղաքին վայրը եւ դիրքը	381
Բ. Քաղաքին անունը, անցեալին մէջ ունեցած վիճակները եւ տեղափոխութիւնները	398
Տեղափոխութիւն կամ փոփոխութիւն հին եւ նոր քաղաքի	402
Գ. «Արկածք եւ Պատահարք»	436
Դ. Բնակչութիւնը եւ Հայոց թիւը	446

## Բ.

### ՄԱԼԱԹԻՈՅ ԱՌԱՋՆՈՐԴՈՒԹԵԱՆ ՀԱՅԱԲՆԱԿ ՎԱՅՐԵՐԸ

Ա. Մալաթիա գաւառ	463
1. Օրտուզի կամ Հորտէօզ	467



2. Հին Մելիտինէ կամ Էսփի Շեհիր	470
Բ. Աղնա Տաղ գաւառը	471
Գ. Պեսնի — Պահեստին	481
Դ. Հիւսնի—Մանսուր կամ Ատիեաման	491
Ե. Քեախդա — Գաղթոյ — Քեախդէ	506

## Ե. ՄԱՍ ՀԱՄԱՅՆՔԱՅԻՆ ԿԵԱՆՔ

### Ա.

ԿՐՕՆԱԿԱՆ ԿԵԱՆՔ ԵՒ ԵԿԵՂԵՑԱԿԱՆ ՎԱՐՁՈՒԹԻՒՆ

Ա. Եկեղեցիներ եւ աղօթատեղիներ	523
1. Ս. Աստուածածին Եկեղեցի	528
2. Ս. Երրորդութիւն Եկեղեցի	531
3. Ս. Յարութեան Եկեղեցի	533
4. Անծածկոյթ Սրբավայրեր	537
Բ. Առաջնորդութիւն	538
1. Իր հաստատութիւնը	538
2. Իր դիրքը Հայ Եկեղեցւոյ նուիրապետութեան մէջ	543
Գ. Թեմագրութիւն	545
Դ. Իր յարաբերութիւնները բարձրագոյն աթոռներու հետ	555
Ե. Գաւազան առաջնորդներու	555
ՄԱԼԱԹԻԱ	556
Զ. Յարակից թեմեր	583
Է. Հայ վանքեր	591
ա. Սուրբ Փրկիչ վանք	592
բ. Ս. Լուսաւորիչ վանք	603
գ. Անարծաթ բժիշկի վանք	616
դ. Կարմիր վանք (Ս. Կարապետ)	623
ե. Ահարոնի վանք	624
զ. Թէոդորոսի կամ Ս. Թորոսի վանք Դերձկի	624
է. Ս. Սարգիս վանք	626
ը. Ս. Գէորգ վանք	627
թ. Ս. Մաքտիրոս վանք	627
ժ. Ս. Կոնոնոս վանք	628
ժա. Ս. Օհան վանք	628
ժբ. Ս. Օհան Հեփիմիսանի	629



ժգ. Ս. Աստուածածին վանք Հեֆիմ խանի	630
ժդ. Կարկանի Ս. Տիմոթեոսի վանք	632
ժե. Քեսունի Կարմիր վանքը	636

**Բ.**

ՄԱԼԱԹԻՈՅ ՀԱՅ ԿԱԹՈՂԻԿԵՆԵՐԸ	640
Առաջնորդները	641
Հայ-Կաթոլիկ Կրթ. Հաստատութիւններ	646
Թեմօրայք	648
Ղառիներ	649

**Գ.**

ՄԱԼԱԹԻՈՅ ՀԱՅ-ԱԻԵՏԱՐԱՆԱԿԱՆՆԵՐԸ	651
Հովիւները	663
Մալաթիոյ գաւառին Հայ-Աւետարանականները	666
Հայ Աւետարանական դպրոցներ	669
Աղանդաւորական շարժումներ	672

**Զ. ՄԱՍ**

**ԻՄԱՅԱԿԱՆ ԵՒ ՄՏԱԻՈՐԱԿԱՆ ԿԵԱՆՔ**

**I**

Ա. Մալաթիա իբր վայր մտաւորական շարժման	673
Բ. Առանձնական ուսուցում	679
Գ. Ընթերցում եւ գրչութիւն	681
Դ. Հայ դպրոցներ	690
1. Սահակեան մայր վարժարան	707
2. Ներսէսեան վարժարան	713
3. Ասողիկ Ընկերութեան վարժարան	714
4. Արամեան վարժարան	714
5. Կրթասիրաց վարժարան	715
6. Գայեանեան վարժարան	716
7. Սանդիստեան վարժարան	717
8. . . . .	718
9. Հռիփսիմեանց վարժարան	718
10. Մանկապարտէզ	718
11. Ազգային Որբանոց	720



## 2

## ՅԱՐԱՆՈՒԱՆԱԿԱՆ ԵՒ ՕՏԱՐ ԿՐԹԱԿԱՆ ՀԱՍՏԱՏՈՒԹԻՒՆՆԵՐ

## Ա.

## ՀԱՅ ԿԱԹՈՒԼԻԿ ՎԱՐԺԱՐԱՆՆԵՐ

1. Խաչատուրեան վարժարան	721
2. Որբանոց	724
3. Լատին վարժարանը	725
4. Լատին որբանոց	726

## Բ.

## ԱՒԵՏԱՐԱՆԱԿԱՆ ԴՊՐՈՑՆԵՐ

1. Համայնֆային դպրոցներ	726
2. Ամերիկեան որբանոց	731
3. Գերմանական որբանոց	732
Ե. Կրթական մշակներ	733
Զ. Վիճակային վարժարաններ	768
Առաջնորդական վիճակ Մալաթիոյ (տախտակ)	771
Է. Կրթական, մշակութային եւ բարեգործական ընկերութիւններ	772
Աստղիկ ընկերութիւն	782
Ներսէսեան ընկերութիւն	783
Կրթասիրաց ընկերութիւն (1880—1895)	783
Գայեանեան խնամակալուհիներու ընկերութիւն	785
Ընթերցասիրաց սանուց ընկերութիւն	785
Կրթասիրաց երիտասարդաց ընկերութիւն	785
Ծիածան Մելիտինէի ընկերութիւն	786
Մալաթիոյ Կրթասիրաց ընկերութիւն	787
Կրթասիրաց ընկերութիւն	788
Մասեաց ընկերութիւն	789
Ընթերցասիրաց ընկերութիւն	790
Զմշուտ ընկերութիւն (1908)	790
. . . . . ընկերութիւն (1896—1898)	790
Բանասիրաց ընկերութիւն	791
Մանկական ընկերութիւն	791
Մելիտինէի միութիւն (1925)	792
Հայ Բարեգործական Ընդհանուր Միութիւն	793
Արամեան ընկերութիւն Հիւսնի Մանսուրի	794



Բարեգործական ընկերութիւն Հիւսնի Մանսուրի	Էջ
Ը. Լսարաններ	794
Կիրակնօրեայ լսարան	794
Թ. Մամուլ եւ տպագրութիւն	794
Մատենադարան	796
Թատրոն	798
	798

## Է. ՄԱՍ

### ՀԱՍԱՐԱԿԱԿԱՆ ԿԵԱՆՔ

Ա. Ազգային հաստատութեանց մատակարարութիւն	800
Բ. Կարօտեալներու հոգածութիւն	806
Գ. Կուսակցական պայքարներ	812

## Ը. ՄԱՍ

### ՔԱՂԱՔԱԿԱՆ ԿԵԱՆՔ

Ա. Մալաթիոյ մէջ Հայ եւ Թուրք յարաբերութիւնները մինչեւ ԺԹ. դարուն կէսերը	818
Բ. Հայ եւ Թուրք յարաբերութեանց վատթարացումը	828
Գ. Հայերու անբաղձալի վիճակը եւ ազդեցիկ Հայերու կատարած դերը	836
Դ. Պերլինի վեհաժողովին ձախող արդիւնքը եւ Հայ յեղափոխական կուսակցութեանց կազմութիւնը	851
Ե. Հարստահարութիւններ Մալաթիոյ եւ շրջակայից մէջ	856
Զ. Յեղափոխական կուսակցութիւններու գործունէութիւնը Մալաթիոյ մէջ	862
Է. Մալաթիոյ 1895-ի ջարդը եւ Հայոց ինքնապաշտպանութիւնը 1895-ի ՄԱԼԱԹԻՈՅ ԿՈՏՈՐԱԾԸ, ԳՐԷՅ՝ ԽՈՍՐՈՎ ՊՈՆԱՓԱՐԹԵԱՆ	881
Ծանօթութիւններ	885
Ը. 1915-ի Հայաջինջ աղէտը	894
Թ. Մալաթիոյ Հայոց ջարդը եւ տարագրութիւնը	912
Ժ. Տարագրութենէն ետք Մալաթիոյ Հայ բեկորները	928
	958

## Թ. ՄԱՍ

### ՏՆՏԵՍԱԿԱՆ ԿԵԱՆՔ

Ա. Մալաթիա իբր առեւտրական կեդրոն	970
Բ. Մալաթիոյ տնտեսական կեանքին մէջ Հայոց դերը	985



	ԷԳ
Տնտեսական վիճակ (արհեստ եւ վաճառականութիւն)	986
Արտածութիւն եւ ներածութիւն	987
Հեռաւորութիւն շրջակայ ֆազաֆներու	987
Արտածութիւն	987
Ներածութիւն	988
Նիւթական վիճակ եւ կացութիւն	989
Գ. Տնտեսական պայքար Հայոց դէմ	991
Դ. Հողային արդիւնաբերութեանց մէջ Հայերու դերը	997
Ե. Հայոց վաճառականութիւնը	999
Զ. Հայ ֆարտաբարութատականները	1002
Է. Հայ արհեստաւորները	1004
Ը. Արհեստակցական միութիւններ	1008
Թ. Ներկայ Մալաթիոյ տնտեսական կեանքը	1019

## Ժ. ՄԱՍ

### ԱԶԳԱԳՐՈՒԹԻՒՆ ՄԱԼԱԹԻՈՅ

Ա. Մալաթիացիներ	1023
Բ. Մալաթիոյ Հայոց լեզուն	1027
Ուրուագիծ կամ ֆերականութիւն	1033
Գործածական դերանուններ	1035
Բայ	1035
Ածանցմունք եւ բարդութիւնք	1036
Բառարան Մալաթիոյ գաւառաբարբառին	1038
Մանկական լեզու	1091
Արկօդեան բարբառ	1092
Հայերէնէ փոխառեալ բառեր բուրբերէնի մէջ	1093
Գ. Նիստ ու կաց	
ա. Տուն տեղ	1097
բ. Հագուստ կապուստ	1099
գ. Ուտելիք խմելիք	1103
Քանի մը միջոցներու եւ քաղցուէնիներու պատրաստութիւնը	1104
Դ. Ընտանիք	
ա. Տունը	1106
բ. Ընտանեկան անդամներու հեղինակութիւնը եւ փոխադարձ յարաբերութիւնները	1107
գ. Փոքրերու խնամածութիւնը եւ դաստիարակութիւնը	1108
դ. Ընտանեկան գուարճութիւններ	1110



Պ. Սովորոյթներ

ա. Ամուսնական սովորութիւններ 1110

բ. Հարսանիք 1114

Տասն եւ հինգ 1120

Մէրէնց տունը լաթ հագցնելու ատեն 1121

Աղջկան բերնէն 1122

գ. Ծնունդ եւ մկրտութիւն 1123

դ. Մահուան եւ յուղարկաւորութեան սովորութիւններ 1127

Ջ. Ժողովրդային բժշկութիւն

(Հիւանդութիւններ եւ ժողովրդային դեղեր) 1129

Է. Հաւատք

ա. Քրիստոնէական հաւատքի բնութեամբ 1131

բ. Կրօնական պարտականութիւններ եւ տօնակատարութիւններ 1135

գ. Պառաւաշունչ (նախապաշարումներ եւ  
աւելորդապաշտութիւններ) 1148

ԺԱ. ՄԱՍ

ԺՈՂՈՎՐԴԱԿԱՆ ԲԱՆԱՀԻՒՍՈՒԹԻՒՆ

Ա. Հաւաքական ստեղծագործութիւն 1152

ՀԱՒԱՔԱԿԱՆ ՍՏԵՂԾԱԳՈՐԾՈՒԹԵԱՆ ԱՏԱՂՁՆԵՐԸ

ա. Առակներ 1156

Էջ, եղ եւ մշակ 1157

բ. Առածներ կամ ասացումներ 1160

գ. Հանելուկներ 1181

դ. Մանրավէպեր 1182

Զորս խուլերը 1183

Անսուրական մանրավէպեր 1187

Անէծքներ 1189

Երդումներ 1191

Օրհնութիւնք 1192

Բարեւել եւ ուրիշ բարեմաղթութիւններ 1193

Աղօթքներ 1194

Օրօրներ 1197

Մանկական երգեր 1199

Սիրահարական երգեր 1201

Եղերերգ 1202

Վիճակներ 1203



Անհատական ստեղծագործութիւններ  
Աշուղներ

էջ  
1206  
1207

ԺԲ. ՄԱՍ

ՀԱՅ ԳՐԶԱԳԻՐՆԵՐ

1209

ԺԳ. ՄԱՍ

ՄԱԼԱԹԻՈՅ

ՀԱՅ ՀԱՍԱՐԱԿԱԿԱՆ ԴԵՄՔԵՐԸ

1235

Եկեղեցականներ

1236

Կառավարական պաշտօնեայք

1239

Հայ առաջականներ, արհեստաւորներ, մտաւորականներ եւ  
կուսակցական գործիչներ

1243

Հայ բժիշկներ

1248

Դեղագործներ

1252

Եփրատ գոլէն (շրջանաւարտներ)

1253

Սանասարեան վարժարանի Մալաթիացի շրջանաւարտները

1255

Խարբերդի փրանսական գոլէնի Մալաթիացի շրջանաւարտները

1256

Այնթապի Ամերիկեան գոլէնէն շրջանաւարտ Մալաթիացի

1256

Վենետիկ Ռափայէլեան վարժարանէն շրջանաւարտ Մալաթիացի

1256

ԺԴ. ՄԱՍ

ՄԱԼԱԹԻԱՅԻՔ ՄԱԼԱԹԻԱՅԷ ԴՈՒՐՍ

Ընդհանուր ծանօթութիւն

1257

Պետական պաշտօնատարներ

1264

Էրմէնի Սիւլէյման փաշա

1264

Եկեղեցականներ

1267

ա. Հայ Առաքելական եկեղեցիի պատկանողներ

1267

բ. Հայ Կաթողիկէ նուիրապետութեան պատկանողներ

1269

Մտաւորականներ եւ արուեստագէտներ

1270

Հասարակական դէմքեր

1278



## ՅԻՍՆԱՄԵԱՅ ՊԱՏՄՈՒԹԻՒՆ

### ՄԱԼԱԹԻՈՅ ԿՐԹԱՍԻՐԱՅ ԸՆԿԵՐՈՒԹԵԱՆ

Աշխատասիրեց՝ ԻՍՐԱՅԷԼ ՏԷՐ ՅՈՎՀԱՆՆԷՍԵԱՆ	1283
Զօն	1285
ՍԿԶԲՆԱԿԱՆ ՇՐՋԱՆ	1287
Մալաթիացիները Ամերիկայի մէջ	1290
Յանկ 1895-էն առաջ Ամերիկա եկող մալաթիացիներու եւ Մալաթիա վերադարձող եւ հոն մեռնող կամ գոհ եղողները	1294
ԵՐԿՐՈՐԴ ՇՐՋԱՆ	1298
Մալաթիոյ Կրթասիրաց Ընկերութիւնը	1299
Ընկերութեան կազմութեան պարագաները եւ ունեցած գործունէութիւնը	1302
Առաջին Պատգամաւորական ժողով	1310
Երկրորդ Պատգամաւորական ժողով	1312
Երրորդ Պատգամաւորական ժողով	1313
Զորրորդ Պատգամաւորական ժողով	1315
ԵՐՐՈՐԴ ՇՐՋԱՆ	1317
Հինգերորդ Պատգամաւորական ժողով	1318
Վեցերորդ Պատգամաւորական ժողով	1319
Եօթներորդ Պատգամաւորական ժողով	1320
Ութերորդ Պատգամաւորական ժողով	1322
Իններորդ Պատգամաւորական ժողով	1323
Տասներորդ Պատգամաւորական ժողով	1324
Տասնեւեկերորդ Պատգամաւորական ժողով	1325
Տասներկուերորդ Պատգամաւորական ժողով	1330
Տասներեքերորդ Պատգամաւորական ժողով	1332
Տասնչորրորդ Պատգամաւորական ժողով	1337
Տասնհինգերորդ Պատգամաւորական ժողով	1339
Տասնվեցերորդ Պատգամաւորական ժողով	1340
Տասնեօթներորդ Պատգամաւորական ժողով	1342
Տասնութերորդ Պատգամաւորական ժողով	1344
Տասնիններորդ Պատգամաւորական ժողով	1345
Քսաներորդ Պատգամաւորական ժողով	1346
ԶՈՐՐՈՐԴ ՇՐՋԱՆ	1383
Քսանւեկերորդ Պատգամաւորական ժողով	1383
Քսաներկուերորդ Պատգամաւորական ժողով	1355
Քսաներեքերորդ Պատգամաւորական ժողով	1357



Քսանչորրորդ Պատգամաւորական ժողով	1360
Քսանհինգերորդ Պատգամաւորական ժողով	1362
Քսանվեցերորդ Պատգամաւորական ժողով	1365
Քսանեօթներորդ Պատգամաւորական ժողով	1367
Քսանութերորդ Պատգամաւորական ժողով	1368
Քսանիններորդ Պատգամաւորական ժողով	1371
Երեսուներորդ Պատգամաւորական ժողով	1373
Երեսունմէկերորդ Պատգամաւորական ժողով	1376
Երեսուներկուերորդ Պատգամաւորական ժողով	1378
Երեսուներեֆերորդ Պատգամաւորական ժողով	1381
Երեսունչորրորդ Պատգամաւորական ժողով	1383
Երեսունհինգերորդ Պատգամաւորական ժողով	1385
Երեսունվեցերորդ Պատգամաւորական ժողով	1386
Երեսունեօթներորդ Պատգամաւորական ժողով	1388
Երեսունութերորդ Պատգամաւորական ժողով	1389
Երեսունիններորդ Պատգամաւորական ժողով	1390
Քառասուներորդ Պատգամաւորական ժողով	1391
Քառասունմէկերորդ Պատգամաւորական ժողով	1392
Քառասուներկուերորդ Պատգամաւորական ժողով	1394
Քառասուներեֆերորդ Պատգամաւորական ժողով	1396
Քառասունչորսերորդ Պատգամաւորական ժողով	1398
Քառասունհինգերորդ Պատգամաւորական ժողով	1400
Քառասունվեցերորդ Պատգամաւորական ժողով	1401
Քառասունեօթներորդ Պատգամաւորական ժողով	1404
Քառասունութերորդ Պատգամաւորական ժողով	1406
Քառասունիններորդ Պատգամաւորական ժողով	1408
Յիսուներորդ Պատգամաւորական ժողով	1410
Յիսունմէկերորդ Պատգամաւորական ժողով	1414
Յիսուներկուերորդ Պատգամաւորական ժողով	1417
Յիսուներեֆերորդ Պատգամաւորական ժողով	1420
Յիսունչորսերորդ Պատգամաւորական ժողով	1424
Յիսունհինգերորդ Պատգամաւորական ժողով	1430
<b>ՀԱՇՈՒԵՏՈՒՈՒԹԻՒՆ</b>	1437
«ՆՈՐ ՄԱԼԱԹԻԱ» Պարբերաթերթը	1441
<b>ՄԱՍՆԱՃԻՒԴԵՐՈՒ ՊԱՏՄՈՒԹԻՒՆ</b>	1443
Նիւ Եորքի մասնաճիւղ	1445
Ֆիլատելֆիոյ մասնաճիւղ	1448



Ուստրի մասնանիւղ	1454
Քլիվլենտի մասնանիւղ	1458
Պոսթոնի մասնանիւղ	1464
Փրաւիտենսի մասնանիւղ	1468
Ֆրենկլինի մասնանիւղ	1471
Նորթ Աթլպորոյի մասնանիւղ	1472
Վոֆէկընի եւ Շիֆակոյի մասնանիւղերը	1472
Կրանիթ Սիթիի մասնանիւղ	1475
Լոս Անճելէսի մասնանիւղ	1477
Տիթթոյիթի մասնանիւղ	1478
Ֆիչպուրկի մասնանիւղ	1480
Ֆրեզնոյի մասնանիւղ	1481
Պրաֆթընի մասնանիւղ	1482
Հէյվըրհիլի մասնանիւղ	1485
Լարենսի մասնանիւղ	1485
Նիւպրիփորթի մասնանիւղ	1485
Լովելի մասնանիւղ	1485
Հաւանայի (Քուպա) մասնանիւղ	1486
ՖՐԱՆՍԱՅԻ ՇՐՋԱՆԻ ՄԱՍՆԱՃԻԻՂԵՐԸ	1490
Լիոնի մասնանիւղ	1491
Ռոմանի մասնանիւղ	1497
Վալանսի մասնանիւղ	1500
Սէն Շամոնի մասնանիւղ	1504
Պէյրուի մասնանիւղ	1514
Հալէպի մասնանիւղ	1517
Շնորհակալութեան եւ գնահատանքի քանի մը խօսք	1527
Յանկ նկարներու	1531





EDUCATIONAL SOCIETY OF MALAYA

HISTORY

OF THE ARABIAN IN MALAYA



13-86

h-813





ՄԱԼԱԹԻՈՅ  
ԿՐԹԱՍԻՐԱՅ ԸՆԿԵՐՈՒԹԻՒՆԸ

ԱՅՍ ՊԱՏՄԱԳԻՐՔԸ  
Կ'ԸՆԾԱՅԷ


ՄԱԼԱԹԻՈՅ  
ՆԱՀԱՏԱԿԵԱԼ ՀԱՅՈՒԹԵԱՆ  
ՅԻՇԱՏԱԿԻՆ



Պ Ա Տ Մ ՈՒԹԻՒՆ

Մ Ա Լ ԱԹԻՈՅ ՀԱՅՈՅ





## Յ Ա Ռ Ա Զ Ա Բ Ա Ն

---

Մալաթիոյ Հայոց Պատմութիւնը պատրաստելու համար որոշում տրուեցաւ 1952 թուին, Մալաթիոյ Կրթասիրաց Ընկերութեան Բառասունիններորդ Պատգամաւորական Ժողովին մէջ, գումարուած՝ Նիւ Եորք (տեսնել ներկայ Պատմագիրքիս մէջ էջ 1409)։

Պատմութեան Եանձնախումբի անդամներ ընտրուեցան ԽՈՍՐՈՎ ՊՈՆԱՓԱՐԹԵԱՆ, ՏԻԿ. ՎԱՐԴԱՆՈՅՇ ՓԱՊՈԻԺԵԼՆ եւ հանգուցեալ ԲԵՆԻԱՄԻՆ ԽԱԶԱՏՈՒՐԵԱՆ։

Պատգամաւորական Ժողովը լրանալէն քանի մը շաբաթ ետք, Մալաթիոյ պատմութեան ծրագրին պատրաստութեան համար, Կեդրոնական Վարչութիւնը՝ մասնակցութեամբ Պատմութեան Եանձնախումբին՝ ժողով գումարեց Նիւ Եորք, ուր հրաւիրուած էր նաեւ նախկին առաջնորդ Տիրան Արքեպս. Ներսոյեան, որուն ջանքերուն շնորհիւ ստացանք Կարապետ քահանայ Պէննէեանի «Մալաթիոյ Պատմութեան» ձեռագիրը, որմէ հեղինակը մեծապէս օգտուեցաւ։ Տիրան Արքեպիսկոպոսի միշտ երախտապարտ պիտի մնանք մեր Պատմագիրքի հրատարակութեան իր տուած գնահատելի օգտակար թելադրութիւններուն համար։

Նոյեմբերի 2, 1952-ին Կեդր. Վարչութիւնը՝ մասնակցութեամբ Պատմութեան Եանձնախումբին, կրկին ժողով գումարեց Նիւ Եորք։ Սոյն ժողովին մէջ որոշուեցաւ Մալա-



Թիոյ պատմութիւնը պատրաստելու աշխատութիւնը յանձնել հանրաժանօթ քանասէր եւ պատմաբան Պրն. Արշակ Ալպոյաճեանի (Գահիրէ), որ նման գործերու համար ծեռնհասութիւն եւ փորձառութիւն ունի:

Պրն. Ալպոյաճեան հակառակ իր յառաջացեալ տարիքին, ութ երկար տարիներու տքնաջան աշխատութեամբ եւ գնահատելի զոհողութեամբ պատրաստեց Մալաթիոյ Հայոց անցեալ եւ ներկայ պատմութիւնը:

Կասկած չունինք որ իր այս կոթողական երկասիրութիւնը անսպառ գանձարան վը պիտի ըլլայ ապագայ պատմաբաններու եւ պիտի ճոխացնէ Հայոց պատմութիւնը:

Մեր սրտագին գնահատութիւնը կ'ուզենք յայտնել քոլոր անոնց, որոնք իրենց տեղեկութիւններով եւ գրութիւններով մասնակցութիւն քերին եւ պատմութեանս էջերը ճոխացուցին եւ օգտակար եղան Հեղինակին, որ օգտուեցաւ անոնցմէ իբր աղբիւր:

Մեր յարգանքը եւ ջերմ գնահատութիւնը կը յայտնենք նոյնպէս հանգուցեալ հանրաժանօթ պատմաբան Վերեղիա Բասունիի, որ իր կարելոր քաժինը քերաւ պատրաստելով Մալաթիոյ հնախօսականն ու պատմականը Բարային շրջանէն մինչեւ Իսլամական գրաւումը, 90 էջերէ քաղկացեալ պատմական արժեքաւոր աշխատութեամբ մը (տես ներկայ Պատմագիրքիս մէջ, էջ 85—175): Կ'ուզենք նաեւ յիշատակել Կրթասիրացի վեթերան անդամներէն հանգուցեալ Իսրայէլ Տէր Յովհաննէսեանը, որ գրի առաւ Մալաթիոյ Կրթասիրաց Ընկերութեան 50 տարուան պատմութիւնը:

Մալաթիոյ Կրթասիրաց Ընկերութիւնը աւելի քան կէս դարէ ի վեր ծանօթ է հայ հասարակութեան իր ազգային, քարեսիրական, կրթական եւ հայրենասիրական գործունէութեամբ եւ մանաւանդ վերածնող Մայր Հայրենիքի վերաշինութեան եւ վերելքին քերած իր համեստ քաժինով՝ Նոր Մալաթիոյ հիմնարկութեամբ:

Պատմական Մելիտինէի, Մալաթիոյ պատմութեան հրատարակութիւնը եւս թող յաւերժական յիշատակարան մը



ըլլայ ի փառս Մալաթիոյ Կրթասիրաց Ընկերութեան, անոր  
գոհաբերող անդամներուն եւ քոլոր մեր հայրենակիցներուն,  
որոնցմէ շատեր մեզմէ յաւիտենապէս բաժնուած են:

Այս աշխատութիւնն կը կանգնենք իբրեւ յիշատակի  
կոթող Մալաթիոյ հին ու նոր հայ նահատակներուն, որոնք  
իրենց արեան գնով պաշտպանեցին Հայոց Եկեղեցին, Հայ-  
րենիքը եւ Մշակոյթը, եւ ծակատազրական պահերուն՝ դի-  
ցազնաբար գիտցան կոուիլ եւ նահատակուիլ:

ՄԱԼԱԹԻՈՅ ԿՐԹԱՍԻՐԱՅ  
ԸՆԿԵՐՈՒԹԵԱՆ  
ԿԵԴՐՈՆԱԿԱՆ ՎԱՐՉՈՒԹԻԻՆ










« ՄԱԼԱԹԻՈՅ ՀԱՅՈՑ ՊԱՏՄՈՒԹԵԱՆ »  
ՅԱՆՁՆԱԽՈՒՄԻ ԱՆԴԱՄՆԵՐ

**ԽՈՍՐՈՎ ՊՈՆԱՓԱՐԹԵԱՆ**  
**ՏԻԿ. ՎԱՐԴԱՆՈՅՇ ՓԱՊՈՒՃԵԱՆ**  
**+ ԲԵՆԻԱՄԻՆ ԽԱԶԱՏՈՒՐԵԱՆ**





Ա. ՄԱՍ

## ԱՇԽԱՐՀԱԳՐԱԿԱՆ ՏԵՂԵԿՈՒԹԻՒՆՆԵՐ

Ա.

### ՄԱԼԱԹԻԱ ԵՒ ՇՐՋԱԿԱՅՔԸ ԻԲՐԵՒ ԱՇԽԱՐՀԱՄԱՍ

Մալաթիա կը դոնուէր Կապադովկիոյ եւ Եփրատի աջ եզերքին միջեւ եւ հիւսիսային կողմը Կոմմադինէի եւ հիւսիս-արեւելեան կողմը Կատաւոնիոյ, թէեւ ոմանց կողմէ Հայաստանի աշխարհադրական սահմաններուն մէջ նկատուած է. սակայն ճիշդ չէ այս տեսութիւնը:

Հայաստանի արեւմտեան բնական սահմանը միշտ Եփրատը համարուած է, եւ անոր արեւմտեան կողմը տարածուող հողամասերը Հայաստանէն դուրս կը մնային:

Մալաթիա հին ատեն Կապադովկիոյ մաս կը կազմէր, առանց աշխարհադրական միութիւն մը կազմելու անոր հետ, իսկ յետոյ պահ մըն ալ համարուած է մաս Կոմմադինէի: Charles Texier կ'ըսէ թէ հիները դիտած էին որ Մալաթիոյ շրջակայքին կլիման կը տարբերէր Կապադովկիայէն, որ շատ բարձր լեռնադաշտ մըն է, մինչդեռ Եփրատի մեծ հովիտը Մալաթիոյ մօտերը 300 մեթրէն աւելի բարձր չէ ծովուն մակերեսէն (տես ASIE MI-NEURE, Description géographique, historique et archéologique des provinces et des villes de la Chersonèse d'Asie, 1882, p. 587):

Երբ Հռոմ տիրակալեց Փոքր Ասիոյ եւ հասաւ մինչեւ Եփրատի սահմանադրուիլը, Եփրատի արեւմտեան կողմը տարածուող հայարնակ բաւական ընդարձակ տարածութեամբ երկիրը ՓՈՔՐ ՀԱՅՔ անունը առաւ հակադրութեամբ Մեծ Հայաստանին եւ Հռոմի կողմէ բաժնուեցաւ երեք շրջանակներու՝ Առաջին, Երկրորդ եւ Երրորդ Հայք անուններով:



Ասոնցմէ երրորդին մայրաքաղաքն էր Մելիտինէ (Մելիտենի ալ կոչուած), որուն տեղին շատ մօտ է արդի ՄԱԼԱԹԻԱՆ, հարուստ եւ բազմամարդ կեդրոնը, որ հաստատուած էր Եփրատի արեւմտեան կողմը, անկէ երկու մղոն հեռու Մելաս դետին (Թողմա Սու) Եփրատի հետ միացման տեղին մօտ:

Երրորդ Հայքի մէջ կը գտնուէին նաեւ Սամոստիա կամ Սամոսատ, Քեսուն, Հիւսնի Մանսուր, Ռապան, Պեհեսնի եւ այլ քաղաքները:

Երրորդ Հայքը անփոփոխ եւ անբաժան չէ մնացած:

Անոր եփրատամերձ մասերը երբեմն կոչուած են Կումապինէ կամ Կումապ, որ հռոմէական գրաւման տակ առած է Եփրատացիք անունը: Թէ՛ Կումապինէ եւ թէ՛ Եփրատացիք անհաստատ սահմաններ ունեցած են եւ իրենց գլխաւոր քաղաքը Գերմանիկ կամ Մարաշն էր: Հոն կը գտնուէին նաեւ Այնթապ, Կարկառ, Կուրիս, Թլպաշար եւ այլն:

Այս երկրամասը տիրապետուած է շատ պետութիւններէ եւ ազգերէ եւ տեւական հաստատուն վիճակ մը չէ ունեցած, այլ չափազանց յարափոփոխ, մինչեւ որ Օսմանեան տիրապետութեան ենթարկուած է, եւ անոր վարչական զանազան բաժանումներու մաս կազմած:

## Բ.

### ԱՇԽԱՐՀԱԳՐԱԿԱՆ ԴԻՐՔ

Մալաթիա քաղաքը հիւսիսային լայնութեան  $38^{\circ} 32'$  եւ Կրինիէն գէպի արեւելք  $37^{\circ}$  միջօրէականին վրայ, ծովէն 2852 ոտք (իբր 684 մեթր) բարձր դաշտի մը կեդրոնը կը գտնուի, որ ունի ամէն ուղղութեամբ 60 մղոն (20 ժամ) տրամագիծ:

Հիւսիսէն՝ Սարը Զիչէք եւ Տերսիմ, արեւմուտքէն՝ Աղճատաղ, հարաւէն՝ Պէկտաղ<sup>1</sup> եւ արեւելքէն՝ Խարրերդի դաշտը զատող լեռները կ'ազդեն վէտ ի վէտ:

Այս հորիզոնը, ինչպէս Մկրտիչ Ս. Որբերեան (տես ԲԻԻՐԱԿՆ, 1900, էջ 68) կը նկարագրէ, «առանց բացառութեան զարդարուած է ցրդիի եւ կաղնիի ընդարձակ անտառներով եւ հազարումէկ անուշաբոյր ծաղիկներով, ո-

(1) Թուրքերը զայն կը կոչեն՝ Պէյ Տաղ: Ան մաս կը կազմէ Տաւրոս լեռնաշղթային (Ս. Մ. Ծոցիկեան, ԱՐԵՒՄՏԱՀԱՅ ԱՇԽԱՐՀ, Նիւ - Եորք, 1947, էջ 374):



րոնց մէջ ամէն կողմէ զլլալացող առուները, բզլացող մեղուները, թռչող թիթեռնիկներն ու սճլաացող միջատները կարծել կու տան ալցելուն թէ եղեմի դրախտը կը մտնէ» :

Ըստ Գէորգ Մելիտինեցիի (ՆԱԽՃԻՐՆԵՐ 1915-1918, Պոստոն, 1929, էջ 13-4), «միջին հաշուով ութը ժամ երկայնութեամբ ու լայնութեամբ տարածութիւն մը, օժտուած արդասարեւ հողով, ինքնարուխ ջուրի առատ հանքերով, բարձրաբերձ ու սաղարթախիտ ծառատաններով, չըջապատուած երեք կողմերէն երկնասլաց լեռներով եւ մէկ կողմէն ջուրով» կը կազմէ Մալաթիոյ համայնապատկերը, ուր քաղաքը կը ներկայանայ երեւութապէս տափարակ դիրքով, եւ կը նկատուի դաշտային քաղաք մը, վասնզի իր շուրջը ունի մեծ տարածութեամբ հարթավայր մը չըջապատուած հսկայ լեռներով (հմտ. նոյն) :

Մալաթիոյ տարածութիւնը, չըջակայքով միասին, 24 մղոն է արեւելքէն արեւմուտք եւ 18 մղոն հիւսիսէն հարաւ :

Այս կեդրոնական դիրք ունեցող քաղաքը գլխաւոր կեդրոնն է գաւառի մը, որ քաղաքին անունով կը կոչուի ՄԱԼԱԹԻԱ, եւ հաղիւ երեք տասնեակ տարի է որ կուսակալանիստ վայր մըն է, իսկ անկէ առաջ կը կազմէր միութեսարըֆութիւն մը, ստորադաս Մամուրէթ-իւլ-Աղիզի կուսակալութեան :

Այս կառավարչութիւնը կը գտնուէր էլ-Աղիզի կուսակալութեան հարաւ-արեւմտեան կողմը :

Պէննէեան Կարապետ քահանայ իր ընդարձակ ձեռագիր տեղադրութեան մէջ այս գաւառին սահմանները կը ներկայացնէ՝ արեւմուտքէն՝ Եփրատ գետը, հիւսիսէն՝ Մելաս (Թոյմա) գետը, հարաւ-արեւելքէն Աղճատաղի եւ Խալիքանի լեռները, հարաւէն Ասլտ-իւլ-Խարապի լճակը, հարաւ-արեւմուտքէն՝ Սիւրկիւ եւ Խարապ Շեհիր եւ արեւմուտքէն՝ Սուլթան Սուլտակը :

Մալաթիա, կեդրոնական գաւառը համանուն կուսակալութեան, առանձին առնելով չըջապատուած է կուսակալութեան հետեւեալ գաւառակներով .

1. Կապան Մատէն, որ հիւսիսային կողմն է .
2. Քեախթէ, որ հարաւ-արեւելեան կողմն է .
3. Հիւսնի Մանսուր, որ հարաւային կողմն է .
4. Պեհեանի, որ հարաւ-արեւմտեան կողմն է .
5. Աղճատաղ, որ արեւմտեան կողմն է :

Այս հինգ գաւառակները միանալով կը կազմեն Մալաթիոյ արդի կուսակալութիւնը, եւ կը ներկայացնեն գէթ արուեստական միութեամբ՝ վարչական բաժանում մը :



## Պ.

## ԵՐԿՐԱԲԱՆՈՒԹԻՒՆ

Մալաթիոյ շուրջի երկրամասը այն շրջաններէն մէկն է, որ հնագոյն եւ նախապատմական ժամանակամիջոցներէն սկսեալ բնակուած է մարդերէ :

Քաղաքին շուրջ գտնուող դաշտին զանազան կողմերը ցցուող բլուրներուն, ժայռերուն եւ կրաքարի ընդարձակ խաւերուն մէջ գտնուած ջրային ճճիներու եւ անասնիկներու բրածոները, ինչպէս նաեւ զանազան տեղեր դուրս բարձրացող կաւային ու աւաղային խաւերը խորհիլ կու տան թէ երբեմն, նախակենդանիներու դարաշրջանին, լիճ մըն էր Մալաթիոյ դաշտը եւ թերեւս Եփրատ ու Թոգմա այս ծովակին մէջ թափելով հարաւ-արեւելեան անկիւնէն կ'անցնէին ու կ'երթային (Մկրտիչ Ս. Որբերեան, ԲԻԻ-ՐԱԿՆ, 1900, էջ 70) :

Այս տեսութիւնը հաստատուած կը կարծէ Մկրտիչ Որբերեան (նոյն) երբ քաղաքէն 20 մղոն արեւելք՝ Իզմալի գետին եզերքը դալով, կը տեսնէ բլուրովին աւաղով ծածկուած դաշտը եւ քիչ մը վար լեռան կուրծքը, որուն ստորոտէն կ'երթայ գետը. իսկ խաւ-խաւ տիղմը եւ հեղեղատի քարերը 150 ոտք վարէն սահող գետը միայն բերած կրնայ ըլլալ : Հարկաւ այս բարձրութենէն երբ գետը կ'երթար, ետեւը դաշտին վրայ լճացած էր (նոյն) :

Որբերեան կը կարծէ թէ քաղաքին եւ շրջակայքի յատակը կրաքարերով խիստ կոտորտած խաւ մըն է եւ այս պատճառով է որ երկրաշարժի տակն անհաւաստալի երեւոյթներ առաջ եկած են :

Այսպէս 1893ին պատահած մեծ երկրաշարժին, քաղաքին բոլոր թաղերը միեւնոյն աղդեցութիւնը կրած չեն. տեղ մը տունները հիմնայատակ կործանած են, ուրիշ տեղ մը ճեղքեր միայն ունեցած են եւ ուրիշ տեղեր անվնաս մնացած են (նոյն) : Այսքան զարմանալի ալլաղանութեան պատճառը Որբերեան կը վերադրէ խաւին անհաւասար կոտորտումին :

Այս իրողութեան ապացոյց մըն է նաեւ ջուրի ակերու առատութիւնը, վասնզի խաւերը որքան ճեղքոտուած ըլլան, լեռներու աւաղանները այնքան աղբերակներ կ'ունենան :

Մալաթիոյ շրջակայ հոգերը ապահովարար ունեցած են փոփոխութիւններ հրաբուխներու հետեւանքով, որոնք սակայն շատ հին են : Այսօր Մալաթիոյ շուրջը ընդարձակ հրաբերաններ չկան : Որբերեան միայն Տէր Մեսիհի լեռան կատարը գոյութիւնը կը հաստատէ փոքր հրաբերանի մը, որ



գուրս նետած էր երկու դոյնով՝ կարմրորակ եւ ճերմկեկ լաւա, որմէ կը հայթայթէին կամարներու եւ դմբէթներու չեչաքարերը (ԲԻԻՐԱԿՆ, 1900, էջ 70) :

Կարապետ քահանայ Պէննէեան (Հ. 26) կը հաւատէ թէ Մալաթիոյ շրջակայ լեռներու մեծ մասը հանդիւած հրաբուխներ են, ինչպէս հին Մելիտինէի արեւելեան կողմը Մաղրապ բլուրը, Քիւնտիւպէկի լեռը, Փորղայի լեռները, Ասիրունարի լեռը, Ճանպէկի լեռը եւայլն :

## Գ.

# Լ Ե Ռ Ն Ա Գ Ր Ո Ւ Թ Ի Ի Ն

Մալաթիոյ դաւառը, ինչպէս Փոքր Ասիոյ մեծ մասը, լեռնային է՝ դաշտը, ուր քաղաքը կառուցուած է, շրջապատուած է լեռներով : Դաշտին հիւսիսային կողմը կը դանուին Սարը Զիչէկի եւ Տերսիմի լեռները, արեւմուտեան կողմը՝ Աղճատաղը, հարաւային կողմը Պէկտաղը, եւ արեւելեան կողմը՝ միաշար լեռնաշարք մը, որ Մալաթիոյ դաշտը ինքնուրուի դաշտէն կ'անջատէ (Որբերեան, ԲԻԻՐԱԿՆ, 1900) :

Պէննէեան քահանայ իր համառօտ տեղադրութեան մէջ (էջ 25) կը խօսի միայն Պէկտաղի լեռնաշղթային վրայ, որ իրրեւ Տաւրոսի մաս, հարաւարեւմուտքէն կ'երկարի հիւսիս-արեւելք :

Գաւառի լեռնադրութեան վրայ ամբողջական գաղափար մը տուած է Պէննէեան քահանան իր ընդարձակ տեղադրութեան մէջ (էջ 26-9) :

Անոր համաձայն «Մելիտինէի արդի քաղաքին ճիշդ թիկունքը եւ հարաւային կողմը բարձրադիր կանդնած է Տաւրոսի շղթաներէն Պէկտաղը, որ դէպի արեւելք ժամ մը երկարելով, Ս. Լուսաւորչի վանքի հանդիպակաց կողմը Ֆելասքինէ դաշտի հարաւային կողմէն երթալով, կը բարեւէ Աղճատաղը : Իսկ դէպի արեւելք նոյնպէս ժամ մը երկարելէ ետք, Տէր Մեսիհի գլուխէն սկսող Քեահքամալաք ձորակն ի վեր կ'երթայ եւ Ապտ-իւլ-Խարապ լճակին մօտ կ'ընդհատի :

Ուրիշ ճիւղ մը հարաւ-արեւմուտքէն Սուլթան Սուլի դաշտը իր առջեւ ունենալով կ'երկարի մինչեւ Սիւրկիւ, ուսկից ալ Քէօսքէն ըսուած լեռը ծայր առած արեւմուտքէն կու գայ եւ կը յանդի Աղնատաղի : Իսկ Աղճատաղ, սկըսեալ Փոլատի դաշտէն դէպի հիւսիս երկարելով եւ Մելասին ճամբայ մը տալէ ետք՝ կ'երթայ ու կը վերջանայ Հաֆիմխանի մէջ : Հաքիմխանէն ալ



(հիւսիսային կողմէն) Սարը Զիչէկի եւ Արդաւանի լեռները շարք-շարք կու գան եւ կ'ընդհատին Եփրատ գետի աջ եզերքը :

Եփրատի միւս կողմէն կը սկսի Ս. Արֆէն (Ահարոն) կամ Թրք. Ապտ-էլ Վահատի լեռը, որ մինչեւ Քէօմիւրիսան եւ դեռ անդին կը ձգուի : Ու Եփրատին մէկ եզերքէն (արեւմուտք) Իդոլուի եւ Խալիքանի լեռները կ'աղեղեն ու կու գան այն տեղը, ուր Պէկտաղը կը դիտէ գիրենք :

Մալաթիոյ հորիզոնը կազմող սոյն լեռնաշղանքը շրջադաշելու համար մարդ սկէտք է 10-12 օր անընդհատ քալէ : Որովհետեւ սոյն շրջանակը շատ ընդարձակ ըլլալով՝ իր մէջ կը պարունակէ ամէն կողմէն բարերեր ու արգաւանդ դաշտեր. արեւելեան դէն՝ Իդոլուի, Գրաճի, Զիֆթիկի եւ Տիւլ-տիլուի դաշտերը, հիւսիսային կողմը՝ մինչեւ Թոգմա, կեդրոնին՝ հին քաղաքի, Ճուտասի, Խաթուն Սուի եւ այլ դաշտերը եւ Մելասէն անդին ալ Եփրատէն մինչեւ Աղճատաղ տարածուած է տափարակ Եագըլը խան անուն դաշտը : Արեւմուտքէն Արդաշի, Էօրէնի, Պալիանի, Զիֆթիկի, Էլեմենդիկի եւ Զէրֆէգ Եագըսի ըստած դաշտերն ու Հաճի Ապտի, Սիւլիւկի եւ Հարիճի դառններու ընդարձակ արտերն են :

Մալաթիոյ լեռները Անդի-Տաւրոսի շղթային մաս կը կազմեն : Աղճատաղի մէկ ծայրը կը հասնի Մարաշ՝ կեաւուր տալ անունը ստանալով :

Ըստ Սրուանձտեանցի (ԹՈՐՈՍ ԱՂԲԱՐ, Ա., էջ 321) Աղճատաղը ճիշդ նոյն Սեւ լեռներն են, որոնք Սուրբ Լերիմի ալ կոչուած են, եւ ինչպէս յայտնի է, աստէն մը լի էին ասորի, յոյն եւ հայ միանձանց վանքերով :

Ե.

## ՋՐԱԳՐՈՒԹԻՒՆ

Լեռներու առատութիւնը ջուրերու առատութեան պատճառ մըն է :

Հետեւաբար Մալաթիա եւ շրջակայքը ջրաշատ երկիր մը եղած է :

Իր ջրադրութեան խարիսխը կը կազմէ Եփրատը, որ Մալաթիոյ դաշտին հիւսիս-արեւելեան անկիւնէն կը մտնէ այս դաշտը եւ օճանման կը սահի եւ արեւելքի լեռնաշղթային քղանցքէն կ'իջնէ դէպի հարաւ-արեւելեան անկիւնը (համա. Որբերեան, անդ) :

«Այս մայր ջուրի երակին կը միանայ Աղճատաղի մէջտեղէն անցնող ջուրի երկր մը, որ դէպի արեւելք Եփրատի մէջ կը թափի եւ դաշտը երկուքի կը բաժնէ :



Այս օժանդակ գետը Թոխմա<sup>1</sup> գետն է, որ Տարենտէի եւ Կիւրինի կողմերէն բխելով կու գայ միանալ Եփրատին:

Հիւսիս-արեւմտեան անկիւնէն կու գայ աւելի նեղ գետ մը, որ Թոխմայի բերնին չմօտեցած՝ կը միանայ Եփրատի: Աս ալ Գուրու Չայն է, որ Հեքիմ Խանի քովերէն կը բխի, թէեւ ամառը երբեմն բոլորովին կը ցամքի:

Դաշտին հարաւային մասը՝ դէպի Թոխման վայրահակ ըլլալով, բոլոր ջուրերը կը թափին իր մէջը: Այսպէս, հարաւային լեռներէն դէպի Թոխման, արեւմուտքէն սկսեալ յաջորդաբար եւ հաւասար հեռաւորութեամբ, Սուլթան Սուլի, Էլեմենդիկի, Պէյլէր Տէրէսի, Խաթուն Սուլի եւ Փունար Պաշիի գետակները:

Պէյլէր Տէրէսի եւ Փունար Պաշիի մէջտեղ, ճիշդ լեռան քղանցքին վրայ կը գտնուի Մալաթիա քաղաքը:

Էլեմենդիկէն մինչեւ Աղճատաղի մօտ Սուլթան Համիտ ունէր ագարակ մը, որուն մէջտեղէն կ'անցնէր Սուլթան Սուն: Ասոր ճիշդ դիմացը՝ Աղճատաղի ստորոտը կը գտնուէր Արղա, որ Աղճատաղի գաղային կեդրոնն է:

Թոխմայի եւ Եփրատի միացած տեղէն դէպի հարաւ-արեւմուտք, գեոքաղաքին չմօտեցած՝ կը տեսնուի սլարիսպ մը, որ հին քաղաքին տեղը ցոյց կու տայ» (Որբերեան, անդ):

Որբերեանի այս շատ հպանցիկ տողերը բաւարար չեն գաղափար մը տալու համար թէ որքան ջրառատ հովիտ ունէին Մալաթիան եւ իր շրջակայ գաւառները:

Գ. Մելիտինեցի իր ՆԱԽՃԻՐՆԵՐ (1915-1918) գիրքին մէջ բաւական ընդարձակ հատուած մը յատկացուցած է Մալաթիոյ ջուրերուն (էջ 18-22), աւելի յստակ ու պարզ ձեւով մը, որ աւելի դիւրամբօնելի է կարծես: Հետեւաբար զայն իր ամբողջութեամբ կ'արտագրեմ այստեղ. —

«Մալաթիոյ ամենէն կարեւոր ջուրի հոսանքը, զոր կարելի էր օգտադործել, Եփրատ գետն է, որ միջին հաշուով ութ ժամ հեռաւորութեամբ իր արեւելեան սահմանը կը գծէ, բաժնելով Մալաթիան Խարբերդէն, եւ սակայն ոռոգման տեսակէտէն որեւէ օգտակարութիւն չունի, եւ չի ալ կրնար ունենալ, քանի որ տիրողը թուրքն է: Ատելութենէ չի բխիր այս կարծիքը: Իրականութիւն է, անողոք փաստ, որ թուրք տիրապետութեան վեց հարիւր տարիներու շրջանին Եփրատէն առուակ մը իսկ վերցուած չէ, գէթ իր անմիջական եղերքը ոռոգելու համար:

Երկրորդ կարեւոր ջուրի հոսանքը Թոխմա գետակն է, որ կը բխի Ալպիստանի քարուտ կողերէն, կը հոսի քաղաքի հիւսիսային կողմէն, մինչեւ երեք ժամ հեռաւորութեամբ: Այս գետակը ղիկզակ պտոյտներով հետ-

(1) Հիներու Մեւա կամ Մեւա գետը:



զհետէ իր մէջ կ'առնէ Սուլթան Սուլի եւ այլ կարեւոր առուներ, ու կը միանայ Եփրատին, Գորան գիւղէն դրեթէ կէս ժամ հեռաւորութեամբ: Թոխմա գետակը Եփրատի կարեւոր ճիւղերէն է. աշխարհադրութեան մէջ կը յիշուի որպէս Ալիս:

Տերմեսի, զոր իր կարգին կարելի է կոչել գետակ, կը բխի քաղաքին հարաւ-արեւմտեան կողմը պարսպող Պէկտաղիի հեռաւոր եւ ասպառաժուտ կողերէն. փոքր տարածութեան մը մէջ եւ եռացող հազարաւոր ակերու միացումով կ'առատանայ ու կը բաժնուի երկուքի: Առաջինը կ'ոռոգէ Վարի Պանագիի, Զըրմըգտիի, Պարդուզիի եւ այլ զանազան տեղերու մշակելի հողերը եւ կը միանայ Սուլթան Սուլին, ապա կը թափի Թոխմայի մէջ: Երկրորդը գիրքի բարձրութեան առաւելութեամբ, կ'ոռոգէ Քիւնտիւպէկի, Վերի Պանագիի, Թեթտէի, Ատափիի, Զեֆնիւկէի դաշտադէտիններն ու ծառաստանները, ապա բաղմաթիւ մանր երակներ հոսեցնելով քաղաքին մէջ, կը շարունակէ իր գնացքը Գարնակի առջեւէն ոլորուելով դէպի հիւսիս, դէպի Հիւսէին Պէկ, Քէօրփէ Սու, Ճինկեցիլիֆ, Կամուրջ Բերան, Ալմա Սու, Վարի Քաղաք, ու կը միանայ Թոխմային<sup>1</sup>: Քաղաքին մէջ տարածուող բաղմաթիւ երակներ, կատարելով իրենց դերազանցապէս մաքրութեան գերը, հետզհետէ կը միանան ու դուրս հոսելով կ'ոռոգեն քաղաքի ծայրամասերը:

Հին թէ նոր ատենները Մալաթիոյ համեմատական բարդաւաճման մէջ Տերմեսիի ջուրին բացառիկ կարեւորութիւնը ըմբռնելու համար կարելի է նմանցնել դայն կենդանական օրգանիզմի ակնադրիւրը եղող սրտին, ուրկէ արիւնը կը բխի, եւ հազարաւոր երակներու միջոցով կեանք ու կենդանութիւն կը ճամբէ մարմնին բոլոր մասերուն: Ապա, հաւաքելով անմաքուր տարրերը, կը վերադառնայ կեդրոն. միակ սա տարրերութեամբ, որ մինչ Տերմեսիի կեդրոնախոյս է, սիրտը՝ կեդրոնաձիգ: Առաջինը անսպառ է ու անվերադարձ, երկրորդը սահմանափակ է եւ կը վերադառնայ կեդրոն, դարձեալ շարունակելու համար իր ընթացքը: Տերմեսի ջուրը բնութեան շնորհած դերադոյն բարիքն է, կենսարաշխ աղբիւրը բնակչութեան բոլոր խաւերուն անխտիր: Մալաթիան անոր կը պարտի դերազանցապէս բուսական կեդրոն մը, կանաչի աւազան մը լինելու իր առաւելութիւնը: Եթէ փոխուի տիրող իշխանութիւնը եւ Տերմեսիի ջուրը օժտուի ջրարաշխական արդիական առաւելութիւններով, Մալաթիան կը դառնայ նոյն ինքն «Երկիր դրախտայի»:

Դարձեալ պէտք է յիշել Վերի եւ Վարի Պապուխտիներու Ջուրը, որ կը բխի քաղաքի հիւսիսային կողմը տարածուող այգեստաններու մէջէն: Այս ջուրերը ոռոգելով բաւականին կարեւոր թիւով դաշտադէտիններ՝ մասնաւորապէս ձմեռները կը միանան այլ առուներու եւ կը թափին Թոխմայի

(1) Ամառուան երեք ամիսներուն, առատ ոռոգումներու պատճառով ջուրերը կը նուազին ու կը ցամքին դեռ չհասած Թոխմային:



մէջ: Զոյգ Պապուխտիները իրենց բնական դիրքի գեղեցկութեամբ, կանաչազարդ պարտէզներու առաւելութեամբ, ամառները կ'ունենան մեծ թիւով այցելուներ, որոնք քաղաքի տաքէն ու տոթէն փախստական՝ կ'ապաստանին սաղարթախիտ ծառաստաններու զով հովանիին տակ գլխացոյ առուակներու եզերքը:

Գառնակ. այս ջուրը կը բխի քաղաքի հարաւ-արեւելեան կողմը բարձրացող լեռներու ստորոտէն, ջրաղաց մը դարձնելու առատութեամբ. կը հոսի միայն չորս ամիս (Ապրիլ, Մայիս, Յունիս եւ Յուլիս) ու կը ցամքի: Գառնակի ջուրի առատութիւնը (եւ ժամանակի փոքրիկ տարբերութիւնը) սերտիւ կ'ապուած է լեռներու ձիւնի քանակէն, որուն հետ ուղիղ համեմատութեամբ կ'աւելնայ ու կը սլակսի:

Ինտերէի ջուր. կը բխի նոյնանուն լեռներու մէջէն. ժամանակի տեւողութեան ընթացքին բուն ակը խորացած է լեռան կողին մէջ, կազմելով խոռոչ մը (մուղարա) հինգ ոտք խորութեամբ. այցելուներ երբ երթան խոռոչի խորը, յատկօրէն կը լսեն խորարմատ ապառաժներու մէջէն ջուրի ձայնական ու հնչեղ զլլուումը, եւ իրենց վիզերուն կը զգան վերի ապառաժներէն ծորացոյ ջուրի սառ կաթիլները: Ինտերէի ջուրէն քիչ մը դէպի արեւելք բարձրացող սէգ ապառաժներու մէջ է նաեւ Մազէ Կամուրջ կոչուած աւանդատեղին, ուր կը պատմուի թէ Գրիգոր Լուսաւորիչ ապաստանած է իր հալածական շրջանին: Մեծ պատերազմի ընթացքին ձրի հայ գործաւորներու եւ արհեստաւորներու ծով քրտինքով թուրք կառավարութիւնը Ինտերէի ջուրը հողաչէն լայն խողովակներու մէջ առնելով բերաւ մինչեւ քաղաքի դօրանոցին առջեւ:

Փունար Պաշիի ջուրը կը բխի քաղաքի հարաւ-արեւելեան լեռներու ստորոտէն. հինգ վայրկեանի տարածութեան մէջ բազմաթիւ ակերու միացումով կը վերածուի փոքր գետակի մը, ոռոգելով Օրտուղուի, Վարի Քաղաքի եւ ստորին Պորանի որոշ մասերը եւ կ'երթայ կը միանայ Եփրատի: Խորաքա կը բխի քաղաքին հարաւային կողմը բարձրացող Պէկտաղի հեռաւոր լեռնագօտիներէն. կ'ոռոգէ Վերի Պանաղիի եւ Գառնակի որոշ մասերը ու ամառ ժամանակ կը սպառի: Այս ջուրը ձմեռները երկու-երեք ճիւղերու բաժնուելով կը միանայ Տերմեսիին: Խորաթայի ջուրը աւելի կարեւոր է որակով, քան քանակով. թեթեւ է ու խիստ առողջարար, համաձայն բժիշկներու եւ քիմիագէտներու վկայութեանց:

Վերեւ յիշուած գլխաւոր ջուրերէն զատ, Մալաթիան հարուստ է նաեւ հազարաւոր աղբիւրներով ու երկրորդական առուներով, որոնք տունէ տուն ամբողջ քաղաքը կ'ակօսեն, ոռոգելով տնական պարտէզներն ու այգիները: Մալաթիոյ ջրաղացքները, բոլորն ալ անխտիր, կը դառնան վերոյիշեալ ջուրերով»:

Այս ամփոփ նկարագրութենէն ետք, հարկ կը համարեմ ներկայացնել նաեւ Կարապետ քահանայ Պեննէեանի Մալաթիոյ ջրագրութեան վրայ տուած



ընդարձակ տեղեկութիւնները, որոնք իր ձեռագիր ընդարձակ տեղագրութեան մէջ կը գրաւեն 38—50 էջերը, իսկ համառօտ տպագրեալ գործին մէջ՝ 38—48 էջերը:

Թերեւս տրուած մանրամասնութիւններէն ոմանք աւելորդ նկատուին, սակայն կ'ուզեմ ներկայացնել նաեւ նահատակ քահանային գրածները, որոնք ունին իրենց յատուկ կարեւորութիւնը, որքան կարելի է ամբողջական ըլլալու համար:

«Մելիտինէ գաւառակէն անցնող գետը Եփրատն է, որուն մէկ ճիւղը կը սկսի Կարնոյ հարաւ-արեւելքը Խաչափայտ<sup>1</sup> անուանեալ լեռան մէջ գլուխը Տուֆլու լճակէն ու անոր շրջականերէն<sup>2</sup>, եւ Դերջանէն, Երիզայէն ու Կամախէն անցնելով Ակն գաւառակը եւ անկէջ երբ Կասյան Մատան կը մտնէ, հոն Տարօնոյ կողմէն<sup>3</sup> եկող Արածանիին հետ միացած՝ կու գայ Գորունուզ գիւղի առջեւ Մելասն ալ իր մէջ խառնելով՝ հանդարտընթաց կը հոսի մինչեւ Քէօմիւրխան: Իսկ երբ Քէօմիւրխանի հարաւային կողմը Քէօրխանէի նեղ կիրճը կը մտնէ, մինչեւ երեք ժամուան տեղ բախելով ժայռերու եւ ապառաժներու, քարուտ եւ հոսանուտ խոխոմներէն<sup>4</sup> մերթ փոփրալից եւ կարկաչասահ, մերթ խոխոջելով ու դդչալով եւ մերթ արեւելք ու հարաւ օձապտոյտ հոսելով՝ Ջեհոյի եւ Կերկերի լեռներն իր ետին թողած, հին Սամուսատը բարեւելով կը հասնի Պասրայի մօտ Գուրնա քաղաքը: Ու հոն, Տիգրիսի հետ Շադ-Իւլ-Արապը կաղմելով կը մտնէ Պարսից ծոցը:

Եփրատի ջուրը կապուտագոյն եւ դաղջ է, բայց սքանչելի համ ունի, զոր կը բերէ դրախտի երջանկալի պարտէզէն: Եփրատի ափանց վրայ վարուցան կ'ըլլայ թէեւ, բայց այս գաւառակին մէջ ափ մը հող իսկ չ'ոռոգեր, բաւական խոր կերպով երկրի մակերեւոյթէն անցնելուն համար: Իր միջոցաւ արտածութիւն ու ներածութիւն ալ տեղի չ'ունենար: Միայն բալուցի լաստավարներ երբեմն դըսղա (սոխի մանր տեսակը) եւ փարջ փոխադրելու առնեն, իրենց ուռկանին լաստի ետեւէն ձգած՝ պատուական ու համեղ ձուկեր որսալով կը բերեն Մալաթիա եւ շրջականեր ու կը ծախեն:

Եփրատէն անց ու դարձ ընելու համար երեք միջոցներ կան, այսինքն նաւակ, տկալաստ եւ անցք (կէչիտ): Նաւակներն երեք տեղ են. Ա — Շէյխ Հասան, Բ — Հարաիֆ եւ Գ — Իգուլուի Բիրոթ գիւղին առջեւ: Աս նաւակները չինուած են կաղամախիի հաստ տախտակներէ եւ կը դործածուին երկու թիակով: Ասոնց իւրաքանչիւրը կրնայ տանիլ 40—50 մարդ, կամ 20 ձի

(1) Թուրքերու՝ Բեաւի:

(2) Սկզբնաւորութեան ատեն Կարինի կողմերը կը կոչուէին Սեւ Զուր (Գարա Սու):

(3) Աւելի ճիշդ՝ Պայազիտի կողմերէն սկսելով՝ Պուլանըղէն եւ Մուշի դաշտէն հոսող ու Պինկէօլի քաղմաթիւ ակերէն եւ այլեւայլ ակերէն գոյացեալ ու կաղմեալ Արածանի (Մուրատ) գետին կը միանայ:

(4) Խոխոմ կը նշանակէ լեռներու մէջ ջուրի նեղ անցք:



Եւ կամ 3—4 կառք: Նաւակներէն ամենէն բանուկը եւ շահաւէտը Իզուրուինն է, Սամսոն-Պաղտատի խճուղին ասկէց անցնելուն համար:

Նաւակներու օրական անց ու դարձը առ առուելն 10 անգամ կ'ըլլայ զէմ առ դէմ ուղղակի երթալու չկարողանալով, խոտորնակ եւ հոսանքն ի վար երթալուն համար: Նաւակներն ամէն տարի կ'առաւարութեան (սէլէտիէյի) հոգմէ աճուրդի հանուելով, 20էն մինչեւ 25 հազար դրուչի վարձու կը տրուին:

Տկալաստ.— Գետեղերքը բնակող ամէն զիւղացի տկալաստ (քէլէկ) կ'ունենայ: Տկալաստը կը կաղմուի 15—20 մինչեւ 30 հատ ուռուցեալ տիկերով, որոնք կը հաստատուին ձուղերու տակ, կրնայ տուել 2—2500 քաչ ծանրութեան: Ինչպէս ըսինք, ասոր ալ անց ու դարձը քիչ եւ վտանգաւոր է, մահաւանդ գետին յորդած ժամանակ եւ հոսանուածքէ անցնելու միջոցին, որովհետեւ իր շուրջը նեցուկ չունենալէ զատ, սղփիկ հովէ մը անմիջապէս տատանելով կը կորսնցնէ հաւասարակշռութիւնը ու կը տապալի:

Անցք.— Երկու անցք կայ, մին Շէյխ Հասանի եւ միւսը Քիլիսիկի առջեւ: Անցքերը միշտ ծանծաղ տեղեր կը դնուին եւ երկու երեք տարին հազիւ մի անգամ տեղի կու տան անցնելու, այն ալ ամառը: Ասկից կ'անցնին ուղտերով, ձիերով եւ հետիոտն: Հարկ չկայ ըսելու թէ անց ու դարձի այս միջոցը էն վտանգաւորն է:

Չմոռնանք ըսել թէ՝ ճարպիկ լուղորդներ ալ սոսկ կամ ուռուցեալ տիկի վրայ հեծած կամ խալէմ ըսուած խոշոր զգուճներ անութին տակ կ'ապելով կ'անցնին ու մասնաւոր երկթանիով փայտ դուրս կը հանեն գետէն:

Գետէն անցնելու էն ապահով միջոցը կամուրջն է: Դարեր առաջ հատ մը կայ եղեր Բիրոքի առջեւ, որուն հիմերը միայն կը տեսնուին ջուրին մէջ:

Քերլիկ Սուլու կոչուած գետակը, որ քաղաքէն երկու ժամ հեռուէն կ'անցնի, կաղային ջուր մը ունի: Երբ որ լուցիկ մը վառելով ձգուի այդ գետակին մէջ, ջրերը կը սկսին վառիլ եւ բոցին հոսանքը կ'երկարի պահ մը, բաւական տեղ:

### ՄԵԼԱՍ—ՄԵԼՈՍ (ԹՐԲ. ԹՈՒՄԱ) ԳԵՏ

Մելաս=Թոխմա Սու գետը քաղաքէն չորս ժամ հեռու դնուող դաշտավայրի մը մէջէն կ'անցնի եւ կ'երթայ կը միանայ Եփրատի: Ոմանք զայն Տաւրոս գետ ալ կը կոչեն: Թուրքերը զայն կը ճանչնան Թոխմա սու անունով:

Մելոս, որ յունարէն մեղր կը նշանակէ, ունի երկու ճիւղեր, որոնց մէկը կը սկսի Տերենտէի կողմը՝ Իսպէկնը (=սպիտակ-ջուր) ու Վերան Շէնիւր ըսուած տեղերէն, եւ Տերենտէի մէջէն անցնելով՝ երբ Աղճատաղ գաւառակը կը մտնէ, միւսը, Կիւրինի մէջէն եկող վտակին հետ խառնուելով՝ Քիւրնէ եւ Քիւրեճիկէ լեռներու ու Շողուլի նեղ կիրճերուն մէջէն Քիւրտ Ապտալըի դիմացը դնուող Գարաբունար լճակի ջուրն ալ հետը առած ու միշտ դէպի



արեւելք Եազըլը խանի եղերքը քերելով՝ Գրըգէօղի տակէն կը հոսի եւ Գո-  
րուհուզի առջեւ կը մտնէ Եփրատի գիրկը:

Մելոսի ունեցած օդաչատութեան եւ այլ յատկութեանցը համար՝ տե-  
ղացւոց մէջ առած դարձած է սա խօսքը թէ՝ «Մելասի ափանց վրայ ոսկի ալ  
ցանես, կը բուսնի»: Այո՛, Մելոսի շնորհքն է որ իր ոռոգած դետիները լիա-  
ռատ կու տան անուշաճամբ բրինձ, լեցուն ու բազմաճատ ցորենի եւ դարբի  
հասկեր: Մանաւանդ իր ափանց վրայ կը հասցնէ քաղցր ու խոշոր սեխեր  
ու ձմերուկներ, որոնց երկու հատը հազիւ կրնայ բռցուիլ անասունի մը:

Մելոս իր ամենայնորդ ատենը իսկ հեղատաճ ընթանալով՝ անցք կու տայ  
ճամբորդներու: Իր մէջ կան մինչեւ 20 լիդր կշռող համեղ ձուկեր:

Հին քաղաքէն երկու ժամ վարը իր վրայ ձգուած է նշանաւոր կամուրջ  
մը՝ Գրգէօղ անուամբ, 40 կամարներու վրայ հաստատուած, որուն հիմա 20-  
25 աչքերէն միայն ջուր կ'անցնի: Այս կամուրջի վրայէն դարեր անցնելով՝  
որեւէ արձանագրութիւն չի տեսնուիր: Բնակչաց տւանդութեանը նայելով  
ասոր շինութիւնը Սուլթան Մուրատ Դ-էն եղած է: Եւ այս կամուրջն է Սվադ-  
Մալաթիա խճուղին միացնողը: Ճիշդ այստեղէն կը սկսի այն Եազըլը խանի՝  
լայնածաւալ դաշտը, զոր ոռոգելու համար Մելասէն գիծ մը բանալով տի-  
պար ագարակ մը շինելու մասին պէտք եղած քարտէսը պատրաստուած է շա-  
տոնց ի վեր: Բայց ինչ օդուտ որ խնդիրը դարձեալ թուղթի վրայ կը մնայ:

### ՍՈՒԼԹԱՆ ՍՈՒ (ԳԵՏԱԿ)

Սուլթան Սուլ<sup>2</sup> կը սկսի Աղճատաղի Փոլատ եւ Ֆրնտըղ գիւղերու վը-  
րայի լեռներէն եւ երկու ժամ վարը Մելետ Տերեսիին խառնուելով ու միշտ  
դէպ հիւսիս հոսելով՝ Էօրէնի, Արդայի եւ Էօրիւշկիւի դաշտերուն առջեւէն  
անցնելով՝ իր տակ դանուած գիւղերու ջուր բաշխելէ, արտեր ու պարտէզներ  
թրջելէ ու ջրաղացներ դարձնելէ ետք՝ կը միանայ Մելոսին:

Այս գետակին վրայ երկու հսկայ կամուրջներ շինուած են, մէկը Մե-  
լետի կամուրջը Մալաթիա-Այնթապ ճամբուն, եւ միւսը՝ Մալաթիա-Արդա-  
ճամբուն վրայ<sup>3</sup>: Այս գետակի մէջ ալ համեղ ձուկեր չեն պահուիր:

Այս գետակը՝ իբր սահմանադրութիւն իրարմէ կը դատէ Մալաթիա եւ Աղ-  
ճատաղ գաւառակները:

(1) Այս գաշտը Մելասի աջ կողմը Կապան Մատան գաւառակին մէջ գտնուող  
գիւղախումբին մէջ 10 ժամ երկարութիւն, 4—5 ժամ լայնութիւն կամ 20,000 արտա-  
վար տարածութիւն ունեցող բերրի բարգաւաճ գաշտ մըն է:

(2) Այս գետակը ունի առատ եւ յորդ ջուրեր եւ կը թափի Մելասի (ժողովոյ)  
մէջ: Իր աղը կը գտնուի կրային կոյտի մը տակ՝ դաշտէն 100 մետր բարձր, եւ քաղա-  
քին հարաւի կողմէն կ'ուղղէ շրջանակի երկիրը:

(3) Առաջին կամուրջէն 6 ժամ վար Զիֆթլիկ Բէօփրիւսի կը կոչուի: Այս երկու  
կամուրջներէն զատ այս գետին վրայ Հեքիւքէի եւ Եողմուրլըի առջեւ երկու փլած  
կամուրջներ կային (Պէննէեան քհ., Հ., էջ 38):



19րդ դարու Ա. Կէսին մէջ, Սապրի Մուսթաֆա փաշա վերստին զաշտերն ուսողելու նպատակով, այս գետակէն դիմ մը կը դատէ, բայց պատշաճ տեղերը ջուր չկարենալով իջեցնել՝ կը ձգէ երեսի վրայ, եւ զաշտը Աղճատաղի մօտ դնուելով, բնակիչները խիստ կը նեղուին համանուն լեռնայինէն ու կը ցրուին. որով առուն ալ բոլորովին կը խանգարի: Բայց 1866ին, անուանի հազարապետ Բահմի պէկ դալով՝ յիշեալ Քիւրտերը նուաճած եւ հին առուն նորոգելով ու բարեփոխելով՝ 18 ժամուան տեղ ջուր իջեցուցած եւ այլ եւ այլ տեղերէն մարդիկ բերելով՝ շատ մը գիւղեր հաստատած է: Բահմի պէկ շինած է նաեւ գետնայարկ, այլ ընդարձակ զօրանոց մ'ալ<sup>1</sup>, որ մինչեւ Օսմանեան Սահմանադրութեան հրատարակութեան առէն Դ. Զօրաբանակի իրաւասութեան տակ կը վարուէր Զիֆթլիկի Հիւմայիւն կամ Հարրայի Հիւմայիւն (կայսերական ազարակ կամ ասպատան) անուամբ<sup>2</sup>:

Այս ազարակը շատ օգտակար եղած է Մալաթիոյ գաւառին իր առատ արմատիքով, բրինձով եւն., եւն.:

Այս ազարակը հիմա Միլիէի անցած ըլլալով՝ գրեթէ փլելու վիճակին հասած է:

Էպեմենտիկ<sup>3</sup>.— Ասիկա ալ քաղաքէն դէպի հիւսիս չորս ժամ հեռաւորութեամբ համանուն ըլրակի մը տակէն կը բխի երկու-երեք աղօրիք դարձընելու չափ առատութեամբ: Էպեմենտիկի ջուրը գաղջ եւ անհամ է, ճահճային եւ չամբուտ վայրէ բխելուն համար, սակայն մէջի մանրիկ ձկները շատ համեղ են: Աս ջուրն ալ իր տակ դնուած արտերը թրջելէ ետք՝ կը թափի Մելասի մէջ:

Շահնա Սուլու եւ Պէկլէր Տերեսի.— Ասոնցմէ առաջինը քաղաքէն դէպի հարաւ-արեւմուտք երկուք ու կէս ժամ հեռու խաղողայի ճամբուն վրայ Սէյ-տուշաղիի լեռան տակէն, Ինէկ Բունար<sup>4</sup> ըսուած տեղէն երկու ակունքէ բխելով՝ երկու ժամ վարը Տէր Մեսիհէն դատուելով դէպի հող հոսող ջուրին հետ կը միանայ ու կը խառնուի Մելոսի: Այս վտակի աջ եղերքին մասնաւոր կաւառներ (պենտ) կը դատուին, եւ վարը, Իսկելէ ըսուած կամրջագաշտի միջոցաւ ջուր կը տարուի քաղաքի թուրք մեծատուններէն Հարիճի եւ Հաճի Ապտի զատէներու<sup>5</sup> բրինձի ընդարձակ արտերն ուսողելու: Այս վտակը խորածորէ

(1) Քաղաքին արեւմտեան կողմը 6 ժամ հեռու:

(2) Իբր «տիպար տգարակ» հաստատուած էր իբր թէ:

(3) Պէննէեան քհնյ. Համաւուօտ Տեղագրութեան մէջ հաւանօրէն սխալ ընթերցմամբ ԷԼԵՄԵՆՏԻԿ գրած է քանի մը անգամ (Պէննէեան քհնյ., Համ., էջ 39):

(4) Համաձայն տեղական առատալիւի մը, տարի մը, ձմեռը երկար տեւելով, գարունը ձիւնհալէն եւ անձրեւներէն ջուրերը կը յորդին եւ ամէն կողմ կ'ողողեն. վերոյիշեալ ջրակներու մեծէն կով մը, իսկ սղտիկէն ալ հորթ մը դռը կու գայ, որմէ կ'առնէ ջուրը իր անունը: Կ'երեւի թէ հաւանականաբար ակերու իրարմէ մեծ ու սղտիկ ըլլալն է այս անուանումը: (Օմնոթ. Պէննէեան քհնյ. ի):

(5) Պէննէեան քհնյ. Համաւուօտի մէջ կը յիշէ նաեւ Հաճի Զատէ, Սիւլիկ Զատէ թուրք ընտանիքները:



մը անցնելով՝ որչափ վերերը ջուրը կաւառներով կը պակսի, այնքան ալ աւելի կ'առատանայ վարը այլեւայլ ակերէ ջուր հաւաքելով:

Այս ջուրին վրայ մէկ մը Մօրէ կէտիկիի, մէկ մըն ալ Ըշըղլար ըսուած տեղը լիւած կամուրջներու ոտքերը կը կենան: Իսկ Շահնախան զիւղի վերեւ կայ հսկայ կամուրջ մը, որուն արեւմտեան կողմը զառիթափին վրայ շինուած է քարուկիւր պանդոկ մը Շահնախան անուամբ, որմէ կամուրջ եւ վրտակ ընդունած են իրենց անունները:

Պալլը, Շիշման եւ Պեսփիրանի վտակ. — Ասոնց երեքն ալ քաղաքին արեւելեան կողմի լեռներու այլ եւ այլ ակունքներէն կազմուելով՝ Շիշման 7 ժամ, Պեսփիրան 9 ժամ եւ Պալլը Չայ 2 ժամ հեռաւորութենէն եւ միշտ դէպի հիւսիս հոսելով՝ իրենց տակ գտնուած ցանքերը ջրելէ եւ ջրադացներ դարձընելէ ետք, կը խառնուին պատկառելին Եփրատի:

Հոս հարկ կը դատեմ աւելցնել Պէննէեան քահանայի սա յուելուածական տեղեկութիւնները՝ այս երեք վտակներուն մասին (տես համառօտը, էջ 40-45). —

«Պալլը վտակը կը գտնուի քաղաքին արեւելեան կողմը՝ երեք ժամ հեռու, եւ կը սկսի Սէվէրէկի լեռնէն ասդի եւ անդի ու դէպի հիւսիս օձապտոյտ հոսելով՝ աղօրիքներ դարձնելէ եւ անթիւ արտեր ու գաշտեր ոռոգելէ ետք՝ Իմամ օղլու զիւղի առջեւ կը թափի Եփրատ գետ:

Պալլը վտակ դարունը կը յորդի եւ ամառը կը նուաղի. իր մէջ ունի մանր ձուկեր: Այսու ամենայնիւ այս վտակը իր տեսակին մէջ ամենէն օգտամատոյցն է:

Շիշման-Մամուֆանի վտակ. — Սա եւս քաղաքէն 7-8 ժամ դէպի արեւելք գտնուած արտերն ոռոգելէ եւ ջրադացներն դարձնելէ ետք՝ կը խառնուի Եփրատի մէջ:

Պեսփիրանի վտակ. — Ասիկա ալ նոյնպէս քաղաքէն դէպի արեւելք 9 ժամ հեռաւորութեամբ Իզդըլուի Գոլլուզ ըսուած զիւղին մէջէն եւ չրջականերէն ժողովելով՝ մի քանի աղօրիք դարձնելէ եւ արտեր ջրելէ ետք՝ մէկ ու կէս ժամ վարը կը խառնուի Եփրատի:

Տէր Մեսիհ<sup>1</sup>. — Վերելի գետակները յայտնի է թէ գաւառակեղերոնին

(1) Տէր Մեսիհ = Տէյր Մեսիհ արաբերէն կամ ասորերէն կը նշանակէ Տուն կամ Տաճար Քրիստոսի: Ջուրը իր անունը առած է համանուն նուիրական շէնքէն, որ իր վրայ շինուած է (այժմ աւերակ), իսկ թուրքեր Տերմէ սուլը կ'անուանեն քաղմաթիւ ակերէ բխելուն համար:

Կ'աւանդուի թէ Քրիստոսի աշակերտներէն մէկը (հաւանաբար Ս. Թադէոս Առաքեալ) այս կողմերը ճամբորդելու ատեն, երբ կը հասնի հոս, խիստ կը ծարաւի, բայց մօտերը ջուր չգտնելով վէմի մը շուքին տակ կը պառկի: Պառկելու ատեն իրեն կ'աղագուի, որ ելլէ գաւաղանը գետինը զարնէ. ընդոտ կ'ելլէ ու կը զարնէ գաւաղանը: Ջուրը կը բխի եւ ի նշան հրաշից այս գաւաղանաձեւ գիծը կը մնայ ջրոյն երեսը: (Ծանօթ. Պէննէեան քհնյ.ի):



երկու կողմը դանուող զիւղերու եւ դաշտագետիններու ջուր կը մատակարարեն, սակայն հետեւեալները՝ կեղբոնին քաղաքին եւ արուարձաններուն: Ասոնցմէ ալ նշանակենք կարգաւ.—

Տէր Մեսիհ.— Մելիտինէի այս ամենապատուական ջուրը կը բխի քաղաքին հարաւ-արեւմտեան կողմը չորս ժամ հեռաւորութեամբ Քիւնտիւպէկի վերեւ եւ Գայըր Ուշաղըի լեռան ստորոտէն՝ քառակուսի աղբիւրէ մը եւ մօտակայ ակունքներէ առատութեամբ. այնպէս որ դեռ քարընկէց մը չլացած՝ այլ եւ այլ ակունքներէ ալ հաւաքուելով՝ կ'աճի եւ կը յորդի անցք չտալու աստիճան:

Տէր Մեսիհի մէկ մասը Գաբուլըգ ըսուած տեղէն ծորակով մը կը դատուի Ինէկըունարըին հետ բրինձի արտերը ջրելու: Իսկ միւս մասը, Քիւնտիւպէկի եւ Չըրմըխտիի վրայէն, մինչեւ Քէլէյիկ՝ դէպի հիւսիս, անկէց ալ Թեթ-տէ, Պարղուզի եւ Ատաֆի արուարձաններէն մինչեւ Գառնակ՝ դէպի արեւելք հոսելով, մէն մի քայլափոխի ծորակներով եւ աղուղաներով բաժնուած՝ կ'ոռողէ ամբողջ վեց ժամուան միջոց մը դրաւող անհամար պարտէզները, այգիներն ու ածուները, կը դարձնէ աղօրիքներ, եւ ամբողջ տուններու ջուր մատակարարելէ ետք՝ նորէն դէպի հիւսիս դառնալով հին Մելիտինէի տակ Բունար Պաշը վտակն ալ հետը առած՝ Գըրգէկօղի եւ Եփրատի միջեւ կը խառնուի Մելոսի:

Այս ջուրը՝ զլուխէն մինչեւ երկու ժամուան տեղ, իր երեսը ունի դաւադանաձեւ ճերմակ, այլ հիասքանչ դիժ մը. կարծես թէ դեղերու բաղադրութեամբ կաթնառուակ մը կը հոսի ջուրին մէջտեղէն:

Տէր Մեսիհ Մելիտինէի բոլոր ջուրերու մայրն է եւ կրնանք ըսել առանց իրեն Մելիտինէն դոյութիւն չունի, որովհետեւ ամէն տարի դարունը երբ առունները մաքրելու եւ յատակելու համար ջուրը ուրիշ կողմ կը դարձնեն, քաղաքին բոլոր ջրհորներն ու ակերը բոլորովին կը ցամքին ու կը չորնան. այնպէս որ շատ անգամ կը ստիպուին մզոն մը տեղ երթալ ու ջուր բերել բոլոր պէտքերուն համար:

Տէր Մեսիհ ունի սա դեղեցիկ յատկութիւններն ալ: Այն է՝ իր ջինջ դոյներն ու ցրտութիւնը 5-6 ժամուան տեղ նոյնը կը պահէ եւ չունի իր մէջ որեւէ ջրային կենդանի:

Մին Քիւնտիւպէկի վերեւ Եէլ Քէօփրիւ եւ միւսը Պարղուտիի մէջ Չաթալ Քէօփրիւ անուամբ երկու խոշոր կամուրջներ շինուած են. Տէր Մեսիհ ասոնց տակէն կ'անցնի, Տալշան Տէրէսին եւ Խարաթան գինքը խաչաձեւելուն համար: Աս կամուրջներէն զատ իր վրայ ձգուած կան 50-60 հատ քարաշէն եւ փայտաշէն կամուրջներ ալ:

Խորաթա վտակ.— Տէր Մեսիհէն ետք երկրորդ եւ կարեւոր ջուրն է Խորաթան, որ կը բխի քաղաքին հարաւային կողմը մէկ ժամ հեռաւորութեամբ վերին Պանաղիի վերեւ այգիներու մէջէն, մեծ մասը Զիյարէթ ըսուած շէնքի մը տակէն՝ ակէ մը եւ մնացեալը՝ չորս կողմէն հաւաքուելով:



Խորաթան դարունը Տէր Մեսիհի չափ առատութիւն ունի, բայց ամառը կը նուազի:

Գիւղէն քիչ մը վարը լերան ստորոտէն, քաղաքին հարաւակողմեան արտերն ու պարտէզները ջրելու համար ասկից ալ մէկ քանի առուններ դատուելէ ետք, մնացածը, ինչպէս իր անունէն յայտնի է, խաղալէն ու խնդալէն կը սահի մինչեւ Չաթալ Քէօփրիւ, ուր բարեւելով «Տէր Մեսիհ»ը կ'անցնի անոր տակէն եւ վարը Թոփ Սէօկիւտ ըսուած տեղը համանուն ջուրին հետ կ'երթայ ու կը խառնուի Մելոսին:

Խորաթա ջուրին համար շատ թեթեւ է, կ'ըսեն, իր սուղած գետնին վրայէն դիւրաւ սահելուն համար: Զուրը վերերը շատ ցուրտ եւ անուշ է թէեւ, բայց վարերը կը կորսնցնէ իր այդ յատկութիւնը: Աս ալ իր մէջ չի պարունակեր որեւէ ջրային կենդանի:

Բունարպաշը.— Ասիկա քաղաքին արեւելեան կողմը մէկ ժամ հեռաւորութեամբ Ս. Լուսաւորիչ եւ Ս. Փրկիչ վանքերու կեդրոնը, «Անծանօթ բըժիշկ» ըսուած վանքի աւերակաց տակէն կը բխի բաւական առատութեամբ եւ կը դարձնէ իր տակ դանուած մի քանի ջրաղացներն եւ կ'ոռոյէ ընդարձակ արտեր եւ Օրտուզը գիւղին ջուր մատակարարելէ ետք, նոյն գիւղի մէջէն դէպի հիւսիս հոսելով՝ հին Մելիտինէի տակը կը միանայ Տէր Մեսիհին:

Աս վտակի ջուրը պաղջ եւ անհամ է, էպիմեմաէկի պէս շամբուտ ըլլալուն: Բայց ունի մանր, այլ համեղ ձուկերու վտակ, որոնց որսացուիլը արդիւնած է կառավարութենէն: Իր վրայ ձգուած են մէկ քանի քարաշէն կամ մուրջներ:

Ս. Փրկիչ վանքի ջուրն ալ այս վտակէն կու գայ մասնաւոր առուակով մը: Կ'ըսուի թէ մինչեւ ԺԷ. դարուն մէջ, Բունարպաշի թրջած արտերէն մասնաւոր տուրք մը կ'առնուէր սոյն վանքին համար:

Գարնակ-Քառնակ.— Գարունը հոսելուն եւ ամառը ցամքելուն համար, Գարնակ (Գարնանակ), իսկ քառասունի չափ ակներէ բխելուն համար Քառնակ կ'ըսուի այս ջուրը, որ կը բխի քաղաքին հարաւարեւելեան անկիւնը՝ Տէր Մեսիհի ընթացքին մօտ եւ Պէկտաղի ստորոտին բազմաթիւ ակներէ պըղպըջալով անմիջապէս կը մտնէ Տէր Մեսիհին մէջ:

Աղբունար.— Սա ալ Շուկային մէջ Կէպէշ Օղլու պանդոկի առաջը երկու աղբիւրներէ կը վաղէ ջինջ, ցուրտ ու սպիտակ եւ բաւական առատութեամբ. հոն կայ նաեւ մի կամարաշէն աղբիւր, որ ասոնցմէ վար չի մնար:

Խոշլուկ Սուլու<sup>1</sup>.— Կը բխի կառավարութեան պաշտօնատան կռնակի տներէն մէկուն մէջէն՝ աղօրիք մը դարձնելու չափ առատութեամբ, դով եւ զուլալ, որ շուկայի կեդրոնէն եւ Ճամէներու մէջէն անցնելով՝ պէտք եղած

(1) Համանուն աղբերակ մըն ալ կայ Չամաղանի բլրոյն դիմաց, Տէր Մեսիհի աջ եզերքը, ուր Լոգոցնէլու կը տանին այն հիւանդները, որոնք իրենց վրայ կ'ունենան ԽՈՇՐՈՒԳ (խոշորուկ) ըսուած հիւանդութիւնը, որ տեղակ մը մորթի հիւանդութիւն է:



մաքրութեան ծառայելէ, երեք-չորս ջրաղացներ դարձնելէ եւ Չարմուղը եւ Հայոց թաղի պարտէզներն ու արտերը ջրելէ ետք կը խառնուի Խաթուն Սուրբ մէջ:

Քաջ Լիպարիտ.— Կը գտնուի Մայր-եկեղեցւոյ մօտ Սարաֆեաններու փողոցին տակը, տունին եղերքը, քաղաքին Ենի Համամ թաղը, առուի եղերքը: Զուրը պաղ եւ բարեհամ է: Քաջ Լիպարիտ պատմական անուն մըն է, որ ջուրին տրուած է: Ըստ աւանդութեան Կիլիկիոյ զիւցազուններէն Լիպարիտ Մալթիա դալով՝ պտըտելու ատեն սոյն համանուն ջուրին կը հանդիպի, յորմէ խմելով զովութեան եւ անուշութեանը համար իր անուամբ կ'անուանէ զսա «ՔԱՋ ԼԻՊԱՐԻՏ»:

Ալթուն Գաշըգ.— Կը բխի Թեճոէի ներքեւ այգեստանեայց մէջէն լորշի աւաղանէ մը, յստակ, ջինջ եւ սառնորակ: Աս ջուրը իր տեսակին մէջ, մասնաւոր յատկութեանցը համար կ'արժէ անուանել արդարեւ «Ոսկէ Դգալ»:


Տավուլը Բունար.— Քէլէյէկի հիւսիս-արեւմտեան տակը Քիլիսէ Պալըը ըսուած տեղը, ուր կը մնան աւերակաց հետքեր, վէմերու տակէն խոխոջիւն մը կը վիժէ բաւական առատութեամբ՝ ցուրտ ու անոյշ: Իր անունը առած է վիժելու ատեն հանած ձայնէն:

Գայնարնա.— Վարի զարմուղիի հիւսիս-արեւելեան ծայրը զով ու ջինջ աղբիւր մըն է Գայնարնան, որ իր ակէն բխելու ատեն կ'եռայ կարծես: Մօտակայ տուններու թուրք կիները հոս կու գան իրենց ճերմակեղէններու կտաւը սպիտակցնելու համար:

Պապուխտի կամ Շուկոնի<sup>1</sup>.— Իր համանուն զբօսավայրով շատ ուշագրաւ եւ հետաքրքրական է Պապուխտին, որ կը գտնուի քաղաքին հիւսիս-արեւմտեան ծայրը: Պապուխտին երկուք է՝ վերի եւ վարի: Զուրը կը սկսի վերի Պապուխտի մէջ քարերու փաթէն, գլլլալէն, պղպջալէն եւ բոլորտիքը գտնուած արտերու մէջէն այլ եւ այլ ակերէ, եւ երբ վարի Պապուխտի հասնի՝ Շուկոնի ըսուած աղբիւրն ալ եւ ուրիշներ ալ մէջը առնելով՝ վտակ մը կաղմած եւ 10-12 ջրաղացներ դարձնելէ, մինչեւ հինգ ժամուան տեղ ընդարձակ դաշտադէտիններ ոռոգելէ եւ համանուն գիւղի առջեւ Խաթուն սույը անունը առնելէ ետք կը ժամանէ Մելոսին:

Ի՛նչ սքանչելի զբօսավայր մըն է հապա սա Պապուխտին. ի՛նչ զարմացում եւ զուարթութիւն չունին մարդոց համար. երեկոները սոյն վայրի դալարեաց վրայ արեգակը կը սփռէ իր ոսկեճաճանչ եւ շառագոյն երփը, մանա-

(1) Շուկոնի աղաւաղեալն է քիւրտերէն Նիր-գոնի (կաթնաղբիւր) բառին եւ «շուկայ ունի» հայ բառին: Մինչեւ հիմա կաթերը նուազ եղող կիներ հոդ կ'այցելեն լուացուելու համար: Եւ Մալթիա, Պողթեփէի վրայ գտնուած ատեն, շուկան այս ջրոյն մօտ շինուած է եղեր, որ հին քաղաք փոխադրուելէ երկար ժամանակ յետոյ, Ժողովուրդը երբ նոր քաղաք կու գայ, չմոռնալով բնակած տեղն ալ կ'ըսէ թէ՝ «Երթանք այցելենք մեր պապերուն բնակած տեղն ալ»: Որով վերջին սերունդը կ'անուանէ այս վայրը «ՊԱՊ ՈՒԽՏԻ»:



13 յ6



ւանդ կիրակիները զրօսաշրջիկներու հոգ կատարած ուրախութեան ժամանակ, որովհետեւ կը տեսնէ երիտասարդներու կայտառ դէմքերը, խումբ-խումբ: Մին այս ահուհիւ շրջապատած, միւսը աղբերակի մը գլուխը նստած, մէկը կանանչ եղերքով առուակի մը եղերքը շարուած եւ մէկալը պարտէզի մը գիր-կընդխառնուած եւ դալարագեղ ծառերու հովանւոյն տակ ընկողմանած կ'աւաչէ, դազալ կը կանչէ, կ'երգէ ու կը պարէ զովացած օդի շիշն ու բաժակը իրար զարնելով: Գեղերգող թռչուններ, տարեակն ու սոխակ եւս կը սկսին դաշ-լայլիկն ու ճռռողիւններն խառնել այդ կենդանի ձայներուն:

Ջուրերը համբելու ատեն պէտք չէ մոռնալ թէ քաղաքին վարի մասին, աւելի հայոց թաղերուն մէջ ամէն տան մէջ, կը գտնուի աղբիւր մը եւ կամ առուակ մը: Ամէն թաղի մէջ եւ ամէն եկեղեցիներ, մզկիթներ ու պանդոկ-ներ ու հրապարակներ ունին իրենց առանձին ջուրերն ու աղբիւրները:

Շահնախոնի Աղբիւր. — Հետաքրքրական եւ ուշադրութեան արժանի ջուր մ'ալ ասիկա է, որ կը բխի համանուն ձորակէն, կամուրջէն դէպի հարաւ: Ասոր հետաքրքրական կէտը հոս է. ջուրը կը հոսի քարերու վաթէն՝ ծակէ մը, տարւոյն ամէն եղանակին ալ միեւնոյն առատութեամբ, առանց մէկ ձուկ իսկ դուրս դալու, բայց դարնան մէջտեղի ամսուն մէջ, 8-10 օր միայն, 25-30 սանթիմ երկարութեամբ միօրինակ ձուկի վտառ մը կը հոսի շարունակ եւ յե-տոյ ընդունիլին կը դադրի: Կ'ըսուի թէ ստորերկրեայ ընդարձակ աւազաննե-րու կամ լիճերու մէջ գտնուած ձուկերն են որ կը տեղափոխուին. կը պատա-հի որ անոնց մանրները դուրս խուժեն այսպիսի ակերէ կամ ծակերէ...»:

Պէննէեան քահանայ (Հ., էջ 46) իրր «անուանի» նոյնպէս կը յիշատակէ հետեւեալները. —

«Շուկայի մէջ Սէօկիւտլիւ եւ Չինարլը մզկիթներու, Սարաճ պաղարըի, Սուլու Գահվէսիի, Հայոց Մայր Եկեղեցւոյ կրկին աղբիւրները, Մալ Տաղը, Սըթմա բունարը, Տիշպրտաք բունարը, Չամուշ օղլու եւայլն անուանեալ ջու-րերը:

Եւ վերջապէս այս քաղաքին մէջ չկայ մզկիթ մը, եկեղեցի մը, պան-դոկ մը եւ կամ տուն մը, որ իր առանձին աղբիւրը կամ ջրհորը չունենայ»:

Ինչպէս կը տեսնուի, Մալաթիա իր շրջականերով իսկապէս ջրառատ երկիր մըն էր, սակայն այս ջուրերը անօգուտ կերպով հոսած են եւ նպաստ մը չեն բերած ոչ արդիւնարեւութեան, ոչ հաղորդակցութեան եւ ոչ ճարտա-րարութեամբական դարգացման:

Հաղիւ ջրաղացներ դարձնելու համար գործածուած կարգ մը ջուրի ընթացքներ կան, մինչ կարելի էր առաւելագոյն չափով օգտուիլ անոնցմէ:

Մասնաւորապէս Եփրատի նման ջուրի երակ մը, որ Մալաթիոյ սահ-մանը կը մտնէ Պիլալ Ուշաղիի քով Ս. Արֆէն (Ահարոն) լեռան ու Տէվէ Պոյ-նուի առջեւէն եւ մինչեւ Իւդ Օղլու արեւելքէն կ'եղերէ Մալաթիոյ երկիրը, բացարձակ ոչ մէկ օգուտ կ'ընծայէ Մալաթիոյ՝ սոսկ ման տեսակէտով, վա-սընդի անկէ չեն օգտուած պղտիկ ճիգ մը ընելով:



Գ. Մելիտինեցի (ՆԱԽՃԻՐՆԵՐ, էջ 16) գիտել կու տայ թէ «Եփրատի Մալաթիոյ Սահմանամուտ տեղէն, Պիլալ Ուշաղիի եւ մասնաւորապէս Ս. Ա. Ֆրէն լերան ստորոտը զտնուող Տէվէ Պոյնուի առջեւէն կարելի է համեմատական փոքր ծախքերով վերցնել հսկայ առուներ՝ ոռոգելու համար Եաղըլը խանի տարածութիւնը»:

Դժբախտաբար թուրքերը չեն կրցած այս տեսակ շինարար եւ երկրին տնտեսական բարդաւաճութեան նպաստող ձեռնարկներ ընել: Ասոր համար, ինչպէս կը պատմէ Գ. Մելիտինեցի, դերման այցելուները գիտելով Մալաթիոյ խիստ առատ ջուրերու անօգուտ ընթացքը, թուրքերը ծաղրած են իրաւամբ անոնց երեսին ըսելով.

«Պու սու պէօյլէ ազար,  
Սիգտէ էշէկ կիպի պազար»:  
Այս ջուրը այսպէս կը վազէ,  
Եւ դուք կը նայիք էշերու ուղիս:  
Որքան իրաւունք ունէին:

## Զ.

### ԲՈՒՍԱԿԱՆՈՒԹԻՒՆ

Հարաւային Հայաստան, որ կը պարունակէ իր մէջ Հայաստանի հաւաքաւորական մասը, Կորդուաց լեռներէն Եփրատ, ալսինքն մինչեւ Խարբերդ-Մալաթիա տարածուած երկիրները, ներառեալ Քղին եւ Սղերդը, յայտնի է ընտելեան յորդառատ բեղմնաւորութեամբ:

Լեռները տեղտեղ հոս ծածկուած են ծառերով, որովհետեւ ձմեռը այս մասին մէջ նոյնքան խիստ չէ: Խոտերը հոս աւելի կը բարձրանան, վասնզի ձիւնը քիչ է եւ շուտ կը հալի, իսկ լեռնասնարները ալլեւ տափակ եւ քարոտ կերպարանք չունին (հմտ. Ա. Ալպոյաճեան, ՊԱՏՄ. ՀԱՅ ԳԱՂԹ., Հատոր Ա., էջ 35):

Այս արդաւանդ շրջանին մէջ էր Մալաթիա եւս, որուն օդը, ջուրը եւ հողը նպաստաւոր են բոյսերու աճման:

Հետեւաբար բուսականութիւնը շատ ճոխ էր, գէթ ի հնումն, վասնզի հակառակ թրքական տիրապետութեան տակ Հայաստանի շատ կարեւոր մէկ մասին փճացման, ըստ հողելոյս Պէննէեան Կարապետ քահանայի «Պէկտաղիի եւ ուրիշներու մէջ դեռ կը գտնուին անտառակներ ու մացառներ ցան ու ցիւր,



Խալիֆանի եւ Ալիֆանի լեռները, Խաղսպայի եւ Պալիանի (Թաթար օվասը) լեռներն ու հովիտները տեղտեղ գեռ խիտ ու ընդարձակ են ասոնք: Յրդին, շատ դժուար աճելուն համար, դրեթէ սպառելու վրայ է»:

Կաղնիներ՝ գիւղացւոց մէջ «գոռի»<sup>1</sup> վերածուելով, բաժնուած են, ուսկից իբր ձմրան պաշար իրենց ոչխարներուն համար կը պատրաստէին դէղեր (Եափրազ) եւ փայտը բերելով քաղաք կը ծախեն: Կաղնիէն եւ ցրդիէն կը պատրաստեն նաեւ ածուխ եւ շինութեանց համար սիւներ: Եւ կարգ մը տեղերու ծառերէն կը քաղեն դիտոր եւ աղտոր (սուժազ): Լեռներու մէջ, անտառազուրկ եւ խոպան վայրերը Քէվէն ըսուած փշատունկը դրաւած ըլլալով՝ վրայէն կը թողվեն բաւական դաղի խէժ (քիթրէ): Լեռներէն վայրի շրէշ (շիւրիշ) եւ առատ սունկ եւ Մահմուտիէի արմատ եւ կոթ, ինչպէս նաեւ, սունկ եւ խաւարծի, կանկար, եւ որմէ մաղտակ ու հունտ կ'առնուի:

Դաշտերուն մէջ կը ցանուին ու կը մշակուին բարեխառն գօտւոյ տակ աճող ամէն տեսակ արմտիք եւ բոյսք: Ծառեր, բանջարեղէններ եւ ընդեղէններ:

Քաղաքի, արուարձաններու պարտէզներն ու այգիները համբաւաւոր են իրենց ծառադարձութեամբ քան իրենց բերքովն ու արդիւնքով: Ասոնք են ահա Մալաթիան դրախտ անուանողներն (Հ. ձեռ. էջ 78-79 թ.):

Մօտաւորապէս 1000 տարի առաջ Քրիստոսի 982-ին դրուած աշխարհագրութեան մէջ Յ. Քիւրտեան այս տեղեկութիւնը գտած է.

«Մալաթիա, մեծագոյն սահմանապահ վայր Լուֆամ լեռան այս կողմը: Իր պտուղները ձրի կը տրուին եւ տէր շունին» (Hudud Alam, London, 1937, էջ 149), իսկ 1340 թուականի Համա-Ալլահ Մուսթաֆի Ղազվինցին (1340) իր աշխարհագրութեան մէջ կը գրէ Մալաթիոյ Չորրորդ շրջանը կը գտնուի Երկայնութեան 71 եւ լայնութեան 39 աստիճանին վրայ: Հոս կայ մօւր բերդ մը, զոր Արքայութիւնը կը կոչեն: Պապոմէսս, հեղինակը Ա.Լ.Մ.Ա.Ճ.Ս-Թի, Մալաթիացի էր: Մեծ քաղաք մըն է, ընտիր կլիմայով եւ հոսուն ջուրերով, եւ ընդարձակ արօտատեղիներով: Իր բերքերն են ցորեն, բամպակ, խաղող եւ առատ պտուղ»

Իսկ մօտաւորապէս 150 տարի առաջ Հ. Ղուկաս Վրդ. Ինճիճեան (տե՛ս Ա.Հ.Ա.Ր.Հ.Ա.Գ.Ր.ՈՒԹԻՒՆ, Ա. Հտ. էջ 321) մեծ դովետով խօսած է Մալաթիոյ բուսական արդիւնարեւութեան վրայ. «Պատուականութիւն բուսոց Մալաթիոյ երեւելի է ի Փոքր Հայս, վասն պատուականութիւն ջուրց իւրոց, զի դրեթէ յամենայն բոյսս եւ ի միրզս զընտիրն եւ զօղատուականագոյն պտղաբեր է. տանձ նորա մեծ եւ քաղցր, սերկեւիլ նորա դանցանէ ծանրութեամբ քան դմի օխայ, եւ մինչեւ 2 օխայ գտանել ասեն Երբեմն, խնձոր նորա քաղցրաճաշակ. պատմէ Քեաթիպ Չէլէպին թէ ի հասունանալ խնձորոյն բնակիչքն տառս եւ անուանս գծեալ ի վերայ թղթոյ, եւ Երբեմն նաեւ ողջոյն տողս տաղից յար-

(1) Տե՛սակ մը հաւաքական սեպհականատիրութիւն:



մարեալ մածուցանեն զթուղթն ի վերայ պտղոյն յարեզդէմ կողմանէ նորա, յետ քանի մի աւուրց իւրաքանչիւր տառք կարմրանիչ տպաւորեն ի վերայ խնձորւոյն: Իսկ տեղիք ներքոյ մնացեալք թղթոյն գեղնադոյն մնան: Որով երեւին իբրեւ տառք կարմիր ներկիւ գրեալք ի վերայ գեղին պտղոյն:

Ունի եւ ընկոյզս եւ այլ միրգս ինքնաբոյս»:

Մալաթիոյ արդիւնաբերութեան ճոխութիւնը կը հաստատեն բոլոր Մալաթիա այցելողները: Որբերեան, որ իր ծննդավայրին վրայ տեղագրական բաւական ընդարձակ տեսութիւն մը ունի (տես ԲԻԻՐԱԿՆ, 1900, էջ 398) ինքն կը հաստատէ թէ Մալաթիոյ հողը «բարեբեր» եւ «բազմաբեր» է եւ մեծ յարմարութիւններ կը ներկայացնէ ստուար բնակչութեան մը բնակավայրը ըլլալու:

Էջկրագործական տեսակէտով ուշագրաւ կեդրոն մըն էր Մալաթիա, վասնզի իր շուրջը ունէր ընդարձակ դաշտեր, արտեր, արօտավայրեր, բազմաթիւ այգիներ, սլարտէզներ:

Պտղատու ծառերը առատ են նոր քաղաքին մէջ, այգիները՝ հարուստ, ողկոյզներ ունին անհաւատալի մեծութեամբ:

Ստրաբոն կը յիշատակէ Մոնարիտ գիւնին, անշուշտ այս խաղողէն պատրաստուած (Որբերեան, ԲԻԻՐԱԿՆ, 1900, էջ 398):

Հոն կ'աճին նաեւ բոլոր բարդիներ, հսկայ սօսիներ, վիթխարի ընկուզենիներ, ահագին թթենիներ:

Ծաղիկներուն ամենէն հոտաւէտներն ու երանդաւէտները, պտուղներուն ամենէն գեղեցիկներն ու համեղները, աֆրոնի ամենէն յարգին Մալաթիա ընդունակ է արտադրելու: Ս. Փրկիչ վանքին մօտիկ սօսիի խոռոչաւոր ահագին ծառ մը կար, որուն ներքին խոռոչին տրամագիծը 12 ոտք էր եւ արտաքին շրջապատը 45 ոտքի չափ: Դաշտին անմշակ տեղերը եւ լեռները՝ աճող խոտերուն շնորհիւ, համբաւաւոր պանիրը եւ ամենէն փափկաճաշակ քիմքերուն յագուրդ տուող մսացու կենդանիները յառաջ կու գան:

Այրեցեալ դօտիի բոյսերէն զատ բարեխառն դօտիին ամէն տեսակ ծառերը կան:

Մալաթիա կ'արտադրէ մեծ քանակութեամբ ամէն տեսակ բերքեր, ցորեն, գարի, ափսոն, ծխախոտ, շերամի բոժոժ, պտուղներ եւայլն:

Տարեկան միջին հաշուով շրջակայ քաղաքները կ'արտածուի 180·000 լիդր խնձոր եւ տանձ, 12·000 լիդր կտամէջ (ծիրանի), 36·000 լիդր չորցած ծիրան (միշմիշ զապուղը):

1·000 լիդր խողակ կամ շերամի բոժոժ:

20·000 » բրինձ:

100·000 » չամիչ:

10·000 » ափսոնի հունտի իւղ:

100·000 » չոր թութ:

100·000 » խաղողէ եւ թութէ պատտեխ:



50․000 հատ ալժի կամ ոչխարի մորթ եւայլն :

1900-ին 8000 օխա ափիոնն արտածուած է , մինչ աւելի տառջները մինչեւ 48․000 օխա եղած է<sup>1</sup> :

Ասոնցմէ զատ կարեւոր տեղ կը զբաւէին իրրեւ տնտեսութի նիւթ զբտորը , քիթրէն , աղուեամբութը , գորգը , կապերտը , կտաւը , իւղը , պանիրը , ծխախոտը , ցորենը , մեղրը եւ տորոնը :

Այս ամէնը ոչ թէ կ'արտածուին , այլ տեղւոյն վրայ ալ կը սպառին , բացի ափիոնէն , մորթերէն , քիթրէնէն եւ կտամէջէն :

Մասնաւորապէս շատ շեշտուած եւ հաստատուած է Մալաթիոյ ափիոնին ընտիր տեսակէ ըլլալը (ԹՈՐՈՍ ԱՂԲԱՐ , Ա. , էջ 323) :

Մալաթիոյ գաւառին մէջ կը մշակուէին ցորեն , գարի , ծխախոտ , բամպակ , բրինձ , ընտիր միրգեր՝ թութ , միշմիշ , որ փոքր , բայց համեղ ծիրան է , տեսակ-տեսակ տանձեր եւ խնձորներ , խոշորահատ խաղող եւ չամիչ , մասնաւորապէս Պեհեսնէի եւ Ատիեամանի մէջ , խայսի եւ սեւ սալոր եւայլն , որոնց չիրերը շատ երկիրներ ծանօթ են (ԹՈՐՈՍ ԱՂԲԱՐ , Ա. , էջ 323) :

Նկատելով որ Մալաթիացիք կը սիրէին ըմպել օղին եւ դինին եւ համբաւուած էր իրենց գինին երկու հազար տարիէ ի վեր ըստ Ստրաբոնի վկայութեան , նախ ըսենք թէ Մալաթիոյ խաղողները եւ անոնցմէ պատրաստուած ճերմակ եւ սեւ չամիչներն ալ նշանաւոր էին :

Մալաթիա ունէր զանազան տեսակ խաղողներ , զորս կը ներկայացնեմ օգտուելով Թէոֆիլի «Որքն ու իր բերքը , այգեբանական եւ մատենագրական ուսումնասիրութիւն»էն (ԱՄԵՆՈՒՆ ՏԱՐԵՅՈՅՅԸ , 1926 , էջ 26-170) եւ Պէննէեան կարապետ քահանայի ձեռագիր ընդարձակ տեղագրութենէն :

Անոնք կը յիշատակեն հետեւեալ խաղողի տեսակները .

1.— Հաֆի կոան , զոր կը նոյնացնէ Թէոֆիլի զանազան հայախօս գաւառներու , ինչպէս Արարատեան նահանգին մէջ Եգան աչք կամ Եգնակ եւ Թրքախօս կարգ մը գաւառներու մէջ Էօֆիւզ կէօզիւ կամ տանա կէօզիւ եւ տէվէ կէօզիւ կոչուած խաղողին հետ (տես , նոյն , էջ 71) , որ բաց կարմիր գոյն ունէր եւ արմաւէն խոշորահատ : Թէոֆիլի ասոր անունը կը կարծէ թէ Թերեւս Խաֆի ֆերիմ յատուկ անունի ձայնափոխեալն է (նոյն , էջ 79) :

2.— Խաթուն մատ , որ Հիւսնի Մանսուրի , ինչպէս նաեւ Ակնի եւ Հաճընի գաւառներուն յատուկ խաղող էր՝ ճերմակ , արմաւի չափ , երկայնահատ , սրապտուկ եւ նրբամաշկ եւ զոր Թէոֆիլի կը նոյնացնէ Թուրքիոյ զանազան վայրերը մշակուած գատըն-փարմաղըին եւ փարմագ իւզիւմիւի հետ (նոյն , էջ 74) : Պէննէեան քհն . իր ձեռագիր ընդարձակ տեղագրութեան մէջ տիկնամատ կը կոչէ այս խաղողը՝ փակագիծի մէջ խաթուն բարմաղը ձեւով յիշելով զայն :

(1) Սրուանձտեանց (Թորոս Աղբար , Ա. էջ 309) , որ 1878-1880-ի տառնները այցելած է Մալաթիա , կը հաւաստէ թէ տարին առնուազն 120,000 ոսկի հասոյթ կը բերէ ափիոնի վաճառքը :



Ձայն կարմրաթրիկ եւ խոշորապտուղ կը ներկայացնէ :

3.— Կուռեզ, վայրի խաղող, ճերմակ, կլոր եւ ուշ հասուկ, յարգէ ինկած, անշահ, որ անհետանալու վրայ է ըստ Գէորգ Արքեպ. Արսլանեանի :

Թէոդիկ կը կարծէ թէ կուռեզ բառը աղաւաղումն է գորուգին (նոյն, էջ 78) :

4.— Անլի կը հասնէր Հիւսնի Մանսուր. իսկական ճերմակ, կլոր, անալի եւ ուշ հասուկ խաղող մըն է :

5.— Միֆերին Մալաթիոյ յատուկ Թահաննէպի<sup>1</sup> կոչուած դեղնորակ ու սեւ ընտիր խաղողներուն մէկ գունակն է, որ ճերմակ է եւ ուտուելիք : Ասոնք հասնելէ վերջ է որ կը հասնին աթմալին եւ շամբ թրքանուն տեսակները (Թէոդիկ, նոյն, էջ 92) :

6.— Մաչուլը կլոր եւ թանձրամիս խաղող մըն է (Պէննէեան քհն.) :

7.— Շամբ, զոր Թէոդիկ կը յիշէ, ուշ հասնող տեսակ մըն է (տես, նոյն, էջ 82) : Պէննէեան քհն. կլոր եւ ջրուտ կը նշանակէ (Հ. ձեռ., էջ 82) :

8.— Սեւ խաղող մը երկարապտուղ եւ քաղցր :

Տեղական գինին ասկէ կը պատրաստեն :

Ասկէ կը պատրաստեն չամիչ ալ, որուն նմանը այս կողմերը քիչ կը գտնուի (Պէննէեան, նոյն, էջ 82) :

Պէննէեան քահանայ խաղողէն զատ Մալաթիոյ բոլոր պտուղներուն համար կու տայ մանրամասն տեղեկութիւններ, առանձին-առանձին խօսելով անոնցմէ ամէն մէկուն վրայ, ինչ որ հետաքրքրական է եւ կը հաստատէ թէ Մալաթիա մասնաւորապէս պտուղի ինչ առատութիւն ունէր :

Ահա պատուական քահանային տուած տեղեկութիւնները .

Տանձ.— Մանր դեղին տանձը, որ էն առաջ կը հասուննայ, խոշոր դեղին տանձ՝ պինդ, այլ քաղցր, որ աչնան վերջերը կը քաղուի : Եագպէկ, որ ամբան սկիզբը կը հասնի, կիգպէկ՝ ամբան վերջերը, իսկ գըլ պէկի՝ աչնան վերջերը : Երեքն ալ ջրուտ եւ թթուաչ : Ձմրան տանձ՝ մանրիկ եւ քաղցր : Զէլէմ արմուտը՝ իրօք շողգամի կը նմանի մեծութեամբ եւ տափակութեամբ եւ է ջրուտ եւ քաղցր : Հանի համգէ՝ ամենախոշոր, երկայն, կակուղ ու մեղրահամ : Պալ արմուտը՝ կլոր եւ մեղրահամ ու կակուղ, եւայլն : Ասոնցմէ մէկ քանին մինչեւ տարի մը կը դիմանայ առանց վնասուելու ու համը կորսնցընելու :

Խնձոր.— Թեփոտ խնձոր՝ դեղնագոյն, կակուղ ու քաղցր, շըխշըխը՝ շիկակարմիր, երկար եւ անոյշ : Երբ ձեռքիդ մէջ կէտկէտցնես կամ կորես, «շըխշըխ» ձայն մը կը հանէ : Քեալի էլմասըն՝ կարմիր եւ երկայն ու շատ համեղ է. այս խնձորը էն պատուականն է, բայց քիչ կը դիմանայ :

Խնձորներն ալ իրենց տեսակներն ունին դեռ, բայց անոնցմէ եագըլը

(1) Պէննէեան քհնյ. Թահին հապր կը կոչէ այս խաղողը եւ կ'ըսէ թէ իսկագոյն եւ երկարապտուղ է :



ըսուածը ցուցնեմ միայն, որ շատ հետաքրքրական է: Այս խնձորը՝ դեռ աղէկ մը չհասած՝ ծառին վրայ թէ փրցնելով՝ վրան մեկանով կը դրեն ոտանաւոր մը կամ գեղեցիկ խօսք մը եւ կը թողուն 8-10 օրի չափ, որ կեղեւը բոլորովին կարմրանալով գիրերուն տեղը միայն կանանչ կը մնայ, զոր սրբելով, իբրեւ նուէր իրարու կու տան:

Ծիրան<sup>1</sup>. — Երկու տեսակ է՝ պատուաստեալ եւ հասարակ: Պատուաստեալներէն անուանի են կեպուր աշրսը, հաճի գըզ, հաճի խալիլ օղլու եւ եկէն ըսուածները, որոնց թարմը ուտելէ զատ, չիր ընելով կը ծախուի: Ասոնց ինչպէս կեղեւը, նոյնպէս կուտը անուշ ըլլալով կը ծախուի: Վերոգրեալներուն մէջ էն արժէքաւորը կեպուր աշրսը ըսուածն է, շատ մօտ է շատ քաղցր ըլլալուն համար, այնպէս որ մարդ մը հազիւ 15 հատ կրնայ ուտել ատկից: Ինչպէս պատուաստելի, նոյնպէս հասարակի քանի մը տեսակներուն թէ՛ թարմը կ'ուտեն եւ թէ՛ կը չորցնեն: Հասարակ տեսակին կուտերը լեղի կ'ըլլան ընդհանրապէս:

Զում-(գըզըմըզ). — Երկու տեսակ կայ սուլթանի եւ խուտայի (հասարակ). ասկից կը պատրաստեն բէշէլ եւ օշարակ կամ մրգօղի:

Սերկելիլ. — Աս ալ մէկ քանի տեսակ է: Հատը մինչեւ մէկ քաշ կշռող խոշորութիւն ունի: Սերկելիլին թարմը այնքան ուտելու չի դարձ թթուաշ ըլլալուն համար, սակայն ասկէց պատրաստուած կերակուրը ամենապատուական ըլլալով՝ սեղանի վրայ մեծ տեղ կը դրաւէ:

Բալ. — Բալի մէկ տեսակ մը միայն գտնուելով, կ'ուտեն ու մրգօղի ալ կը պատրաստեն:

Դեղձ. — Երեք տեսակ կայ ասկից, որոնք ծանօթ են շամ, հինտ եւ ֆիւնտէպէկ շէֆթալը կ'անուանեն: Քիւնտէպէկ ըսուածը հասարակ տեսակն է եւ մանր, իսկ շամը՝ խաւոտ եւ խոշոր, եւ հինտը անխաւ: Շամ ըսուածին մէջ մինչեւ 100 տրամ կշռողներ կ'ըլլան: Դեղձէն ալ խոշապի համար չիր կը պատրաստուի:

Սալոր. — Սալորի տեսակներն ալ շատ են, ինչպէս պուտիկ սալոր, ճեղքելուդ պէս կուտը մէջէն կը ցատկէ ցամաք ըլլալուն համար: Աս սալորը բնաւ չ'որդնոտիր: Իսթամպուլ էրիկի՝ խոշոր, ջրուտ եւ անոյշ, ֆան էրիկի՝ չիկակարմիր եւ անոյշ: Կարմիր սալոր, ջրուտ եւ անոյշ ու բոլորովին կարս միր: Մընջիկ սալոր, մանր, այլ անոյշ, ձմրան սալոր՝ աչնան վերջերը հասունանալուն համար, ֆերմակ սալոր, կանանչ, երկար եւ անոյշ, սեւ սալոր, երկար եւ անոյշ, ֆէշէ մէմէսի՝ սեւ եւ հաւկիթի խոշորութեամբ, անոյշ, եւայլն, եւայլն:

Սալորներու թացը ուտուելուն պէս՝ չիր ալ կը պատրաստեն, ինչպէս

(1) Մաւաթիա կը նկատուի ծերանին հայրենիքը, թէեւ աւելի հաւանական է որ ան Հայաստանէն տարածուած ըլլայ ուրիշ երկիրներ:

(2) Պատուաստումը հայէ մը եղած ըլլալուն համար:



վերջերս կը պատրաստեն նաեւ պատեղ եւ ուրիշ բաներ ալ :

Թուք .— Մալաթիոյ պարտէզներու պտղատու ծառերուն գոնէ կէսը թթենիներ են : Ուստի արդիւնքն ալ կը համեմատի միւսներու արդիւնքին : Թուքը կը չորցնեն ուտելու եւ օգլիի համար : Իսկ թացը եփելով կը պատրաստեն առատ ուսղ, պատեղ, հատարլիթ (քէսմէճէ) եւայլն : Թուքին կարմիրը հաղուադիւտ է :

Եւ վերջապէս շատ կը գտնուին ընկոյզ, կաղին, կեռաս, նուռ, նուշ, թուզ, եւայլն :

Զմերուկ եւ սելս .— Զմերուկի տեղական տեսակներէն զատ վերջին տարիներս մուտ գտած են ուս եւ քէֆիրտաղ ըսուած տեսակներն ալ : Սեխերէն՝ մինակ շամամը կը գտնուէր առաջ, բայց հիմա տիարպէֆիր ըսուածը եւ ուրիշ աղնիւ տեսակներէն շատ կը ցանուին :

Տումաքէս եւ փաքաքէս .— Հազիւ 40-50 տարի է որ մուտք գտած են հոս : Եւ սակայն երկուքն ալ շատ օգտակար եղած են իրենց կարգին :

Մալաթիոյ մէջ միայն ձիթենի չի հասնիր, ծովէն հեռաւորութեան եւ բարձրութեան համար :

Ծաղիկներ .— Ի մէջ այլոց ծանօթ են վարդն՝ իր տեսակով, թանթըրուենի, մեխակ, յասմիկ, շուշան, մոռ մանուշակ, պապըլիկ (կապոյտ մանուշակ), բեհան, սմբուլ, թաւիշ, կակաչ, անթառամ, հարսնուկ (կէլիմնէֆ չիչէյի) այգազարդ, ասլըիմ մեռնիմ, արեւածաղիկ, մեկոն, ձնծաղիկ, տիկնարիբ (խաթուն քիբրիկի), բաղեղ, եւայլն :

Ասոնք համրելէ եւ նկարագրելէ ետք, կ'արժէ որ մի անգամ այցելենք ու շրջագայինք դաշտն ու պարտէզը : Ծառատանն ու ծմակը, տեսնենք ու վայելենք երփներանգ գոյներով եւ անուշահոտ, ծանօթ ու անծանօթ բազմորակ եւ անհամար ծաղիկներու հրապուրիչ եւ զմայլելի տեսարանները, որոնք կը պարզուին աչքիդ առջեւ : Ծաղիկներ՝ տեղ մը կարմիր, տեղ մը դեղին, վերը ճերմակ, մէջը կանանչ եւ վարը երկնադոյն, անդին գորշ մանրշակագոյն, անդին խարտեաչ եւ խատուտիկ : Հոս՝ բոյլ-բոյլ մեղմաթոյր, հոն՝ դալարադեղ եւ անուշաբոյր : Կարծես գեղանկար գորգեր եւ կապերտներ սփռուած են, որոնց մէջ փաթն ու վրան ո՛րքան թիթեռներ կ'ոստոստեն ու կը թռչկոտին, եւ ո՛րքան մեղուներու տղտղութն ու բզզիւնը կը լսուին : Ի՞նչ հաճոյք չես զգար հապա երբ կը տեսնես ծառերու ճիւղերէն կոյզ-կոյզ կախուած պտուղները, որոնք կը հրապուրեն քեզ իրենց մօտենալու, թող թռչնոց կտցահարելէն թափածները, որ մարդոց ոտքերուն տակ կը ճզմուին, հաւաքէ՛ սաղարթադարդ ճիւղերու փաթէն թափի թափ դլուխիդ եւ գոյգ ինկածները, որոնք շատ խնամով պիտի քաղուէին յետոյ պարտիզպանին կողմէ» :

Ինչպէս կը տեսնուի, Մալաթիա իսկապէս պտղառատ երկիր մըն է, ճոխ բուսականութեամբ օժտուած :

Իր պտուղները իրենց տեսքով, համեղութեամբ, խոշորութեամբ, գե-



դեցկութեամբ եւ առատութեամբ անգերադանցելի են :

Հայաստանի ներքին դաւառներուն համար, ձմրան եղանակին մէջ մասնաւորապէս, Մալաթիոյ կը կազմէր չոր միջոցներու անսպառ շտեմարան մը :

Համբաւաւոր էին Մալաթիոյ, մանաւանդ խոշորահատիկ, մստ ու քաղցր, դեղնորակ չամիչը, ինչպէս նաեւ խաղողի հիւթէն շինուած պաստեղը նշոտ, բլիթը, շարսցը, եւայլն (Ծոցիկեան, ԱՐԵՒՄՏԱՀԱՅ ԱՇԽԱՐՀ, էջ 378) :

Է.

## ԿԵՆԴԱՆԱԿԱՆ ՀԱՐՍՏՈՒԹԻՒՆ

ԵԻ

### ԱՆԱՍՆԱՊԱՀՈՒԹԻՒՆ

Մալաթիոյ գաւառին կեդրոնական լեռը Պէկտաղն է, եւ ունի այն նըշանակութիւնը ինչ որ Արարատը ունի Այրարատեան նահանգին եւ Արգէսը՝ Կապադովկիոյ համար :

Պէկտաղը, որուն ստորոտն է Մալաթիա քաղաքը, մշակելի քիչ հող ունի, բայց Պոնազալցիներ, Գարակէօղլիներ եւ ուրիշներ ամէն կողմ այգիներ կը մշակեն :

Խիստ անուանի են այս լեռան արօտավայրերը, մարմանդները եւ կաղնիի ու ցրդիի խիտ անտառները, բազմերանդ ու երփնագոյն ծաղիկներով ու խոտերով : Գարնան երբ ալ ձիւները կը հալին, խոտերը իրենց զլուխները գետինէն դուրս կը հանեն : Այս լեռան վրայ կու գան Ալեքան, Մոլուքան, Թաշեքան եւ Խտրասոր ըսուած վաչկատուն քիւրտ ցեղեր ու գիւղաբնակներ ուր 4-5 ամիս մնալով, զով ու առողջարար օդը ծծելէ, վճիտ ու սառնորակ աղբերակներու եւ առուակներու ջուրերը խմելէ եւ իրենց բաղմաթիւ տաւար եւ ոչխարներն արածելէ ետք, աշնան ցուրտ հովին փչել եւ ձիւներն գալ սկսելուն պէս՝ կը չուեն կ'երթան իրենց ձմերանոցները :

Տեսնուեցաւ թէ Մալաթիա եւ իր շրջակայքը ճոխ բուսականութիւն ունին, շնորհիւ ջրառատ հողին եւ նպաստաւոր կլիմային :

Նոյնպէս արօտատեղիներու առատութիւնը մեծագոյն նպաստն է արջաուարուծութեան, որ զարգացած էր շատ : Արգէն յիշուեցաւ թէ Մալաթիոյ



խոստառատ դաշտերուն վրայ կ'արածէին մտացու անասուններ :

Հոգելոյս Կարապետ քահանայ Պէննէեան իր համառօտ տեղադրութեան մէջ Մալաթիոյ կենդանիներու համար բացառութիւն մը ըրած է թուելով թուր կենդանիները անոնց ամէն մէկին ածական մը տալով (Համ. էջ 70-1), մինչ իր ընդարձակ գործին մէջ սեղմ տողերով ընդհանուր գաղափար մը կու տայ եւ զանց կ'առնէ կենդանիներու վերադիրները :

Նախընտրեցի այդ տողերը արտագրել վասնզի Հ.ի մէջ իր պճնադար-դեալ տողերն ոչ մէկ Մալաթիոյ յատուկ տեղեկութիւն ունէին, քանի որ գրեթէ բոլոր Փոքր-Ասիոյ կենդանիներն էին, որ կը թուէր, ինչ որ աւելորդ աշխատանք մըն էր եւ ոչինչ կը պարունակէր հետաքրքրական :

Ահա այս ամփոփ բայց խղճամիտ տողերը, որոնք բաւական են ամբողջական գաղափար մը տալու համար. —

«Մալաթիոյ գաւառին իւրաքանչիւր կողմը լիք է դուար ու ոչխարներով : Կան հեծանելի եւ բռնակիր ձիեր ու ջորիներ ընտիր տեսակէն : Կովերու տեսակները այնքան գովելու չեն դար : Դաշտերու մէջ ոչխարը, իսկ լեռներու մէջ այծը յարգի է : Վայրի կենդանիներէն կը գտնուին գայլ, արջ, խոզ, ոզնի, նապաստակ, աղուէս, այծեամ, փորսուղ, սանսար, վայրի կատու, եւայլն :

Ընտանի թռչուններէն, հաւ, բազ, սագ, սիրամարդ, հնդկահաւ, առաւրակ, աղաւնի, եւայլն գտնուելուն պէս՝ վայրի թռչուններէն բազ, սագ, կաքաւ, կարապ, արծիւ, բազէ, շահէն, ցին, աղաւ, անծեղ, յոպոպ, փայտփոր, կեռնեխ, սարեակ, սոխակ, ծիծեռնակ, ճնճղուկ եւ բու : Ինչպէս այլ տեսակ յափշտակիչ եւ երգող թռչուններ կը լեցնեն լեռներն ու դաշտերը :

Կը գտնուին միջատներ ալ, ինչպէս նաեւ սողուններ : Օձ, մողէս, դոգոշ, կրիայ, գորտ, խխունջ, կարիճ, տղրուկ, ճպուռ, ծղբիղ, մեղու, մըրջիւն, դատիկ, շերամ, թիթեռ, ճանճ, իրենց համասեռներով ու տեսակներովը, եւայլն :

Գոմէշ եւ ուղտ քիչ քանակութեամբ կը գտնուին : Ուղտը կը պահեն Սինանցիներ եւ Էօրենցիներ միայն : Դաշտեցիներ առհասարակ կը պահեն բռնի համար էշ, իսկ լեռնցիներ՝ ջորի : Էշի եւ ջորիի գործը լեռներու մէջ յաճախ եզները կը կատարեն (Պէննէեան, Հ., էջ 77) :

Ինչ որ առանձնապատուկ է Մալաթիոյ, Պէկտաղի ամէն կողմ կատարուած մեղուարուծութիւնն էր որ ոչ միայն քիւրտ լեռնարնակները կը կատարէին, այլ նաեւ քաղաքացիք, վասնզի երբ թութի քաղցուն (չիրէ) կը փրուէր տանիքներու վրայ, մեղուները չջնջելու համար, քաղաքացիք ալ իրենց փեթակները կը փոխադրէին հոն, ուր մեղուներ հիւթալի ծաղիկներէն առատ մեղր կը պատրաստէին, այնպէս գեղեցիկ ու համեղ, որուն հետ եւ ոչ մէկ լերանը կամ տեղինը կրնայ համեմատուիլ (Պէննէեան քահանայ, Ը., էջ 28-29) :

Պէկտաղի շուրջ բոլոր գտնուող արօտավայրերը իրենց գեղեցիկ խոտե-



բով եւ բուսականութեամբ կը նպաստէին ոչ միայն մեղրին համ ու հոտ տալու, նոյնպէս անուշահոտ եւ համեղ ճաշակ դարձնելու ոչխարներու միտը, իւղը, պանիրն ու կարագը, որոնք շատ անուանի էին (նոյն, Ը., էջ 29):

Նոյնպէս նշանակելի է որ հակառակ անոր որ Մալաթիա ցամաքային քաղաք մըն է, սակայն բնակչութիւնը զրկուած չէր ձկնեղէններէ, որոնք մասնաւորապէս նահանգին արեւմտեան սահմանը գծող Եփրատ մեծ գետէն կը ստացուէին:

Ըսուեցաւ արդէն վերը թէ Բալուցի լաստավարներ երբեմն գըսդա (սոխի մէկ տարեկանը) եւ փարջ փոխադրելու ատեն, ուռկան կը ձգէին լաստի ետին եւ պատուական ու համեղ ձուկեր որսալով կը բերէին Մալաթիա եւ շրջակաները, ու կը ծախէին:

Եփրատէն դատ Մելաս (Թոխմա) գետն ալ ունէր առատ ձուկ: Անկէ կ'որսային մինչեւ 20 լիդր կշռող համեղ ձուկեր (նոյն, էջ 39):

Համեղ ձուկեր ունէին նաեւ Սուլթան Սու եւ Էտեմենտիկ, որոնց առատ եւ յորդ ջուրերը կը թափին Մելասի մէջ:

Տէր Մեսիա գետը, Քարանց Այտին մօտերը, տարուան ջրառատ եղանակին մէջ, կ'ունենար ահագին քանակութեամբ ձուկ: Եւ գետը, ժողովուրդին պատեհութիւն կու տար առատ ձուկ որսալու միայն 11 օր, Ապրիլ 7-էն մինչեւ 18:

Երբոր այդ տարապայման ձկնառատութեան որոշ շրջանը կազմող 11 օրը կը լրանայ, չի գիտցուիր ուրիշ<sup>6</sup> եւ ի՞նչպէս, հսկայ օձ մը կու գայ իբր թէ ջուրերուն հետ, եւ ձուկերը, իրենց ահէն, կ'աներեւութանային իսկոյն: Ու բնական այս յոյժ տարօրինակ երեւոյթը, ամէն տարի, նոյն վայրին ու եղանակին եւ միեւնոյն օրերուն մէջ, կը կրկնուէր, դարմանալի կանոնաւորութեամբ մը: Միայն ձկնորսները բոլոր պարտին իրենց ձեռք բերած ձուկերէն հաւասար բաժին ունենալ, եթէ ոչ կը տուժեն, կը պատժուին (Ս. Մ. Ծոցիկեան, ԱՐԵՒՄՏԱՀԱՅ ԱՇԽԱՐՀ, էջ 373):

Պէննէեան քահանայ աւելի իրապաշտ եւ աւելի դերձ նախապաշարումներէ նոյնը կը հաստատէ գոհացուցիչ բացատրութիւն մը տալով այս անսովոր երեւոյթին (տես Ը., էջ 49-50), որ արդարեւ հետաքրքրական է: Պէննէեան քահանայի համաձայն Շահնախանի աղբիւրը, որ կը բխէր համանուն ձորակին մէջ, կը հոսի քարերու փաթէն ծակէ մը տարուան ամէն եղանակին ալ միեւնոյն առատութեամբ, առանց մէկ ձուկ իսկ դուրս տալու, բայց դարնան մէջտեղին ամսուան մէջ 8-10 օր միայն, 28-30 սանթիմ երկարութեամբ միօրինակ ձուկի վտառ մը կը հոսի շարունակ եւ յետոյ բոլորովին կը դադրի: Կ'ըսուի թէ ստորերկրեայ ընդարձակ աւաղաններու կամ լիճերու մէջ գտնուած ձուկերն կը տեղափոխուին. կը պատահի որ անոնց մանրները դուրս խուժեն այսպիսի ասիւրէն կամ ծակերէն (Պէննէեան, Ը., էջ 50):



## Ը.

## ՀԱՆՔԱՅԻՆ ՀԱՐՍՏՈՒԹԻՒՆ

Ինչպէս Փոքր Ասիոյ ամէն մասերուն, նոյնպէս Մալաթիոյ ընդերքը տեսակ տեսակ հանքեր ունէր, սակայն դժբախտաբար դարերով դրեթէ անոնցմէ ոչ մէկը չահագործուած էր, մասնաւորաբար փոխադրութեան միջոցներու չգոյութեան պատճառով:

Արդարեւ, «Քաղաքէն ոչ շատ հեռու կը գտնուին դանազան տեսակ քարեր, բորակ, հանքածուխ: Իսկ հեռուները՝ պղինձի հանք, երկաթ, եւայլն, զորս կը նշանակենք համառօտակի, եւ նախ քարը:

Սալաքար կամ թերթաքարի ազնիւ մէկ տեսակը կայ Օրտուղի հիւսիսարեւելեան կողմը դաշտին մէջ խաւ-խաւ: Աս քարով կը ծածկեն աղուղաներ: Խոշորներն ու թանձրները իբրեւ կամուրջ կը ձգեն առուակներու վրայ, եւ տուններու դաւիթներն ու սրահներն կը սալաշատակեն» (Պէննէեան, Ը., էջ 33):

Մալաթիոյ մէջ կար նաեւ ադահանք մը: Աղի լիճի մը ջուրը ամառը կը շոգիանար եւ տակը նստած աղէն տարեկան մէկ միլիոն օխայի չափ կը ժողվրէր եւ կուսակալութեան մէջ եւ շրջակայքը կը սպառէր, ինչպէս կը տեսնուի Նեճմեստին Սամիի ԳԱՄՈՒՍ ԻԻԼ ԱԼԱՄԻ մէջ:

Այս ընթացիկ եւ առօրեայ գործածութիւն ունեցող եւ դիւրաւ ստացուող եւ մատչելի հանքային մարմիններէն զատ Մալաթիոյ ունէր Պէննէեան քահանայի ընդարձակ տեղադրութեան համաձայն նաեւ՝

«Երկանաքար.— Գլխաւորաբար կը գտնուի Գարափէօյի տակ Պալլը-չայի եզերքը, Ս. Լուսաւորիչ վանքին քաղաքակողմեան ծիրանեաց պարտէզին վերեւ ու վանքէն Բունար պաշը երթալու ճամբուն խճուղիին միացած տեղը: Աս երեքէն գլխաւորը Գարափէօյինն է, անոր դալլախաղի բաղադրութեան շատութեան պատճառաւ:

Զօդաքար-յօդաքար.— Ասիկա խնկադոյն եւ սլաղիկի պէս դիւրափրշրելի քար մըն է, որ առատութեամբ կը գտնուի Պէկտաղի Ս. Կարապետ ըստած կիրճին մէջ: Աս քարը կը գործածեն երկաթագործներն ու դարբինները, երբ բաղադրելիք պողպատը կամ երկաթը հրաշէկ դառնան, իրարու վրայ բերելէ ետք, այս քարեփոշիէն վրան ցանելով՝ կ'երեւցնեն լաւ մը, որով կը հալի ու կը յօդէ:



**Չեչափար.**— Երկու հանք կայ չեչափարի, մին ֆլեաֆին բլրոյն վրայ եւ միւսը Քէօնաիւպէկի վերեւ Տէր Մեսիհի եղերքը: Ասիկա ծակոտկէն եւ ոսկրադոյն ըլլալուն համար քեմիւֆ քար ալ կ'ըսուի, եւ կը դործածուի քարաշէն հաստատութիւններու զմբէթներն ու կամարները ծածկելու:

**Հրափար** (կրաքար կամ օջախի քար).— Կը գտնուի վերին Պանագրի տակ Խորաքա յիտակի եղերքը եւ ուրիշ տեղեր ալ: Աս քարը մութ մոխրագոյն եւ աւաղախաոն է: Ասկէ կը շինեն փուռեր, օջախներ եւ ասոնց պատուանդանաքարն ու երախաներու տակ փռուած հողը տաքցնելու համար անուակաձեւ քարը: Այս քարը մութ մոխրադոյն ու աւաղախաոն է, եւ հարիւրաւոր տարիներ կը գիմանայ կրակին:

**Որձափար** կամ որմնափար.— Գլխաւոր երեք հանք կայ ասկէց, մին՝ Չամաչանփի, մին՝ Երխըր Խանի եւ միւսն ալ Մադրապ կամ Կելիննիկ Թեփեսիի մէջ: Առաջին երկուքը հիմերու, պատերու, խի վերջինը, կապտագոյն, եւ կամարներու յարմար:

**Մարմարիոնի ճերմակ** եւ լաւ տեսակը կը գտնուի Չէօշնիւկ ըստւած տեղոյն շուրջը առատօրէն:

**Կրափար.**— Թէեւ ամէն տեղ առատօրէն կը գտնուի, բայց գիւրաւ պատրաստուելու համար Պէկտաղի երեսը գտնուածները կը դործածեն, որ թերթ-թերթ պառկած է հոն:

**Գան** կամ բուռ.— Ասոր մէկ ընդարձակ խաւը կը գտնուի Խաթուն Սուի մօտերը՝ բլրակի մը կուշտը:

**Բորակ.**— Թէեւ շատ մը տեղեր կը տեսնուին ասկէց, բայց աւելի կը գտնուի հին քաղաքի եւ Իզօղլուի մէջ. անկէ կը պատրաստեն այս գաւառին մէջ սպառած բոլոր վառօդը:

**Քարածուխ** (հանքածուխ).— Որչափ ուրիշ տեղեր ալ կան, աւելի մէկ ընդարձակ խաւը կը գտնուի Խաթուն Սուի ճամբուն վրայ՝ համանուն վտակին եղերքը:

Ըստ Մկրտիչ Որբերեանի (ԲԻԻՐԱԿՆ, 1900, էջ 70) Մալաթիայէն 3 մղոն դէպի հիւսիս արտի մը մէջ հանքածուխ տեսնուած է 1900ին, նոյնիակ հողին երեսը: Դժբախտաբար անոր կարեւորութիւնը ըմբռնող չէ եղած, եւ շահագործելու փորձ անգամ չէ կատարուած:

Կ. Պոլսոյ թուրք ամենէն կարեւոր թերթերէն մին՝ Ճիւմհուրիյէթ, 26 Հոկտ., 1953ին (թ. 10502) իբր նոր յայտնութիւն մը կը հաղորդէր թէ Հեքիմ խան գաղաթին ենթակայ Մեկիլմէ գիւղին մէջ շատ հարուստ հանքածուխի խաւ մը գտնուած է, զոր շահագործել կարելի պիտի ըլլա՞յ, չենք դիտեր: Նաեւ երկաթի նշաններ տեսնուած են Պալիան գիւղախմբի Պուտալա եւ Կէօշենէ գիւղերու փաթ (°) գտնուող երկար բլրաթեւին վրայ:

**Պղնձահանք.**— Խալիքանի եւ Ճենպէկ լեռներու մէջ կայ պղնձի հանք մը, որ այժմ չի շահագործուիր:

1862ին Խարբերդի կուսակալ Իզդէթ փաշա փորձած է այս հանքը շա-



հազորձել եւ վարակեալներ ու զործիքներ բերած եւ երեք տարիի չափ բանեցընելէ ետք, երեսի վրայ ձգուած է: Բայց յետոյ եւզակիացի Ասլանեան Մանուկ շահազորձել ուղեւորվ, երկու տարի եւս բանեցուցած եւ առանց օգտըւելու թողած է (Պէննէեան, Հ., էջ 32):

Հաւանօրէն այս հանքին կը վերաբերէր 1917ին հրատարակուած այն կայսերական իրաւէն, որով կը ջնջուէր Մալաթիոյ Թեփեխան վայրը գտնուող եւ 1289 Ջիլհիճէ 25 (1872-3) թուական Փերմանով Սարաֆ Ասլան Օղլու (Ասլանեան) Գէորգ եւ Սամանձը Օղլու (Սամանձեան) Գէորգ էֆենտիներու տրուած օղիինձի հանքին մենաշնորհը (տես ԺԱՄԱՆԱԿ օրաթերթ, 15 Փետրուար, 1917)<sup>1</sup>:

Հաւանական է որ Մալաթիայի շուրջ, այս հանքերէն դատ՝ աւելի կարելոր՝ քարիւղ ալ գտնուի, ինչպէս վերը յիշուեցաւ:

Քեքլիկ Սուլու կոչուած գետակը հաւանօրէն քարիւղ պարունակող հողամասէ մը կ'անցնի, քանի որ եթէ լուցկի մը ձգուի ջուրերը, կը վառին (տես Ս. Մ. Ծոցիկեան, ԱՐԵՒՄՏԱՀԱՅ ԱՇԽԱՐՀ, էջ 375):

Թրքական Ճիւմհուրիյէթ լրագիրը իր 16 Նոյեմբեր 1953ի 10523 թիւին մէջ կը հազորդէր թէ Ատիեամանի եւ Քահթէ գաղայի միջեւ Աղվանտիք գիւղին մէջ հարուստ քարիւղի երակ մը գտնուած է:

Եթէ ճիշդ է թուրք լրագիրին այս տեղեկութիւնը, կը հաստատուի, թէ Մալաթիոյ շուրջը քարիւղի երակներ կան, որոնք եթէ շահազորձուին, կըրնան երկրին բարգաւաճման նպաստել:

Նոյնպէս թուրք թերթերը 1955ին կը ծանուցանէին թէ նահանգին բազմաթիւ շրջաններուն մէջ այլազան հարուստ հանքերու երակներ գտնուեցան: Ասոնց կարգին՝ Բէօթլիւրկէի Թեփեհան աւանին մէջ հարուստ ոսկեհանք մը գտնուեցաւ եւ հանածոները Անգարայի Հանքային Հետազօտութեան Խնամարարութիւնը զրկուեցան, քննելու համար: Քրոմի, կասպարի, մանկանէզի, արսենիքի, զինկի, երկաթի եւ քարիւղի հանքեր եւս գտնուեցան նահանգին մէջ:

Եթէ բոլոր այս դիւտերը հնարուած չեն Ամերիկացիներու ուշադրութիւնը դարձնելու համար Թուրքիոյ վրայ եւ անոնց տոլարներուն մօտենալու խայծեր չեն, ցոյց կու տան թէ Մալաթիա հանքերով շատ հարուստ հողամաս մըն է:

Այնպէս որ կարելի է ըսել, որ եթէ Մալաթիոյ հողին երեսը հարուստ է իր բարեբերութեամբ, նաեւ հարուստ է հողին ընդերքը հանքային հարուստութիւններով, որոնք դժբախտաբար չեն շահազորձուած մինչեւ հիմա:

(1) Հաւանօրէն սխալ մը կայ, վատնողի ինչպէս տեսնուեցաւ, Եւզակիացի Ասլանեան Մանուկ ունէր այս տեսակ մենաշնորհ մը:



## Թ.

## Կ Լ Ի Մ Ա Յ

Հայաստանի հարաւային կողմը բնորոշուած է երկրին միւս մասերէն իր կլիմային բոլորովին առանձնայատուկ յատկութիւններով, Միջերկրականի հովերու աղբեցութեան տակ (հմմտ. Ա. Ալպոյաճեան, ՊԱՏՄՈՒԹԻՒՆ ՀԱՅ ԳՐԱԿԱՆՈՒԹԵԱՆ, Ա. հտ., էջ 42) :

Այս նպաստաւորուած դօտին մաս կը կազմէր Մալաթիա, որուն կլիմային եւ առողջապահական պայմաններուն մասին զժրախտարար իրարու անհամաձայն տեղեկութիւններ գրուած են : Հետեւաբար եթէ իրար հակասող տողեր տեսնուին, այս մասին պատասխանատուն այս տողերը գրողը չէ, այլ՝ իր աղբիւրները :

Հնազոյնը այդ աղբիւրներուն, զոր ես տեսած եմ, Հ. Ղուկաս վրդ. Ինճիճեանի ԱՇԽԱՐՀԱԳՐՈՒԹԻՒՆ ՉՈՐԻՅ ՄԱՍԱՆՅ ԱՇԽԱՐՀԻ հատորներու առաջինն է, որ նուիրուած է Հայաստանի, եւ տպուած՝ անցեալ դարուն ըսկիդրները (1806) : Հոն (էջ 321) կը կարգանք թէ «Յրտութիւն օդոյ Մալաթիէ քեմիս սաստիկ է ի ամերայնի» :

Հաւանօրէն զիրքէ մը քաղուած այս տեղեկութիւնը թերեւս չափազանցութիւն մըն է կամ ասոր հակառակը ըսողները կրնան տարրեր չափանիչով մը դատելով Մալաթիան բարեխառն դաւառ մը նկատած ըլլալ, բայց Մալաթիոյ կլիմային մասին բոլոր խօսողները — տեղացիներ ըլլալով իսկ — իրարու համաձայն չեն :

Այսպէս, ժամանակակից Մալաթիացիներէն Յակոբ Աղբլբութուսը<sup>1</sup>, բնիկ Մալաթիացի, 1881ին կը գրէր թէ Մելիտինէ քաղաքը 1839էն առաջ «միմեանցմէ երկու ժամուան համբայ հեռաւորութեամբ երկուքի բաժնուած էր, վարի քաղաք կամ հին Մելիտինէ, որ հին դարերու անթիւ յիշատակներով լի ըլլալէ ի գատ, կլիման եւս չոր ու առողջ է եւ ծառեր բնաւ չկայ : Վերի քաղաք կամ Ասպգէ, որոյ կլիման քէեւ խոնաւ, բայց անմիան պարտէզներով, գուարնալի աշգիներով, անուշ պտուղներով, վնիտ ու յստակ

(1) Այս անձը աշակերտած էր Էջմիածնի Գէորգեան Ճեմարանին : Յետոյ իր մականունը Ագլեանի վերածած է : Եղած է 1908-ին, Սահմանադրութենէն ետքը, Ազգ. Ժողովի մէջ Մալաթիոյ երեսփոխան :



աղբիւրներով, գետերով, գետակներով եւ այլ բերք ու բարիքներով լի է» (ՄԱՍԻՍ, 1881, թ. 2845) :

Ուրիշ Մալաթիացիներ ալ, որոնք առիթ ունեցած են խօսելու Մալաթիոյ կլիմային վրայ, միշտ իրարու համաձայն չեն, բայց աւելի գովեստ ունին քան դժգոհութիւն կլիմայէն :

Հետեւաբար թերեւս դժուար պիտի ըլլայ հաշտեցնել իրարու անհամաձայն այս տեղեկութիւնները, որոնք Մալաթիոյ կլիմային համար տրուած են, սակայն պիտի ջանանք դոնէ դանոնք ներկայացնել, ընթերցողին թողլով եզրակացութիւններ հանել :

Նահատակ Կարապետ քահանայ Պէննէեանի, որ յայտնի է թէ մեծ սէր ունի իր ծննդավայրին նկատմամբ եւ իր կարողութեան սահմանին մէջ եւ իր բմբռնումներուն համաձայն, հնարաւոր խղճատութեամբ, ինչպէս բացատրուած է վերը, երկու անգամ, առաջին անգամ՝ 1899-ին եւ երկրորդ անգամ 1912-ին, կարեւոր յաւելումներով եւ սրբագրութիւններով պատրաստած է երկու տեղագրութիւններ, որոնց առաջին համառօտին մէջ<sup>1</sup> (էջ 24) կը գրէ թէ «Մելիտինէ գաւառակի թէ՛ կեդրոնական մասին (ֆաղափին) եւ թէ՛ գիւղերու կլիման է բարեխառն, գեղեցիկ եւ առողջարար : Կլիմայի սոյն հանգամանաց գլխաւոր պատճառն է հիւսիսային հեղաշունչ եւ զովարար գեփիւռը եւ Տաւրոսի լեռնաշղթայքը, որ շրջապատած են ամբողջ գաւառակը, արգիլելով խորշակին եւ ցուրտ քամիին, որ դուն ուրեք շարժեն իրենց թեւերը այս գաւառակին վրայ, որով հոս ոչ ամառը խիստ տաք եւ ոչ ալ ձմեռը խիստ ցուրտ կ'ըլլայ, այլ տարւոյն չորս եղանակներն ալ կանոնաւոր պարբերութեամբ մը կը յաջորդեն իրարու :

Բայց պէտք չէ մոռնալ թէ՛ քաղաքին, արուարձանաց, ինչպէս նաեւ Դիլիկի, Օրորգրի, Վերին Պանաղըի, եւայլն օդը՝ բաղդատմամբ միւս տեղերու՝ խոնաւ ու ծանր է : Ուստի այս տեղերը թէ՛ խիստ ծառայից եւ թէ՛ խոնաւ են, ուստի անպակաս են յօդացաւ, թանջք (մայասըլ), տենդ (սըք-մա), աչացաւն, եւայլն :»

Պէննէեան քահանայ իր ընդարձակ դարձին մէջ (էջ 26) նոյնութեամբ առած է այս տողերը հազիւ գրիչի պզտիկ հպումով :

Գ. Մելիտինեցի, որ նոյնպէս տկարութիւններ ունի հանգէպ իր ծննդավայրին, կը գրէ թէ «Մալաթիա իր աշխարհագրական դիրքով մօտ լինելով Միջերկրականին, օժտուած է բարեխառն կլիմայով մը : Տարուան չորս եղանակները միայն ամիսներու անուններով կամ օրացոյցի մատնանշումներով չէ որ կ'որոշուին, այլ անոնց մուտքը բնականօրէն կը զգացնէ մարդոց՝ եղանակի փոփոխութիւնը :

Շատ տեղեր կան ֆարաէսի վրան, որ գարնան եղանակին կարծես ամեռ

(1) Մալաթիոյ տեղագրական եւ աղագագրական աշխատանքութիւն, տպ. 1954-ին՝

Պէտրոս թ :



է որ կը շարունակուի, կամ ամառ ու աշունը խառնուած են իրար: Այսպէս չէ սակայն Մալաթիոյ կլիման: Փոքր Հայքի այս դրախտավայր քաղաքին մէջ երբ գարունը գայ, *մարդիկ կը զգան եւ կ'ապրին որպէս գարուն*, որովհետեւ եղանակի մուտքին հետ անյապաղ բոլոր դաշտերը կը կանանչան: Արեւի մեղմ ճառագայթներուն տակ յդի ու յուրօրի հողի ծոցէն հագարաւոր բոյսեր կը բողբոջեն, պտղատու ծառաստաններ գոյնգոյն շապիկներ կը հագնին, սար ու ձորեր ծաղկի բոյրով կ'օծանուին, մէկ խօսքով, ողջ բնութիւնը կ'առնէ գեղածիծաղ ու հանդիսաւոր երեւոյթ մը, որ տօնակատարութիւնն է, կենսատու մուտքը գարունին:

Այսպէս նաեւ տարուան միւս եղանակները, որոնք իրենց մուտքը գգալի կը դարձնեն իրենց մասնայատուկ գոյնով, համով ու հոտով, առանց իրարմէ ժամանակ գողնալու: Եթէ պատահի որ այսինչ կամ այնինչ եղանակը իր սահմանէն դուրս ելլէ, կամ օրինակ, ամէնը իր մետասաներորդ ժամուն պահած ձիւնն ու կարկուտը տեղայ աստուածային օրհնութեամբ յդի գարնան գլխուն ու քօշնեցնէ կոկոնն ու ծաղիկը, քր գիւղացիին յոյսն ու արեւն են, բարի ու հաւատաւոր ժողովուրդը երկնից նզովքը կը համարէ այդ, ու կը կրկնապատկէ աղօթքն ու աղաչանքը աղէտի վերացման, չփացման համար:

Այժմ աւելի քան երբեք հասկնալի կը դառնայ, թէ ինչո՞ւ բանաստեղծ Ռուբէն Որբերեան<sup>1</sup> իր «Գիւղիս ճամբան» բանաստեղծութեան մէջ Մալաթիան կ'անուանէ «*կանաչի աւազան*», բառին լայն իմաստով:

Իրաւ ալ, Մալաթիան բարեխառն կլիմայի չորս կանոնաւոր եւ նշգրիտ եղանակներն ունի, պտղատու անվերջ ծառաստաններ, մշակելի առատ հողեր (ինքնաբաւ), նոյնքան առատ ջուրի երակներով ակօսուած եւ այս բոլորը պարսպուած երեք կողմէն երկնասլաց լեռներով ու մէկ կողմէն եփրատ գետով» (ՆԱԽԺԻՐՆԵՐ, էջ 23-24):

Բրոֆ. Մկրտիչ Որբերեան, նոյնպէս Մալաթիացի, չորրորդն է Մալաթիան տեղագրողներուն, որ կը խօսի դաւառին կլիմայի վրայ, եւ ինչպէս պիտի տեսնուի, բաւական տարբեր բաներ կ'ըսէ:

Անիկա ալ կը հաստատէ խոնավութիւնը.—

«Ծառերու խտութիւնն ու ջուրերու առատութիւնը միշտ խոնավ կը պահեն մթնոլորտը:

Յուլիսի մէջ իսկ բացօթեայ տեղ պառկող մը առաւօտուն վերմակերեսը քօնուտ պիտի գտնէ...:

Պէտք է ըսել թէ սառնորակ աղբիւրները ամառուան ու վառելանիւթի առատութիւնը ամառուան մէջ տանելի կ'ընեն բնութեան սոյն հակոտնեայ խտութիւնները:

Օդային շարժում չեղած ատեն, ծուխն ու փոշին ծառերուն փաթ կը կենան, անանկ որ, դուրսէն դիտող մը պիտի խորհի թէ սոյն նիւթերէն վրա՞նք

(1) Սխալմամբ «Բրոֆ.» տպուած է այս բառը:



մը քաշուած է անտառին վրայ :

Օդը առողջարար է, քէեւ լեռնային մթնոլորտի մը պէս ազատ շարժում չունի, սակայն ծառերու արտաշնչումը, կենդանիներուն եւ այս վերջիններու արտաշնչումը բոյսերուն կենսաւէտ ըլլալուն բնական օրէնքովը՝ մարդիկ եւ կենդանիներ առոյգ, խոշոր՝ ինչպէս նաեւ ծառերը հսկայ են :

Կենդանական գարշահոտութիւններէն մթնոլորտը ազդուած չեա գըտներ, որովհետեւ բնակարանները ցրուած են եւ տեղը ընդարձակ է :

Կը պատմուի ասկէ կէս դար առաջ<sup>1</sup> կանգուն-կանգուն ձիւն տեղալ սովորական բան է եղեր, մինչ հիմա խիստ հազուադէպ :

Տարուան չորս եղանակներն ալ, առանց իրարու սահմանները ամարկելու, իրենց յատուկ բերելոյթներով կու գան ու կ'երթան» (տես ԲԻԻՐԱԿՆ, 1900, էջ 69-70) :

Մալաթիացիներու այս չորս վկայութիւնները, որոնք իրարու կը նմանին, տարբերութիւններով, կը ժխտեն Սրուանձտեանցի կարծիքը (ԹՈՐՈՍ ԱՂԲԱՐ, Ա., էջ 315), որ շատ աննպաստ արտայայտուած է Մալաթիոյ կլիմային եւ անոր հետեւանք տեղւոյն առողջապահական վիճակին վրայ :

Տեսնենք թէ ի՞նչպէս կ'արտայայտուի այս եկեղեցականը, որ գրեթէ Հայաստանի եւ Փոքր Ասիոյ բոլոր կողմերը շրջած է եւ ուսումնասիրական աշխարհով դիտած եւ զննած է :

«Ես, կ'ըսէ Սրուանձտեանց, որ ոչ ծովէն ու ցամաքէն, ոչ Զէրփէզէն ու Քրդէն, ոչ տքնելէն եւ քրտնելէն չէի տկարացած, Մալաթիոյ մէջ օրէ օր, ժամէ ժամ, վայրկեանէ վայրկեան անգամ զգալի ծանրութիւն մը եւ տկարութիւն մը կը զգամ : Բոլոր քաղաքը հիւանդ է, ծառոց խտութենէն օդ չի խաղար, ջրոց շատութենէն եւ լեռան ստորոտը շինուելէն՝ խոնավութիւն կայ, արջառոց հիւանդութեան կոտորած՝ չորս կողմը սառակեցրով լցած, ոչ ոք է որ դանոնք թաղէ, արեւի կիզիչ, աղբ եւ աղբիւս, փորտախիք եւ կղկղանք, խոտերու եւ միրգերու ապականած վիճակը ամէն տեղ թոյն կը սփռեն, բնակիչք զանազան ախտից բռնուած, մարդ չկայ, որ դոնէ տենդ չունենայ, հիւժողականն, վերեմն, տեղական ախտից կարգին է. ո՞վ կրնայ ասոնց հասկցնել առողջապահական զգուշութիւնները, օրէնքները : Աստուծոյ հակառակ խօսիլ էր, եւ թէպէտ Մեմլեֆեթ հէֆիմի ալ ունէին, բայց կը դանդատէր՝ թէ երբեք ըսածներս ուշադրութեան չեն առնուր : Փախչիլ որոշեցի եւ աճապարեցի վիճակագրութիւնս լրացնել» (ԹՈՐՈՍ ԱՂԲԱՐ, Ա., էջ 315) :

Ես կը կարծեմ թէ Սրուանձտեանց աւելի իրականութեան համապատասխան կերպով արտայայտուած է քան Մալաթիացի տեղագրողները, որոնք իրենց ծննդավայրին սիրով տկարացած՝ բուն իրականութիւնը չեն

(1) Այսինքն՝ աւելի քան հարիւր տարի առաջ, քանի որ այդ տղերքը 1900-ին գրուած են :



կրցած տեսնել եւ ըսել :

Մալաթիա ամէն բանէ առաջ ջերմոտ էր եւ ասիկա կը բաւէր ըսելու համար , որ իր կլիման առողջ չէր : Գաւառը իբր միջավայր իր բեղմնաւոր բուսականութիւնը կը պարտի իր ջուրերու առատութեան , որ եթէ արգասաբեր կը դարձնէ հողը , սակայն կը ստեղծէ խոնաւութիւն մը , որ վտանգաւոր է մարդկային առողջութեան :

Յետոյ նոյնքան մարդկային մարմնոյն համար ցնցիչ է օդի բարեխառնութեան ելեւէջը , որ ամառուընէ ձմեռը մեծ է :

Պէննէեան քահանայ սանթիկրատ ջերմաչափով ամառը  $25-30^{\circ}$  , իսկ ձմեռը զերոյէն վար  $18-24^{\circ}$  ցոյց կուտայ բարեխառնութիւնը , զոր Բրոֆ . Մկրտիչ Որբերեան ամառը մինչեւ  $33^{\circ}$  աստիճանի կը բարձրացնէ եւ ձմեռը զերոյէն վար  $15^{\circ}$ -ի կ'իջեցնէ :

Երկու պարագային ալ 40-էն 50 աստիճան այս փոփոխութիւնը նկատողութեան արժանի սլորապայ մըն է , զոր կարելի չէ անտեսել :

## Ժ.

# ՀԱՂՈՐԴԱԿՑՈՒԹԵԱՆ ՄԻՋՈՑՆԵՐ

Մալաթիա կը դտնուի կարեւոր ճանապարհներու խաչաձեւման կէտին վրայ , իր աշխարհագրական դիրքին բերմամբ : Բրոֆ . Ռամսէյ , որ Փոքր Ասիոյ պատմական աշխարհագրութեան համար նշանաւոր հեղինակութիւն մըն է , իր THE HISTORICAL GEOGRAPHY OF ASIA MINOR շատ ծանօթ գործին մէջ (էջ 46) խօսելով Փոքր Ասիոյ հաղորդակցութեան ուղիներուն վրայ՝ կ'ըսէ .

«Փոքր Ասիա ընդհանուր առմամբ խաղաղ երկիր մըն էր եւ ճամբրաները մեծ մասամբ հաստատուած էին մասնաւորաբար վաճառականական նկատումներով , որպէսզի դիւրացնեն դէպի Իտալիա փոխադրութիւնը ապրանքներու :

Բայց կան զանազան բացատրութիւններ այս ճամբաներու մասին : Արեւելեան Կապադովկիոյ եւ Փոքր Հայքի ճամբաները շինուած էին սահմաններու պաշտպանութեան նպատակաւ : Մելիտինէ մեծ զինուորական կայան մըն էր : Այն ճամբաներուն վրայ , որոնք Մելիտինէ կը տանէին , հետաւորութեան չափերը փորագրուած էին մզոնաքարերով : Լեոնադաչաին հաքաւային երկայնքին՝ կարգ մը ուրիշ ճամբաներ շինուած էին զաշտերու



մէջ՝ Իսաւրիայի եւ Պեսիտիոյ անգուսպ լեռնականներէն պաշտպանուելու համար :

Այս ճամբաները շինուած էին Օգոստոս կայսրի ժամանակ, որ կարգ մը հռոմէական գաղութներ եւ ամրոցներ շինեց Տաւրոսի քղանցքի երկայնքին, որոնք միացուած էին կեդրոնական գաղութին՝ Անտիոք Պեսիտիոյ :

Այս ճամբաներու շինութիւնը վստահօրէն ենթադրել կու տայ Օգոստոսի ծրագիրը՝ հռոմէական գաղութները եւ ամրոցները զինուորական պաշտպանութեան ենթարկելու : Սակայն իրական ապացոյցներ կը պակսին : Վաւերագիրներէն ոչ մէկը խօսած է այս կարգ մը ճամբաներու մասին եւ ոչ մէկ գրող անոնց մասին ակնարկած է : Իրապէս՝ միակ օտար աղբիւրէ գիտցած եմ մղոնաքարերու գոյութիւնը, որոնցմէ գտած եմ հատ մը երկու տարի առաջ անծանօթ գաղութի մը կողմերը, որ կու տար Ք. Ա. 6 թուականը, Օգոստոս կայսեր եւ փոխ-կառավարի շին անունները, թիւ մը, որ կրնայ միայն բացատրուիլ իբր զինուորական կեդրոնէն մինչեւ Անտիոք Պեսիտիոյ՝ հեռաւորութիւնը : Ուստի այդ քարը կ'ապացուցանէ ճամբու մը գոյութիւնը, որ շինուած էր միացնելու այս գաղութը Անտիոքի հետ : Նոյն տարին Օգոստոս հիմնեց իր գաղութները. իսկ նման ճամբայ մը կրնայ ապացուցանել միւս գաղութներու պարագան : Այս ճամբաներու այնքան մութ մնալուն պատճառը այն է, որ Պեսիտիոյ լեռնականները յաղթած էին եւ մտած կայսրութեան մէջ յաջորդ դարու ընթացքին, եւ որ Իսաւրիացիներու վախ պատճառեց : Այսպէս գաղութները շուտ կորսնցուցին իրենց զինուորական արժէքը, եւ զինուորական ճամբաներու դրութիւնը կործանուեցաւ եւ ընդհանուր առմամբ Անատոլեան դրութեան ենթարկուեցան» :

Բայց մինչեւ այդ թուականը, որ Հռոմ տիրակալեց իր բոլոր զօրութեամբ Փոքր Ասիոյ, եւ մինչեւ այն թուականը, որ իսլամական աշխարհը հասաւ Եփրատի արեւելեան եզերքը եւ զայն անցնիլ փորձեց, Մալաթիա իր աշխարհագրական դիրքով պահակ մը հանդիսացաւ Եփրատի կամրջադլուխին վրայ, թէ՛ Հայաստանի լեռնադաշտին եւ Փոքր Ասիոյ եւ թէ Փոքր Ասիոյ եւ Սիւրիոյ միջեւ :

Արդարեւ, ինչպէս Գեր. Սահակ Կոզեան դիտել կու տայ, «հին աշխարհի ամենէն կարեւոր զինուորական պողոտաները կ'անցնէին Մալաթիայէ :

Եփեսոսէն մեկնող պողոտան Մալաթիոյ վրայով կ'երկարէր մինչեւ Բաբելաստան ու Հնդկաստան : Սեւ ծովէն պողոտայ մը կ'իջնէր դէպի Միջերկրական ծով ու իր սիրտը կը գտնէր Մալաթիոյ մէջ : Ազգեր խուժած են այս պողոտաներէն. անոնք թէ՛ դարձուցած են վաճառաշահ քաղաք եւ թէ կողոպտած» (տես Մելիդ, Մելիտինէ, Մալաթիա, էջ 9) :

Պատմական անժխտելի իրողութիւն մըն է որ հռոմէական բանակնե-

(1) Անտիոք Պեսիտիոյ՝ այժմ Ադշեհէր :



ըը Պարթեւներու դէմ իրենց արշաւանքներուն ատեն, «քնդացուցին Մալաթիոյ պողոտան՝ անցնելու համար Հայաստան եւ Հայոց պարտադրելու Ծերակոյտին կամֆը» (տես Փերպ. Սահակ Կոզեան, Նոյն, էջ 12) :

Իսկ աւելի հին ժամանակներու մէջ դիւսաւոր կռուադաշտը եղած է հիւսիսային Սիւրիան, ուր Հայերը եւ Եգիպտացիք, ինչպէս նաեւ Ուրարտացիք՝ Հաթերու հետ մաքառած են, նուաճելու համար Երկիրը, ինչպէս յետոյ հոն պիտի մաքառէին Սիւրիոյ տիրապետութեան համար Արարները եւ Բիւղանդացիք, ինչպէս պիտի տեսնուի Մալաթիոյ պատմական անցեալին վրայ խօսուած ատեն :

Հետեւաբար Մալաթիայէն դէպի արեւելք՝ Հայաստան եւ Պարսկաստան դացող ռադմուղիներու չափ եւ աւելի կարեւոր էր թերեւս այն ճամբան, որ Մալաթիայէն կ'անցնէր Երկարելու համար մինչեւ Ամանոս լեռները, անկէ լեռնանցքէ մը անցնելով մտնելու համար Սիւրիա :

Արդարեւ, ինչպէս կը տեսնուի, կար Ամանոս—Մալաթիա պողոտայ մը՝ շատ հին ժամանակներէ ի վեր յայտնի եւ պատմական կարեւոր դեր կատարող :

Այսպէս, կը յիշուի թէ Ուրարտայի թագաւոր 751 Ն. Ք. «Սարտուրիս Բ. ...իր արշաւանքն ուղղեց հիւսիսային Սիւրիոյ վրայ Մալաթիոյ ճամբով : Անկէ անդին դէպի հարաւ ճամբան կ'երկճղէր ու մին Կատաւոնիոյ (այսինքն, կա'մ Կոմանայի եւ կամ Կոկիսոնի) վրայէն անցնելով Սսոյ մօտ կ'իջնէր Կիլիկիոյ դաշտը, իսկ միւսը արեւելեան Տաւրոսի կիրճերէն կ'իջնէր Կոմմագիւնէ» (Եղիա Քասունի, ՆԱԽԱՀԱՅԿԱԿԱՆ ՀԱՅԱՍՏԱՆ, էջ 406) : 748-ին (Ն. Ք.) Սարգուրիս կրկին Սիւրիա կը դառնայ իր նուաճումները շարունակելու համար եւ կը նուաճէ Խուրա եւ Նուշինի քաղաքները Ռիխիշա Երկրին մէջ, ապա կը գրաւէ Բիէ քաղաքին գաւառը, որ Բաշատանի թագաւորին կը պատկանէր : Յետոյ կը նուաճէ Իրսինի (կամ Սուրսնի) եւ Մելիտա (կամ Մելինէ) քաղաքները, որոնց թագաւորը իր առջեւ կու գայ հպատակութիւն յայտնելու ( Adontz, HISTOIRE d'ARMENIE, էջ 170 եւ Քասունի, ՆԱԽԱՀԱՅԿԱԿԱՆ ՀԱՅԱՍՏԱՆ, էջ 408—409) :

Ե. Քասունի կ'ըսէ թէ «քերեւս պէտք է Մալաթիայէ Մարաշ եւ Այծթապ տանող կարաւանի մամբուն վրայ փնտռել արձանագրութեան մէջ յիշուած տեղերը եւ այս հաւանակութիւն կը ստանայ՝ եթէ Մելիոս ընթերցումն ուղիղ է» (տես Քասունի, Նոյն, էջ 409) :

Այս ճամբան ըստ Ե. Քասունիի՝ «Հայկական բարձրաւանդակի եւ հիւսիսային Սիւրիոյ միջեւ հազարամեակներէ ի վեր միակ մնայուն հաղորդակցութեան մամբան էր» (Նոյն) :

Եղիա Քասունի, այս հիման վրայ «Ռիխիշա (Լուխզու, Լակոտինա) Երկրին Խուրա եւ Նուշինի քաղաքները» կը նոյնացնէ յիշեալ պողոտային վրայ արդի Կէօգեմէ եւ Սիւրկիւ հանգրուաններուն հետ : Իսկ Բաշատանի թագաւորին պատկանող Բիէ քաղաքին մարզը՝ արդի Վերամշեհիքի եւ հին



Զուլպադրայի հետ» (ՆՍՅԱՀԱՅԿԱԿԱՆ ՀԱՅԱՍՏԱՆ, էջ 409) :

Հիմա Մալաթիայէն Կէօլպաշ եւ ապա Փազարճըզ եւ Ամանոս իջնող երկաթուղին կը հետեւի առհասարակ Ամանոսէն Մալաթիա տանող հին կարաւանի ճամբուն, որ Մալաթիոյ արեւմտեան կողմը եղող Սուլթան Սուլու դետակին հեղեղատին զուգընթաց կ'ընթանայ մինչեւ Սիւրկիւ :

20 Փետրուար 1956 թուականով իր մէկ նամակին մէջ Մանուէլ Քասունի իր եղբօր տեղագրական վերոյիշեալ տողերուն վրայ հիմնուելով՝ կ'եզրակացնէ թէ քանի որ Բիէն Ատրեամանի մօտ է, ուրեմն Վերանշեհիւր — Զուլպատրա Մալաթիայէն կը հեռանայ եւ Ատրեամանի կը մօտենայ :

Այս շրջանակին մէջ է որ տեղի ունեցած է վճռական ճակատամարտ մը Ուրարտուի եւ Ասորեստանի միջեւ, որուն վայրին մասին անհամաձայն էին Եղիա եւ Մանուէլ Քասունի եղբայրները, որոնք այդ շրջաններու ծանօթ են :

Վեր. Ե. Քասունի Կիչտան = Կէօստէն հաւասարութիւնը կը պաշտպանէր, իսկ Մանուէլ Քասունի՝ Կիչտան = Քիւչտամ նոյնացումը, եւ կը ջանար այդ դէպքին շուրջ հիւսել Այնթապ — Հոռմկլայ ճամբուն տեղագրականը :

Տոքթ. Ն. Պաղտոյեան (այժմ Ուինչիսդըր, Ամերիկա), որ իբր բժիշկ երկու անգամ երթալ-գալու առիթով տեսած, շնչած եւ պատմական հետեւութիւններ հանած էր, այս առթիւ իրեն եղած հարցումի մը պատասխանելով 1952-ին մասնաւոր նամակով մը կը նկարագրէ Մալաթիա — Ամանոս պողոտային ինչ ինչ կէտերը, որ սերտօրէն առնչութիւն ունի Վերանշեհիւր — Զուլպատրայի դիրքը որոշելու տեսակէտէն գլխաւորապէս :

Այդ նամակը, որմէ քաղուած մը ազնուօրէն մեզի տրամադրած է Տիար Մանուէլ Քասունի, կը պարունակէ սա հետաքրքրական տողերը. «Որքան կը յիշեմ, 1907-ին, ուշ աշնան — նախ քան անձրեւները, իջայ Աղճատաղէն, Փոլատի Տերպեմտէն (կիրճ) (Պաշեարըի եայլայէն) եւ երկու օր մնացի Վերանշեհիւրի — պատմական Սեզուփեթրայի մէջ, եւ Սիւրկիւի, Կէօստէնի, Էրքէնէքի եւ Թուլթի վրայով իջայ Պեհեսնի եւ Ատրեաման : Պողտաղի լեռնանցքները բաւական լաւ կը ճանչնամ : Եղիային (Քասունի) մեկնութիւնները ճիշդ են հոս : ... Հարկ է ի մտի ունենալ որ Կոմմագենեան Տաւրոսներու շրջանին մէջ (եւ բոլոր Տաւրոսներու երկայնքին) ամենացած խաղը (notch) Կէօստէնն է, ծովու մակերեսէն հազիւ 4000 ոտք բարձր : Իրական ջրբաշխը կ'իյնար այս լեռնանցքէն հիւսիս, Սիւրկիւի հովտին մէջ : Սիւրկիւ վտակը նախապէս կը հոսէր Կէօքսուի մէջ, Էրքէնէքի մէջտանի բարձրութեանց եւ Շահին Գայասիի կիրճին միջեւ : 1907-ին Սիւրկիւի ջուրը նորափոր ջրանցքով մը առաջնորդեցին եւ թափեցին Սուլթան Սուլի մէջ, ոռոգելու համար Արկայի մէջ Սուլթան Համիտին պատկանող Զիֆթլիկի Հիւմայունի արտերը : Ես այդ ձեռնարկը դիտած ու սերտած եմ Թոխմայի քաղաքին աւազանին մէջ» :



Տոբթ. Պաղտոյեան, նոյն խնդրոյն նուիրուած Մայիս 1954-ի թուականով ուրիշ նամակով մը կը կրկնէ իր նախորդ ըսածները, սա ձեւով.

«1907-ին Աղճատաղէն (Մալաթիոյ շրջանակ) դացի մինչեւ Պեհեսնի եւ Ատրեաման, croo country<sup>1</sup> միշտ լեռներու վրայէն. Պաշեարդէ ետք Փոլատի տերպենտին տակ իջանք Վերանշեհիւր, պատմական Սեղոփեթրա:

Այս տեղը բնակուած էր Կովկասէն եկած մուհանիրներով: Ես հետաքրքրուեցայ աւերակներով: ...Կիւղենէ եւ Սերկիւ հարթավայրով ընթանալով՝ բարձրացանք Կէօստէնի սարահարթը: Կէօստէնը շատ հին ճամբայ մըն էր. արհեստականօրէն չէր շինուած, այլ երկար դարերու ընթացքին գործածութեամբ մաշած եւ բաւականին վար իջած: Կէօստէնի լեռնանցքը՝ Տաւրոսներու վրայ՝ կարելի է ըսել ամենացած կապանն է, որ կը կապէ Հայկական Բարձրաւանդակը հարաւին՝ Սիւրիոյ. հետեւաբար մեծ աշխարհակալութեանց դասական ուղին է: Եթէ Կէօստէնի լեռնանցքը շարունակէինք, պիտի իջնէինք Փերվերիի կամուրջը (հոմէական), Կէօքսուի վրան: Սակայն մենք շարունակեցինք դէպի արեւելք եւ դացիք էրքէնէքի ու Սինկա գիւղերու վրայէն դէպի Թութ գիւղը:

Թութէն դուրս գիշերեցինք, եւ աւազակներու դէմ հսկում կատարելու ստիպուեցանք: Թութ գիւղէն ետք, Կէօքսուն անցանք հոմէական միականի կամուրջով դէպի Պեհեսնի:

Խալիֆայական շրջանին Արաբները, որոնք առաւելապէս կը կռուէին իրենց այրուծիով, անտեսած են ընդհանրապէս ամառները Պէյլան – Կիւլէքպողազը ճանապարհը եւ ընտրած են «Կաղնը եռլու»ն, որ 14—18-րդ դարու կէսը միշտ գործածուած է արաբ, քիւրտ եւ թիւրք կէօշէրներուն կողմէ Ուզուն Եայլա երթալ-գալու համար:

Այս ճամբան սակայն ձմեռը բացարձակապէս անանցանելի է:

Ինչպէս քիչ առաջ գրեցի, գտնուած եմ Կէօքսուի վերեւ էրքէնէք — Սինկա — Թութ շրջանին մէջ: Յետոյ Կէօքսուն անցած եմ Թութ գիւղէն վարը կեցած հոմէական կամուրջով եւ Պեհեսնի դացած: Եւ անկէ ետքը Կէօքսուն կտրելով երկու շաբաթուան չափ այցելած եմ Ատրեամանը եւ Փիւրէ (Փիէ) հոմէական աւանը:

Կէօստէնը՝ Տաւրոսներու վրայ՝ ամենահին ճամբաներէն մին է, որ կը կապէ Հայկական Բարձրաւանդակի արեւմտեան մասը վարի դաղջ դաշտերուն: Սինկա գիւղը յաջողած է իր անունը պահել մօտ 3000 տարիներ: Կէօքսուի որոտը կարելի է լսել Սինկա գիւղէն. գետակի խրամատն ալ տեսանելի է Սինկա գիւղէն: Անկարող եմ ըսելու թէ Սինկա գիւղն իր անունը առած է Սինճ գետէն<sup>2</sup> թէ հակառակը:

Կիշտանը հարկ է մեկնուի Սիւրկիւի եւ Բավրալուի<sup>2</sup> միջեւ կեցած

(1) Ըսել կ'ուզէ՝ ուղիղ գիծով:

(2) Տիար Մանուէլ Քասունի կը նոյնացնէ Փերվերիի հետ:



վիժափոր եւ բարձրադիր լեռնանցքով — կէօստէնով» :

Արդ, ինչպէս Տիար Մանուէլ Քասունի կ'եզրակացնէ, յայտնի է որ Զուպատրա — Սեղսիւթրա — Վերանշէհիւր Սուլթան Սուլի ակերուն մօտ ըլլալով՝ Նոր Մալաթիայէն 35—40 մղոն հեռու է<sup>1</sup> :

Նոյնպէս կայ, ըստ Մանուէլ Քասունիի, դէպի Ատրեաման կարճ ճամբայ մը, Զրմուխտիի վրայով, որ շուրջ 50 մղոն երկարութիւն ունի :

Այս բոլոր տեղեկութիւնները կը հաստատեն այն տեսութիւնը թէ Մալաթիա, իսկապէս ճանապարհներու խաչաձեւման վայր մըն էր եւ անկէ անցնող կարաւանի ճամբաներն էին որ Փոքր Ասիան կը կապէին մէկ կողմէն Հայաստանի եւ միւս կողմէն Սիւրիոյ :

Իսկ գետային հաղորդակցութիւններ չկային հին աշխարհի այս կարեւոր երկրամասին մէջ, հակառակ անոր որ Եփրատի պէս ջուրի մեծ երակ մը կ'եղերէր Մալաթիոյ գաւառը արեւմուտքէն :

Դժբախտաբար Եփրատ ոչ մէկ օգուտ կ'ընծայէր գաւառին, վասնզի հողին մակերեւոյթէն բաւական խոր անկողին մը ունենալով հողի ամենադոյզն մաս մը չոռոգելէ զատ, իբրեւ լայն ջուրի հոսանք մը դոնէ իբր հաղորդակցութեան ճամբայ չէր ծառայեր, իր եզերքներու վրայ հաստատուած վայրերուն միջեւ :

Այսպէս այս տեսակէտով ալ ծառայութիւն մը չի մատուցաներ Մալաթիոյ գաւառին, որուն հաղորդակցութիւններուն նպաստելու տեղ արգելքներ կը ներկայացնէ, վասնզի անկէ անցնելու համար դժուարութիւններ կան :

Պէննէեան քահանայ (Ը․, էջ 37-8) անոր վրայէն անցնելու համար երեք միջոցներ կը նշանակէ․ 1․ նաւակ, 2․ տկալաստ եւ 3․ անցք (կեչիտ) :

1․ — Նաւակներ․ — Կը գտնուէին երեք տեղ․ Ա․ Շէյխ Հասանի (Հասէն), Բ․ Հարդիի եւ Գ․ Իզողլուի Թիրոթ գիւղին առջեւ : Այս նաւակները շինուած էին կաղամախիի հաստ տախտակներէ, եւ կը գործածուէին երկու թիակով : Անոնք կրնային փոխադրել գետին մէկ եզերքէն միւսը 40-50 մարդ կամ 20 ձի եւ կամ 3-4 կառք :

Նաւակներէն ամենէն բանուկը եւ շահաւէտը Իզողլուինն էր, վասնզի Սամսոն-Պաղտատ խճուղին ասկէ կ'անցնէր :

Նաւակներու օրական անցուդարձը առ առաւելն 10 անգամ կ'ըլլայ : Ուղղակի դէմ դիմաց անցնիլ անկարելի էր հոսանքին պատճառով :

Նաւակները ամէն տարի քաղաքապետութեան (պէլէտիէ) կողմէ անձուրդով 20-25 հազար դրուչի վարձու կը տրուէին անհատներու :

2․ — Տկալաստ (քէլէկ)․ — Ունէին գետեզերքը բնակող բոլոր գիւղացիները : Ասիկա կը կազմուէր 15-20 կամ մինչեւ 30 հատ փչուած տիկերով,

(1) Մանուէլ Քասունի կ'ըսէ թէ նորագոյն թրքերէն աթլաս մը նոյն տեղերը Տողանշէհիւր մը կը նշանակէ իբր երկաթուղիի կայարան, եւ հաւանական կը նկատէ որ Վերանշէհի անունը փոխուած է Տողանշէհիւրի (ծնող քաղաք) Քեմալականներու կողմէ :



որոնց տակը կը հաստատուէին փայտէ ձողեր: Տկալաստը կրնայ վերցնել 2000-2500 քաշ ծանրութիւն: Ասոր ալ անցուղարձը քիչ եւ վտանգաւոր էր, մանաւանդ գետին յորդած ժամանակները եւ հոսանուտքէ անցնելու միջոցին, որովհետեւ իր շուրջը նեցուկ շունենալէ զատ, պզտիկ հովէ մը անմիջապէս տատանելով՝ կը կորսնցնէ հաւասարակշռութիւնը եւ կը տապալի:

3.— Գալով անցքերուն, կարելի է ըսել թէ անոնք երկուք էին. մին՝ Շէյխ Հասանի եւ միւսը՝ Քիլիսիկի առջեւ: Անցքերը միշտ ծանծաղ տեղեր կը գտնուին եւ երկու երեք տարին անգամ մը հազիւ թոյլ կու տան անցնելու, այն ալ ամառը: Անցքը կը կատարուի ուղտերով, ձիերով եւ հետիոտն: Անցուղարձի այս միջոցը ամենէն վտանգաւորն էր:

Ճարպիկ լուղորդներ երբեմն առանց ունէ միջոցի եւ երբեմն ուռած տիկի վրայ հեծած եւ կամ իսալէմ ըսուած խոշոր դղումներ իրենց անութիւն տակ ունենանլով կ'անցնին Եփրատը ու մասնաւոր երկթանիով փայտ դուրս կը հանեն գետէն:

Գետէն անցնելու ամենէն ապահով միջոցը կամուրջն է: Դարեր առաջ հատ մը կայ եղեր Բիրոթի առջեւ, որուն հիմերը միայն կը տեսնուին ջուրին մէջ (Պէննէեան Ը., էջ 38):

Եփրատի վրայ Մալաթիա միակն է, որ կը ներկայացնէ յարմարագոյն վայրը ոչ միայն կարաւաններու, այլ նաեւ բանակներու անցքին, ինչպէս կը տեսնուի: Հետեւաբար կամուրջի մը շինութեան գաղափարը անշուշտ մտածուած պէտք է ըլլայ ապահովելու համար Հայաստանի եւ Փոքր Հայքի, Սիւրիոյ եւ Փոքր Ասիոյ ու Միջագետքի միջեւ հաղորդակցութիւնները:

Պատմական յայտնի իրողութիւն մըն է որ Դարեհի եւ Քսերքսէսի ատեն երբ Պարսից տիրապետութիւնը կը հասնէր մինչեւ Յոնիական ծով, ամբողջ պարսիկ ընդարձակածաւալ տէրութեան մէջ երթեւեկի դիւրութիւն եւ աշխոյժ կար:

Արքունի կրկին պողոտաներ Շօշը եւ Եկրատանը կը կապէին տէրութեան հեռաւոր մասերուն հետ:

Մելիտինէ, ուր կը նստէր Տրիբազ Սատրաբը՝ «բարեկամ թագաւորին» (401 Ք. Ա.), իր դիրքին պատճառով այս ճամբաներուն մէկուն վրայ կը գտնուէր անպատճառ:

Այդ ճամբաներուն մեծ ուշադրութիւն եւ խնամք կը տարուէր:

Կանոնաւոր օթեւաններ կանգնուած էին ամէն 3-5 փարսախին, ուր արքունի սուբհանդակներ ձիերը կը փոխէին:

Որքան ալ այս տեղերը սովոր էր իջնել եւ օթեւանել իր ճամբորդութիւններուն ժամանակ, ճամբան կարեւորագոյն տեղերը բերդեր կառուցուած էին եւ պահապաններ դրուած:

Այս արքունական ուղին հաւանօրէն կառուցած էր Դարեհ:

Հերոդոտոս (Ա. 75 եւ Ե. 52) կը հաստատէ որ Կրեսոսի ժամանակ կա-



յին արդէն Ալիսի կամուրջները եւ արքունի ճանապարհին շինութեան ատեն ասպահովաբար Եփրատի վրայ ալ կամուրջ մը պէտք էր շինուած ըլլար:

Արքունի այս պողոտան, որ կ'անցնէր Կեսարիա-Կոմանա-Մելիտինէ գիծով, Բիմբոյա (Bimboa) լեռան բոլորտիքը հիւսիսէն ոչ թէ հարաւէն պատելով կը դառնար: Անկարելի է որ հոն ընդհատուած ըլլար:

Առեւտրական այն պողոտան, որ միջազգային վաճառականութեան կարեւոր երակ մըն էր եւ աշխոյժ գործունէութեան մէջ էր նաեւ Ալեքսանդրի աշխարհակալութեան յաջորդող դարերուն, կու գար Մելիտինէէն եւ Եփրատը կ'անցնէր եւ կ'երկարէր մինչեւ Ամիդ (Տիարպեքի) (Համտ. Ստրաբոն, ԺԲ. 2. 1. եւ ԺԴ. 2. 29., նաեւ Թ. Բէյնախ ՄԻՀՐԴԱՏ ԵՒՊԱՏՈՐ, Մ. Ա. Գարազաշեան. ՔՆՆԱԿԱՆ ՊԱՏՄՈՒԹԻՒՆ, էջ 131, Ե. Տիշոյեան ՀԱՅԱՍՏԱՆԻ ԿՈԶՆԱԿ, 1933, էջ 1064):

Նոյնպէս հռոմէական մեծ ուղին, որ ասկէ կ'անցնէր, չէր կրնար ընդհատուած ըլլալ Եփրատի առջեւ: Արդարեւ անիկա Եփրատէն անդին կը շարունակուէր, ինչպէս ցոյց կու տան մինչեւ հիմա մնացած հետքերը այդ ճամբուն:

Մասնաւորապէս ուշադրաւ է որ Մելաս (Թոխմա) գետը, որ Մալաթիա գաւառը կը կիսէ եւ կը միանայ Եփրատի, հին քաղաքէն երկու ժամ վարը ունի իր վրայ ձգուած նշանաւոր կամուրջ մը Գըրքէօզ անունով, 40 կամարներու վրայ հաստատուած, որուն հին 20-25 աչքերէն միայն ջուր կ'անցնի (Պէննէեան քհնյ. Ը., էջ 39-40):

Այս կամուրջը ոեւէ արձանագրութիւն չունի, եւ պատմական յիշատակութիւն մը չունինք անոր մասին. աւանդութեան մը համաձայն շինուած է Սուլթան Մուրատ Դ.էն (1622-1640), որ ապստամբներով եւ տէրէպէյիներով գրաւուած օսմանեան պետութեան ասիական գաւառները նուաճելու եւ հնազանդեցնելու համար՝ իր բանակը շարժուն վիճակի մէջ պահած էր եւ հաղորդակցութեան միջոցներու պէտք ունէր: Հետեւաբար անհաւանական չէ որ իր բանակներու անցքը դիւրացնելու համար շինուած ըլլայ այս կամուրջը, որ Սըվազ-Մալաթիա խճուղին կը միացնէր:

Այս կամուրջը եթէ ԺԷ. դարուն շինուած է, շատ հաւանական է որ հին ատեն գոյութիւն ունեցող կամուրջի մը տեղը հաստատուած ըլլայ, վասնզի եթէ աւանդապահ արեւելքի մէջ սառած ու անփոփոխ բան մը կայ, ան ալ ամենէն աւելի հաղորդակցութեան ճամբաներն են, որոնք տակաւին նախնեաց բացած նոյն գիծերուն վրայ կը շարժին:

Առայժմ ուղտն ու ձին, էջն ու սայլը կը շարունակեն երթեւեկել այն ճամբաներուն վրայ, որոնցմէ կ'օգտուէին դարեր առաջ:

Օթեւաններու աւերակները, մզմոյսներ, դիտարան բլուրներ եւ կամրջագլուխներ յայտնի կը ցուցնեն ճամբաներուն ուղղութիւնը. (Համտ. Zimmerer, Հ. Ա. 1900 էջ 35): Հետեւաբար բնաւ պէտք չէ զարմանալ որ Մալաթիա ալ վաղեմի ճանապարհներու վրայ կը գտնուէր: Իբրեւ առեւ-



տըրական կեդրոնավայր եւ երթեւեկի ճամբու վրայ ինկած քաղաք մը՝ խըճուղիներով կապուած էր շրջակայ կեդրոններու հետ:

Մասնաւորապէս բաւական լաւ խճուղիներով կապուած էր հին ժամանակներէն ի վեր Սեբաստիոյ եւ Խարբերդի հետ: Սեբաստիոյ խճուղին քաղաքէն դէպի հիւսիս, Հին Մալաթիոյ ճիշդ քովէն կ'երկարի դէպի Մելաս (Թոխմա գետ), դիմելու համար դէպի հիւսիս-արեւմուտք: Եփրատին վրայ խճուղի մը կար, որ Խարբերդ կ'երթար:

Նոյնիսկ 1870-ական թուականներուն, այսինքն մօտաւորապէս 70—80 տարիներ առաջ, ճանապարհները «խիստ բանուկ» եւ «դիւր» էին, ինչպէս կը հաւաստէ Սրուանձտեանց (ԹՈՐՈՍ ԱՂԲԱՐ, Ա., էջ 324): Ան կը վկայէ թէ Մալաթիա յարաբերութիւն ունէր Հալէպի, Մարաշի, Իսկենտերունի, Տիարպեքիւրի, Խարբերդի, Սեբաստիոյ, Կարինի եւ շրջակայ փոքր քաղաքներուն հետ, եւ ինչպէս անիկա կ'ըսէ, «Իբրեւ պորտ» կը ներկայանար «Բաղդատի եւ Կ. Պոլսոյ մէջ» (նոյն):

Նկատելի է որ բոլոր գլխաւոր ճամբաները, որ Մալաթիայէն կ'անցնին, արեւելքէն արեւմուտք եւ փոխադարձաբար կ'երթան, վասնզի Ռոհըր-պախի տեսութեան համաձայն՝ Հայաստանի մէջէն արեւելքէն արեւմուտք ու փոխադարձաբար երթալ ուզող մէկը շատ դիւրաւ կրնայ գտնել հովիտներ եւ դիւրանցանելի անցքեր, բայց երբ հիւսիսէն հարաւ եւ փոխադարձաբար երթեւեկել փորձէ, պարտի բազմաթիւ բարձր ու դաժան լեռնաշղթաներ բարձրանալ:

Արեւելք արեւմուտք բնութենէն նախասահմանուած հաղորդակցութեան գլխաւոր ճամբան կ'անցնի անմիջականօրէն Արարատի հարաւէն եւ հայ-իրանական լեռնաշղթայէն, Պայազիտի վրայով կը հասնի Կարնոյ դաշտը, անկէ Երզնկա՝ արեւմտեան Եփրատի եզերքը եւ ասկէ ալ դէպի Սեբաստիա՝ Ալիս գետին եզերքը, Փոքր Ասիոյ պատկանող առաջին եւ կարեւոր քաղաքը: Հարաւային ճամբայ մը Ուրմիոյ աւազանէն կը տանի դէպի Վանի ծովը: Հոս ծովին արեւմտակողմի վերջաւորութեան վրայ ճամբան երկուքի կը բաժնուի, որոնցմէ մէկը Բաղէշի ժայռահատուածներու մէջէն՝ դիւրաւ կ'անցնի հայկական Տաւրոսը եւ դէպի Տիգրիսի հովիտը կը հասնի, իսկ երկրորդը Մշոյ դաշտէն կ'անցնի եւ անկէ ալ ամայի լեռնաքարերու մէջէն՝ Բալուէն անցնելով դէպի Խարբերդ եւ Մալաթիա կը հասնի, միացեալ Եփրատի անցքին հանդիպակաց կողմը: Խարբերդէն Արղընի-Մատէն կիրճէն անցնելով եւ Տաւրոսի ճամբով՝ Տիարպեքիւր (Տիգրիսի վրայ), իսկ Մալաթիայէն, ուրիշ մը՝ արեւմտակողմէն՝ Կեսարիա, ուր կը միանայ Փոքր Ասիական ճամբաներու ցանցը (հմմտ. ՀԱՅԱՍՏԱՆ ԸՍՏ ՌՈՀՐՊԱՀԻ 1919-Ի ՏԵՍՈՒԹԻՒՆ, էջ 9 կամ ՊԱՏՄ. ՀԱՅ ԳԱՂԹԱԿԱՆՈՒԹԵԱՆ, Ա. հտ., էջ 71):

Սովորական այս ճամբաներէն զատ, որոնք քիչ-շատ ապահովուած են, կողմնակի ճամբաները շատ չէին եւ անապահով, մինչեւ 100—150 տարի առաջ:



Մոլթքէ, որ իբր մարդիչ օսմանեան բանակին՝ 1838-ին Փոքր Ասիոյ մէջ պտոյտ կատարած է, նոյն թուականի Նոյեմբերի դրած իր մէկ նամակին մէջ կը պատմէ թէ ինչպէս Գոնիոյ եւ Կեսարիոյ կողմերը շրջած ատեն փափաքած է լեռներու մէջէն ուղղակի ճամբայ մը գտնել դէպի Մալաթիա եւ իրեն ըստած է թէ այսպիսի ճամբայ մը չկայ եւ բոլոր անցքերը բռնած են Աւշարները:

Ճամբան այնքան անապահով էր որ Տէվէլիի միւսէլլիմը (կառավարիչ) բանակին ընդհանուր հրամանատար Հաճի Ալի փաշայի յանձնարարականին համաձայն անձնական պատասխանատուութիւն չէ ուղած ստանձնել բրուտապի զօրավարին կեանքին ապահովութեան համար, եւ հրամանատարին խորհուրդ տուած է դիմել Թոմարզայի Հայոց վանքին վանահօր, որ Աւշարներուն վրայ իրեն ունեցած ազդեցութեամբ կրցած է արդարեւ Մոլթքէի փափաքած անցքը ապահովել անոր (տես ՊԱՏՄՈՒԹԻՒՆ ՀԱՅ ԿԵՍԱՐԻՈՅ, էջ 662-663):

Հին ժամանակներու մէջ հակառակ Անատոլիոյ մէջ տիրող այս անապահովութեան՝ Մալաթիա միշտ կեդրոնավայր մը եղած է ղինուորական եւ առեւտրական եւ երեթեւեկ ունեցած է շրջակայ քաղաքներուն հետ:

Հանդ. Պէննէեան քահանայ (Հ., էջ 78-79) կազմած է ցուցակ մը, որ ցոյց կու տայ թէ Մալաթիա օրքան հեռու է Անատոլեան զանազան քաղաքներէ:

Այս ցուցակին համաձայն Մալաթիայէն հեռու են.

Տարեցի	դէպի	արեւմուտք	18	ժամ
Կիւրիւն	»	»	23	»
Կեսարիա	»	»	56	»
Էյպիսքան	»	»	18	»
Մարաշ	»	հարաւ-արեւմուտք	38	»
Պեհեսնի	»	»	22	»
Այնթապ	»	»	50	»
Հայեպ	»	»	74	»
Հիւսնի-Մանսուր	»	հարաւ	18	»
Ուրֆա (Եղեսիա)	»	»	36	»
Սելեւեկ	»	»	28	»
Տիարպեֆի	»	հարաւ-արեւելք	46	»
Չնֆու	»	»	18	»
Խարբերդ	»	հիւսիս-արեւելք	18	»
Բալու	»	»	34	»
Կապան Մասէն	»	»	20	»
Տիվրիկ	»	»	38	»
Ակն	»	»	36	»
Արաբկիր	»	»	18	»
Սեբասիա	»	հիւսիս-արեւմուտք	42	»
Եւզոպիա	»	»	60	»



Այսօր այս հեռաւորութեան ժամերը իրենց արժէքը կորսնցուցած են, քանի որ Մալաթիա Անատոլուէն անցնող երկաթուղիի ցանցին կապուած է եւ շատ բան փոխուած է, բայց մեզք որ հայ ստեղծագործ միտքը եւ շինարար ձեռքերը այլեւս դոյութիւն չունին հոն, ընծայուած պատեհութենէն օգտուելու համար:

## ԺԱ.

### ՎԱՐՉԱԿԱՆ ԲԱԺԱՆՈՒՄՆԵՐ

Պատմական Մելիտինէն, ինչպէս տեսնուեցաւ, անցքի մը վրայ հաստատուած վայր մըն էր եւ կամուրջ մը շատ մը ազգերու համար, որոնք կը ձգտէին դէպի արեւմուտք՝ Փոքր Ասիա, իրենց տիրապետութիւնը տարածելու համար:

Այս գաւառը իբր ճամբայ չէ կրցած տեւականօրէն միակ պետութեան մը կապուած երկրամաս մը դառնալ, այլ բոլոր զօրաւոր իշխանութիւններ, որոնք հիներու ծանօթ աշխարհին տիրակալելու փորձ ըրած են, ոտից կոխան ըրած են այս աշխարհամասը, որ կոուսինձոր եղած է անոնց միջեւ եւ միշտ զօրաւորագոյնէն յափշտակուած:

Այս իսկ պատճառով անյիշատակ ժամանակներէ սկսեալ հաստատուած են տեւական վիճակ մը չէ ունեցած եւ շարունակ տէր փոխած է, ինչպէս պիտի տեսնուի իր պատմութեան մէջ:

Յօսիլ շատ հին ժամանակներու վրայ եւ սեպագրական շրջանի դասնական դարերու մէջ Մալաթիոյ երկրամասին ո՛ր պետութեան պատկանելունքն եւ վարչական ի՛նչ բաժանումներու մաս կազմելուն վրայ, դժուար է, փաստողի շատ բան տակաւին մութ է եւ նոր յայտնութիւններու պէտք կայ:

Սակայն պարսիկ մեծ կայսրութեան կազմութենէն ետք, երբ արեւելքի պատմութիւնը կանոնաւոր շարայարութեամբ մը կը ներկայանայ, այլեւս հնարաւոր կը դառնայ Մելիտինէի շրջանակին պատմութեան հետեւիլ եւ ճշդել թէ այդ դաւառը ի՛նչ պետական եւ վարչական շրջանակներու մաս կազմած է:

Արդարեւ պարսիկ մեծ կայսրութիւնը իբր իր իշխանութիւնը կը տարածէ մինչեւ Եգէական ծով, Մելիտինէ կ'ենթարկուի այդ կայսրութեան՝ իբր ճամբու վրայ գտնուող երկիր: Առանց Մելիտինէն դրաւելու՝ Պաղատիկները չէին կրնար դրաւած ըլլալ Փոքր Ասիան եւ Սիւրիան եւ հասնիլ մինչեւ Եգիպտոս:



Պարսկական տիրապետութեան շրջանին Մելիտինէ անոր սատրապութիւններէն, այսինքն վարչական բաժանումներէն մէկուն կեդրոնն էր, եւ հոն կը նստէր Տիրիբազ սատրապը, որ «բարեկամ թագաւորին» կը կոչուի: Պատմութիւնը իր մասին տուած է բաւական տեղեկութիւններ, բայց մութ կը մնայ թէ այդ շատ ազդեցիկ սատրապը, որ դրամ իսկ հանած էր, արեւմտեան Հայաստանի սատրապն էր թէ ընդհանուր Հայաստանի սատրապին ենթակայ կուսակալ մը:

Այս մասին համաձայն չեն պատմագիրները: Մեծն Ալեքսանդրի աշխարհակալութիւններէն ետք, Մելիտինէ ենթարկուեցաւ Սելեւկեան թագաւորութեան եւ ապա մաս կազմեց Կապադովկիոյ անկախ թագաւորութեան, որուն հարաւային մասին մէջ կը գտնուէր:

Ստրաբոն եւ Պտղոմէոս Մելիտինէն միեւնոյն տեղը ցոյց կու տան: Սահմաններն էին արեւելքէն՝ Եփրատ, հիւսիսէն՝ Փոքր Հայք, արեւմուտքէն՝ Սարկարաւոսէն<sup>1</sup> եւ Կատաւոնիա<sup>2</sup> եւ հարաւէն Կոմմադինէն<sup>3</sup> (Ramsey, *THE HISTORICAL GEOGRAPHY OF ASIA MINOR*, 313):

Հաւանաբար՝ Պտղոմէոսի կողմէ նշանակուած Լաւիանեզինէ<sup>4</sup> եւ Սաւրասինէ<sup>5</sup> բաժանումներուն քաղաքներէն ոմանք Մելիտինէի մէջ կը մտնէին, իսկ մնացածները կը պատկանէին Կոմմադինէի կամ Կատաւոնիոյ, բայց անոնց մեծագոյն մասին վրայ այնքան քիչ ծանօթութիւն կայ որ կարելի չէ անոնց տեղերը որոշել (Ramsey, նոյն, էջ 313):

Դժբախտաբար բոլոր այս բաժանումները հաստատուն եւ տեւական չեն եղած: Ստրաբոն (Ն. Ք. 63-19 Ք. ետք), որ Կապադովկիացի մըն էր, ինքն կ'ըսէ թէ Կապադովկիան շատ մասերու բաժնուած էր եւ այդ բաժանումները միշտ փոփոխութիւններ կրած էին: Ուստի կարելի չէ որոշ տուեալներ ներկայացնել թէ Մալաթիա իր վարչական ո՛ր բաժանումին կը պատկանէր:

Ստրաբոն ունի քանի մը յիշատակութիւններ այդ շրջանին մասին, որոնք թէեւ ամբողջական գաղափար մը չեն տար, սակայն մասամբ կը լուսաբանեն Մելիտինէի դիրքը Կապադովկիոյ կառավարական կազմին մէջ: Ստրաբոն կ'ըսէ թէ «Մելիտինէ Կապադովկիոյ տասերորդ մասն է, երկրին տասը կուսակալութեան բաժնուելէն ի վեր» (նոյն): Եւ որովհետեւ Հերոդոտոսէն (Ա. 72 եւ Ե. 54) գիտենք թէ Կատաւոնիա Կիլիկիոյ մասն էր, ուրեմն Մելիտինէ Կիլիկիայէն անջատուած եւ Կապադովկիոյ կցուած էր, եւ

(1) ՍԱՐԿԱՊՍԵՆԷ՝ ըստ Գերպ. Անդրէաս Վրդ. Ալեքսանդրեանի. արդի Նեվշէհիթի շուրջն էր (ՊԱՏՄ. ՍԵՐԱՍՏԻՈՅ, էջ 17):

(2) ԿԱՏԱԻՈՆԻԱ կը համապատասխանէ Կէօքսուի, Հաճընի եւ Զէյթունի շրջանակին (նոյն):

(3) ԵՓՐԱՏԱՅԻՔ՝ ըստ հայ հեղինակներու:

(4) ԼԱԻԻԱՆԵԶԻՆԷ՝ ըստ Գերպ. Ալեքսանդրեանի (էջ 17) եւ համապատասխան է արդի Կիւրինի, Թոնուզի եւ Ազիզիէի շրջանին:

(5) Ըստ նոյն հեղինակին՝ արդի Բեհաճթէի շուրջը:



Մեղիտինէ ու Կատաւոնիա միասնաբար կազմած էին Կապադովկիոյ տասը նահանգներէն մէկը :

Ստրաբոն, որ ապրած է 63 Ք.է առաջ — 19 Ք. ետք, կ'ըսէ թէ «Իմ ժամանակս այս երկուքին (Կապադովկիոյ եւ Կատաւոնիոյ) իւրաքանչիւրն ալ իր յատուկ կուսակալն ունէր: Բայց որովհետեւ ասոնց եւ Կապադովկիացւոց մէջ ոչ լեզուի եւ ոչ սովորութեանց ոեւէ տարբերութիւն կայ, իրենց ցեղային տարբերութեան հետքերը զարմանալի կերպով բոլորովին անհետացուած են»:

«Թէպէտ բաժնուած էին, բայց ԱՐԻԱՐԱԹԷՍ Կապադովկիոյ առաջին քագաւորը իր պետութեան հետ միացուց (տես Zimmers, ԳԱՄԻՐՔ, ՀԱ., 1900, էջ 112. ՊԱՏՄ. ՀԱՅ ԿԵՍԱՐԻՈՅ, էջ 219-220):

Իսկ այն տեսութիւնը, որ Մեղիտինէն կը դնէ Փոքր Հայք կոչուած աշխարհամասի մը մէջ, շատ երկբայելի է, վասնզի Փոքր Հայքը որոշ եւ հաստատուն, ճշդուած սահմաններով երկիր մը չէր, այլ շատ առաձգական բնոյթ ունեցող աշխարհամաս մը:

Ոմանք Փոքր Հայք ըսելով կը հասկնան հնադոյն Փոքր Հայքի (ARMENIA MINOR) թաղաւորութեան սահմանները ընդգրկող շատ փոքր աշխարհամասը, որ ըստ Կիպրեթի, Եփրատով Հայաստանէն բաժնուած՝ կը հասնէր մինչեւ Արածանիի խառնուրդէն քիչ մը վարը, սահմանադիծն ըլլալով Դասկուսայի եւ Կիսիկայի միջեւ, որմէ ետք կը բաժնուէր Մեղիտինէի չրջանէն զիծով մը, որ կը հասնէր Տոնասայի մօտերը՝ աղեղնաձեւ մը կաղմելով, եւ այնուհետեւ հիւսիս-արեւելեան ուղղութեամբ կը հետեւէր լեռնազիծին (scordises լերինք), քիչ-շատ դուզահոսական նաեւ Ալիսի, որ Փոքր Հայքէ բխելով՝ կ'անցնի Կողովենէ եւ հարաւ-արեւմտեան ուղղութեամբ կը հոսի, գուղընթաց նաեւ Կողովենէի մէջ մնացող Սերաստիա-Կա-միսա-Չարօ զիծին, որմէ ետք զէպի հիւսիս կը ձգտի Պարթարեան չրջանին մէջ (Կիպրեթ, նաեւ այլք, վերջնական Փոքր Հայքը այստեղ չեն հասցներ շիտակ մինչեւ Մելանթիոս, այլ սահմանադիծը աւելի զէպի արեւելք կը դրծեն), եւ այն Պարթարեան-Խաղղեան ջրարաշխով բաժնուած վերոյիշեալ ծովեղերեայէն կը հասնի մինչեւ Բարձր Հայքի սահմանները, ուր Փոքր Հայք այս ներս մտած ծագին թէ՛ արեւելեան եւ թէ՛ հարաւային սահմանը կը կաղմէ «մինչեւ ցլոյն դարձուած Եփրատայ ի հարաւակոյս» (Հ. Յ. Տաշեան, ՀԱ., 1939, էջ 20):

Փոքր Հայքի այս սահմանադժուժը պատմական տուեալներու վրայ հիմնուած իրականութեան համապատասխան է: Սակայն ուրիշներ անոր կուտան տարադայման ընդարձակութիւն մը: Անոնք Եփրատի արեւմտեան կողմը տարածուած ընդարձակ երկիրները, որոնք հռոմէական վարչութեան տակ Հայք անունով զանազան նահանգներու բաժնուած էին, հակադրելով Եփրատի արեւելեան կողմը գտնուող Մեծ կամ Բուն Հայաստանին, աններելի սըխալով մը Փոքր Հայք կը նկատեն:



Հայ դասական մատենագիրները եւ պատմիչները չէին ճանչնար «Փոքր Հայք» անունով աշխարհամաս մը: Հայ մատենագիրներուն համար Եփրատի արեւմուտքը գտնուած երկիրները ընդհանուր կերպով «Յունաց աշխարհ» են: Նոյնիսկ անոնք Առաջին, Երկրորդ, Երրորդ եւ Չորրորդ Հայք կոչուածներն ալ միշտ օտար նկատած եւ անոնց մասին այլ ընդ այլոյ եւ խեղաթիւրուած ծանօթութիւններ տուած են:

Փոքր Հայքի վրայ որոշ տեղեկութիւններ տուած է Պտղոմէոս աշխարհագիր, որ կը ճանչնայ այս երկիրը:

Անիկա այս երկիրը կը բաժնէ հինգ գաւառներու, որոնք էին.

1. Որպալիսինէ (արդի Գարահիսարի շուրջը)
2. Տեստուղանա (արդի Այշեհիրապատի շուրջը)
3. Էտիոնիքա (արդի Կերճանի շուրջը)
4. Հորսէոն (արդի Ակնայ շուրջը)
5. Օրբիսինէ (արդի Արաբկիրի եւ Արկուայի շրջան):

Այս հինգ գաւառները բոլորովին անծանօթ են մեր մատենագրութեան, եւ ինչպէս անոնց արդի վայրերուն նայելով կը տեսնենք, Մալաթիա անոնց մէջ չէ, ինչ որ կը հաստատէ թէ անիկա Փոքր Հայքի մէջ չէր:

Նոյնպէս եթէ քննութեան առնենք անունները այն քաղաքներուն, զորս Պտղոմէոս կը յիշատակէ Եփրատի եզերքը եւ երկրին ներքին կողմերը՝ լեռներուն վրայ, կրնանք տեսնել թէ այս հինգ գաւառները, որոնք կը գտնուէին Եփրատի արեւմտեան կողմը կամ աջ եզերքը, Կիւմիւշխանէի սահմանէն մինչեւ Մելիտս եւ հիւսիսէն դէպի հարաւ կը տարածուէին, Մալաթիա չէին հասներ:

Professeur W. M. Ramsey կազմած է հետաքրքրական տախտակ մը, ուր Պտղոմէոսի հետ հնութեան ուրիշ հեղինակներէ յիշատակուած Փոքր Հայքի բոլոր տեղանունները կը հաւաքէ (տես *Historical Geography of Asia Minor*, էջ 71):

Այս ցուցակին ուշադիր քննութիւնը պիտի ցոյց տայ թէ Փոքր Հայք որքան սահմանափակ տարածութիւն ունեցող երկիր մըն էր, եւ պարզապէս փոքր կամուրջ մը կը հանդիսանար Կապադովկիան եւ Պոնտոսը Մեծ Հայաստանի միացնող:

Փոքր Հայքը մեծ տարածութիւն մը չունէր եւ Մելիտինէ կապ չունէր Փոքր Հայքի հետ: Կապադովկիա կանուխէն կրցաւ իւրացնել Մելիտինէի շրջանը եւ հասաւ մինչեւ Եփրատ:

Իսկ Փոքր Հայք անունով պզտիկ թագաւորութիւնը ենթարկուեցաւ պոնտական իշխանութեան եւ դէպի ծով դիմեց՝ Պոնտոսի մէջ ձուլուելով, կամ Հ. Յ. Տաշեանի բառերով «պոնտանալով» (ՀԱ., 1937, էջ 26):

Տիգրանի շրջանին՝ Փոքր Հայք Հայաստանի հետ վարչական ուժէ կապ չունէր եւ Մելիտինէ-Կեսարիա գիծին հիւսիսակողմը Փոքր Հայք-Պոնտոս չէր կրնար ալ ունենալ, քանի որ այդ շրջանին գլխաւոր տիրակալողը եւ Հը-



ռոմի ոյժին դէմ մաքառողը Պոնտոսն էր՝ Միհրդատ Մեծին վեհապետութեան տակ, որ խաղաղօրէն կլլած էր մինչեւ այն ատեն անկախ Փոքր Հայքը, որ այս միջոցին սրահ մը իսկ Հայաստանի մաս չկազմեց եւ Հռոմայեցիներուն անցաւ իբր Պոնտոսի մասը եւ ոչ թէ Հայոց ձեռքէն առնուեցաւ (Հ. Յ. Տաշեան, ՀԱ., 1937, էջ 25-26) :

Մինչ Մելիտինէ, որ կանուխէն Կապադովկիայէն զրաւուած էր եւ կազմած էր այս թաղաւորութեան տասը գաւառներէն մէկը, զրաւուած էր Հայերէն, անմիջապէս որ Մեծ Հայաստանի աշխարհակալ Արքայից Արքան՝ Տիգրան Բ. (95-56 Քր. ա.) անցաւ Եփրատը, ուր Մելիտինէի զրաւամբ հասած էր Կապադովկիոյ թաղաւորութեան սահմանները : Մեծն Տիգրան, 77-ին ոչ միայն Մելիտինէն, այլ եւ ամբողջ Կապադովկիան զրաւեց, առանց սակայն Մալաթիան բաժնելու Կապադովկիայէն եւ կցելու Մեծ Հայքի Ծովքին, որ Եփրատի ձախ կողմն էր Մալաթիոյ դիմաց (Յ. Մանանդեան, ՔՆՆԱԿԱՆ ՏԵՍՈՒԹԻՒՆ ՀԱՅ ԺՈՂՈՎՐԴԻ ՊԱՏՄՈՒԹԵԱՆ, 1944, Ա. հտ., էջ 154) :

Կարճատեւ եղաւ նուաճումը թէ՛ 77-ին եւ թէ՛ 67-ին, երբ Տիգրան Մեծ, Տիգրանակերտի անկումէն (69) ետք, կրցաւ յաղթական Լուկուլլոսը պարտութեան մատնել իր վերակազմած բանակով Արածանիի մօտ եւ վերադրաւել Կապադովկիան Մալաթիայով միաւորին (Մանանդեան, նոյն, էջ 225) :

Պոմպէոս վերջ տուաւ 64-ին ոչ միայն Մալաթիոյ եւ Կապադովկիոյ վրայ հայ տիրապետութեան, այլ նաեւ ամբողջ հայկական կայսրութեան (Կոդեան, նոյն, էջ 12) : Մեծն Տիգրանի եւ Մեծն Միհրդատի ընկճուելէն ետք Հռոմայեցիք Պոնտոսէն զրաւուած Փոքր Հայքի (*Armenia Minor*) թաղաւորութիւնը եւ հայ թաղաւորութենէն տիրապետուած Կապադովկիան վերակազմեցին՝ առանց անոնց անկեղծ նեցուկ ըլլալու :

Հռոմ սովոր էր իր սահմաններու մօտ զանազան տէրութիւններուն նախ բարեկամ ձեւանալ եւ զանոնք հովանաւորել եւ ապա միջամտելով անոնց ներքին գործերուն՝ «Բաժանեա զի տիրեացես» ի իր պառակտիչ սկզբունքը կիրարկել եւ զանոնք ի վերջոյ իր պետական կազմին մէջ առնելու շնորհը ընել, եւ այսպէս վերջնապէս զանոնք կցել իր կայսրութեան :

Բոլոր Փոքր Ասիոյ փոքրիկ թաղաւորութիւնները այս կերպով ջնջուեցան՝ Պոնտոսի եւ Հայաստանի Մեծն Միհրդատ եւ Մեծն Տիգրան զինակից թաղաւորներուն զօրաւոր պայքարէն ետք :

Անոնց ընկճուելէն ետք Հռոմ սիրաշահելու համար էր որ անոնց նուաճուած երկիրները, ի մասնաւորի Փոքր Հայքի եւ Կապադովկիոյ թաղաւորութիւնները, վերակազմեց :

Անոնց առաջինը՝ Փոքր Հայք՝ շատ կարճ կեանք մը ունեցաւ եւ քանի մը անգամ ջնջուելէ եւ վերակազմուելէ ետք, վերջապէս կցուեցաւ հռոմէական կայսրութեան, անոր նահանգներուն մէջ ներմուծուելով : Այս թաղաւորութեան վախճանին հետ նոյնիսկ «Փոքր Հայք» բացատրութիւնը, որ հռոմէական էր, սկսաւ գործածութենէ իյնալ եւ անհետանալ, առանց մոռ-



ցուելու երբեմն այս անունով ճանչցուած երկիրին հայկական նկարագիրը : Այլեւս Փոքր Հայք մասը կը կազմէր Հայք ընդհանուր կոչումով եւ Առաջին, Երկրորդ, Երրորդ եւ Չորրորդ եւ այլ կոչումներով վարչական բաժանումներէն մէկուն կամ միւսին՝ ըստ ժամանակին, որուն ընթացքին փոխուած սահմաններ ունեցած են անոր չորս վարչական բաժանումները (Ա. Ալպոյաճեան, ՊԱՏՄՈՒԹԻՒՆ ԵՒ ԴՈՒՍԻՆՑ ՀԱՅՈՅ, էջ 4) :

Իսկ Պոմպէոսի Տիգրանի հետ կնքած Արտաշատի դաշինքով ոչ միայն Մելիտինէն վերստին դրուեցաւ Կապադովկիոյ թագաւորութեան (Ա. Ալպոյաճեան, ՊԱՏՄՈՒԹԻՒՆ ԿԵՍԱՐԻՈՅ ՀԱՅՈՅ, էջ 184), այլ եւ նոյնիսկ Ծովքը տրուեցաւ Կապադովկիոցի արքային, որ Հռոմէն հովանաւորեալ մըն էր : Այսպէս Հռոմի պաշտպանութեամբ Կապադովկիոյ թագաւորութիւնը տարապայման կ'ընդարձակուէր, Կապադովկիոյ նահանգին Կիլիկիոյ թագաւորութեան մի քանի մասերը միացնելով (Հ. Մակուարտ, ՀԱՅ-ԿԵՍԱՐԻԱ, էջ 132), բացի Ծովքէն, զոր Հռոմ Կապադովկիոյ շնորհած էր :

Այս պետութեան մասս պէտք էր կազմած ըլլար Մելիտինէ մինչեւ այն թուականը որ Կապադովկիոյ թագաւորութիւնը կը ջնջուէր Հռոմի սովորական մեթոտներով : Իսկ Ծովքը, որ բռնի եւ անբնական կերպով միացած էր Կապադովկիոյ, հայկական երկիր մըն էր եւ չէր կրնար այսպէս մնալ : Ան կրկին Հայաստանի մասս եղաւ եւ մնաց, բայց Մելիտինէ ալ չտեսաւ երբեք հայ արքայ մը, եւ որչափ ալ շատ կարճատեւ էր Հայոց տիրապետութիւնը, Հայոց ձեռքէն անցաւ Հռոմի :

Այսպէս հայ տիրապետութեան շուտով յաջորդեց հռոմէականը Կապադովկիոյ եւ Մալաթիոյ վրայ, ուսկից վերջին անգամ իբր ոչ-հռոմէական նահանգէ, անցած էր Անտոնինոս՝ 36-ին :

Գերմանիկոս էր որ զայն վերածեց հռոմէական նահանգի Քրիստոսէ առաջ 17-ին (Մանանդեան, նոյն, էջ 308) :

Քրիստոսէ ետք 61-ին եւ 64-ին Կորբուզոն եւ Պետոս, Կապադովկիոյ Հռոմէ կարգուած կուսակալները եւ Պարթեւներու դէմ պատերազմին հռոմայեցի զօրավարները, Մալաթիոյ կայան ըրին իրենց բանակներուն՝ Հայաստանը նուաճելու համար :

Այս երկարատեւ անդուլ պատերազմներէն ծնաւ 66-ին հայ արչակունի հարստութիւնը՝ երկու հզօր պետութիւններու միջեւ իբր արդելակ պետութիւն եւ առաջին Արչակունին՝ Տրդատ Մալաթիայէն անցաւ Հռոմ երթալու համար (Կոլեան, նոյն, էջ 13) :

Այդ թուականէն ետք Մելիտինէ իբր սահմանապահ զօրքերու բանակաւորի՝ ստացաւ կարեւորութիւն :

Դիոկղետիանոս կայսրը (284-305), որ ստեղծած էր վարչական նոր կազմակերպութիւն մը եւ սահմանած էր զաւտուական նոր բաժանումներ, արեւելի կուսակալութիւնը բաժնեց հինգ թեմերու, որոնք էին. 1. Արեւելի, 2. Եգիպտոս, 3. Ասիա, 4. Պոնտոս եւ 5. Թրակիա :



Կապաղովկիա ենթարկուած էր Պոնտոսի, իսկ ընդարձակագոյն Փոքր Հայքը բաժնուած էր Կապաղովկիայէն եւ առանձին նահանգի մը, որուն մայրաքաղաքն էր Մելիտինէ եւ կը կառավարուէր պրետորով մը (Ramsey, նոյն, էջ 313) :

Դիոկղետիանոսի այս կազմակերպութիւնը առաջին անգամ փոփոխութեան ենթարկուեցաւ Կոստանդիանոսի կողմէ (306-337), որ հռոմէական կայսրութիւնը վարչական նոր կազմակերպութեամբ մը օժտեց, զայն բաժնելով նահանգներու, որոնք իրենց կարգին կը ստորաբաժանուէին վիճակներու եւ վիճակները՝ գաւառներու :

Այս նոր բաժանումներուն համաձայն արեւելեան նահանգին ենթակայ Պոնտոսի վիճակին մէջ կ'իյնար Փոքր Հայքը, որ երկու գաւառի բաժնուած էր, իւրաքանչիւրը իր դիուխը ունենալով Պրետորներ :

Այս երկու գաւառները կը կոչուէին՝ 1. Արմենիա Առաջին կամ Առաջին Հայք, 2. Արմենիա Երկրորդ կամ Երկրորդ Հայք : Ասոնցմէ առաջինին վարչական կեդրոնն էր Սեբաստիա, եւ այս գաւառին մէջ կը գտնուէին նաեւ Սեբաստուպոլիս, Նիկոպոլիս, Կոդոնիա, Սատաղա, Ամփիպոլիս, Պերիսսա, Հեփալիկեպոլիս կամ Պետաքասլէ քաղաքները :

Յետոյ աւելի եւս ընդարձակուեցաւ այս գաւառը, եւ անոր կցուեցաւ նաեւ Երիզա, Կամախ եւ Թէոդոսոպոլիս գաւառները :

Արմենիա Երկրորդին կեդրոնն էր Մելիտինէն եւ անոր սահմաններուն մէջ կը գտնուէին նաեւ Արկա, Կոմանա Կապաղովկիոյ, Արապիսոս եւ Կիթառիձոր :

Երբեմն այս գաւառին կցուած է նաեւ Սոփինէ (=Ծոփք) եւ Տրոսպատիս կամ Տրոսպոնտիս (ՊԱՏՄ. ՍԵՖԱՍՏԻՈՅ, էջ 15) :

335-ին Կոստանդիանոս կայսրը նոր վարչական կարգադրութիւններ ըրաւ Փոքր Ասիոյ մէջ, եւ Կապաղովկիան, Պոնտոսը եւ Փոքր Հայքը միացուց եւ կազմեց Թաղաւորութիւն մը, որուն դիուխը դրաւ իր եղբորորդին եւ փեսան Աննիբադիանոսն, բայց ան աւելի միայն անուանական վեհապետ մըն էր եւ միայն երեք տարի (335-338) կրցաւ իշխել, վասնզի Աննիբադիանոս իր զօրքերէն սպաննուեցաւ, Կոստանդիանոսի մահէն ետքը (Գեր. Անդրէաս Վրդ. Ալեքսանդրեան, ՊԱՏՄ. ՍԵՖԱՍՏԻՈՅ, էջ 48) :

Բայց Փոքր Հայքը, զոր Հռոմայեցիք ստեղծած էին, հետզհետէ ընդարձակուեցաւ եւ Ստրաբոնի կողմէ յիշուած 10 նահանգներէն եօթը փոխանակ Կապաղովկիոյ՝ Փոքր Հայքի մասերը նկատուեցան ժամանակի ընթացքին : Ասոնց առաջինը Մելիտինէի նահանգն էր :

Յետոյ այս նահանգն ալ երեքի բաժնուեցաւ՝ Առաջին, Երկրորդ եւ Երրորդ Հայք անուններով :

Մելիտինէ մայրաքաղաքը եղաւ անոնցմէ միայն մէկուն կամ միւսին : Այսպէս 378-ին մայրաքաղաքն էր Երկրորդ Հայքի :



Հռոմ շուտով Փոքր Հայքը կցած էր կայսրութեան եւ շուտով ենթարկած հռոմէական օրէնադրութեան, տալով բնակչութեան Հռոմէական քաղաքացիական իրաւունքներ, մինչ Եփրատէն արեւելք Հռոմի տիրապետութեան ենթարկուած Հայաստանի մասերը կը պահէին իրենց ներքին ազգային կազմակերպութիւնը, նախարարական դրութեամբ:

Երբ 384ին Հռոմ եւ Պարսկաստան համաձայնեցան Հայաստանը իրենց միջեւ բաժնելու, Թէոդորոս կայսրը (379-395) նոր կարգադրութիւններ ըրաւ հռոմէական տիրապետութեան ենթարկուած հողերուն համար:

Այսպէս, 378էն 386 Փոքր Հայքը կրկին բաժնեց երկու մասի՝ Առաջին Հայք եւ Երկրորդ Հայք անուններով (*Guterbob, ROMISCH ARMENIA*, 5 եւ 23, Հիւպչման, Հին ՀԱՅՈՑ ՏԵՂԻՈՅ ԱՆՈՒՆՆԵՐԸ, էջ 76), անջատ հռոմէական Հայաստանէն, որ կը բաղկանայ գլխաւորապէս Փոքր Հայքի դրացի Եկեղեաց գաւառէն, Դերջանէն, Խորձեանէն, Կարինէն եւ հին հռոմէական սատրապետութիւններէն, ինչպէս Ծոփքէն, Անդեղտունէն եւայլն, եւ կը կառավարուէր կոմսով մը, որ «կոմս Հայաստանի» (*Comes Armeniae*) տիտղոսը ունէր եւ կուսակալ մըն էր պարզապէս, զոր կայսրը ինք կ'անուանէր: Երկիրը կը պահէր իր նախկին տեղական օրէնքները, իսկ Առաջին Հայք եւ Երկրորդ Հայք մտած էին կայսրութեան ընդհանուր վարչական կազմին մէջ:

Այս կարգադրութեամբ «Փոքր Հայք»ի ոչ միայն բաժանումը, այլ նաեւ անունը դոյութենէ կը դադրէր եւ «Փոքր Հայք» աշխարհը մաս կը կազմէր Առաջին Հայքի, Կողովինէի (Սեբաստիոյ շրջանակ):

Յուստինիանոս կայսրը 536-ին աւելի մեծ քայլեր առաւ:

15 Ապրիլ 536-ին հրովարտակով ջնջեց Հայաստանի բոլոր առանձնաշնորհները (*ՊԱՏՄ. ՀԱՅ ԿԵՍԱՐԻՈՅ*, էջ 346): Եւ Հայաստանի երբեմնի թագաւորութեան հողերը եւ միւս Հայք կոչումներով երկիրները չորս (4) վարչական շրջանակներու բաժնեց.

1.— Ա. ՀԱՅՔ

2.— Բ. ՀԱՅՔ

3.— Գ. ՀԱՅՔ

4.— Դ. ՀԱՅՔ

Իսկ Փոքր Հայքը միացուց Հայաստանի Բարձր Հայք գաւառին հետ եւ կազմեց Ներքին Հայքը կամ Յուստինիանոսի Առաջին Հայքը:

Այս անգամ Եփրատի արեւմուտք արտահայաստանեան չորս նահանգներէն Գ. Հայքի կուսակալանիստ քաղաքը եղաւ Մելիտինէ եւ գլխաւոր քաղաքներէն էին Արկա (արդի Կերկերը) Արաբիսոն (արդի Եարբուզ՝ մերձ Զէյթունի), Արիարաթիա (արդի Ազիզիէ կամ Կիւրին), Կապադովկեան Կոմանա (հիմա Հաճընի եւ Ազիզիէի միջեւ գիւղ մը), Կոկիսոն (արդի Կէօքսու):

Ուրեմն Մելիտինէ կը ներկայանար իբր առանձին վարձական շրջանակի մը կեդրոնը (*ՀԱՅ ԿԵՍԱՐԻԱ*, էջ 346-7):



Այս կարգադրութիւնը շատ երկար ատեն չտեւեց, վասնզի Մօրիկ կայսեր ատեն (587-603), 591-ին, նորէն Հայաստանը կամ տւելի ճիշդ սահմանումով՝ հայաբնակ հողերը բաժնուեցան 8 նահանգներու, որոնց առաջինն էր Առաջին Հայքը, իրը մայրաքաղաք ունենալով Մելիտինէն:

Իսկ Փոքր Հայքը բոլորովին անհետացաւ, վասնզի ներմուծեցաւ «մասն մեծ Հայոց» շրջանին մէջ (ՀԱ, 1937, էջ 44):

Է. դարէն ետք Մելիտինէի շուրջ ամէն ինչ չփոթ է, վասնզի իր շրջականերով Մելիտինէ կռուախնձոր եղած էր բիւզանդական կայսրութեան եւ արաբ խալիֆայութեան միջեւ:

Երբեմն Արարները տիրած են եւ երբեմն՝ Բիւզանդացիք. այնպէս որ բնաւ հաստատուն եւ խաղաղ շրջան մը չէ ունեցած: Արարներու պատմութեան ասպարէզը դալէն հազիւ հարիւր տարի վերջ Լեւոն Խաւերացի կայսրը (717-741) պարտաւորուած է ջնջել քաղաքային վարչութիւնները եւ դանոնք միացուցած է զինուորական հրամանատարութիւններու:

Այսպէս, երկիրը դարձած է մշտնջենական պատերազմի դաշտ մը, ուր ամէն բանէ առաջ էին պատերազմական սլահանջները, որոնք մէկ օրէն միւսը կը հարկադրէին փոփոխութիւններ:

Արարներուն յաջորդեցին Կեդրոնական Ասիայէն դէպի արեւմուտք արշաւող բարբարոս եւ վայրենի մարդկային զանդուածներ, որոնց դէմ թէեւ Բիւզանդիոն սլաքար մղեց, բայց չկրցաւ դէթ Եփրատի դիժը սլաշտպանել եւ պարտաւորուեցաւ անոնց առջեւ տեղի տալ:

1021-էն մինչեւ 1315 (Մալաթիոյ դրաւումը Օսմանցի Թուրքերէն)՝ այս քաղաքը բնաւ չունեցաւ հաստատուն եւ տեւական վիճակ մը եւ շատ մը փոփոխութիւններու ենթարկուեցաւ համաձայն արշաւող բարբարոսներու եւ սլաշտպանող ոյժերուն փոխ-յարարերութիւններուն:

Օսմանեան պետութեան տիրապետութեան ենթարկուելէն ետք, ան մաս կազմած է Անատոլիոյ, եւ հին բաժանումներու համաձայն Մարաշի էյլալէթին, որ իր գլուխը ունէր Պէյլէր Պէյի մը եւ կը բաժնուէր չորս դաւառի կամ սանճագի, որոնց երկուքն էին Մալաթիա եւ Սամոսատ, որոնք վերջը իրարու կցուեցան. Սամոսատ մասն եղաւ Մալաթիոյ սանճագին (Ինճիճեան Հ. Ղուկաս վրդ., ԱՇԽԱՐՀԱԳՐՈՒԹԻՒՆ, Ա., էջ 320), եւ իր շրջականերով կը կազմէր այդ էյալէթին (=կռտակալութիւն) մէկ սանճագը կամ լիվան (գաւառը):

Ինճիճեան արքունի դիւանագիրին մէջ գրուած է կ'ըսէ՝ «Լիվա Մալաթիոյ յորում նստի Երկտուղեան փաշայ, եւ դատըլըզ (այսինքն թեմք) պարունակեալք յայս Լիվա են սոքա»:

Ա. Մալաթիէ

Բ. Քեախթէ

Գ. Դաշապատ

Դ. Շուրէ հանդերձ Պուճաղիւ



Ե. Քիւրքիւր (Կերկեր) լիւլա

Զ. Սամսար Լիւլա (որ թերեւս է Սամսատ)

Է. Տիյուրիկի լիւլա

Ը. Հիւսնի Մանսուր

Թ. Պեհեսնի

Ժ. Մազիրէ

Եւ յիւրաքանչիւրումն ի թեմից աստի նստի գատը, այսինքն գատաւոր : Քեաթիպ չէլէպին ի Ճեհաննիւմային զՇուրէն կոչէ Շուրիւմազ եւ զՏիյուրիկին՝ Տիվերէկի» :

Մալաթիոյ սանճագը ժամանակ մը Խարբերդի եւ ժամանակ մըն ալ Տիարպեքիւրի կուսակալութեան միանալէ ետք՝ Սուլթան Ապտ-իւլ-Ազիզի (1861-1876) իշխանութեան ատեն Խարբերդի գաւառին հետ կազմած է նոր կուսակալութիւն մը, Մամուրէթ-իւլ-Ազիզ անուանով : Մալաթիա գաւառը (սաննագ) Մամուրէթ-իւլ-Ազիզի կուսակալութիւնը կազմող երեք գաւառներէն մին էր ու հարաւ-արեւմտեան կողմն էր :

Մալաթիոյ լիւլան կամ սաննագը, որ միւլթսարըֆուքիւն ալ կոչուած է, բաժնուած էր հինգ գազաներու կամ գայմագամուքիւններու, որոնք են .

1. Մալաթիա (կեդրոն)

2. Արկա կամ Ազլէ տաղ

3. Քեաթա

4. Հիւսնի Մանսուր

5. Պեհեսնի

Ասոնք երկու մասի կը բաժնուէին, ըստ իրենց դիրքին :

Հիւսնիսային մասը կը բովանդակէր Մալաթիա եւ Արկա եւ հարաւայինը՝ Քեաթա, Հիւսնի Մանսուր եւ Պեհեսնի (ԲԻԻՐԱԿՆ, 1900, էջ 392) :

Մինչեւ թուրք հանրապետութեան հաստատութիւնը, վարչական այս կազմակերպութեամբը կառավարուած են Մալաթիա եւ իրեն ենթարկուած հինգ գաւառները, որոնք ըստ Շեմսետին Սամիի Գամուս-իւլ-Ալեամ-ին (տպ. 1898) ունէին 27 Նահիէ (գիւղախումբ) եւ 1240 գիւղ :

1903-ին հրատարակուած ուրիշ վիճակագրութեան մը համաձայն Մալաթիոյ միւլթսարըֆութեան հինգ գազաներն են .

1.— Մալաթիա, ունէր 66 գիւղ

2.— Հիւսնի Մանսուր, ունէր 174 գիւղ

3.— Պեհեսնի, ունէր 115 գիւղ

4.— Ազճէ տաղ, ունէր 122 գիւղ

5.— Քեաթա, ունէր 146 գիւղ :

Սուլթաֆա Քեմալի Միլլի կառավարութիւնը կայսրութեան ժամանակի բոլոր կուսակալութիւնները, որ իր իշխանութեան տակ մնացած էին, ջնջեց եւ հին բոլոր կուսակալութիւններուն գաւառները վերածեց կուսակալութիւններու : Մամուրէթ-իւլ-Ազիզի կուսակալութեան երեք գաւառներն



ալ, որոնք էին խարբերդ կամ էլագիզ, 2. Տերսիմ, 3. Մալաթիա, երեքն ալ վերածուեցան կուսակալութիւններու:

Այսպէս, Մալաթիա կազմեց կուսակալութիւն մը, որուն ենթարկուած են հինգ գաւառներ, որոնք են.

1.— Մալաթիա (կեդրոնական գաւառ)

2.— Հիւսնի Մանսուր կամ Ատրեաման

3.— Պեհեսնի

4.— Քեախտէ

5.— Աղճատաղ:

Մալաթիոյ քաղաքին բոլորտիքը գտնուող 147 գիւղերը կեդրոն գաղային (Մերքեզ գաղա) կը վերաբերին: Արեւմտեան կողմի բոլոր գիւղերը Աղճատաղի եւ Թոխմայէն անդին Արզաւունի բոլոր գիւղերը Մատէնի վարչութեան տակ են:

## ԺԲ.

### Հ Ն Ո Ւ Թ Ի Ի Ն Ն Ե Ր

#### ԵԻ

### ՊԱՏՄԱԿԱՆ ՅԻՇԱՏԱԿԱՐԱՆՆԵՐ

Մալաթիա Փոքր Ասիոյ հնագոյն քաղաքներէն մէկն է եւ ունի պատկառելի պատմական անցեալ:

Ամենահին ժամանակներէ սկսեալ իր անունը խառնուած է աշխարհի պատմութեան:

Այն շրջանակը, որ այսօր Մալաթիոյ կուսակալութիւնը կը ներկայացընէ, մաս կը կազմէ պատմական հաթեան կայսրութեան, որ մեծ քաղաքակրթութիւն մը ունեցած է եւ Փոքր Ասիոյ սիրտին վրայ ամենակարեւոր դեր կատարած է:

Իր յիշատակարանները կը մնան ցարդ, ինչպէս Փոքր Ասիոյ բազմաթիւ վայրերուն, նաեւ Մալաթիոյ մէջ եւ շուրջը:

Հաթեանց ժամանակ, գոնէ մինչեւ Քր.է առաջ 1200, այս շրջանակը կը կազմէր Տիգարամա նահանգը եւ կը պարունակէր երեքը Կումմուխ (Կոմմազինէ), Մելիտինէ (Մալաթիա) եւ Տիւլ-Գարիմմէնի (Կիւրիւն) կոչուած



տեղերը, եւ յետոյ միայն բաժնուեցաւ այս երեք մասնական աշխարհներու (Ե. Քասունի, ՆԱԽԱՀԱՅԿԱԿԱՆ ՀԱՅԱՍՏԱՆ, էջ 80, Տաշեան, ՀԱ, 1931, էջ 67-8, Խաչատրեան, ՍԵՊԱԳՐԱԿԱՆ ՇՐՋԱՆԻ ՊԱՏՄՈՒԹԻՒՆ, էջ 238 եւ 395):

Մինչեւ 1200 Քր. Ա. ոչ Մելիտ եւ ոչ Կոմմոլիս կը յիշուին:

Հաթ՝ Խատտուսիլ Գ. (1298-1260 Ք. Ա.) Իշուվայ Ուղաշտա արեւմտեան նահանգը կցեց Մելիտինէի թագաւորութեան, որ առաջին անգամ ըլլալով կը յիշուի եւ որ Խանին Գալբատ անունն ալ կը ժառանգէ, կ'երեւի անոր համար որ Միտանի կամ Խուրրի պետութիւններու վերապրող ազնուականներէն մեծ մասը Մելիտինէ քաղաքած էր (Ե. Քասունի, ՆԱԽԱՀԱՅԿԱԿԱՆ ՀԱՅԱՍՏԱՆ, էջ 134):

Հաթերը գրաւեցին Մելիտինէն, որ առանձին թագաւորութիւն մըն էր եւ որ ատկէ յետոյ յաճախ իբր հաթ պետութեան բաղկացուցիչ բաղմաթիւ թագաւորութիւններէն մէկը յաճախ յիշուիլ սկսաւ:

Երբ հաթ մեծ կայսրութիւնը կործանեցաւ, իր բեկորներէն կազմուեցան դէպի հարաւ-արեւելք շատ մը մեծ ու փոքր տեղական թագաւորութիւններ, ինչպէս Մելիտինէ, Գուրգում (Մարաշ), Կոմմոլիս (Կոմմագինէ = Սամոսատ), Քարքամիուս (Կարկամիշ), Խաթինա (Հաթայ = Իսկենտերուն) եւ Եմաթ, եւայլն:

Ասոնք թէեւ մերթ ընդ մերթ արտաքին թշնամիներու դէմ կը միանային, սակայն ընդհանրապէս զատ-զատ կը գործէին (Ե. Քասունի, ՆԱԽԱՀԱՅԿԱԿԱՆ ՀԱՅԱՍՏԱՆ, էջ 56):

Դեռ չորս դար շարունակեցին ասոնք իրենց յատուկ կեանքը եւ քաղաքակրթութիւնը, եւ նշանակելի է որ գիտուններու ընդհանուր համոզումը այն է որ «Հաթեան» (Hittite) կոչուած յիշատակարանները, ինչպէս դիտել կու տայ Ե. Քասունի (նոյն, էջ 57), գրեթէ բոլորովին այս մասնակի թագաւորութեանց մնացորդներն են եւ ոչ թէ մեծ կայսրութեան:

Այս Նոր-Հաթեան փոքր թագաւորութիւնները նկատելի է որ սերտ շփումներ ունեցած են Ուրարտուի հետ, երբեմն թշնամական եւ երբեմն բարեկամական:

Նոյնպէս պէտք է գիտնալ, թէ Նոր-Հաթեան քաղաքակրթութեան բուն վառարանն ըլլալ կը թուի Մելիտինէ, որ Հայաստանի այնչափ մօտ էր:

Ուրարտայի թագաւորներու արձանագրութիւններէն կը հասկցուի, թէ հարաւ-արեւմտեան Հայաստանի այս նահանգները, զորս Հաթերը «Խատիաստան» կ'անուանէին, Մալաթիոյ թագաւորին իշխանութեան տակ կը գտնուէին:

Այս շրջանակը Ասորեստանի եւ Ուրարտուի պայքարի ատեն կռուախնձոր եղած է երկու պետութեանց միջեւ:

Այսպէս, Ուրարտուի Մենուաս (810-785 Ք. Ա.) թագաւորը իր թագաւորութեան կցած է Մելիտէ = Մելիտինէ (Ղափանցեան, ՈՒՐԱՐՏՈՒԻ



ՊԱՏՄՈՒԹԻՒՆ, էջ 151 եւ Ե. Քասուհի ՆԱԽԱՀԱՅԿԱԿԱՆ ՀԱՅԱՍՏԱՆ, էջ 296—7), որ ուրարտեան դաշնակից թագաւորութիւններէն մէկը կը կազմէր (Ե. Քասուհի, Նոյն, էջ 302):

Ուրարտեանք հոն հանդիստ չեն ձգուած, վասնզի Մալաթիոյ աշխարհագրական դիրքը, որ կերտած է այդ երկրամասին պատմութիւնը, թոյլ չէր տար այդ անդորրութեան եւ հանդիստին, վասնզի այդ շրջանակը՝ ինչպէս ամենահին ժամանակներէն սկսեալ՝ բախման վայր մը եղած էր բազմաթիւ ժողովուրդներու եւ իշխանութիւններու, նոյնպէս նաեւ այդ շրջանին նոյնը հանդիսացաւ:

Մասնաւորապէս Մալաթիա, Փոքր Ասիան Հայաստանէն անջատող մեծ ջուրի հոսանքը՝ Եփրատը անցնելու յարմարագոյն վայրը եւ Տաւրոսեան լեռնաշղթայէն դէպի Սիւրիա անցնելու ամենէն գլխաւոր ճամբան կը հանդիսանար:

Հետեւաբար իրարու յաջորդող անկէ անցնող կամ հոն տեղաւորուող բազմաթիւ ազգեր հոն ձգած էին յիշատակարաններ: Մասնաւորապէս այս տեսակէտով նշանաւոր էին հաթեան կայսրութեան բեկորներէն կազմուած Փոքր Ասիոյ արեւելեան ծայրը եւ Սիւրիոյ հիւսիսը կազմուած մանր թագաւորութիւնները, որոնք բազմաթիւ յիշատակարաններ թողած են այդ երկրամասերուն մէջ: Այդ աշխարհամասին մէջ առանձնապէս Մալաթիա եւ իր շրջակայքը ամենէն նշանաւորներէն մէկը եղած է. հետեւաբար եթէ ըսենք թէ իր բազմաթիւ հնութիւններով ամենանշանաւոր վայր մը եղած է, չափազանցութիւն ըրած չենք ըլլար:

Է. Հոնիկման (E. Honigmann), որ իսլամ երկիրներու պատմութեան մասնագէտ մըն է, *ENCYCLOPEDIE DE L'ISLAM*-ի մէջ (Գ. հտ, էջ 208) Մալաթիոյ վրայ խօսած ատեն քաղաքին պատկառելի հնութիւնը ինքն ալ կը հաստատէ եւ կուտայ տեղեկութիւններ, որոնց ուրիշ տեղ չեմ հանդիպած. ուստի վերապահութեամբ կը ներկայացնեմ:

Է. Հոնիկման կը գրէ թէ «Այս քաղաքը յիշուած է ասորեստանեան բեւեռագիր արձանագրութեանց մէջ Մելիտա<sup>1</sup> անունով եւ Մալաթիոյ մէջ (աւելի ճիշդ Արսլան Թեփէ, Մալաթիոյ քիչ մը հարաւը) կը գտնուին Հիթիթական երկու կոթողներ<sup>2</sup>:

Հաւանական է որ այս քաղաքն է որ յիշուած է M. L. Z. ի (վերջին գիրը կասկածելի է) սահմանները իբր հողամաս, Համատի Z. H. R. թագաւորին արձանագրութեան մէջ (Ք. Ա. 800-ի ատեններէն), զոր Rognon գտաւ Հալէպի մօտ Աֆիս:

Պլինիոս (ԲՆՈՒԹԵԱՆ ԳԻՐՔ, Դ. 8) այս քաղաքը կը յորջորջէ Melita

(1) Հաւանորէն Գերսլ. Կոդեանի Մեւլիդը:

(2) E. Honigmann իր տեղեկութեան աղբիւր նշանակած է Messesechmidt, Cospus inseriph hettitic p. m. VAG, 1900, IV, էջ 13, 1906, V, էջ 7:



*a Semiramida condita* . «Առասպելական հիմնադիրին անունը թե-  
րեւս դեռ պահուած է Շամրին ամրոցին անունին մէջ, զոր Միքայէլ Ասորի  
կը յիշէ ( MICHEL LE SYRIEN, թրգմ. Chabot, Գ. հտ., էջ 272) ԺԲ,  
դարուն Սաուաա ( Sawad ) կոչուած երկիրին մէջ, Մալաթիայի շրջ-  
ջակայքը :»

Է. Հոնիկման յետոյ կը խօսի այն մեծ բարդաւածման վրայ, զոր  
հռոմէական կայսրութեան տիրապետութեան տակ ունեցած է Մալաթիա,  
մասնաւորապէս հռոմէական բանակին իբր կայան: Այսքան հին եւ շար-  
ժուն երկրամասի մը մէջ շատ բնական է որ պիտի գտնուէին մեծ քանակու-  
թեամբ հնութիւններ, շատ մը այլադան իշխանութիւններու եւ դարերու  
պատկանող:

Արդարեւ շատ հարուստ կեդրոն մը եղած է Մալաթիա հնութիւննե-  
րու, որոնք կը գտնուէին նահանգին չորս որոշ շրջանակներուն մէջ եւ զորս  
ցոյց կու տայ Հ. Եփրեմ Վրդ. Պօղոսեան:

Այս չորս հնութեան մեծ կայաններն էին՝

1.- Քեախաէ

2.- Հին Մալաթիա

3.- Ասլան Թեփէ

4.- Քէօմիւր — խան — Իդուլի (Եադըլըխան):

Այս հնութիւնները պատահարօրէն կամ մասնակի պեղումներով երե-  
ւան հանուած, գիտական մեթոտներով չեն քննուած, եւ ոչ ալ պէտք եղած  
խուզարկութիւնները կատարուած են՝ նահանգին բոլոր հնութիւնները ե-  
րեւան հանելու համար: Այնպէս որ գաւառէն գտնուած հնութիւններէն ո-  
մանք յայտնի չէ նոյնիսկ թէ ի՞նչ ծագում ունին եւ ո՛ր ազգին, ո՛ր պետու-  
թեան կը պատկանին:

Հոգելոյս Պէննէեան Կարապետ քհնյ. այս պատճառով առանց խոր  
ուսումնասիրութիւններու մէջ մտնելու եւ յայտնի հնութիւններուն սու-  
բարեան, հաթեան, խալթեան կամ ուրարտեան, ասորեստանեան եւ այլն  
ըլլալը առանց ճշգրիտ պատասխանատուութիւնը յանձն առնելու, միայն ա-  
նոնց տեղերը ու ինչ ըլլալը նշանակելով բաւականացած է:

Իր այս մասին գրած տողերը հետաքրքրական են, եթէ ոչ այն տե-  
սակէտով որ հնադիտական արժէք մը կը ներկայացնեն, այլ գոնէ ցոյց  
կու տան թէ ո՛րքան առատ հնութիւններ կային Մալաթիոյ գաւառին մէջ:

Հետեւաբար կ'արտադրեմ իր այս մասին գրած տողերը նոյնու-  
թեամբ:

Ահա իր տուած տեղեկութիւնները.—

«ԲԼՈՒՐՆԵՐ ԵՒ ՀՈՂԱԿՈՅՏՆԵՐ (ԹԻԼ). — «Մալաթիա ունի իր մէջ,  
աւելի հնադէտներու հետաքրքրութեան եւ ուշադրութեան արժանի բաւա-  
կան բնարկուրներ եւ հողակոյտներ ալ, որոնցմէ նշանակենք.

1.- Արսլան Թեփեսի.— 70—80 մեթր բարձրութեամբ հողակոյտ մը



Օրտուղիի հիւսիսային կողմը: Վրան տապանադրերը անընթեռնի վիճակի հասած գերեզմանատուն է: Այստեղի հողը բորակախառն ըլլալով՝ շաղախին խառնուած յարդը կանաչանալ եւ անձրեւի կաթիլները տակը իջնելու չթողլուն համար, քաղաքացիք տանիքները ծեփելու հողը միշտ ասկից կը տանին: Փորուած ատեն կը գտնուին հին հողամաններ, սլաքաձեւ երկաթներ, գործիքներ, քար արձան եւայլն: Ասկից 18—20 տարի առաջ այս բլրոյն շրջակայ արտերէն մէկուն մէջէն գտնուած էր մէկ մեթր երկայնութեամբ եւ 3 քառորդ մեթր լայն քար մը, որուն վրայ ամենայն ճարտարութեամբ քանդակուած էր ձիու լծուած կառք մը, կառքին վրայ աղեղնաւոր մը կանգնած՝ ձիուն առաջակողմը կեցող առիւծի կուրծքին նետ մը արձակելով՝ անոր վէս սլարանոցը ետ դարձնելէ յետոյ, կը պատրաստուի աղեղը լարելով դարձեալ նետահարելու: Զիուն փորին տակ շուն մը (առիւծի երկիւղէն անշուշտ) ինքզինք կը պահուրտէ, իսկ միւս տարին, Պոլիս կայսերական հնութեանց թանգարանը փոխադրուած է:

2.— Երխըլը Խան.— Ասիկա ալ Խարբերդի խճուղիին եւ Օրտուղիի միջեւ բաւական բարձր բնաբլուր մըն է: Այս բլուրը Մալաթիոյ էն առաջուան հաստատութեան ատեն ժողովրդեան ամառանոցն է եղած: Իսկ հիմա բացի հարաւային կողմէն ամբողջ տեղը այգիներ են: Այս բլրոյն վրայ, ինչպէս իր անունէն յայտնի է, կը տեսնուի 80 ոտք երկար եւ 40 ոտք լայնութեամբ չէնքի մը փլած պարիսպը, որ կա'մ դիտարան եւ կա'մ դղեակ մը ըլլալու է: Բոլորտիքէն կը գտնուին քանդակեալ քարեր, մարդոց ոսկերոտիք եւայլն:

Այս բլրոյն վրայ խմելու ջուր չգտնուելուն, Ս. Լուսաւորիչ վանքի ջուրը փողրակներով եւ ագուգաներով բերած են հոս, որ դեռ այս փողրակներու հետքը կ'երեւան տեղ-տեղ:

3.— Հիւյիւֆ Թեփեսի.— Քաղաքէն երեք ժամ հեռաւորութեամբ, Պալլըշայի եզերքը, խճուղիին աջ կողմը, 100—110 ոտք բարձրութեամբ կոնաձեւ բլուր մըն է (Երզմա): 19-րդ դարուն սկիզբը թաղեալ գանձ (տեփնէ) գտնելու յոյսով ոմանք ասոր դադաթէն պեղած ու խորած են, բայց առանց բան մը գտնելու ետ քաշուած են յուսահատ:

Ասկից մօտ երեսուն տարի առաջ դարձեալ (այս անգամ կառավարութեան արտօնութեամբ), միեւնոյն նպատակով փորձ փորձած եւ հին ծակերէն եւ կողերէն ալ նոր ծակեր բանալով խորշընդխորշ («քէօշէ պուճազ») պեղելու պրպտելով իջած են մինչեւ յատակը: Սակայն եւ այնպէս ասոնք ալ բան մը չեն գտած, եթէ ոչ արոյրեայ տապար մը եւ լայնամանեակ ոսկի մատանի մը: Կը սլատմեն, թէ յատակը լիք էին մարդոց ոսկորներով: Կը գտնուէին դիւրափխրելի («քէվէքէ») քարէ արձաններ, երկաթներու բեկորները եւայլն:

4.— Սաման Գալեսի.— Ասիկա ալ հողակոյտ մըն է 70—80 ոտք բարձրութեամբ համանուն գիւղին առջեւ կանգնած, որուն առջեւէն կը բխի վըճիտ ու սառնորակ ջուր մը բաւական առատութեամբ, այն է Սքմա Բունար:



Այս բլրակին ալ դադաթէն թէ կողերէն ծակեր բացուած են, եւ քաղաքի տանիքներուն համար ասկէց ալ հող կը փոխադրեն:

5.— Թիլեկ — Թելակ (թրք. Դելէկ) — Համանուն գիւղին վերեւ բաւական մեծկալ բլուր մըն է, որուն վրայ տուներ, ստորոտը՝ գոմ եւ փաքաներ շինուած են:

Այս տեղւոյն համար, Ալիշան կ'ըսէ թէ Մելաս գետ մէջտեղէն կ'անցնէր, բայց սխալ գիտցուած է, որովհետեւ այս աւանը Մելոսէն դէպի հարաւ երկու ժամ հեռու կը գտնուի: Կարելի է թէ դարեր առաջ Տէր Մեսիհ եւ Խորաթա վտակները միացած ասկէց հոսած ըլլան:

6.— Աղ Սեփիւ.— Աղ Սեփիւ Չըրմըզտըի գիմաց սուր եւ բարձր բնաբլուր մըն է, իր անունն առած է տեղւոյն բնական գոյնէն: Հովիւներ կը զգուշանան իրենց հօտերը հոս արածելու, ոչխարներու մահ առթող խոտի տեսակ մը գտնուելուն համար:

Աղ Սեփիւի աջ կողմը, գիւղին վերեւ, Մեգարլըֆ ըսուած վայրը կը գտնուի տեսակ մը աւազախառն հող, որուն կիրի աստիճան սպիտակութեան համար, Մալաթիոյ տան պատերու երեսները ասով կը ծեփեն:

7.— Իմամ Տեփեսի.— Սա ալ կը գտնուի հին քաղաքի հիւսիս-արեւելքը երկու ժամ հեռաւորութեամբ, Եփրատի եզերքը, ուր կը խառնուի Պալլըչայ. բաւական մեծ թիւ մըն է:

Ըստ տեղական աւանդութեան մը, այս բլուրին ստորոտը՝ դետակին տակ թաղուած կայ գերեզմանը այն թաղաւորին, որ այս բլուրը հաստատած է հոս:

8.— Գուշ Տոդա՝ Տեփեսի.— Սա ալ կը գտնուի իր համանուն գիւղին վերեւ: Ասոր բոլորտիքը բազմաթիւ շէնքերու աւերակներ են: Քանի տարիներ առաջ բլուրը եւ շրջակայքը խուղելով՝ գտնուած են շղթաներ, հողամաններ, սալ եւ արոյրեայ խաչ մը: Կ'երեւի թէ սոյն վայրի կործանումը այնքան կանուխ չէ:

9.— Պոզ Տեփէ.— Ասիկա բնաբլուրներու շարախումբ մըն է, որ կ'երկարի քաղաքին վարէն մինչեւ Սաւանֆէօյ եւ մինչեւ Մեգերէ ու Թելակ: Վերջերս շատ մը տեղերը որթատունկեր տնկուած են: Թէեւ վարուցան ալ կ'ըլլայ, բայց ապարդիւն, բուսահողի պակասէն:

10.— Չամաչանկ կամ Չեմեչեմֆ.— Պոզ Տեփէի պէս, քաղաքին վարի ծայրէն սկսելով՝ իրր օղակաւորումը շատ մը բլրակներու կ'երկարի մինչեւ հին քաղաք եւ մինչեւ Մելաս գետ:

Մալաթիոյ գաւառակին, դաշտային մասին մէջ ընդհանրապէս գեռ շատ կան այս կարգի տեղեր, բայց մենք այսքանը միայն նկարագրելով կը բաւականանանք» (Պէննէեան, Ը., էջ 29-33):



## ԱՅՐԵՐ ԵՒ ՆՇԱՆԱՒՈՐ ՎԱՅՐԵՐ

Ինտարա կամ Ինտերէ. — Քաղաքին արեւելեան կողմը կիրճի մը մէջ, հիւսիսային կողմը կան մէկ քանի քարայրներ, որոնց կերպարանաւորում մը տուած է արհեստը:

Այս այրերու մէջ մտնելու համար մահը յանձն առնելու է մարդ, որովհետեւ այրերը խիստ բարձր գահաւանդի մը լերկ երեսը գտնուելով՝ նեղ ու վտանգաւոր ճամբայ մը անցնելու պէտք կայ: Աս անցքը տեղացիք Մաղէ կամուրջ կ'անուանեն: Եւ ով որ այդ կամրջակէն անցնելով կը յաջողի մեծ այրին մէջ մտնել, իր մուրաւը կ'առնէ Լուսաւորիչէն:

Հայեր այս վայրը այցելելու ուխտի կ'երթան Զատիկի Նոր Կիրակին, խուռն բազմութեամբ. ամուլ կիներ կը ջանան մաղէ կամուրջէն անցնիլ գաւազի ունենալու յոյսով: Քարայրներէն մէկուն մէջ կայ տապանաձեւ փոս մը եւ մարդու պատկեր մը քանդակուած պատին վրայ: Լուսաւորիչ այս այրին մէջ ճգնելու ատեն թթիւմորը դնելու համար բզուկ մըն ալ փորած է քարէն:

Խոշրուֆի Մաղարա. — Ասիկա ալ մահուան կիրճին հարաւային կողմը լերան կուշտն է: Ասոր մուտքը լայն եւ ճամբան դիւրին է: Ծուրջանակի ունի խորշեր, եւ ձեղունէն կը կաթկթի կրախառն ջուր: Զեռքի եւ երեսի վրայ խորշուք ունեցողներ եթէ լուացուին այդ ջրով, կ'անհետանայ իրենց հիւանդութիւնը: Աս պատճառաւ իր անունը դրած են Խոշրուֆի Մաղարա:

Ժամանակաւ հետաքրքիր ոմանք այս կիրճին մէջէն տեփնէ գտնելու յոյսով տեղտեղ պեղած են, բայց ի դուր, առանց բան մը գտնելու «խելօք ախպար ինչ կը բանիս, ինչ գրիր որ ինչ տանիս» կ'ըսեն ու կը ձգեն պեղումը:

Թեփէ Մաղարաւը. — Սուլթան սու զետակի աջ եղերքը զառիթափին վրայ կայ զարմանալի քարայր մը Նափուլիի (Իտալիա) «զանայր»ին պէս: Այսինքն այս այրին մէջ ալ, բնական պատճառով մը, տիզ (կէնէ) չ'ապրիր բնաւ: Ուստի հովիւներ միշտ իրարու հետ կը ծեծուին այս այրին վրայ, իրենց հօտերը մտցնելու համար:

Էկրիֆէ. — Բնութեան ամէնարուեստ դործերէն է ասիկա, եւ կը դրանուի Խաչոպայի ճամբուն վրայ: Էկրիֆէ երկու կողմը 2-300 մեթր բարձրութեամբ ահադին եւ միաձույլ ժայռերով եւ հազիւ 2 մեթր լայնութեամբ եւ երեք ժամ երկայնութեամբ աստիճանաբար եւ օձապտոյտ նեղ ու հիանալի կիրճ մըն է, այնպէս նեղ որ երբ երկու կողմէն բեռցուած զրաստներ իրարու հանդիպին իրարու անցք տալու համար, մէկը պէտք է ետ դարձնել, մինչեւ որ լայն տեղ մը գտնելով դուրս տարուի: Ուստի ճամբորդներ երբ կը մտնեն այս կիրճին մէջ, կը սկսին սուլել կամ խաղ կանչել անպատճառ:

Սու Պաթա. — Մալաթիայէն Հիւսնի Մանսուր տանող ճամբուն առա-



ջէն իջնանք կեդրոնը, լեռներու մէջտեղ, ձաղարածեւ ծակ մըն է. շուրջի ջր-  
րէջքներէն կաղմուած բոլոր ջուրերը կը խորասուզուին ասկէց ներս: Չի գիտ-  
ցուիր թէ ուսկի՞ց դուրս կը բխին եւ ո՞ւր կ'երթան յետոյ: Ոմանք Բունար  
Պաշը կամ Էպեմեմտիկ վտակներուն համար ասկէց գոյացած են, կ'ըսեն, որ  
հաւանական չէ, որովհետեւ խիստ խոր ձորերով Սու Պաթանէն բաժնուած  
են երկուքն ալ:

## ԱՆՇԱՐԺ ՀՆՈՒԹԻՒՆՆԵՐ, ԽԱՆԵՐ ԵՒԱՅԼՆ

Մալաթիոյ զաւառին ամէն կողմն ալ աչքի կը զարնեն տեղտեղ դեռ  
կանդուն կամ կիսակործան խաներ, դորս ժամանակին կանգնել տուեր է եր-  
կրին իշխանը կամ թաղաւորը: Այս խաներու մօտէն ձգուած կը տեսնենք հին  
կառուղիներ ալ հատաքարով շինուած: Խաներէն դեռ կը տեսնուին Եազըլը  
Խան՝ համանուն դաշտին մէջ, Քէօմիւշ Խան՝ Մելասի ձախ եղերքը, Շահնա-  
խան՝ Պէյլէր Տէրէսիի մէջ, Եարմնա Խան՝ Պալլը Չայի ետեւ համանուն գիւ-  
ղը, Չիֆթէ Խան՝ Մամուրաքի լեռան ստորոտը՝ Պալլը Չայի եղերքովը, Խա-  
նէ Բուրուֆան (քրդերէն տղոց սլանդոկ) Խալեքան լեռներու միջեւ, Շիշման  
Խանը՝ համանուն գիւղին մօտ վտակին եղերքը, Խէյրսըզ Խան՝ Իզողլուի ձա-  
ֆըլար ըսուած տեղը եւն.:

Թեֆմէ Թաշ.— Հին քաղաքի հիւսիսային կողմը մէկ ժամ հեռաւորու-  
թեամբ խճուղիէն եղերքը ցցուած կոթող մըն է. դետինէն դուրս գտնուած  
մասը ունի 3 մեթր բարձրութիւն եւ երկու գիրկ շրջապատ: Որեւէ արձա-  
նազրութիւն չի տեսնուիր վրան. դադաթը թասի պէս փոս մը ունի միայն:

Կ'աւանդեն թէ՛ իր երկիրը շրջադաշելու ելլող թաղաւորը՝ ժողովուր-  
դը փորձելու համար այդ փոսին մէջ ոսկի լեցնելով կը մեկնի, եւ վերադար-  
ձին կը տեսնէ թէ ոչ ոք համարձակած չէ ձեռնամուխ ըլլալ ատոր: Ըստ ա-  
մէն հաւանականութեան՝ սահմանաքար մը ըլլալու է ատիկա, սակայն որե-  
ւէ տեղ ուրիշ մըն ալ չի տեսնուիր ներկայի մէջ:

## ՆՈՒԻՐԱԿԱՆ ՀՆՈՒԹԻՒՆՆԵՐ (ԿՈՐԾԱՆԱԾ ԿԱՄ ԿԱՆԳՈՒՆ)

Ինչպէս ըսած ենք, դարերու ընթացքին, Մալաթիան քաղաքական եւ  
այլ փոփոխութիւններու շատ ենթարկուած ըլլալով՝ դետինը իր տակ ծած-  
կած է հեթանոսական թէ քրիստոնէական հնութիւնները. այնպէս որ դա-  
տարկ տեղ մը պիտի չգտնես երբ կը պեղես երկրին այս կամ այն տեղը: Ահա-  
ւասիկ մի քանին քրիստոնէական դարերու թողուածներէն:

Ս. Կարապետի Ժամ.— Քաղաքին վրայ համանուն կիրճին բերանը տա-  
փարակ դետնի վրայ դեռ կը մնայ յարակից երկու եկեղեցիներու հիմունքը,  
որոնք հազիւ թէ ասկէց երկու դար առաջ կործանած են: Քաղաքին Ս. Յա-  
րութեան եկեղեցւոյ շինութեան ատեն ժողովուրդը հոս փոխադրած է անոնց



պատերու կարեւոր քարերը :

Քաղաքին հիւսիսային կողմը Տ. Մեսիհի եղերքը պեղելու ատեն գրտնուած են ընդարձակ եկեղեցիի մը հիմունքը եւ պարիսպը, որուն քարերու կարեւորները տեղւոյն վրայ եւ ներկայ զօրանոցին մօտ շինուած հաստատութեան մը գործածուած է : Այդ քարերուն մէջ՝ շուրջը յունարէն գրերով գրուած խաչքար մըն ալ կայ :

Պալեանի Քիլիսէ գիւղին վերեւ վէմերուն վրայ հաստատուած եւ կիսակործան կը կենայ եկեղեցի մը, որուն մէջ գիւղացիները իրենց տաւարը եւ ոչխարները կը լեցնեն հիմա :

Մելետ Տերեսի ըսուած ձորին հիւսիսային կողմը կը տեսնուին եկեղեցւոյ մը պատերը միայն : Նոյնպէս այս ձորին գլուխը՝ Միլէտ պաշի ըսուած տեղը :

Սոչապա գիւղի արեւելեան կողմը, լերան ստորոտը բլրակի մը վրան ու բոլորտիքը քրիստոնեաներու գերեզման ըլլալը տեսնուելէ զատ, առջեւի տափարակ գետինը բռնած են քաղաքի մը աւերակներու քարակոյտերը :

Սոյն գիւղի կռնակի լերան ետին Փատրլ ըսուած տեղն ալ, զոր հիմա գիւղացիներն իրենց ուխտավայր ըրած են, կը տեսնուի եկեղեցւոյ մը հիմունքը :

Վերին Մաստրֆանի (Իզոզլու) վերեւ Սեքիւլէր ըսուած տեղն ալ կայ եկեղեցւոյ մը հիմունքը : Հոգ կը տեսնուին, ինչպէս անունէն (սեքիւ) յայտնի է, աստիճանաւոր բերդի մը փլած պարիսպները :

Իզոզլուի Կեալուրան (քրդ. Հայկ) գիւղի մէջ կը տեսնենք հին եկեղեցի մը եւ ընդարձակ գերեզմանատուն : Կեալուրան, ինչպէս իր անունէն ծանօթ է եւ ինչպէս ներկայ բնակիչները կը կարծեն, մինչեւ ԺԶ. դարուն վերջերը հայաբնակ է եղեր : Բայց անկից յետոյ հարեւան Քիւրտերու պատճառով՝ սկսած են քաղաք եւ ուրիշ տեղեր զաղթել. քաղաք զաղթողներէն ծանօթ են հիմա Էմրիկեանի եւ Ծերնիկեանի :

Ճուպաս գիւղախումբի Քելեսիկ գիւղի (Եփրատի եղերքը) պարտկաներուն մէջ ալ կայ հին եկեղեցի մը : Գիւղին արդի բնակիչները Ուրբաթի եւ Նամազի գիշերները ճրագ վառելով ասոր մէջ կը դնեն :

Ներկայ քաղաքի Հայոց գերեզմանատան արեւելեան եղերքը՝ Ս. Օվաննէս անուանեալ եկեղեցւոյ մը հետքը կը տեսնուի դեռ : Հայ մամիկներ, դեռ քիչ տարիներ առաջ, հաւաքուելով ուխտի կ'երթային հոտ՝ մոմ վառելով եւ մուրաւ ուղելով : Սոյն վայրի մօտէն (գերեզմանատան եղերքէն) 1889-ին գտնուած է գետնափոր շիրիմ մը, որուն կափարիչին վրայ յունարէն տառերով գրուած էր հետեւեալը. «Ով որդիք Բոլոնիայի, Ժեթացւոց գլխաւորներն եղող երկու նարտարապետներուն վրայ ողբացէք, որ Տէրը հանգիստ քնոյ մը մէջ հանգչեցնէ» : Այս քարը անարժէք բան մը համարելով կոտրած եւ Ս. Երրորդութիւն եկեղեցւոյ պատին մէջ ձգած են :

Շիրիմ մ'ալ Էօրէն ըսուած Հայոց գերեզմանատունէն գտնուած է : Աս



վերջերը թէեւ վերինէն փառաւոր ու ընդարձակ, բայց որեւէ դէպքում արձանագրութիւն չունէր: Զարմանալի զուգահեռութիւն որ այս երկու հին շիրիմները նոր գերեզմանատանց մէջէն կը գտնուին:

Հոգեւոյս Պէննէեան Տ. Կարապետ քհնյ.ի այս տեղեկութիւններէն անհատաբար եւ զանոնք առանց կարգացած ըլլալու Տոքթ. Միքայէլ Քեչիշեան ունի ցուցակ մը Մալաթիոյ հնութեանց (տես ՊԱՊ ՈՒԽՏԻ, Թ. 25, էջ 9), ուր կը թուագրէ եօթը հնութիւններ, որոնք էին. —

1. — Քեախթէ Նեմրութ լեռը, կամուրջը, բերդը, Հիւսնի Մանսուրի ճամբուն վրայ բրգաձեւ արհեստական բլուրներ եւ այլն.

2. — Արդայի գետնափոր եկեղեցին, յունական մողայիքներով.

3. — Արսլան Թեփէն՝ Հիթիթներու օրերէն մնացած.

4. — Հին քաղաքը (վարի քաղաքը) Լենկթիմուրի օրով կործանած, 40 իշխան Նահատակաց գերեզման: Ուստա Շեկերտ Կիւպլէսին, Ուլու Ճամին, Մեծ Խանը, սլարիսպը, Ս. Թորոսը, որուն աղաւաղեալ ձեւով Զոտտըրոզ կ'ըսեն.

5. — Տերմեսիի եկեղեցին եւ հրաշալի ջուրը, համանուն լեռանց մէջ յիշատակարաններ, Տիքիլի Թաշ եւայլն.

6. — Գըրք Կէօզի կամուրջը.

7. — Անարծաթ Բժիշկ եկեղեցին, Թադէոս եւ Բարթողիմէոս առաքեալներու քրիստոնէութիւնը տարածելու ատենները շինուած 40 մատուռով, որ կը գտնուի Մելիտինէ քաղաքէն մէկ ժամ հեռու դէպի արեւելք Բունար Պաշիի քովը, եւ որուն աւերակները դեռ նշմարելի են:

Տոքթ. Միքայէլ Քեչիշեանի թուած այս հնութիւններէն Անարծաթ Բժիշկը, որուն վրայ քանի մը տող խօսած է, հնօրեայ վանք մըն է, որուն վրայ սլիտի խօսուի վանքերու բաժնին մէջ:

Իսկ մնացեալ վեց հատուածներու մէջ Տոքթ. Քեչիշեան պարզ թուումն մասանցով մը բաւականացած է առանց ոեւէ տեղեկութիւն տալու, եւ ինչպէս Յ. Գոճապաշեանի մէկ գրութենէն (ՊԱՊ ՈՒԽՏԻ, Թ. 30, էջ 11) կ'երեւի, հաւանօրէն պզտիկ սխալներ ալ սպրդած են այս գրութեան մէջ: Այսպէս, Յ. Գոճապաշեան կ'ըսէ թէ Տիքիլը Թաշը Տերմեսիէն հեռու հին քաղաքէն դէպի Գըրք Կէօզ երկարող ճամբուն վրայ պէտք է ըլլայ եւ ոչ թէ Տերմեսիի ջուրին մօտ:

Տոքթ. Քեչիշեանի գրութիւնը դժբախտաբար նոյնպէս անխնամ աշխատութիւն մըն է եւ լայն տեղեկութիւններ չի տար Մալաթիոյ նահանգին հընութիւններուն վրայ, եւ ոչ ալ անոնց ո'ր դարուն պատկանիլը կը ճշդէ:

Իսկ Գ. Մելիտինեցի իր ՆԱԽՃԻՐՆԵՐՈՒՆ մէջ (էջ 24-7) ունի հատուած մը՝ Պատմական վայրերու նուիրուած, ուր իբր «հնութեանց վայրեր» կը յիշատակէ.

«Ա. Ասլան Թեփեսի կը գտնուի քաղաքէն երեք ժամ հեռաւորութեամբ Վարի Քաղաքի արեւելեան կողմը: Միջակ բարձրութեամբ բլուր մըն է, ու»



բուն կողերէն դեռ մակերեսային խորութեամբ գտնուած են քարի վրայ քանդակուած զանազան նկարներ (մեծ մասամբ անասնոց) եւ այլ սեպածեւ դրութիւններ, որոնցմէ տեղական ժողովուրդը ոչինչ հասկցած է: Ո՞ր շրջաններէն մնացած են հոն թաղուած հնութիւնները, եւ ի՞նչ արժէք կը ներկայացընեն քաղաքակրթական տեսակէտէն: Ասոնք հարցեր են, զորս կրնան լուծել միայն գիտնական հնախոյզներ, եթէ միայն արտօնուին անոնք կատարելութիւնց պեղումները:

Բ. Ինքիբլիֆ Տեփեսի կը գտնուի Վարի Քաղաքի դարձեալ արեւելեան կողմը առաջինէն քառասուն վայրկեան հեռաւորութեամբ. ասոր ստորոտներէն եւս գտնուած են քարէ ու հողէ ամաններ, որոնք ակնբախ կը վկայեն հոն թաղուած հնութեանց մասին:

Գ. Վարի Քաղաք, բազմատմամբ առաջիններուն աւելի նոր, ունի եկեղեցիներու, պարիսպներու եւ այլ շէնքերու կիսակործան փլատակներ, որոնք կը կրեն հայկական ու առաւելապէս բիւզանդական դրոշմ: Լենկթիմուր եղած է պարիսպի գլխաւոր քանդողը, որուն երկայնքին փորուած խորութիւնը (ջուրով լեցնելու համար) կը վկայէ քաղաքի երկար ժամանակ պաշարուած մնալը: Գլխաւոր վայրերն են՝ Արաճա Գափու, Զոտ Տը Տոզ, Ուլու Ճամի, Ս. Ստեփանոսի եկեղեցին, Թով Գափու եւայլն: Ուլու Ճամին նախապէս եղած է յունական եկեղեցի, ապա օսմանեան տիրապետութեան շրջանին վերածուած է մզկիթի: Պատերը դարդարուած են կանաչ, կարմիր ու ճերմակ, եռանկիւն ու քառանկիւն նրբօրէն տաշուած քարերով, որոնք ցարդ անաղարտ կը պահեն իրենց դռները:

Դ. Օրտուզի կը կրէ ամբողջովին հայկական դրոշմ, մինչեւ համաշխարհային Ա. Պատերազմը. անցեալի փառաց միակ կոթող՝ կանգուն կը մընար եկեղեցի մը Ս. Փրկչաց նուիրուած:

Ասիական բարբարոսներու արշաւանքներէն շատ առաջ<sup>1</sup>, հին նախահայրեր Բունար Պաշիի ջուրին ակերուն վերեւ կառուցած են Անարծաթ Բժիշկ եկեղեցին (որուն հիմերը դեռ ցցուած են հողի երեսին՝ մասամբ), որ ունի եղեր քառասուն խորան, քառասուն սուրբերու նուիրուած: Լենկթիմուր տեսնելով այս սրբատեղիի պաշտելի նուիրականութիւնը ժողովրդեան վրայ հիմնադրատակ քանդած է, եւ անթիւ զօրքերու ու զերիներու տաժանակիր աշխատութեամբ քարերը թափած եփրատ գետը, խալսո ջնջելու համար անոր յիշատակը: Կը պատմուի թէ հին ատեններ Օրտուզիի Ս. Փրկչաց եկեղեցին եւ Անարծաթ Բժիշկ վանքը յարակից եղած են իրենց ընդարձակ բաժանումներով»:

Գ. Մելիտինեցի (ՆԱԽԾԻՐՆԵՐ, էջ 27) այս տեղեկութիւնները տալէ ետք կ'ըսէ թէ «զանց ընելով նուազ կարեւոր տեղերու թուումը, անդամ մը եւս չեշտենք որ... ցարդ ոչինչ կամ զրեթէ ոչինչ լոյս աշխարհ հանուած է

(1) Այսինքն ըսել կ'ուզուի ժ.Ա. դարէն առաջ:



իր (Մալաթիոյ) ծոցին մէջ թաղուած թանկագին հնութիւններէն . . . » :

Մալաթիոյ հնութիւններով զրազած է նաեւ Գէորգ Արքեպիսկոպոս Ասլանեան իր առաջնորդութեան շրջանին եւ զանոնք նկարագրած է զանազան հրատարակութիւններու մէջ (ինչպէս ԲԻԻԶԱՆԴԻՈՆԻ, ԱՄԵՆՈՒՆ ՏԱՐԵՅՈՅՅԻ եւ ԲԱԶՄԱՎԷՊԻ) :

Ասլանեան Արքեպիսկոպոսի այս նկարագրութիւնները ի մի ամփոփած է Հ. Եփրեմ Վրդ. Պօղոսեան (ՊԱՊ ՈՒԽՏԻ, Թ. 61, Մալաթիոյ Հնութիւնները)՝ չորս կարեւոր վայրերու վրայ բաժնելով այս հնութիւնները, ինչպէս կը ներկայացնէ Հ. Եփրեմ Վրդ. Պօղոսեան, նոյնպէս առանց ճշդելու թէ այդ հնութիւնները ո՞ր ազգերուն եւ ո՞ր ժամանակներուն կը պատկանին . —

Ա. — Քեախթէի Հնութիւնք. Մալաթիոյ կուսակալութեան Քեախթէ գաւառը կը ներկայացնէ ամենէն հարուստը թանկագին հնութիւններով, որոնք կը պատկանին զանազան ազգերու եւ ժամանակներու, եւ անշուշտ կը կարօտին գիտական լուրջ ուսումնասիրութիւններու, որոնք չեն կատարուած դրեթէ մինչեւ հիմա :

Գէորգ Արքեպիսկոպոս Ասլանեան Քեախթէ այցելած է 1905-ին եւ իր այցելուի տպաւորութիւնները ներկայացուցած է յօդուածներով : Ան կը գրէ թէ Քեախթէի «Արեւելեան կողմը, լերան ստորոտը, ահագին բաղնիքի մը աւերը կայ, որուն ամբողջութեան չորրորդ մի մասը դեռ կանգուն է, մինչեւ ջուրն հոսելու տեղերն ու աւազանները սրոշ կ'երեւին : Որմերուն մէջ երկու ջուրի ճամբաներու խողովակներն անվնաս կեցած են մի քանի դարերէ ի վեր : Այս հնութենէն կտոր մը փրցնել անկարելի է . ժայռի պէս ամուրցած է : Այնպիսի վարպետութեամբ շինուած է որ նորերուն մէջ դժուար կը գտնուին առանկ գիծացկունութիւն, յղկութիւն եւ անայլելիութիւն . մէկ չորրորդ մասըն հինգ սրահներէ կը բաղկանայ, մնացեալ երեք մասերու ամէն մէկը 5 կանգուն երկայնութիւն, 5 կանգուն լայնութիւն եւ մէկ կանգուն բարձրութիւն ունին, եւ այսպէս 15 կտորներ կը համրուին ձորին մէջ ինկած . հին օրերու մէջ ահագին հեղեղ մը եկած քշած է ամէնը :

Բաղնիքին առաջ բնդարձակ տափարակ մը՝ ձխովարժութեան տեղ է եղեր եւ այժմ խոշոր ձորի մը վերածուած է . սոսկավիթխար քար մըն ալ եկած հողէ բլուրի մը վրայ պղպղած է :

Ճամբուն վրայ աղբիւր մը կայ . այս եւս հին ճարտարապետութեան մէկ հիանալի դործն է, որ դարերու միջոցին հողին մէջ թաղուած՝ իր պաշտօնը կը կատարէ :

Լերան տակ փապուղեակ մը, որուն մէջ ստոնորակ վճիտ ջուրը կը քալէ, առանց վնասելու եւ առանց փողրանքի : Մարդ կրնայ քիչ մը ծռած երթալ ու երթալ մինչեւ մէկ ժամ եւ հոն տեսնել թոնիրներու տեղեր, կամաւրակապ շէնքերու բեկորներ :

Ամենէն աչքի դարձող շէնքն է բերդը : Կառավարութեան շէնքին ետեւի կողմէն կը բարձրանանք բերդը, որ կրանիթ տիտան ժայռ քարին վրայ կե-



ցած է: Քարը կնդուղի մը ձեւն ունի: Ժայռին լայն կողէն բերդը բարձրացած է հսկայ, հիանալի եւ վեհ երեւոյթով: Բերդին աւագ դրան արեւելեան կողմը բացուած է, կամարակապ, խոյակաւոր քանդակներով, նոնաձեւ գնդակներով ու նուրբ ծաղիկներով: Դրան ճակտին վեց կարգ երկար շարքի մը վրայ գրուած է յիշատակութիւնը, որուն Սուլթան Սալահատին եւ Մելիք Սէյֆետին բառերը շատ որոշ կը կարդացուին:

Հետաքրքրութեամբ վառուած ու լարուած ենք: Առաջին աստիճանները քայքայած են բոլորովին եւ արեւմուտքէն երկարած ահագին որմերուն հիմնաքարերը շատ դժուարութեամբ քակելով տարած են եւ որմը դեռ անգիտակ կը կենայ խիզախօրէն: Արտաքին պատնէշ որմերուն համար հազարաւոր քաշ կշռող քարեր գործածեր են, իսկ ազուցման համար միլիոնաւոր հաւկիթ, կիր ու աւագ: Որմերն այնչափ ողորկ ու այնչափ փայլուն են որ կը հիանաս ու կ'ապշիս:

Դռնէն ներս երկար կամարի մը տակէն կ'անցնինք. քարերու կտորաւանքը ճամբան քիչ մը դժուարացուցած է: Երկրորդ դռնէն ներս պիտի մըտնենք. անցքը բոլորովին գոցուած է: Սողոսկելով կ'անցնինք: Երկրորդէն ներս ազատ շունչ մը կ'առնենք. երկայն դաւիթ մը, որուն երկու եզրերն հըսկայ շէնքերու շարքեր կան, 1-2-3 կարգ եւ գուցէ աւելի ալ ու համակ քար, համակ կամարաշէն:

Աջ կողմերնիս շարունակ կամար, մէջէ մէջ հիւսուած, ազուցուած կուռ ընդ կուռ սենեակներ են, եւ այս ամենուն մէջ նեղ ու երկար շերտեր կան դիտանոցի, ձախերնուս քառակուսի եւ դմբեթաւոր շինուածք մը կայ մանր քանդակներով: Ճիշդ այս շէնքին դէմը կ'իյնար աւելի նուրբ շէնք մը, որ ազօթարանն է<sup>1</sup>: Երկար գրութիւններ շէնքին ներսի մասին որմերուն վրայ, գրուած են ամբողջ սիւլիւս գիրերով, եւ մեծ բոլորչի պատուհան մը, որ քովնտի դէպի արեւմուտք կը դիտէ անծայր ու անծիր հորիզոնը: Շէնքին տակը ներքին յարկ մը եւս: Քառակուսի դմբեթաւոր շէնքին քովն է դէպի վեր տանող ճամբուն մեծ դուռը՝ մեթրներով երկար ու բարձր: Այս դռնէն երկրորդ դաւիթը կը մտնենք, ընդարձակ տարածութեան մը վրայ փռուած (ԲԻԻԶԱՆԴԻՈՆ, Թ. 2593):

Ուրիշ յօդուածի մը մէջ (տես Թէոդիկ, ԱՄԵՆՈՒՆ ՏԱՐԵՑՈՅՑԸ, 1922, էջ 186-8 կամ ԲԱԶՄԱՎԷՊ, 1936, էջ 37-9) Ասլանեան Արքեպիսկոպոս կրկին խօսելով Քեախտէի վրայ դարձեալ կ'անդրադառնայ անոր հնութեանց վրայ:

Ան կը նկարագրէ Բել (Պէլ) լեռը բարձրանալու համար իր եւ ընկերօջը՝ Տ. Եղիշէ քահանայ Խաչատուրեանի կրած դժուարութիւնները. —

«Ճամբան այնքան քարքարուտ է որ, կ'ըսէ, ատեն-ատեն կը ստի-

(1) Քեախտէաբնակ Հայոց մեծ գերդաստանը, որ երկու դարէ ի վեր Քեօիշեմք կը կոչուի, ունէր սուլթանական «Փերման» մը, որ բերդին մէջ կարգ մը առանձնաշնորհօժներ տուած էր անոր, երբ սովորութիւն է եղեր ատենօք հոն բնակիլ (Թէոդիկ, ԱՄԵՆՈՒՆ ՏԱՐԵՑՈՅՑԸ, 1923, էջ 237, ծանօթ.):



պուլինք ձիերէն իջնել: Կ'անցնինք Քեախտէի ձորէն, հսկայ Բելը հոս ոտք դրած է եւ իր յաղթ սեպուծիւնը տարածած ժեռուտ կողերով: Խոսքով դիւղի առաջքէն կ'անցնինք... Երեք ու կէս ժամ այսպէս կը շարունակենք մեր վերելքը, միշտ աջ ու ձախ ունենալով վիմեղէն կարկառներ եւ օձերու բոյն խոռոչներ... Արեւելքի դէմ պատնիշուած վիթխարի արձաններու առջեւն ենք, ահա, շարուած թէ ո՛րը պիտի դիտենք եւ որո՛ւն քով պիտի երազենք ամենէն առաջ:

Մեր առաջ պարզուած է հնութեանց պատկառելի շէնք մը անդուռ եւ անորմ: Հոս առիւծ մըն է կեցած՝ ցից բաշերով, հոն փաթթոցաւոր հսկայ դլուխ մը անմօրուս, անդին բազէ մը, շահէն աչքերով, խառնիխուռն հաստ սրունքներ, քամակներ, ջլապինդ բազուկներ՝ մականակիր եւ աղեղնաւոր, փիսոս, վանդակի թաթերով ջախջախուած:

Մեծ շէնքի մը դաւիթին շուրջը շարուած արձաններու թափթփուքներ են ասոնք, պատուանդան ունենալով խոշոր աւազաններ:

Արձանի մը մէն մի բեկոր թոնոներ կը կշռէ, բոլորն ալ կրանիթ քարէ: Դէպ արեւելք, կարծեօք մեհեանին լայնդիր սանդխամատները կ'երեւին, մինչեւ 7 աստիճան՝ անեղծ մնացած, իսկ շէնքին քարերը՝ փուլ ու ջիլ: Քանի մը տասնեակ դարերու դործ...: Դեռ եւս կանգուն վեց արձան հիացում կ'առթեն դիտողին, դարերը իրենց ոտքին տակ առած, իրենց յոխորտ կեցողածքով... Ատոնց պատուանդանները քարետախտակներու պէս ողորկ են շերտ շերտ յեցած իրարու վրայ, «քեախտէական» (քաղդէական) ոճով դրժուած ու նշանադրուած: Այս որմաշարը մարդու հասակէ շատ բարձր է, իսկ արձանները՝ քանի մը պատիկ աւելի բարձր, մեծղի իրաններով, ծաղկազարդ գլուխներով, մերկատիտ ու մերկասրուն: Իրենց նայուածքը դէպի հիւսիս ու հարաւ, կնոջն ալ ուղղուած՝ Կարկառի ժայռաբերդին ծոցը քանդակեալ այր արձանին...:

Արեւելքէն դէպի արեւմուտք՝ միւս վեց արձաններուն այցելելու համար, պէտք է անցնիլ լերան հիւսիսի կողէն, որուն մէկ ծայրէն, այսինքն արձաններուն (<sup>6</sup>) ու դաւիթին քովէն մինչեւ միւսներուն առնթեր, կայ յեասանաձեւ քարացցուանքներու շարք մը, մօտաւորապէս տասնական սանթիմ լայնքով, ներկայացնելով այլազան նկարներ՝ կենդանիներու, ծաղկանց ու դրուածոց քանդակներ, մանաւանդ երկսեռ մարդապատկերներ: Արդարեւ, արուեստն ու արհեստը մրցեր են իրարու հետ, ինչպէս դուրն ու ուռնը՝ վրձինին ու գրիչին հետ. դլուխ-դործոց մըն էր կնոջ մը անդրին՝ գեղանի, նրբայօն աղեղ, թուշը կլոր, շուրթերը ներդաշնակ, մազերը քիչ մը նման այժմու ոլորուածքին, վարդի տրցակներ եւ դառնադլուխ զարդեր այտերուն, ինչպէս եւ վայելուչ ապարանջաններ դաստակներուն: Ագին ամփոփած առիւծ մը՝ կնոջ մատներուն հպումէն հիպնոսացած՝ կ'անշարժանայ, ձախ ուսին բազէ մը՝ որսախոյզ ակնարկով. վրան առած է լողիկ մը այնքան նուրբ ու փափուկ, որ տակէն լեցուն իրանը կը նշմարուի:



Երկրորդ մը այլ մարդուն պատկերն է. զիրքէն դատելով՝ իշխանաւոր մը ապահովարար գեղադէմ, ամբիւսած աշտերով, փաթթոցաւոր, նըրբահասակ, սոնապաններ կան ոտքերուն վրան՝ կապայ մը, թելերուն տեղն իսկ յայտնի. աջին ունի աղեղ մը, ձախին ալ հրովարտակ մը, զոր կարծես կը կարգայ, նայուածքը թէեւ սուր, բայց միտքը մոայլ: Կ'անցնինք արեւմտեան կողմի արձաններուն, որոնցմէ երկուքը միայն անեղծ մնացած են, երկուքը կիսովին, իսկ միւս երկուքը աւելի վնասուած. արեւելքի եւ արեւմուտքի միջոցին մէջ 960 ոտքէն աւելի շրջանակով 1000-ի մօտ բարձրութեամբ վիթխարի քարակոյտ մը կայ՝ արձաններուն շինութենէն զոյապող կտորուանքովը ձեւացած: Ոչ մէկ բուսականութիւն այդ լերի լեռնակին վրայ, ուր բարձրացանք տաժանադին, դիտելով չորս աւուր ճանապարհով հեռի Տիարպէքիւրի մինարէներուն մունիկը»:

Դարձեալ Ասլանեան Արքեպիսկոպոս երրորդ յօդուածի մը մէջ (Թէոդիկ, 1923, էջ 239-9) մասամբ վերաքաղ մը կ'ընէ իր առաջին յօդուածին (ԲԻԻԶԱՆԴԻՈՆ, Թ. 2593)՝ անոր կցելով մի քանի նորութիւններ:

Հոն կը խօսի Քեախտէի արեւմտակողմը գտնուող Խարազնաղ լերան վրայ կանգնուած վիթխարի կոթողին մասին. —

«Ասոր արտեւանը թեւատարած նստած է սեւ թռչունը. մարդկային աչքը պատրանք կ'ունենայ թէ երկինքէն կախուած է ան... Արեւելքէն՝ Պելլի լերան սեպ կատարը երկնամուղ, հիւսիսէն ու հարաւէն խրոխտ Կիւնտէներու հսկայ քարակոյտերը, նաեւ շարք մը վիմեղէն ահապին շղթաներու տարտարոսեան վիհեր, թաւուտներ, զանթարայի գետակը մեղմահոս ու իր կամուրջը հոյակերտ:

Քեախտէի ձորէն դուրս սլոթկացող գետակի ափին կ'երեւի Ս. Թորոսի մատուռը, որ ատենօք մենաստան է եղեր, իսկ հիմա աւերակոյտը միայն կայ:

...Այնուհետեւ կը մտնենք Խապէր, Շէյխ-Մուս, Եադի-Տէրէ, Ապու-Խեֆան, Քիլիսէ եւ Սերգիւզ դաշտակներուն մէջ: Ատոնց դիմացն են Զէրֆէօզ, Քեֆիրմէ, Քէրֆիւրէկ եւն., որոնց հունին՝ Քեախտէի եւ Կենտերէի գետակները տելթա մը կազմած կը համբուրուին: Թաշդանի-Թեփէէն կը դիտենք ժայռերու կուրծքին թաղուած յաղթ կոթողները: Կամուրջին քովն ենք. հրաշալիք մը, մեծ յղացումի կնիքն իր վրայ, նախնեաց ճարտարապետութեան մէկ գլուխ-գործոցը, որ դարեր ապրեր է ու պիտի ապրի յաւիտեան: Երկայնութիւնն է 500 ոտք, լայնութիւնը 30 ոտք, ջուրին երեսէն մինչեւ կամարին աղեղին կեդրոնը 60 կանգուն, իսկ 2 հիմերուն իրարմէ հեռաւորութիւնը 300 ոտք: Եղերքը գետեղուած են 2 մեթր երկայն, 1 մեթր բարձր ու նոյնքան լայն քարեր՝ իրարու մէջ ագուցիկ, արտակարկառ մասերուն վրայ նոնաձեւ զարդերով:

Քեախտէ Մեղիրէի Թաշդանի կողմը կոթող մը կայ 8 բոլորակ քարերով, իւրաքանչիւրը 2 գրկաչափ լայն եւ մէկ ու կէս կանգուն երկայն. 4 քա-



ռակուսի ահագին քարեր հիմը կը ձեւացնեն. զոյգ մը խոյակաւորներ ալ ծայրին զետեղուած: Կոթողին բարձրութիւնն է 20 կանգունէն աւելի, կէսն անընթեռնի արձանադրութիւններով լեցուած. 40 քայլ անդին դէմ դէմի քառակուսի լայն քարերուն վրայ դրուածքներ ամբողջ: Գարադուշ եայլասի կողմն ալ լի է նմանօրինակ քարերով եւ 2 կոթողներով: Այնպէս կ'երեւի թէ ատոնք 4 են եղած, սակայն մին փճացած է: Այս հսկայ կամուրջը մէկ կամարի վրայ կեցած է միայն, կոփածոյ հսկայ քարերով, եղերքներն ալ ամբողջ ժայռ: Դէպ արեւելք 2 մեծ պատուանդաններ կան հարթյատակ, որոնց վրայ 30-40 հողի հանդիստ կրնայ կենալ: Կամուրջին հսկայ որմերէն միոյն վրայ բեւեկնի մը եւ ուրիշ ծառ մը բուսած են ինքնին եւ կանաչ ջահերու նըման առկախուած: Այս կամուրջը վիթխարի բերդ մըն է: Պատմութիւնը Կանդարա անունով ուրիշ մըն ալ կը յիշէ, որ բոլորովին տարբեր է ասկէ. Սինչա Նահր էլ-Ագրապ զետակին վրայ կառուցուած է այս Պէհիսին եւ Հիւանի-Մանսուրի (Ատրաման) մէջէն վազող «Կէօք-Սու»ինը» (Թէոքիկ, ԱՄԵՆՈՒՆ ՏԱՐԵՅՈՅՅԸ, 1923, էջ 238-9):

\*\*\*

Ասլանեան եպիսկոպոս կը յիշէ Քեախտէի հնութեանց վրայ խօսած տեղն նաեւ հետեւեալ հնութիւնները.—

«Ա. Գուշ-Թեփէ.— Քաղաքէն դէպի Սամոսատ տանող ճամբուն վրայ թառած քար ոտներով, նոյնպէս քար փետուր թեւերով ամբողջովին հսկայ քար թռչուն մը ամենանուրբ մանրամասնութեամբ, որ իբրեւ արծուի կը հսկէ, կը տիրէ ու կ'իշխանապետէ բոլոր շրջակայից վերեւ:

Բ. Սամոսատ.— Սամոսատ այժմ դաշտ, եւ այս հողերուն մէջ ճամբու մը եզրին մեծարժէք, նշանաւոր, սեւ կրանիթեայ արձանի մը միակտուր, միապաղաղ, քանդակեալ կոթողը կայ, որ այդպէս տապալած դետնի հողին վրայ պառկած է. հետաքրքրուող իսկ չկայ, մինչդեռ ան հնութեանց թանգարանի մը թանկարժէք հնութիւնը պիտի կազմէր:

Գ. Արդայի Հնութիւն.— Սա Մելիտինէէն դէպի Գերմանիկէ (Մարաշ) եւ մասամբ ալ Սեւ Հողեր (Սվազ) երկարող Մելիտինէի ՄիլթեսարըՔութեան ենթարկեալ դաւառամասն է, բաւական ընդարձակ... իր հնութիւններն են... Գերեզմանատեղիկը, 9 կարգ, ուղիղ շարքերով եւ համաչափ կերտուածքով եւ ամէնը քար՝ բլրակի մը վրայ տողուած... ամէն մէկ դամբարան ունի փոքրիկ դռնակ մը, ու դեռ կը մնան անաւեր... իշխանական սլալատը, որուն աւերակները կան եւ ատով դուրս կու գայ թէ հոյակապ վեհափառութեան մը նշխարքն ու նշմարքն են, երբ... յարգը երբեք չգիտցող ձեռներ քարեր ու սիւներ, մարմար ու կրանիթ քանդեր են ու տարեր ձիերու ախոռ շինելու... Պեղումներ կը կատարուին գերեզմաններուն առջեւ, ընդարձակ դետնի մը վրայ... եւ ահա երեւան կ'ելլեն մարմար քարեր ու սիւներ եւ ի-



րենց առջեւ կը բացուի հոյակապ տաճարի մը սիւնադարդը դաւիթը, ուր կան մարմարեայ դամբարաններ: Գաւիթը բոլորչի ձեւ մը ցոյց կու տայ, ուսկից անկիւնաւոր մաս մը կիսովին մէջտեղ է ելած: Գաւիթը մէկ մասամբ դուրս բերուած է դեռ: Որմերու վերի մասերը ծաղկադարդը քանդակեալ են եւ մարմարները ամբողջ եղերաքանդակ. ամբողջ գաւիթը սիւնադարդը եղած է... սիւնադարդ, խոյակադարդ գլուխներ... սպիտակ, վարդագոյն, բաց դեղնագոյն մարմարէ են. փշրուած սիւներու մասերն ու ամբողջութիւնը դուրս կը բերեն հոյակապ տաճարի մը մեծարժէք շինութիւնն ու հնութիւնը...:

Յատակը եղերքներով կրանիթ քարերու յատակումովը, եւ բուն կեդրոնովն ալ ամբողջ մոզայիկ ծաղկադարդը ու կենդանադարդը են. դարերու մէջ կրցած են պահել գեղակերտ կենդանութիւննին... Անկիւնադարձ մը, որ դարձեալ մաս կը կազմէ գաւիթին, դեռ անադարտ կան հսկայ եօթը սիւներ, խոյակաբարձ մեծակշիռ թանկարժէք գլուխներով կիսովին թաղուած:

Կայ փառաւոր դամբարան մը եւս, որուն կափարիչին վրայ կը տեսնուի Թէոդորոս յոյն եպիսկոպոսի մը յիշատակարանը. իսկ այս անկիւնադարձին ամենասքանչելի մասը կը կազմէ բուն յատակը, որ մասամբ մէջտեղ պարզուած ամբողջ մոզայիկով որպէս թէ մեծ գորգ մը փռուած է գունազեղ հիւսուածքով, ճոխ բուսականութեամբ, ծաղիկներու փնջակներովը, թռչուններու երամներովը եւ դեռ ծաղկուն ու գեղգեղուն ոսկեջրերով ալ հարբուն: Ոսկեծեփ թրծուն որմերուն վրայ, ամէնը ամէնով բոլորովին հրաշալիք մը, որոնք թէեւ կիսովին են դուրս բերուած, եւ սակայն ասոնք անգիտակ ձեռքով եւ քանդիչ բրնձով փճացուած ու փճանալու վրայ են:

Անգլիացի հնագէտ մը, տարիներ առաջ, մոզայիկ կենդանադարերը մանրակրկիտ քննելով՝ կը յայտարարէ թէ այս շէնքը նախ քան զՔրիստոս տաճար մը եղած է, յետոյ վերածուած է քրիստոնէական տաճարի մը...

Մէջտեղ ելած գաւիթին մէկ մասը հարիւր կանգունի մօտ շրջագիծ մը ունի. որով ինքնին դուրս կու գայ հոյաշէն ու մեծաշէն տաճարին մեծութիւնը:

Արկադեան – Աղճատաղն ալ եղած է հնութեանց թանգարան մը իր մեծաշէն շէնքերովը, եւ ձեռք անցուած հնութիւն բուրոյղ ու արժող բեկորներովն ու առարկաներով, արձաններովն ու արձանիկներովը, գլանաձեւ ազնիւ քարերու վրայ նշանադրերու, թռչուններու եւ այլ կենդանիներու քանդակուն գլուխ-գործոցներովը եւ աւելի հիթիթական դիմագիծովն ու հագուստներովը. քարի ու երկաթի վրայ փորուած կնիքներովը, ինչպէս զանազան արժեքաւոր քարերու վրայ, որպէս զմրուխտի եւն...:

Մեծ աւազան մը համակ եւ միակտուր կրանիթ մարմարէ եւ քանդակուն առիւծներով բոլորուած: Այս գեղակերտը փոխադրուած է կայսերական ազարակի ասպաստանը:

Արկադեան – Արղայէն վեց ժամուան ճամբով հնութիւնները Անսուր Մուշովկայինը՝ հարուստ բնակչութեան մը բակտեղիքը, քար բակերը, գե-



բեզմանոցը հազար դերեզմանաքարերով՝ իւրաքանչիւրը արուեստանշաններով քանդակուած, մանաւանդ մեծ քարաժայռի մը կողքին համաչափ փորուած տնակ թէ կրակակ եւ շարք մը այնչափ թուով... բայց թուական մը չգտանք ճակատնուն, բացի պատմուածքներէ. եւ որ զարմանալին է՝ քարաժայռ կտուրին անմիջապէս փորուածք մը, ուր զետեղուած է հսկայ խաչքար մը փորուածքի բերնին, եւ կտուրին վրայէն քառակուսի սիւն մը երկարցուած դէմը ցցուած լերկ լերան մը. իրապէս մազէ կամուրջ մը. ասոր համար ալ աւանդութիւն:

Դէպի Սեբաստիա ճամբուն Հասան պատրիկով Հեքիմ խանն է... Հեքիմ խանէն 2 ժամուան հեռաւորութեամբ Կիւղիւնկիա-Չմրուխտ լեռնադաշտակին վրայ հսկայ բերդի — ըստ պատմուածքի՝ պալատ — կուշտն ու կողերը մնացած են. դարերուն հետ մաքառելով՝ պահապան հրեշտակն է եղած՝ գոնէ դաշտի յուռթի բուսականութեանը եւ դից թէ քրմուհեաց մատուցանելի ծաղկանց ու մրգաց առատութիւններուն անթուելի» (ԲԱԶ-ՄԱՎԷՊ, 1936, էջ 39-40 եւ 1937, էջ 65-6):

## ՀԻՆ ՄԱԼԱԹԻԱ ՔԱՂԱՔԻՆ ՀՆՈՒԹԻՒՆՆԵՐԸ

Ասլանեան վրդ. կը գրէ. «Հին Մելիտինէն (նորը Ասպուղա անուամբ կը յորջորջուի) շատ հնութիւններով, աւելի հնութեանց բեկորներով ու ցրուած կոյտերով եւ կիսակործան եւ նոր անուն ու հանդերձանք զգեցածներով բոլորուած է: Յայտնի բոլորուածներն են. Ալի-Պապան, Ահմետ-Պուրանը, Գարա-Պապան, Սարխըլըն, Սէյտի-Գալէն, հետաքրքրութիւն ու ուշադրութիւն գրաւող: Մելիտինէն 3500 տարուան հնութիւն մը ունի եւ հոս է որ տիրած ու տիրապետած են Ուրարտուք, Վանեանք եւն.: Քաղաքը հսկայ պատնէշներով պարսպապատ եղած է, որոնց բեկորները հոս ու հոն մեռած ու թաղուած են եւ կապուտ-կողոպուտ եղած. բոլոր պարիսպներուն առջեւ 20-30 կանգուն լայն խրամատներ կան: Պարիսպները 4 հսկայ դռներով են եղած. 1.- Ալաճա Գաբու, 2.- Ս. Թորոս, 3.- Մուշար, 4.- Պազար, եւ 4 գլխաւոր թաղեր. 1.- Ալաճա Գաբու, 2.- Թոփ Տաշ, 3.- Խարախան, 4.- Մէյտան Պաշը: Իսկ աչքդ կտրելու չափ փռուած դերեզմանաքարեր՝ քվացած, քարաքոս կապած, զանազան ու զարմանազան ձեւերով, ամէն ազգի ու տիրապետողի նշանագիրներով ու պատկերախաղերով այլաձեւ. կոշտը, նուրբը, խառնուրդ մը շատ հինէն, միջինէն ու վերջինէն: Ուլու-Ճամին հնութիւն մը շալկեր է բոլորովին եւ նոր յաւելուածներուն ու կերտումներուն դէմ իր բողոքը ունի և ատամներ ցոյց կու տայ ոչ-պարտուողի: Աւա՛ղ որ ճիգ ու ջանք ըրած են արժեքաւոր այս հնութեան թանգարա-



նը եղծանելու, եւ նորովը ամբողջովին աղճատած ու ճղատած են:

Պէշ Գարտաշար, Ուլու-Ճամիին քովը դէպի հարաւ հնութիւն մըն է. ասոր կիսաւեր կոտորտուն դուռը տակաւին իր քանդակներովը հնամենի՝ հիացում կ'ազդէ եւ հին արուեստին փառքը կը ցուցադրէ:

Հին Մելիտինէի մէջ դեռ շատ հնութիւններ, աղօթատեղիքով՝ բաւական լեցուն էջեր կը դրաւեն... Ս. Ստեփանոսի վանքին եկեղեցին նոյնքան հնութեամբ, ինչպէս բոլոր հնութիւնները պատմական... ընդարձակ բակի - դաւթին - ճակատի կողմին բերդաւոր պատին կրթնած է մատուռը, գեղեցիկ, ալ, դեղնաւոր ու թխորակ քարերով աղուցուած ճակտին խաչքարեր. հոս ու հոն պատերուն վրայ, եւ նաեւ կամարի եղերքներուն անմիջապէս տակերովը ասորերէն, յունարէն ու հայերէն հին դրերով խաչքարեր նուրբ ու կոշտ եւ արդէն ասոնց փորուածքն ու ձեւը ցոյց կու տան խաչերու հայկականութիւնը:

Մատրան դուռը կ'իջեցուի 8-10 սանդղամատերով՝ միշտ հաստ շերտ քարերով: Դուռը փոքր հասակող երկաթագամերով աւելի պնդացած: Տաճարը կու տայ քեզի շատ ու հնաբոյր խորհրդասլաշտիկ աղօթարանի մը բոլոր մասերովն ու մթնոլորտովը դեռ սրտերու խօսող եւ հոգիներու ազդող տուն: Իր մէջը դեռ կիսականդուն մնացած է եւ ամենէն արժեքաւոր սեւ կրանիթէ նրբատաշ խաչքարին մէկ մեծ մասը՝ հիանալիօրէն քանդակում, ինչպէս եւ միակտուր վէմքարը:

Տաճարին ներքին կողմի պատերուն վրայ քերթուածներ, փորուածքներ, խաչքարերու նշմարք ու նշխարք բաւական. շատ քիչ եւ աղօտ, դրեթէ աննշմարելի պատկերագծերու հետքեր ու փսփոռներ կան:

Դար մը առաջ դեռ այս նշխարներէն կանդուն են եղեր անաղարտ ու արժէք ներկայացնող արուեստի գլուխ-գործոցներ, ինչպէս նաեւ արեղաթաղ, միաբանից խցիկներ իրենց սարօքը, եւ գետնափոր բնակներ բնակութեան յատկացուած ու թաղեր ուխտաւորաց:

Այս սուրբ շաբաթացեալին մօտերը ապրող 130 տարեկան թուրք ծերունի մը պատմեց, որչափ ալ ականածանօք, Ս. Ստեփանոսի անուանի հըռչակն ու համբաւը հրաշագործութիւններուն եւ ուխտաւորներու գունդագունդ այցելութիւնը ամէն ազդէ ու սեռէ՝ հայ, թուրք, քիւրտ, սիւննի թէ ալեւի, ասորի եւ Յոյներ եւս, որ այն ատենները բաւական կան եղեր: Փայլուն, չէն ու շող վիճակէն ու վիճակաւորէն այնչափ խօսեցաւ յուզուած ու ցաւած ներկայ աւերքէն» (ԲԱԶՄԱՎԷՊ, 1937, էջ 66 եւ 1938, էջ 297-8):

## ԱՍԼԱՆ ԹԵՓԷ

Մալաթիոյ արեւելեան կողմը Օրտուզ անունով թրքաբնակ գիւղ մը կայ: Հակառակ մեծ գիւղ մը ըլլալուն, 1907-ին հաղիւ 7-8 տուն բնակիչ ունէր: Գիւղը նախապէս ունեցած է սակայն մեծ թիւով բնակչութիւն մը,



որուն մեծագույն մասը հաւանորէն հայ եղած է: Ասոր ապացոյց է այն, որ գիւղին վերելքը կը գտնուի Հայոց Ս. Փրկիչ վանքը, որուն հնութիւնը, ժողովրդական աւանդութեամբ, մինչեւ Առաքեալներու ժամանակը կը հասնի:

Արդ, Յրտուղ գիւղին տակն է Ասլան-Թեփէ ըստած բլուրը, որուն ստորոտը կը տարածուի ընդարձակ գետին մը: Բլուրին կողերը փարուած էին դարուս սկիւրները: Գաղաթին վրայ հայ գերեզմանաքարերու շարք մը կար, մամռացած՝ գրեթէ անընթեռնի դարձած: Բլուրը իր ծոցին մէջ կը պահէր հնութիւններու դանձարան մը, որմէ հրապուրուած՝ անգլիացի մը այցելած եւ իր յուշերը գրած է (Թէոդիկ, ԱՄԵՆՈՒՆ ՏԱՐԵՑՈՅՅԸ, 1913, էջ 151):

Գէորգ վրդ. Ասլանեանի կարծիքով (ԲԱԶՄԱՎԷՊ, 1937, էջ 67) «Ասլան-Թեփէ արուեստական բլուր մըն է, կրնանք ըսել թէ հսկայ շէնք մը կամ քանի մը շէնքեր, որ ժամանակի ընթացքին, մանաւանդ յաճախակի երկրաշարժներու հետեւանքով կործանած վրայէ վրայ՝ այսօր բլուր մըն է լեռնանման»:


Ասլանեան, որ յաճախակի այցելած է Ասլան-Թեփէի վայրը, կու տայ քանի մը հետաքրքրական տեղեկութիւններ: Նա կը գրէ. «...Շատ անգամներ հողէ տմաններ, սլաքաձեւ երկաթներ, ու ստորոտէն բխող զուլալ ջրէն ալ «մողայիկ» կը գտնուին (մենք եւս քանիցս ժողոված ենք), որոնք կու դան անգամ մըն ալ հաստատ համոզումը գոյացնելու մեղի, թէ այս բլուրը ճիշտ հնութիւններ կը արտունակէ իր գոյին: Ոչ շատ տարիներ առաջ գտնուած թանկարժէք քար մը (փոխադրուած կայսերական թանգարանը) 1 մեթր լայնքով եւ երեք-չորրորդ բարձրութիւնով, վրան գրուած քանդակուած է եղեր ձիու լծուած կառք մը, կառքին վրայ աղեղնաւոր մը կանդնած. ձիուն առաջակողմը կեցող առիւծի մը կուրծքին նետ մը արձակած եւ վէս պարանոցը ետ դարձնելու աստիճան նետահար ընելէ զատ, դարձեալ աղեղը լարելով՝ պատրաստ նետաձգութեան. ձիուն որովայնին տակ (անշուշտ առիւծի երկիւղէն) շուն մը կը պահուէր. արձանագրութիւն՝ բաւական: Մեր Մելիտինէ եղած ժամանակ, 1906-ին, դարձեալ հողքերներ կը դանեն քարէ եղ մը բնական մեծութեամբ. ապուշները կը կոտրտեն այդ պատուական հնութիւնը» (Թէոդիկ, ԱՄԵՆՈՒՆ ՏԱՐԵՑՈՅՅԸ, 1913, էջ 151-2):

Այս քարերը ըստ Ասլանեան եպիսկոպոսի 1907-ին գտնուած են եւ անխորնամ թողուած էին կառավարչական պաշտօնատան բակին մէջ: Ասոնք ունէին մէկ մեթր երկարութիւն եւ մէկ կանդուն լայնք:

Քանդակները շատ որոշ ու նուրբ էին. քարի գոյնը մութ կարմիր կամ աւելի ճիշդը՝ կարմիր հողի երանգով էր:

Ասլանեան Արքեպիսկոպոս կը կարծէ թէ այս քարերու գիրերը Հաթեան են, ինչ որ անհաւանական չէ, քանի որ Մալաթիոյ շրջանը ատեն մը հաթեան տիրապետութեան տակ գտնուած է, բայց կրնան նաեւ ուրարտական ալ ըլլալ, վասնզի Մալաթիոյ շրջանակին մէջ գտնուած են ուրարտական կա-





ԱՍԼԱՆ ԹԵՓԵԻ ՊԵՂՈՒՄՆԵՐՈՒ ՄԻՋՈՑԻՆ ԳՏՆՈՒԱԾ ՉՈՐՍ ՔԱՐԵՐԸ

րեւոր հնութիւններ, նոյն լեզուով արձանագրութիւններով:

Այսպէս, ուրարտական կարեւոր հնութիւն մըն է Եփրատի վերին ընթացքին վրայ, գետին արեւելեան կողմը Իգոզլու գիւղի եւ Քէօմիւր Խանի միջեւ գտնուող սեպագիր արձանագրութիւնը, զոր տեղացիք Նազըլը Քաշ կը կոչեն:

Արձանագրութիւնը 40 տողի չափ է եւ կը վերաբերի ուրարտեան Արգիստիս Ա. թագաւորին (778-750 Ք. Ա.), որդի Սարտուր Գ.ի (750-733 Ք. Ա.) (տես Inscriptions ourartiennes et Annales des rois d'Assyrie: Recueillies et commentées par N. E. Vrouyr, էջ 15):

Այս արձանագրութիւնը գտած են առաջին անգամ Մուլտէ Եւ Ֆոն Միւլլիթալս եւ օրինակած են 1839-ին: Առաջին անգամ զայն տեսնող եւ ծանօթացնող հայը եղած է Սահակ վրդ. Հաճեան<sup>1</sup>, որ նկարագրած է (տես ԱՐԵ-ԻԵԼԵԱՆ ՄԱՄՈՒԼ, Իզմիր, 1886, ԺԶ. տարի, էջ 20-1): Սահակ վրդ. Հաճեան կ'ըսէ թէ՝

(1) Սահակ վրդ. Հաճեան, յետոյ արքեպիսկոպոս, արդիւնաւոր հայ-կաթոլիկ եկեղեցական մըն էր: Ծնած է 1837ին Բրգնիք: Աշակերտ թոգատի Անարատ Յղութեան Ընծայարանին, 1852ին քահանայ ձեռնադրուած է եւ 1872էն 1877 ժողովրդապետ եղած է իր ծննդավայրին:

1877-1886 առաջնորդական փոխանորդ Սեբաստիոյ:


1886-1892 Կ. Պոլսոյ հայ-կաթոլիկ պատրիարքարանի դիւանապետ եւ 1892էն 1905 արքեպիսկոպոս Սեբաստիոյ եւ եպիսկոպոս Եւդոկիոյ: 1905ին առանձնացաւ Պոլիս, ուր վախճանեցաւ 23 Սեպտեմբեր 1908:

Արդիւնաշատ, գործունեայ եւ անխոնջ աշխատող եկեղեցական մը եղած է:




«Մեկիտիոյ արեւելեան հիւսիսային կողմը վեց ժամ բացակայ ի Քըր-  
դաց Իզոլու գիւղը Եփրատի երկու կողմը շինուած, որոյ բնակիչք աղէկ վա-  
ռօղ կը շինեն: Թողման՝ որ է հին Մելասը, Իզոլուէն երեք ժամ վեր Եփ-  
րատին կը խառնուի: Իզոլուէն երկու ժամ բացակայ դէպ յարեւելս է Քէօ-  
միւր խանը, աւերակ արքունական ճամբու վրայ շինուած, բարբարոս ձեռ-  
քեր շինութեանց շոշորդ (հետք) չեն թողուցած բնաւ, Քէօմիւր խանէն կէս  
ժամ, եւ Իզոլուէն ժամու կէս երկուքին միջեւ ճամբուն ձախակողմը կ'ե-  
րեւի պղտիկ ասպառաժուտ բլուր մը Եագըլը Թաշը՝ երեսը դէպի ճամբան,  
երկու մեթրի չափ երկայնութիւն ունի, եւ մէկ մեթրօ լայնութիւն, բոլորը  
խորանաձեւ չրջանակ մը փորած է, եւ քառասուն տող դրուած է մէջը բեւե-  
ռագիր պալարաձեւ (դադարթմա): Տեղը անմատոյց է. վարէն քիչ մը հեռա-  
ւորութենէ կը կարգացուի:

Բլուրին դադարթը քարի մը մէջ կռանով փորած ջրհորի նման լայն  
բերնով դուր մը կ'երեւայ, շատ խորունկ կը թուի, մէջը պարսպ է. եթէ քար  
մը ձգեն, երկայն ատեն ձայնը կ'ելլէ աստիճանէն աստիճան դարնուելուն.  
չետնափոր ուղի է, կ'ըսեն, Եփրատէն ջուր առնելու, բայց ոչ ոք կը համար-  
ձակի մէջը մտնելու: Բեւեռագիրին առջի տողը մեծ դժուարութեամբ հաղիւ  
կըցայ օրինակել ճշգրտութեամբ» (ԱՐԵՒԵԼԵԱՆ ՄԱՄՈՒԼ, 1886, ԺԶ. տարի,  
էջ 20-1):



ԻԶՈՂԼՈՒԻ ՍԵՊԱԳԻՐ ԱՐՁԱՆԱԳՐՈՒԹԵԱՆ Ա. ՄԱՍԸ (ՊԱՊ ՈՒՆՏԻ, Թ. 62, Էջ 4)





ԻԶՈՂԼՈՒԻ ՍԵՊԱԳԻՐ ԱՐՁԱՆԱԳՐՈՒԹԵԱՆ Բ. ՄԱՍԸ (ՊԱՊ ՈՒԽՏԻ, Թ. 62, ԷՋ 5)

Այս արձանագրութիւնը կրող քարին յաւանկարը, զոր տրամագրած է Վիեննայի Համալսարանի Ուսուցչապետներէն Բրոֆ. Տոքթ. Թ. Վ. Քէօնիկ<sup>1</sup>, հրատարակած է Հ. Եփրեմ Վրդ. Պօղոսեան (տես ՊԱՊ ՈՒԽՏԻ, Թ. 62, էջ 4), եւ ապա տուած է երկու մասով միայն արձանագրութիւնը։

Ըստ Տոքթ. Թ. Վ. Քէօնիկի ընթերցման՝ արձանագրութեան թարգմանութիւնն է։

«Խալդի (աստուծոյն) սեպհական կառքը խոյացաւ յառաջ, յարձակեցաւ Շախուրեան Խիլարուազայի Մելիտէա քաղաքի երկիրին վրայ, խորտակեց զայն, Արդիատեան Սարաուրի առջեւ։

«Խալդիի արհաւիրքով, Խալդիի ահարկու կառքով խոյացաւ Սարաուր Արդիատեան։

«Սարաուր կ'ըսէ. հպատակ... (ծառայ) ... էր, ոչ թէ արքայ մըն էր հոն բանակած։ Աղօթեցի Խալդի տիրոջ, օգի դից (Տիեզերա) արեւ դից (Շէվինի) եւ Բիայի երկիրներու աստուածներուն, որ տիրոջ (Խալդիի) շնորհիւ յաղթանակեմ։ Աստուածները լսեցին ինձ, ճամբայ բացին իմ առջեւ։

«Հետեւորդներուս հետ բանակեցայ Տումէշիկի (քաղաքին) առջեւ։

«Միեւնոյն ատեն (նոյն օրը) յարձակեցայ երկիրին դէմ, սախակցի Կալա երկիրը որ սարէն տայ, չուս վերջացուցի Կառնիշի լեւան սահմանին վրայ գէպի Մելիտէա տանող ուղղութեան վրայ՝ Մուշայի երկիրին ծայրը

(1) Մասնագէտ մըն է արեւելեան հնութեանց եւ ունի մեծ հաւաքածոյ մը բեւեռագիր արձանագրութիւններու, որոնց մէջ են նաեւ Վանի, Մուշի, Բալուկի եւ Մալաթիոյ բեւեռագիր արձանագրութիւնները։



վերջացուցի չուս. Չարչա քաղաքին մէջ [էր] [յաղթանակի] աւարը: 14 բերդեր (ու) քաղաքներ աւարեցի մէկ օրուան մէջ, բերդերը կործանեցի, քաղաքներն այրեցի, 150 կառաւոր դերի առի [եւ] զանոնք իմ բանակիս շարքերն անցուցի:

«Սասի (քաղաքը), Խիլարուադայի արքայական քաղաքը, որ ամրացած էր, պատերազմով դրաւեցի, հօտերը, այրերն ու կիները անկէ քշել տուի:

«Սարտուր կ'ըսէ. ճամբուս ընթացքին մօտեցայ Մելիտէա (քաղաքին): Խիլարուադա առջեւս ելաւ, դեռին ինկաւ, երկու ոտքերս բռնեց. զթացի իրեն, ոսկի ու արծաթ աւարեցի, լուծքի նախիրներ քշեցի Բիայի երկիրները, իր վրան ալ հարկ դրի, ինն բերդեր... կորդեցի, իմ երկրիս կցեցի, [քաղաքներ] Խաղանի, Ուուրախի (կամ Ուդարախի), Տումեշկի, Ազինի, Մանիուի, Արուշի, Կուլբիտառի[նի], Տաշէ, Կուէրայտաշէ, Մելուիա[նի]:

«Խալդիի մեծութեան շնորհիւ [իմ] Արգիստիսեան Սարտուր, հզօր արքայ, Բիայի-երկիրներու արքան, տէրը Տուշպա քաղաքին:

«Սարտուր կ'ըսէ. ով որ այս արձանագրութիւնը կը քանդէ, ով որ [զայն] կ'աւերէ (կ'ոչնչացնէ), ով որ [զայն կը ծածկէ], ով որ այսպիսի բան մը [այսպիսի] չարագործութիւն կը տեսնէ [կամ] կ'ըսէ «Գնա ոչնչացուր», այնպիսին ոչնչանայ Խալդի [աստուածէն], օդի Աստուածէն, արեւ աստուածէն եւ [միւս] աստուածներէն, ինքը եւ իր ցեղը արեւու լոյսէն զրկուին, իր հողին, իր... եւ իր կեանքը ամբողջապէս մարին<sup>1</sup>»: (ՊԱՊ ՈՒԽՏԻ, Թ. 62, էջ 4-5):

Ինչպէս կը տեսնուի այս մասնակի եւ առանց դիտական ուղղութեամբ ներկայացուած հնութիւններու առատութենէն, կարելի է հետեւցնել թէ Մալաթիա հնութիւններով հարուստ աշխարհամաս մըն էր, որ տակաւին շատ քիչ ուսումնասիրուած եւ գրեթէ պեղումներով պրպտումներու առարկայ չէր եղած, եւ հիմա նոր է որ ուշադրութեան առնել սկսած են եւ շատ հաւանա-կան է որ աշխարհի քաղաքակրթական պատմութիւնը լուսաբանող մեծ յայտ-նութիւններ կատարուին հոն ուր երկար ատեն՝ դարերով արեւելք եւ արեւ-մուտք, ինչպէս նաեւ Քրիստոնէութիւն եւ Իսլամութիւն դէմ դէմի եկած եւ մարառած են:

\*\*

Հոգելոյս Տ. Կարապետ քահանայ Պէննէեան, Տաթ. Մ. Քեչիշեան, Գէորգ Արք. Ասլանեան եւ այլք իրենց ներկայացուցած հնութիւնները, ինչ-պէս տեսնուեցաւ, կանոնաւոր մեթոտաւոր աշխատանքներով չէին կրցած

(1) Գերմաներէնէ թարգմանած է Հ. Եփրեմ վրդ. Պողոսեան:



քննել, վասնզի անոնցմէ ոչ մէկը այդ տեսակ գիտական լուրջ քննութիւն մը կատարելու ձեռնհասութեամբ օժտուած անձ էր :

Մինչեւ շատ մօտ թուականներ՝

«Հնագէտներ դուն ուրեք պտըտած են այս պատմական վայրերը : Պուսոյ կայսերական Թանգարանի երբեմնի տնօրէն Համտի պէյ՝ գերման հնագէտի մը հետ՝ անգամ մը այցելած է հոս, վեց ամսուան չափ թէեւ մնացած է եւ անդրիններէն ոմանց կաղապարները մեծ դժուարութեամբ գաճով առնելէ վերջ սնտուկներով Գերմանիա ուղարկած : Հին ազգաց պատմութեան, քաղաքակրթութեան ու գեղարուեստին վրայ նոր նոր լոյսեր սփռող ի՞նչ գանձեր կան այսպէս Թուրքիոյ ներքին գաւառներուն մէջ, անոնց արժէքին անգիտակներու եւ ժամանակին անգութ աւերման թողուած» (Թէոդիկ, անդ, 1922, էջ 186-8) :

Վերջերս Գերմաններ նորէն զբաղիլ սկսան Մալաթիոյ շրջանակով եւ հոն կատարեցին պեղումներ եւ դտան հնութիւններ, որոնք նոր յայտնութիւններ եղան :

Այսպէս ասկէ մի քանի տարիներ առաջ Փրանսական պեղումներու վարչութիւնը կը տեղեկացնէր թէ անծանօթ քաղաքակրթութեան մը բեկորները երեւան հանուած են արեւելեան Անատոլիոյ մէջ, Փրանսացի հնագէտներու կողմէ :

Փրանսացի գիտնականներու արշաւախումբ մը, թեքնիք առաջնորդութեամբ Պ. Ծորերի, Արսլան Թեփէի մէջ, վերին Եփրատի մօտերը, 14 մեթր խորութեան վրայ, լոյս աշխարհ բերած է հետքերը քաղաքակրթութեան մը, որ մեր դարաշրջանէն առաջ 3000 տարուան հնութիւն մը ունի :

1955-ին ՆԻԻ-ԵՈՐՔ ՄԱԿԱԶԷՆԻ մէջ հրատարակուած է «Նոր լոյս վաղնջական ժամանակաշրջանի մը վրայ» խորագրով յօդուած մը, որ այս պեղումներուն հետ կապակցութիւն ունի : Կը ներկայացնեմ այդ յօդուածին թարգմանութիւնը ընդհանուր գաղափար մը տալու համար :

«Հիթիթ ժողովուրդը, որ մէկն է առաջին անգամ երկաթ պատրաստող եւ գործածողներէն, կը վարէր կայսրութիւն մը՝ Թուրքիոյ եւ Սիւրիոյ հողամասերուն վրայ եւ մրցակից էր վաղեմի Եգիպտոսին ու Բաբելոնին : Ծնունդոց զրքին մէջ արձանագրուած է, թէ Արրահամ իր կնոջ Սառային գերեզմանը բերաւ Հիթիթներէն : Անոնց կայսրութիւնը կործանեցաւ Ն. Ք. ԺԲ. դարուն : Հնագէտները կը հաւատային, թէ անոնց մշակոյթը անհետացաւ Ն. Ք. 800-ին, բայց Օր. Թերեզա Կուլլի եւ Տոքթ. Ֆրիտրիխ Քարլ Տորնիզի (Արեւմտեան Գերմանիոյ Մուէնսթըր համալսարանէն) Նեմրութ լեռան 7400 ոտք բարձունքին վրայ կատարած պեղումները ցոյց կու տան, թէ ցարդ աննշմար մնացած Հիթիթ ազգեցութիւնը տեւեց Կոմագէնէի հելլենիստական թաղաւորութեան մէջ մինչեւ Քրիստոսի ժամանակները, որ վերածաղկեցաւ հոն : Վարը Կոմագէնէի թաղաւոր Անտիոքոս Ա.ի գերեզմանին մօտ գտնուած արձանները ատոր ապացոյցներն են :



Ա. Մեծագանգուածները. — Վերը մէկէ աւելի անգլուխ արձանները, թաղաւորի դերեղմանին մօտ տաճարի դաւիթին մէջ, պարսկերէն եւ յունարէն կրկնակ անուաներով աստուածներ են, որովհետեւ թաղաւորին կրօնքը կը միացնէր Պարսիկներունը եւ Յոյներունը: Չախէն աջ չորրորդը թաղաւորն է, որուն ներկայութիւնը աստուածներուն հետ կը նշանակէ իր աստուածացումը:

Բ. Արքայական առիւծը. — Այս ձախ կողմի արձանը, որ իր ինկած ձախ տեղէն բարձրացած է, կը թուի կապը ըլլալ 2000 տարի առաջ Կոմմագինէի եւ վաղեմի Հիթիթներուն միջեւ: Յատկանշական հիթիթ դրոշմներ գտնուեցան իր աչքերուն շուրջը եւ արմուկներուն մէջ:

Գ. Աստուածութիւններ. — Տաճարի արեւմտեան դաւիթին մէջ քանդուած արձաններուն վարը նոր-դասական դլուխներ կը ցուցնեն Կոմմագինէի մէջ խառն մշակոյթի եւ կրօնի ազդեցութիւնը: Չախէն աջ դլուխներն են Հերքիւլէս-Արտաքսէսի, Ապոլոն-Միթրայի եւ Չեւս-Արամազդի: Խորքի արծուագլուխը կը նշանակէ թաղաւորութիւնը:»

Իսկ շատ աւելի կարեւոր է ՆԻԻ-ԵՈՐՔ ԹԱՅՄԶ-ի 2 Յունուար 1955-ի թիւին մէջ թերթին մասնաւոր թղթակից Welles H an gen - ի 22 Դեկտեմբեր 1954 թուականով Անգարայէն գրած հետեւեալ թղթակցութիւնը, զոր կը ներկայացնեմ հոս թարգմանաբար.

«Հիթիթական կորսուած մշակոյթի մասին պեղումներով յայտնագործուած հաւաստի փաստեր թուրքիոյ մէջ մնացորդ նշխարներ կը թելադրեն թէ հին ոճը տեւեց մինչեւ Քրիստոսի ժամանակ:

Այս տարի թուրքիոյ հարաւ-արեւելեան կողմը կատարուած պեղումներով յայտնուեցաւ ապացոյցը թէ հիթիթական քաղաքակրթութիւնը վերապրեցաւ մինչեւ Քրիստոսի ժամանակ:

Ն. Ք. Ը. դարուն վերջերը Ասորեստանի նուաճած հիթիթ քաղաք-պետութիւններու ճարտարապետութեան, արձանադրութեան եւ կրօնքին երեւութական անհետացումը երկար ատենէ ի վեր չփոթութեան մատնած էր հնագէտները:

Մայիսիոյ հարաւ-արեւելքը Անգլի-տաւրոսեան խորտուրորտ լեռներու մէջ դործող ամերիկո-գերման արշաւախումբը պեղումներով գտած է հիթիթական անլրիպելի ազդեցութիւնը Կոմմագինէի հելլենիստական թաղաւորութեան մէջ երկու արքայական շիրիմ-դարձիւններու վրայ:

Հիմնուած Ն. Ք. Ա. կամ Բ. դարուն իբր անկախ պետութիւն Կոմմագինէն պաշտօնապէս միացած էր Յ. Տ. 72-ին Հռոմի կայսրութեան Վեսպասիանոսի օրով:

Այս քառուղիներու թաղաւորութեան միջով, արեւելքէն դիտաւոր կարաւանային ճամբաներով էր որ կ'ենթադրուի թէ Միթրասի պաշտամունքը թափանցած է հռոմէական կայսրութեան մէջ: Կոմմագինէի պահակապօրքի հռոմէական զինուորները միջոց դարձան որ Միթրասապաշտութիւնը անցնի



կայսրութեան բոլոր մասերուն մէջ, մէջը ըլլալով Լոնտենեումը (վաղեմի Լոնտոնը), ուր վերջերս դանուեցաւ միթրասական տաճար մը» :

## ՄՐՑՈՐԴ ՔՐԻՍՏՈՆԵՈՒԹԵԱՆ

Միթրասական կրօնքը, որ միաստուածեան էր, կը խոստանար յաւիտենական կեանք եւ մինչեւ Քր. է ետք շորրորդ դարը մրցակից դարձաւ քրիստոնէութեան :

Կամմազինէի շիրիմ-դարերներու (սրբարան) պեղումներուն դործը կը զեկալարեն Նիւ-էօրքցի Օր. Թերեզա Կորլ եւ վերածնող արեւմտեան Գերմանիոյ Մուէնսդերը Համալսարանի պատմադէտ Տօքթ. Ֆրիտրիխ Քարլ Տորները : Արշաւախումբը կը վայելէ արեւելքի խուղարկութեան դպրոցներուն հովանաւորութիւնը : Նիւթականը կը հողացուի Պոլինկըն Հիմնարկէն եւ Ամերիկեան Փիլիսոփայական Ընկերութենէն :

Երրորդ անգամ ըլլալով Օր. Կորլ եւ Տօքթ. Տորները պիտի դառնան յաջորդ տարին : Անոնք կերպը կը փնտռեն բանալու Կամմազինէի թաղաւոր Անտիօքոս Ա.ի գերեզմանին հողաբլուրը Նեմրութ լեւան 7400 ոտք բարձրութեան վրայ, նոյնպէս անոր հօրը Միհրդատ Ա.ի գերեզմանը, որ կ'ենթադրուի թէ թաղուած է մերձաւոր Քեախտէ լեւան մէջ :

Թէեւ երկու գերեզմանախուցերէն եւ ոչ մէկը բացուած է եւ սակայն հետազօտողները պեղումներով յայտնաբերած են հելլենիստական արժեքաւոր արձանագրութիւն երկու կողմերուն վրայ՝ յունարէն արձանագրութեամբ :

Կ'աղնկալուի որ շիրիմները պիտի յայտնաբերեն երկար ատենէ ի վեր փնտռուած Ասիական Թուրքիոյ Հելլենիստական քաղաքակրթութեան վրայ ծանօթութիւններ, որ կը վերաբերին քրիստոնէութեան նախնական շրջաններուն, ինչպէս նաեւ պարսկական եւ հիթիթական տարրերու հետ անոր միացումի մասին ծանօթութիւններ :

Անտիօքոսի գերեզմանին մուտքը ծածկուած է կրաքարով մը, որ կը կազմէ լեւան բնական սուր կատարը, դաստակաշափ թոյլ կրաքարի խճային ծածկոյթով մը, որ երեւոյթէն կը նմանի մարմարեայ բուրդի մը : Օր. Կորլ եւ Տորները կը յուսան յաջորդ ամառ արդիական երկրաբնագիտական դործիքներով բնորոշել գերեզմանին ճիշդ դիրքը :

Դամբանաբլուրը երեք կողմերէն պաշտպանուած է վիմանման խորշաձեւ դարատափ դաւիթներով՝ տաշուած լեւան դառիթափին վրայ : Թափորի հոյակապ ճամբայ մը կ'առաջնորդէ դէպի արեւելեան դաւիթը, ուր վիթխարի արձաններու շարք մը կը ներկայացնէ Անտիօքոսը եւ չորս պաշտպան աստուածները, որ դեռ կը կենան :

Անոնք կը մխրձին պարսիկ-մակեդոնական աստուածութիւններուն մէջ՝ ցոլացնելու համար վեհապետին յաւակնութիւնը թէ ինք սերած է Պարսիկ-



ներէն եւ Մակեդոնացիներէն: Այդ արձաններն են Ապոլոն-Միթրաս, Կոմմա-դինէի բախտը (արդասարեւութեան աստուածուհին), հսկայ Չեւս-Արամազդը, Հերքիւլէս-Արտազնէսը:

Առիւծները, որ կը ցուցնեն զօրաւոր հետքերը հիթիթ ազդեցութեան, կը դարձարեն բարձրաքանդակները երկու դաւիթներուն: Նեմրութ լեռան բազմաթիւ դէմքերը կը կրեն հիթիթ տիպարի գլուխի յարդարանքը, թէեւ իրենց տարազին մնացած մասերը յունական կամ պարսկական ներշնչում ունին:

Այս վերապրած նշխարները մասնաւորաբար հետաքրքրական են այն իրողութեամբ, որ հիթիթական վերջին կայսրութիւնը կործանած էր Ն. Ք. ԺԲ. դարուն, թէեւ ծանօթ է թէ հիթիթական մշակոյթը նորէն ծաղկեցաւ թ. — է. դարերուն մասնաւորաբար Կոմմադինէի շրջանին մէջ:

Այս ամառ գտնուեցաւ ութ ոտք սալաքար մը գերեզմանին քով, որուն վրայ յունարէն արձանագրութիւն մը կայ, որ կ'ազդարարէ «Անոնք որ հոս կու գան անդիտակցարար սրբապղծելու այս տեղը, պէտք է խոյս տան անկէ, իսկ անոնք որ կու գան կողոպտելու համար, պիտի տառապին ահաւոր հետեւանքներով»: Նման նդովք մը գտնուեցաւ Միհրդատի գերեզմանի մուտքին, ուղղուած ամբարիշտ բռնարարիչներու:

ՄԵԾ ՊԱՏԿԵՐԻՆ ՏԱԿԸ. — Հերքիւլէս-Արտազնէսի այս զանգուածեղ գլուխը դեռ կանգուն է Նեմրութ լեռան բարձունքին վրայ, Կոմմադինէի Անտիոքոս Ա.ի գերեզմանին մօտ: Հոն կատարուած պեղումները ապացոյցը կու տան թէ Փոքր Ասիոյ մէջ հիթիթներու կորսուած քաղաքակրթութիւնը վերապրեցաւ նուազագոյն մինչեւ Քրիստոսի ժամանակ:

Հետաքրքրական է դիտնալ թէ այս պեղումները կատարուած են Վեսթ-Փալիոյ Միւնսթէյ, համալսարանին հին ազդաց պատմութեան դասախօս Ֆրիտրիխ Քարլ Տորլների<sup>1</sup> կողմէ, որ 20 տարի առաջ ալ Թուրքիա գտնուած էր, եւ իրենց նստատակ ունէին երեւան հանելու Պոնտոսի Միհրդատ Եւպատոր եւ Հայոց Մեծն Տիգրան թաղաւորներու գանձերը, որոնք չգտնուեցան, սակայն երեւան եկան պատմական յայտնութիւններ, որոնք ոչ նուազ թանկագին էին քան այդ գանձերը:

1954-ին յաջողեցան գտնել 85 մեթր երկայնութեամբ եւ 45 աստիճանի վրայ հակած մեծ փապուղի մը, ուր հին թաղաւորութեան մը վերաբերեալ բազմաթիւ փաստեր կարելի պիտի ըլլայ գտնել, ինչպէս յայտարարած էր եւ ինչպէս իրապէս ճիշդ ելաւ իր ենթադրութիւնը:

Իր պեղումներուն առաջին արդիւնքները, որոնք 1954-ին ձեռք բերուած են եւ յայտարարուած են այն ատեն (տես ՅՈՒՍԱՅԵՐ, 15 Սեպտեմբեր, 1954), հետեւեալներն են. —

1. Քեախտէ գետին մէջտեղերը՝ Արտամետա (հաւանօրէն Արշամոչատ

(1) Փրոֆ. Տորլները շատ լաւ թրքերէն գիտէ:



ըսել կ'ուզուի. Ա. Ա.) քաղաքը, որուն պատերը պեղումներու շնորհիւ մէջտեղ հանուած են:

2. Ձեռք բերուած է նաեւ արձան մը, ուր կը տեսնուին Միհրդատ թագաւորը եւ Հերակլէս:

Հին յունարէն արձանագրութիւն մը կայ արձանին վրայ, ուր Միհրդագատին տղան կը խօսի հօրը եւ նախահայրերուն մասին: Կը մատնանշէ նաեւ դէպի հօրը եւ մօրը դերեղմանները տանող ճամբան: Կը խօսի հարուստ դանձերու մասին եւ կը յայտնէ թէ խիստ վտանգաւոր է մօտենալ դերեղմաններու բաժնին:

1954-ին գիտունը դարձեալ գնաց Քեախտէ, պեղումները շարունակելու համար: Իրեն կ'ընկերանան դերման ճարտարապետ Պիրիկեր եւ ամերիկացի կին ճարտարապետ մը (հաւանօրէն վերոյիշեալ Օր. Կորլ. Ա. Ա.):

Տոքթ. Ֆրիդրիխ Քարլ Տորրները լրագրողի մը ըսած է այս առթիւ.

«Միհրդատ թագաւորին դանձը շատ ճոխ է: Եթէ չէ գողցուած, անպայման պիտի դտնենք, ինչպէս նաեւ պատմական շարք մը ապացոյցներ»:


Սակայն, ինչպէս ըսի, Միհրդատի վերաբերեալ ոչինչ գտնուած է, քայց գտնուած հնութիւնները նուազ արժեքաւոր չեն<sup>1</sup>:

Կարեւոր եւ անթխտելի պատմական իրողութիւններու անհերքելի փաստերը կան եւ կը մնան տակաւին այդ հողամասին վրայ, հակառակ քաղաքակրթութեան թշնամի Սելճուկին, Թաթարին եւ Թուրքին մօտաւորապէս հազար տարիէ ի վեր շարունակ քանդելուն եւ կոտորելուն մարդկային քաղաքակրթութեան բոլոր յիշատակաբանները:


Տակաւին հոն կը մնան մարդկային քաղաքակրթութեան անխօս, սակայն շատ պերճախօս յիշատակաբաններուն մնացորդները, զորս Գորշ Արջը դարերով քանդելով եւ կոտորելով չէ կրցած անհետացնել:

Անոնք դարերու հեռաւորութենէն կը կանգնին՝ արհամարհելով վայրենութիւնը, ի փառս ստեղծադործ միտքին, անոր արդիւնք մշակոյթին եւ քաղաքակրթութեան:

(1) Այս պեղումներու առթիւ թուրք թերթեր մատնաւորապէս «Պիւթիւն Տիւն-եա» ամսագիրը եւ «Ենի Սաղա» օրաթերթը կարգ մը անյարիր հրատարակութիւններ ջրած են (տես Յուսարէր 15 Սեպտեմբեր 1954-ի թիւ):







Բ. ՄԱՍ

## ՊԱՏՄԱԿԱՆ ԱՆՑԵԱԼ

•

ՄԱԼԱԹԻՈՅ ՀՆԱԽՕՍԱԿԱՆՆ ՈՒ ՊԱՏՄԱԿԱՆԸ  
ՔԱՐԱՅԻՆ ՇՐՋԱՆԷՆ ՄԻՆՋԵՒ ԻՍԼԱՄԱԿԱՆ ԳՐԱԽՈՒՄԸ

Գրեց՝ ԵՂԻԱ Ս. ՔԱՍՈՒՆԻ(\*)

Ա.

### ՓՈՔՐ ԱՍԻՈՅ ՆԱԽԱՊԱՏՄՈՒԹԻՒՆԸ

Փոքր Ասիոյ մէջ մարդկային բնակութեան ամենահին հետքերը գտնուելու համար դեռ կարեւոր հետազոտութեանց ձեռնարկուած չէ։ Այսօր հազիւ թէ կարելի է քանի մը դիրքեր մատնանշել, ուր հնաքարային մարդոց (paleolithic) ձեռակերտած գործիքներ գտնուած են։ Եփրատի բարձրահովիտին մէջի սակաւաւոր գիւտերը կը ջուցնեն որ Չոքրորդակ (Quaternary) շրջանին արդէն մարդիկ կը բնակէին հայկական լեռնաշխարհին արեւմտեան եզերքները (Կոմմագինէ, Մելիտինէ, Խարբերդի եւ Ամիտայի [Տիարպեքիը] շրջանակները եւայլն), որ այն ժամանակ արեւմտեան Բարձր Ասիոյ սառոյցէ ազատ միակ երկիրն էր (Հ. Յակ. Տաշեան, ՀԱՆԴ. ԱՄՍ., 1894, էջ 106)։

Հետեւեալ տեղեկութիւնները մեծաւ մասամբ կը քաղենք Delaporte-ի LES HITTITES գիրքին 35-8 էջերէն. —

---

(\*) Յաջորդ ութը հատուածները գրուած են Մալաթիոյ Կրթատիրաց Միութեան խնդրանքով Վեր. Եղիա Քասունիի կողմէ։ Բաղմահմուտ հեղինակին այս շահեկան ուղիւստութիւնը կը հրատարակուի նոյնութեամբ։



Լիւկիոյ մէջ Կուրմա անուն տեղը Վիթթորիօ Վիալէ երեւան բերաւ Մուստիրեան խաւի գոյութիւնը քարայրի մը մէջ:

Ներկայիս ճանչցուած ամենակարեւոր գիտն է ժընեցի Pittard-ինը 1928-ին, Եփրատի Չաղզալ անուն մէկ օթանդակի ձորին մէջ, Փիրունի կամուրջին մօտ, Ատրեամանէ (Հուսնըմանսուր) իրր 5 քիլոմետր հեռու, ժայռերու տակ ապաստանարանի մը մէջ, որոնց ներսի կողմը դրուագուած են հին սիկահողերէ կազմուած խճաքարային (conglomerate) ժայռի պարեխներով, ինք պատահած է տաշուած կայծքարերու: Այս ապաստանարաններու եղերքը եւ դրացի գաւիլայրերու վրայ M. Pittard ժողոված է ցոկաւոր քերոցներ, գշիրներ (burin), շեղրեր՝ կոնակը վայրահակ, որոնք Աւրիգնակեան (Aurignacian) շրջանին յատկանշական են: Ֆոն տէր Օսթէն ալ 1931-ին այցելած է նոյն վայրը եւ քարէ դործիքներ ժողոված, բայց դեռ բան մը չէ հրատարակած անոնց մասին:

Հետեւեալ տեղեկութիւնը կը քաղեմ Marc R. Sauter-էն. —

1928-ին Prof. Eugène Pittard Մալաթիոյ վիլայէթին մէջ Ատրեամանի մօտ Փիրուն ըսուած տեղը, գետնի երեսը դտաւ տաշուած կայծքարէ դործիքներու առատութիւն մը՝ զանազան տիպերէ: Ասիկա մինչեւ հիմա Թուրքիոյ մէջ դառնուած նախապատմական հնաքարային կեդրոններու ամենակարեւորն է: Abbé Breul -ի դասաւորմանց համեմատ՝ ասոնք Aurignacian միջին շրջանին կը պատկանին. հոն կան հաստ քերոցներ, որոնց շատերը ցոուկ ունին, գշիրներ, քանի մը հաղուագիւտ տեսակէ շեղրեր՝ կըռնակը՝ համեմատեալ (P. 159 fig. 41 ասոնցմէ նմոյշներ կը պատկերացնէ): Կը յիշուին դեռ քանի մը հատուածակողմի ձեւով կորիզներ, զորս դրեթէ անկարելի է զանազանել նորքարային դործիքներէ, նաեւ վանակատէ (obsidian) առարկաներ, զորս դժուար է դասաւորել:

Ատրեամանի այս Աւրինեակեան կայանն ահագին կարեւորութիւն ունի Մերձաւոր Արեւելքի նախապատմութիւնն ուսումնասիրողին համար: Ան կ'օգնէ մէկ կողմէն Սուրիա-պաղեստինեան մարդի արտադրութիւնները, միւս կողմէն Քիւրտիստանի, նաեւ Անդրկովկասի եւ հարաւային Ռուսիոյ մարդերուն նմանօրինակ հնաքարային արտադրութեանց հետ յարաբերութեան բերելու: Արդարեւ այս երեք մարդերուն մէջտեղ կայ հայկական հաստամետը, եւ Քսենոփոնի վկայութիւնը բաւական է ցուցնելու թէ ի՛նչ սոսկալի դժուարութիւն կար այս լեռներէն անցնելու. բայց հարկաւ նախապատմական մարդոց թափառումները եւ այդ շրջանի մշակութային ազդեցութեանց թափանցումները չենք կրնար չափել զինեալ բանակի մը արշաւանքին ատեն կտրած ռաւական փարսախներուն հետ: Եփրատի երկու վերին բազուկները կը բանան երկու խրամներ, ուր զարմանալի չէ պատահիլ հնաքարային մարդոց հետքերուն:

Այսպէս, Ատրեաման, որմէ հեռու չէ Մալաթիա, կը ներկայացնէ մեզի Սուրիայէն հիւսիս-արեւելք եւ հիւսիս-արեւմուտք տարածուող հնաքարային



ազդեցութեան ամենէն յառաջացեալ կեդրոնը: Պարզ խօսելով, Վերին Եփրատի ձորն է, որով հարաւէ հիւսիս եւ հիւսիսէ հարաւ դաղթած են Հնաքարային շրջանի մարդիկը՝ տանելով իրենց քարային գործիքներու պատրաստութեան արհեստը (*Préhistoire de Méditerranée Paléolithique et Mésolithique*, Payot. Paris, 1948, pp. 156, 158, 162):

Պետիգիոյ մէջ Գըղըլլովա անուն դաշտին վրայ Էօմէր Էֆէնտի չիֆթլիյի ըսուած տեղը, Ավանճըզ գիւղէն դէպի հարաւ, R. Paribani և P. Romanelli 1913-ին գտան ցած բլուրի մը վրայ որոշ մնացորդներ նախապատմական կայանի մը: Անոնք ուրիշ այսպիսի դիրք մը ճանչցած են Մերսին չայի մօտ Եռւմազ թէփէ: Հաւանօրէն երկու տեղերն ալ Միջնաքարային (Mesolithic) կամ Նորքարային (Neolithic) են:

Անգարա, կազի գործարանին արեւմտեան կողմը, 1931-ին, Kurt Bittel, քարահանքի մը մէջ ի լոյս բերաւ Հնաքարեան տաշուած գործիքներ կապուտկեկ կայծքարի երիկամածեւ գունտերուն մէջտեղ, ուղղանկիւնածեւ՝ կլորակ փշածայրերով. անոնք կը ներկայացնէին հաստ վերահըպումներ երկու ծայրերուն վրայ եւ երկայն կողմերէն մէկուն առջեւի երեսին վրայ. իսկ ետեւի երեսին վրայ տափակցուած են: Ասիկա հաւանօրէն Հնաքարէն դէպի Նորքարը անցում մը կը նշանակէ:

Երկրաբանական Չորրորդակ Ժամանակի դէպի վերջերը պատահող Սառնահալքին յաջորդեց Արեւմտեան Ասիոյ մէջ Անտառապատութեան շրջան մը, որ Հնաքարէն դէպի Նորքարային շրջան անցման հետ կը զուգադիպի: Այս շրջանին՝ Փոքր Ասիոյ բոլոր մեծ ու պզտիկ լեռնաշղթաները խիտ անտառներով ծածկուած էին, հարկաւ ստորոտները բարեբեր բացաստաններով: Բայց թերակղզիին կեդրոնական հարթավայրին խորութեան մէջ շատ մեծ ներքին ծով մը կար՝ հալած ձիւներէն ու սառնամանիքէն եւ տիրող անձրեւաշրջանէն գոյացած: Այս ներքին ծովը հետզհետէ քաշուելով անձրեւաշրջանին յաջորդող չորութեան շրջանին, հիմա Թուզկէօլ անուն աղի լիճ մը միայն մնացած է անկէ:

Ի սկզբան ամենէն աւելի թերակղզիին ծովեզերքներուն վրայ բնակելի տեղեր կային, եւ այս տեղերը շատ կանուխէն ստացած են Միջերկրականեան ցեղէ բնակչութիւն, հաւանօրէն Կասպեան մշակոյթով: Բայց Փոքր Ասիա, ինչպէս Հայաստան եւ Անդրկովկաս, կը դառնան երկու կլիմայական գօտիներու սահմանադիւրսին վրայ. որով անիկա թէ՛ հարաւէն եւ թէ՛ հիւսիսէն ընդունած է ինչպէս բուսական եւ կենդանական, նոյնպէս ալ մարդկային ու մշակութային տարրեր:

Այսպէս, Արեւմտեան Ասիոյ մէջ զօրաւոր կերպով ծաղկող Նորքարային քաղաքակրթութենէն նախ ծովեզերքներուն մօտ կը դառնանք ուժեղ հաստատութիւններ, որոնք սակայն հետզհետէ թերակղզիին ներսն ալ կը թափանցեն այլեւայլ ուղիներով ու միջոցներով:



Դաշտային Կիլիկիոյ եզերքը՝ Մերսինի մօտ պեղումներու ամենաստորին խաւը կը բովանդակէ հասարակ միագոյն (monochrome) կաւեղէն, որուն հետ գտնուած յղկեալ քարէ գործիքները վանակաւ (obsidian) շինուած են։ Հողագործութիւն կայ հոս, որ տիպար ոռոգման մշակոյթ (irrigation culture) է։ Ն. Ք. 6.000-ի մօտերը սկսած այս զուտ նորքարային մշակոյթը շատ երկար տեւած ըլլալու է, որովհետեւ մնացորդներու 20 հազ խորութեամբ խաւ մը թողած է։ Յաջորդ խաւին մէջ թրծումի արուեստը կատարելագործուած է, եւ նախշուն կաւեղէն (painted pottery) կը սկսի։ Քիչ յետոյ մարդիկ պղինձի ալ ծանօթացած են, բայց առանց ձգելու քարէ գործիքներու եւ զէնքերու գործածութիւնը, որով Պոլիսթիք (Chalcolithic) շրջանի մէջ կը մտնեն։

Նորքարային շրջանի վախճանը նշանակող հազարամեակին՝ Տաւրոսեան-գիւղական մշակոյթ մը կը ծաղկէր, որ տարածուած է Տաւրոսեան լեռնաշղթային հարաւային զառիթափին վրայ՝ արեւելքը մինչեւ Պարսկաստանի խորերը, եւ արեւմուտքը՝ դէպի Կիլիկիա։ Բայց նաեւ ճոխ խաւերով կամ գոնէ հետքերով կը գտնուի Փոքր Ասիոյ ներսերը եւ մինչեւ Հայաստանի խորերը։ Իսկ արեւմտեան Փոքր Ասիոյ մէջ՝ Լիւդիոյ Գիւգեան լիճը մեզի կը ներկայացնէ Զուիցերիականներուն համանման լճաբնակ տուններ, որոնց բնակիչները հաւանօրէն Եւրոպայէն Ասիա գաղթեր են։ Միւս կողմէն, Մալաթիոյ մօտ M. Przyleuski 1933-ին ճանչցած է մեծֆալեան (Megalithic) յիշատակարաններ։

Ոռոգման մշակոյթը հարկաւ անասնաբուծութեան կ'ընկերանար՝ ինչպէս արդի ագարակներուն մէջ։ Այդ անասնաբոյծ մշակները ստիպուած են, իրենց ընտանի անասուններու սիրոյն, ամառները թողուլ ջերմադին դաշտագետինները եւ գաղթել դէպի լեռներու հովոցները, ուր թէ՛ թարմ արօտներ կան եւ թէ՛ զով օդ ու մաքուր ջուր։ Այս տեսակ ֆոշուորութիւնն էր հաւանօրէն գլխաւոր միջոցը, որով մարդիկ հարաւէն մանաւանդ, մասամբ ալ հիւսիսէն, հետզհետէ թափանցելով տեղաւորութեան Փոքր Ասիոյ աստիճանաբար մշակութեան ու բնակութեան յարմար դարձող մարդերուն մէջ։ Եւ անգամ մը հոն տեղաւորուելէ ետք, այնտեղ ապահովութիւն գտնելով աճեցան ու բազմացան։ Ասկէ դատ, այդ նախնական մշակները քանի որ հողը պարարտացնելու արուեստական կերպերը դեռ չէին գիտեր, երբ իրենց առաջին հաստատուած տեղի արտերը հինգ կամ տասը տարի միեւնոյն հունձքերը տալով կը կորսնցնէին իրենց արգաւանդութիւնը, ժողովուրդը աւելի անդին կը գաղթէր՝ անմշակ, բայց բարեբեր նոր հողեր փնտռելով։ Եւ այսպէս ամբողջ թերակղզիին ներսի մասերը դարերու ընթացքին կը ստանային հողամշակ եւ անասնաբոյծ բնակչութիւն։

Զուտ նորքարեան մշակոյթ կ'երեւի թէ գտնուած չէ Փոքր Ասիոյ ներսերը։ Ամէն տեղ, ուր որ քննութիւն կարելի եղած է, մետաղ ալ գտնուած է նորքարեան խաւերուն մէջ։



Կապաղուկիոյ մէջ իր առաքելութեան ընթացքին՝ գիտնական Շանթր հաւաքած է քարէ կացիններ եւ ուրիշ Նորքարային գործիքներ Պեշարտաշի եւ Աղզըկէօղէլի մէջտեղ Զամանթի սուի աջ ափին վրայ, Բիւլթեփէ, Էվերեկ, Ֆարահետին, Թոմարզա, Շար, Հաճըն, Փունարալաշը, Զէյթուն, Սիս եւ Անաւարզա: Նման գործիքներ կը գտնուին նաեւ թերակղզիին արեւմտեան մասին մէջ եւ մասնաւորապէս Հիսարլըզի (Տրովադա) Բ. եւ Ե. խաւերուն մէջ, ուր ասոնք հին արուեստագիտութեան մը ուշ մնացած ներկայացուցիչներն են:

Գալով կաւեղէնի, ամենէն սկիզբը միեւնոյն դեղնորակ տեսակէն կաւանօթներ գործածական կը գտնուին ամբողջ թերակղզիին մէջ, ինչպէս նաեւ Կրետէ եւ Կիւկլադեան կղզիները:

Փոքր սսիական շրջանակներէն շատերը, որոնցմով մասնաւորապէս շահագրգռուած ենք, նորագոյն ժամանակի բոլոր հնագիտական խուզարկութեանց հակառակ՝ տակաւին խիստ անկատար կերպով հետազօտուած են: Ասիկա առանձնապէս ճշմարիտ է Փոքր Ասիոյ արեւելեան մասին համար, Մելիտինէի, շրջանակ մը՝ որուն հնագիտական եւ պատմական կարեւորութիւնը կատարելապէս կը զգան ուսումնականները, բայց որուն խուզարկութիւնը, բազմաթիւ գործնական եւ քաղաքական դժուարութեանց պատճառաւ յետաձգուած է եւ դեռ նոր սկսելու վրայ է:

Ինչպէս տեսանք, Փոքր Ասիոյ մէջ Հնաքարային շրջանէն գրեթէ ոչինչ գիտցուած է՝ ի բաց առեալ սա պարզ իրողութիւնը թէ գոյութիւն ունեցած է ան: Անգարայի հարաւ-արեւելեան կողմը՝ Էլմատաղի վրայ Ուզալ կամ Ուզաղըլ ըսուած տեղը, 1909-ին՝ R. Campbell Thompson երկու գործիք գտած է andesite քարէ եւ քարեղէն մուրճի մը կէսը, զոր ինքը հին Հնաքարեան կը կարծէ, բայց բոլոր շրջակայքը՝ մօտակայ տեղեր կաւեղէնի կտորուանք կան, որոնց թուականը ինք չէ կրցած որոշել եւ որոնք սակայն կ'ապացուցանեն թէ այս վայրը հին Հնաքարեան չէ, այլ Նորքարեան: Հետեւաբար այս է ամէնը, զոր ներկայիս գիտենք Փոքր Ասիոյ Հնաքարային շրջանին վրայով: Դժբախտաբար Նորքարային շրջանին Փոքր Ասիոյ պատմութեան վրայով ալ մեր ծանօթութիւնն ասկէ աւելի գոհացուցիչ չէ: Հոն կատարուած սակաւաթիւ պեղումները (Տրովադայի մէջ՝ Շլիմանի եւ անոր գործակիցներուն ու յաջորդներուն ձեռքով եղածը, Պողազքէօյի մէջ Վինքլէրի եւ Կարքիմիշի [Ճարապլուս] մէջ Բրիտ. Թանգարանի պաշտօնեաներուն ձեռքով եղածները) չի թուիր թէ իջեցուած են մինչեւ զուտ Նորքարային խաւը:

Հիւսիսային Սուրիոյ մէջ Սաքչէկէօղիւ, ուր Կարսթանկ պեղումներ կատարեց, երկու ամենավարին խաւերը Նորքարային են, բայց գուցէ Նորքարային շրջանի ամենականուի փուլերուն չեն պատկանիր: Երեւան հանուած են վանակատէ (obsidian) եւ ոսկորէ ձեռակերտներ (implements) եւ կտորուանք սեւ կաւեղէնի՝ փորագրուած գծային զարդարանքով: Աւելի ետքի Նորքարային խաւը տուաւ գունաւոր կաւեղէն ուղղաձիւ կամ ոլորուն



գլխավորում էլ կենտրոնացնում և արագացնում զարգացումը, որ շագանակագոյն գետնի վրայ սեւում նկարում են: Բայց մինչև որ շատ աւելի թիւով վայրեր չխուզարկուին, անկարելի պիտի ըլլայ ըսել թէ պատմական ուրուագծի մը մէջ ո՛ր վայրկեանին կը յարմարին անոնք: Վանակատի ներկայութիւնը կանխադոյն խաւին մէջ կարելոր է անով որ կը թելադրէ թէ արդէն առեւտրական յարաբերութիւն հաստատուած է Մելոս կղզիին հետ, որ Եգէական ծովու աւազանին մէջ գլխաւոր աղբիւրն էր վանակատի, բայց թերեւս նաեւ Հայաստանի հետ, որ վանակատով այնքան հարուստ է:

Քարի շրջանի ու Մետաղային շրջանի սահմանագծին վրայ կիրաւիկայի (ceramics) նոր մշակոյթ մը հետզհետէ կը ծաւալի Մերձաւոր Արեւելքի մէջ: Այս փոփոխութեան յատկանիշն է նախկին սեւ կաւանօթի դադարումը եւ անոր տեղ կարմիր գոյնով կաւանօթի անցնիլը: Այս փոփոխութիւնը կը վերադրուի ամէն բանէ առաջ կաւեղէնի թրծման մէջ տեղի ունեցած բարեփոխութեան, որ այս ալ արդիւնքն էր հաւանօրէն բրուտի հնոցներուն կըրած բարեփոխութեանց: Նախկին կաւեղէնը կը թրծուէր բաց ու մխացող կըրակի վրայ: Այս կերպով թրծուած անօթներու մակերեսը ծուխէն սեւ պիսակներ կը ստանար. բրուտները սեւ պիսակները անխուսափելի համարելով, մնացած մասերն ալ ձեռքի աշխատանքով կը սեւցնէին միօրինակութեան համար: Նոր հնոցներուն մէջ, կաւին պարունակած երկաթի թթուատը կըրակի աղդեցութեամբ կարմիր գոյն մը կու տար բրտեղէնին: Զայս ալ նմանապէս միօրինակ կ'ընէին՝ լուալով կամ ուրիշ կերպերով. նաեւ յղկելով կը փայլեցնէին:

Յարեւմուտս Դանուբի աւազանին մէջ, յարեւելս Թուրքաստանի մէջ եւ հարաւը Սուրիոյ մէջ, այս կարմրեւոր բրտեղէնը ժամանակով կը համապատասխանէ մետաղէ պղինձէ դործիքներու առաջին երեւման: Ոչ մէկ արձանագրութիւն, որչափ երկար եւ որքան ալ պատմական մանրամասնութիւններով լեցուն, պիտի չկարենար այնչափ պերճախօս ըլլալ ժողովուրդներու շարժումներուն եւ առեւտրական հաղորդակցութեանց ընդարձակութեան մասին, որքան այս կարմիր կաւեղէնի շերտերը, որ հաւաքուած են իրարմէ այդքան հեռաւոր վայրերէ: Կը խորհուի թէ անոնց թուականն է մօտաւորապէս Ն. Ք. 5.000 — 4.000:

Մետաղի առաջին շրջանին դաղթականներ եկան Եւրոպայէն եւ տեղաւորուեցան Եգէական ծովու Ասիական եղերաց վրայ. յետոյ տարածուեցան դէպի ցամաքին ներսերը առանց բոլորովին անդին անցնելու դադարաւարային գիծէ մը՝ նշանակուած Սանգարիոսի եւ Պէյշէհիւր լիճին արեւելքէն, Պէյպազար, Գորդիոն, Սիղմա եւ Գոնիա տեղերով. կիրամիկան ասոր ապացոյց կը բերէ: Այս երեւակայական գիծի արեւելեան կողմը ուրիշ մշակոյթ մը կը ծաղկէր: Այս է նկարագարող կաւագործութիւնը, որ Թէլ-Հալաֆեան կը կոչուի: Ուրեմն Փոքր Ասիոյ մէջ, որ Հաթեանց եւ անոնցմէ առաջ Նախահաթեանց հայրենիքն է եղած, երկու կողմէն կերամիկայի երկու տարբեր հո-



սանքներ մտած են: Նկատուած կաւեղէնի ուշագրաւ տիպ մը կայ, որուն բաշխման կեդրոնը կրնայ Եղամի Սուսիանա երկիրն ըլլալ, բայց որ ամբողջ Փոքր Ասիոյ մէջ ալ կը գտնուի, նաեւ գէպի հարաւ մինչեւ Սուրիա եւ Պաղեստին: Փոքր Ասիոյ մէջ ան կը պատկանի պրոնգի շրջանի վերջին մասին: Անոր զարգարուեստին վրայ ազդած են թերեւս յետնագոյն Միսոպոտամիոյ շրջաններու գեղարուեստական մոտիւնները. բայց մինչեւ անգամ այսպիսի նորմուծումներ ընդունելով հանդերձ, կը մնայ մնացորդ մը մեզի, զոր նաեւ կրեւտական արուեստը չի կրնար բացատրել, եւ ուրեմն անկախ փոքրասիական զարգացում մըն է: Կը նշանակէ որ կեդրոնական Փոքր Ասիոյ յատուկ բրտեղէն այս նշանաւոր արուեստը, Պալքաններու մէջ երեւան ելած ու ծաղկած կիրամիկային հետ հանդիսութիւններ ունենալով իսկ, Հնդեւրոպայի գաղթականներու ժամանումէն ու Խատտիի պետութեան կազմակերպուելէն շատ առաջ, արդէն գոյութիւն ունէր թերակղզիին մէջ: Թերեւս Նախահաթեանք զայն կատարելագործեցին՝ դուրսէն սորվուած արուեստին վրայ իրենցմէ հնարուած նոր տարրեր աւելցնելով: Ընդհակառակն Մելիտինէի եւ յարակից մարզերուն մէջ միշտ արեւելեան միջագետային ազդեցութիւն մը տիրապետող եղած է նկարեալ բրտեղէններուն վրայ (R. A. S. Macalister, «Survey of Early Mediterranean Cultures», chapter 19, of Hammerton's «Universal History of the World», vol. II pp. 590-4. Delaporte, «Les Hittites», pp. 35-38. Արտաւազդ Արքեպոս. Սիւմէեան, ՍՈՒՐԻԱ, էջ 578):

Եգիպտոսի Դինաստիական քաղաքակրթութեան հիմնադիրները, որոնք Միջագետքի Սուրարեաններուն պէս սպիտակ լայնագլուխներ էին, կ'երեւի թէ Ն. Ք. 3.000 թուականէն քիչ մը առաջ հասած են Նեղոսի հովիտը: Այնպէս կը թուի թէ Կովկասեան լեռնաշղթայէն հարաւ հոսող բացգոյն լայնագլուխները անկէ երկճիւղեցան: Մէկ գաղթային հոսանքը Իրանի վրայով Միջագետք հասաւ եւ կազմեց Սուրարեան ժողովուրդը. միւս հոսանքը հարաւ-արեւմուտք շեղելով Պոնտոսի եզերքով եւ Իրիս ու Ալիս գետերու ընթացքն ի վար, նախ լեցուց Փոքր Ասիոյ պարապ տեղերը, եւ ապա Տաւրոսէն հարաւ յորդելով՝ Սուրիոյ վրայէն երկնցաւ հարաւ, մինչեւ որ զօրաւոր ճիւղ մը Սուրին Եգիպտոս հասաւ: Այս վերջիններուն աւանդաբար «Հերոս աստուծոյ ժողովուրդ» կ'ըսուէր: Ասոնք արդէն անագապղինձէ գէնքեր ունէին եւ յայտնի արեւապաշտներ էին: Փեթրի, Չայլտ եւ ուրիշ գիտուններ նշմարած են նախապատմական զօրաւոր ազդեցութիւններ Կովկասէն մինչեւ Եգիպտոս թափանցած. անոնք կ'ըսեն թէ «Մեռելոց Գիրք» (Book of dead) անուն վաղեմի եգիպտական կրօնական գրուածներու մէջ Կովկասեան եւ հայկական տեղանուններու որոշ արձագանդները կը լսուին: Հարկաւ ծայրը մինչեւ Եգիպտոս հասնող այսպիսի ընդարձակ գաղթային հոսանքներէն՝ ետեւը Փոքր Ասիոյ մէջ մնացած սկիտի ըլլան ժողովրդային հոծ զանդուածներ, եւ Մելիտինէի նախնագոյն բնակչութիւնը կրնայ ասոնցմէ ըլլալ:



Բայց ինչպէս վերեւ տեսանք, Փոքր Ասիոյ լոկ հիւսիս-արեւելքէն չէ որ նոր ժողովուրդ ստացաւ, հապա նաեւ հիւսիս-արեւմուտքէն՝ Պալքանեան թերակղզիին կողմէն։ Ասոր պատմական փաստերը բազմաթիւ են, որոնց մէջ ամենէն զօրաւորն է նորէն բրտեղէնի ապացոյցը։ Արդ, Փոքր Ասիոյ կիրամիկան, ըստ մասնազիտաց, դէպի նախաքրիստ. Գ. հազարամեակին վերջերը եղանակաւորուած է նմանապէս արեւմուտքէն եկած դաղթականութեամբ մը, եւ փոփոխութիւնը առանձնապէս կը յայտնարերուի կիրամիկայի բոլորովին նոր տիպի մը երեւումով։ Այս նորեկները, որ կ'երեւի թէ համեմատաբար սակաւաթիւ էին, հնդեւրոպականներ են, որ հին աղղարնակչութեան մէջը տեղ կը գտնէին, եւ Ն. Ք. 20-րդ դարուն խառնուրդի մէջ զօրութիւնն իրենց ձեռքը կ'առնեն (1)։

Բ.

## ՄԱԼԱԹԻԱ ՀԻՆ ՀԱԹԵԱՆՑ ՕՐՈՎ

Փոքր Ասիոյ արեւելեան մասին վրայով ամենահին ստոյգ տեղեկութիւնները կը քաղենք երկու աղբիւրներէ. — ա — Կեսարիոյ մօտ Կանէչ, այժմ Քիւլթեփէ, առեւտրական դաղութի թողած բեւեռագիր պնակիտներէն. բ — Ագատէի Մեծն Սարգոն թագաւորին Ք. Ա. շուրջ 2800 Փոքր Ասիոյ վրայ կատարած արշաւանքէն։ Մալաթիոյ պատմութեան համար առաջինը կարելոր է անով որ Կանէչի վաճառականաց դաղութը դէպի Եփրատ տանող առեւտրական մեծ պողոտայ մը ունէր, որուն ուղեգիծին եւ կարելոր կայաններուն արձանագրութեան մէկ մասը մեզի հասած է. — Կանէչ, Սախսում, Սարանա, Սամուխա, Տիմելիա, Լուխուղատիա, Տիգարամա (Delaporte, Les Hittites, p. 49)։ Այս ուղեգիծին համեմատ՝ Սամուխայի դիրքը մօտաւորապէս կը համապատասխանէ վաղեմի Ծամնդաւ եւ արդի Ագիգիէ աւանի դիրքին։ Իսկ Տիգարամա՝ պատմագէտներու ընդհանուր համոզմամբ՝ արդի Կիւրին քաղաքն է (հինն Gauraina)։ Բայց անշուշտ ճամբան, որ պէտք է դէպի Ասորեստան եւ Բաբելոնական շարունակէր, չէր կրնար Կիւրինով վերջացած ըլլալ, հապա Եփրատի վրայ գետանցք մը պիտի ունենար, որ չէր կրնար տարբեր ըլլալ Մալաթիոյ դիրքին մօտ իզուրէն։

Արդ, ամենահին Մալաթիոյ ներկայացնող Մալդիյայի (այժմ Արսլան թեփէ) պեղումները ցոյց տուած են որ հոն, գետակի մը ծայրը, փոքր դաշտի մը մէջ, Նորքարային շրջանին սկիզբը՝ կազմուած է մարդկային կարելոր բնակավայր մը եւ այդ աղիւսաչէն բնակութեանց աւերակները տեղւոյն վրայ

(1) Տես մեր ՆԱԽԱՀԱՅԿԱԿԱՆ ՀԱՅԱՍՏԱՆ երկին մէջ, էջ 26։



մնացած ըլլալով եւ հետզհետէ նոր շինուող ու ապա կործանուող շէնքերու հողը իրարու վրայ դիպուելով, արուեստական բլուր մը ձեւացած է այդ տեղ: Այս հիւշիւկին վրայ է որ հիմնուած է Ն. Ք. 3.000 եւ 2.500 թուականներուն մէջտեղ՝ ամենահին քաղաքը: Միւս կողմէն, Ակկադեան Սարգոնի համար կը կարգանք որ Փոքր Ասիոյ վրայ իր յաջող արշաւանքէն ետք՝ այդ ընդարձակ երկրամասին մէջ բազմաթիւ պահականոցներ շինեց՝ առեւտրական պողոտաներու վրայ հսկելու պաշտօնով: Ուրեմն, ամէն հաւանականութիւն կայ որ ամենահին Մալաթիոյ Արսլան թեփէի բերդաքաղաքը շինողն էր Ակկադեան Մեծն Սարգոն, որովհետեւ շինութեան թուականն ամենայարմար կը հանդիպի իր ժամանակին:

Ակկադի մեծ աշխարհակալ Սարգոնի թոռնորդւոյն՝ Նարամսինի բիւրեղեայ մէկ բաժակը գտնուած է Ամիդա (Տիարպեքիր): Իսկ անկէ դէպի արեւելք Փարզինի (հին Տիգրանակերտի) մօտ ապառաժի մը վրայ իր պատկերը կայ քանդակուած. նոյնպէս Փարզինի մօտերը գտնուած եւ այժմ Իսթամպուլի թանգարանին մէջ պահուող կոթողի մը վրայ ալ Նարամսինի ցածաքանդակ մէկ պատկերը կայ, եւ անոր ընկերացող սեպագիր արձանագրութեանէն կ'իմացուի թէ Ակկադի այս թագաւորը հոն պալատ մը կառուցանել տուած է հաւանօրէն իբր ամառանոց:

Դէպի Փոքր Ասիոյ կեդրոնը Նարամսինի արշաւանաց մէկ պատմութիւնն ալ գտնուած է Պողադ-Քէօյի հաթերէն պնակիտներէն: Հոն կը յիշուի թէ Բարելացի թագաւորին դէմ արեւմտեան Ասիոյ ազգերէն տասնեօթը արքաներու ղինակցութիւն մը կազմուած էր. որով Նարամսինի համար երեք արշաւանք ընել պէտք եղած է, մինչեւ որ ղինակցութիւնը խորտակուեցաւ եւ դաշնակիցները ստիպուեցան հաշտութիւն կնքել Ակկադի յաղթական թագաւորին հետ եւ անոր հարկեր զրկել:

Փոքր Ասիոյ վրայ Նարամսինի այդ արշաւանքները սա տեսակէտէն նըշանակալից են մեր պատմութեան համար. Նարամսինի նախորդը Սարգոն իր դէպի Անատոլիոյ արշաւանքները կատարած էր սկզբնապէս Ամանոսի կիրճերուն եւ Կիլիկիոյ ճամբով. Նարամսին ալ իր առաջին երկու արշաւանքները միեւնոյն ճամբով կատարեց, բայց երբ տեսաւ թէ այս ուղիով իրեն կարելի պիտի չըլլայ վճռական յաղթանակ մը շահիլ, նոր ճամբայ մը ընտրեց հիւսիսային դաւառներու վրայէն, այսինքն, ինչպէս իր արձանագրութեան մէջ կը կարգանք, Սուրարտուէն (Միջագետք) արշաւեց մինչեւ Ամիդա, եւ անկէ Խարբերդ-Մալաթիա ճամբով անցաւ Եփրատը եւ քալեց ուղղակի Փոքր Ասիոյ սրտին վրայ:

Հաւանօրէն նա իր այս քաջագործութեան կ'ակնարկէ Քաղդէացւոց Ուր քաղաքը գտնուած մէկ արձանագրութեան հետեւեալ տողերովը. «... այս արշաւանքը՝ որուն թագաւորներու մէջ ոչ մէկ թագաւոր ձեռնարկած էր, Նարամսին, Ագատէի արքան, կատարեց: Եւ Ինինի (Իշտար) դիցուհին անոր



մրցորդ մը չտուաւ: Սուրարտուի տանուտէրերը (patesi) եւ Բարձրաւանդակի (կամ Էւնաշխարհի) իշխանները իրենց հարկերը բերին անոր առջեւ»: Հոս Էւնաշխարհի կամ բարձրաւանդակի բառով անշուշտ Հայաստանը կը հասկնայուի, եւ Տիգրանակերտի շրջանակին մէջ Նարամասինի գոնէ երեք յիշատակարան թողած ըլլալէն եւ պալատ մը չինել տալէն յայտնի է թէ նա ո՛րքան կարեւորութիւն կու տար Խարբերդ-Մալաթիա գծով Փոքր Ասիա տանող այս ճանապարհին, որուն Միջագետսային բանալին էր Տիգրիսի վրայ Ամիգա քաղաքը, իսկ Անատոլեան բանալին՝ Եփրատի վրայ Մալգիյա բերդը:

Նարամասինի գէմ պատերազմող 17 զինակից թագաւորներու ցանկին մէջ (զոր տես Prof. Nicol Adontz, Histoire d'Arménie, p. 209) հինգերորդն է Խատտիններու արքայ Պամբա, վեցերորդը՝ Կանէշի արքայ Զիպանի: Անկարելի է որ ցանկին մէջ յիշուած արքաներէն մէկն ալ Մալաթիոյ կողմինն ըլլայ: Հոս յիշուող «ԽԱՏՏԻ» արքայ Պամբա, ըստ պատմագիտաց Նախախաթերու թագաւորն է: Անոր ժամանակէն ետք եկան բուն հնդեւրոպական Խետացիք կամ Հաթեանք, որ հետզհետէ զօրանալով Փոքր Ասիոյ ամբողջ կեդրոնական ու հարաւային մասերը գրաւեցին, եւ ապա իրենց Մուրսիլիս Ա. թագաւորը Ն. Ք. 1780-ի ատենները հիւսիսային Սուրիոյ վրայ յարձակելով Հալէպը նուաճեց, վերջն ալ մինչեւ Բաբելոն մեծ արշաւանք մը ըրաւ: Բայց այս հին շրջանին՝ Խետացւոց Մալաթիոյ կողմերուն հետ ունէ չփման մէջ գտնուիլը յիշուած չէ:

Այդ ժամանակ Քերքուքի եւ Մուսուլի կողմերէն մինչեւ Միջերկրական ծով բոլոր հիւսիսային Միջագետքն ու Սուրիան բռնած էր Հուրրի անուանեալ մեծ ժողովուրդը, որուն հետ նախ սաստիկ բնդհարումներ ունեցաւ Հաթեանց վերոյիշեալ Մուրսիլիս Ա. մեծ արքան, եւ յետոյ զինակցեցաւ Բաբելոնի վրայ իր կատարած արշաւանքին համար: Հալէպ ալ այն ատեն Հուրրիներու ձեռքն էր: Հուրրիներու պետութիւնը Խանա կամ Խանիգալքատ կը կոչուէր, որ կը տարածուէր նաեւ վերին Տիգրիսի աւազանէն բաղկացեալ հարաւային կամ ստորին Հայաստանի վրայ: Քիչ վերջը կը տեսնենք որ Հուրրիները մինչեւ իսկ արեւելեան Կասպիցովիկիան գրաւած եւ դէպի Պոնտոս երկընցած են, Հաթեանց դէպի Սուրիա եւ Միջագետք ճամբան փակելով: Այս կը նշանակէ որ ոչ միայն Կամմադինէի, այլ նաեւ Մելիտինէի եւ Տիգարամայի (Կիւրինի) շրջանակները Հուրրիներուն ձեռքն անցեր էին: Այսպէս տեւեց իրաց վիճակը մի քանի դար մինչեւ որ Ն. Ք. 1460-ի ատենները Հաթեանց կամ Խեզացւոց պետութիւնը վերադարձում մը ունեցաւ: Այս վերջին ժամանակը Մելիտինէի արեւմտեան կողմէն սկսեալ մինչեւ Ապառաթուտ Կիլիկիա տարածուող կարեւոր թագաւորութիւն մը ձեւացած էր արդէն, որ Կիզզուաունա կամ Կատաւաւաւա կը կոչուէր, եւ որուն բնակչութիւնը Հաթեանց եւ Հուրրիներու խառնուրդ մըն էր: Պատմագէտները կը կարծեն թէ Կատաւաւա կամ Կիզզուաւա անունէն ածանցած պիտի ըլլան այդ երկրամասի դասական Կատաւունիա եւ արդի Գոզան անունները: Ն. Ք. 1500 թուականէն յետոյ՝



Միտաննեցիք անուն հնդեւրոպական ժողովուրդ մը Հուրրիները յաղթահարելով եւ ապա անոնց հետ միանալով՝ Խանիդալբատի պետութեան նոր ձեւ մը տուին։ Ուստի այդ պետութեան յաճախ «Հուրրի-Միտանի պետութիւն» անունն ալ կը տրուի։

Արդարեւ Խետացիք մինչեւ անգամ Փոքր Ասիոյ մէջ քիչ մը ատեն դարձեալ ետ մղուեցան Հուրրի-Միտանի պետութեան ծաւալումին Լրեսէն։ Հաթեան պետութեան գլխաւոր հակառակորդը դարձող այս նոր տէրութիւնը իր զօրութեան գաղաթնակէտին վրայ կը դռնուէր Ք. Ա. ժ. Ե. դարու դէպի վերջերը, երբ Խանիդալբատի երկիրները Արտաւամա Ա. թագաւորին մականին տակ միացած էին։ Միտանիի թագաւորը իր իշխանութիւնը Եփրատէն արեւմուտք ալ տարածելով, նուաճեց հիւսիսային Սուրիան, Կոմմադինէն եւ ապա Տեգարամայի երկիրը — որ կը բովանդակէր Մելիտինէն ալ — եւ իրեն հարկատու դաշնակից ըրաւ Կիդզուատնայի թագաւորը։

Այս ժամանակ Խետացւոց մեծ թագաւորն էր Արնուանդաս Ա. ի որդին Խատտուսիլ Բ. (իրը 1425—1410 Ն. Ք.)։ Իրենց հարաւ-արեւելեան սահմանին վրայ Միտաննեցւոց պէս զօրաւոր ու ռազմասէր տէրութեան մը հաստատուին անշուշտ բնաւ չէր կրնար հաճելի ըլլալ Խետացւոց, ոչ ալ Եգիպտոսի հետ անոր բարեկամ-զինակից ըլլալը։ Բայց արդէն արեւմտեան Հայաստանի մէջ ալ կաղմուած էր Խալասա կամ Հայասա անուն կարեւոր պետութիւն մը, որ Փոքր Հայքէն դոնէ մինչեւ Վանայ ծովը կը տարածուէր։ Այնուհետեւ սոսկալի պայքար մը սկսաւ երեք մեծ պետութեանց միջեւ, որոնց ընդհարումներուն գլխաւոր ասպարէզն էր Տիգարամա-Մելիտինէի դաւառները, ինչպէս նաեւ անոնց դիմացը՝ Եփրատի արեւելեան կողմը տարածուող Լշուվա կամ Իսուա երկիրը (Խարբերդ-Արզնի շրջանակը)։

Խատտուսիլ Բ. ի որդւոյն ու յաջորդին՝ Դուտիսալիյաս Գ. ի օրով (1410—1393 Ն. Ք.), երբ ատեն մը ներքին երկպառակութիւն կը տիրէր Հուրրի-Միտանի պետութեան մէջ, Հաթեանք նուաճեցին մինչեւ Եփրատի աջ եզերքը տարածուող բոլոր փոքր-ասիական դաւառները եւ ընդհարման եկան Հայասայի պետութեան հետ, որուն զինակից էին Պոնտոսի երկրին Քասաբաներ անուն հզօր բարբարոս ցեղերը։

Դուտիսալիյաս Գ. իր համանուն մէկ որդին իրեն գահակից ըրաւ (Ն. Ք. 1405-ի ատենները)։ Բայց Սուրբիլուլիումա անուն ուրիշ մէկ որդին, ինքն ուղեւորվ հօրը գահակիցն ըլլալ, դաւադրութիւն մը սարքեց իր եղբօրը դէմ, զայն սպաննել տուաւ եւ հասաւ իր փափաքին։

Սակայն ամբողջ կայսրութիւնը տակնուվրայ եղաւ ներքին յեղափոխութեամբ, եւ բոլոր կողմերը ապստամբութիւններ ծագեցան։ Փոքր Ասիոյ հիւսիս-արեւելեան մասերն ալ ապստամբեցան։ Այս երկրամասին մէջ Խատտի պետութենէն ապստամբած տեղերու ցանկը, մէկ հնագրի մէջ երկու անգամ կրկնուած, հետեւեալն է. — «Իշուվայի երկիրը թշնամացաւ։ Խատտիի հպատակ մարդիկ ալ Իշուվայի կողմը բռնեցին. այսինքն՝ Դուտալիսայի մար-



դիկը, Արաւաննայի մարդիկը, Զաղչայի (կամ Զաղիչայի) գաւառը, Կալամաշմայի (Երկրորդ ցանկին մէջ անճշգորէն Տիգարամայի) մարդիկը, Տիմինայի գաւառը, Հալիւայի լեռնագաւառը, Կարնայի լեռնագաւառը, Տուրմիտայի մարդիկը, Ալիսայի գաւառը, Խուրմայի գաւառը, Խարանայի լեռնագաւառը, Տիգարամայի երկրին կէսը, Տիպուրղիայի մարդիկը, Խասքայի մարդիկը, Արմատանայի մարդիկը» (Delaporte, «Les H es», p. 78. N. Adontz, «Histoire d'Arménie, p. 41-2):

Հոս «մարդիկ» ըսելով թերեւս դեռ կատարելապէս հաստատարեալ վիճակ չառած ցեղեր պիտի հասկնանք, եւ ուրիշ արձանագրութիւններէ կ'իմանանք որ այս ցեղերը Գասպացի ծագում ունէին, բայց Խետացւոց պետութեան յարած էին եւ անոնց կը ծառայէին իրենց զինուորներով իբրեւ վարձկան: Իսկ հոս իբրեւ «երկիր» կամ «գաւառ» յիշուածներն ալ կ'երեւի թէ նախապէս ոչ թէ Հաթեան, այլ Հուրրիական էին: Այս ցեղերու եւ գաւառներու տեղերը մանրամասնօրէն ճշդել մեր նպատակէն դուրս է, այլ միայն կը բաւականանք ըսելով թէ անոնք կը գտնուէին Իսիս (Գայլ դետ) եւ Ալիս գետերու վերին աւազաններէն սկսեալ մինչեւ Մալաթիա եւ Ալպիսթան՝ Եփրատի արեւմտեան կողմը տարածուող լեռնադաշտերու վրայ: Բայց ցանկիս մէջ ամենակարեւոր անունը Տիգարաման է, որ կը նշանակէ միանգամայն թէ՛ ընդարձակ նահանգ մը, որ անշուշտ Մելիտինէն ալ կը բովանդակէր, եւ թէ անոր կեդրոնական քաղաքը, զոր պատմագէտք իրաւամբ կը նոյնացնեն դասական Gauraina եւ արդի Կիւրին քաղաքին հետ: Թէ Մելիտինէն ալ կը բովանդակուէր Տիգարամա նահանգին մէջ, կը հետեւի անկէ որ Տիգարամա աշխարհն անմիջական դրացին էր Իշուվայի, որ կը նոյնացուի Խարբերդի կողմերուն հետ, որովհետեւ Խաթեան արձանագրութիւն մը կ'ըսէ. «Բայց եկաւ Իշուվացի թշնամին աւերեց Տեգարամա քաղաքի աշխարհը»: Թէեւ այս ժամանակի արձանագրութեանց մէջ Մելիդ քաղաքի անունը չի յիշուիր, բայց ասկէ չի հետեւիր թէ Մելիդ այդ ատենը զոյսութիւն չունէր, այլ միայն թէ տակաւին նահանգի կեդրոն եղած չէր:

Տեղը չէ հոս Հաթեան կայսրութեան եւ Հայաստայի պետութեան միջեւ մղուած դարաւոր պատերազմներու մանրամասնութեանց մէջ մտնելու, զորս արդէն ընդարձակօրէն պատմած ենք մեր «ՆԱԽԱՀԱՅԿԱԿԱՆ ՀԱՅԱՍՏԱՆ» գիրքին մէջ (է. եւ Բ. գլուխներ): Միայն կը բաւէ յիշել թէ Սուրբիլուլիումա, որ ներքին բոլոր ապստամբութիւնները մարելէ ետքը՝ սոսկալի արշաւանքով մը խոնարհեցուց Հուրրի-Միտանի պետութիւնը, եւ անոր որդին՝ Մուրսիլիս Բ. Հաթեան մեծ արքան, որ վերջնական մահացու հարուածը տուաւ Հայաստայի կամ Աղղիի պետութեան, երկուքն ալ երբ պատերազմի համար Եփրատէ արեւելք կ'արշաւեն՝ Իշուվա երկիրն իբրեւ ճանապարհ՝ դործածելով, ամէն անգամին ալ Մալաթիոյ մօտ անցած պիտի ըլլան դետը:

Հաթեան մեծ կայսրութեան վերջին դարուն Մալաթիոյ եւ Կիւրինի շրջանակները հետզհետէ աւելի կարեւորութիւն կը ստանան քաղաքական տե-



սակէտով: Հաթեանք նորանոր քաղաքներ կը հիմնեն այս կողմերը եւ անոնց մէջ խեղատի գաղթականներ կը հաստատեն: Երբ Մուրսիլիս Բ-ին յաջորդեց իր որդին Մուվատտալիս (Ք. Ա. 1320—1290), ասիկա իր Խատտուլիս եղբայրը սպայակոյտին պէտ եւ զլխաւոր մատուակապետ կը կարգէ: Այս միջոցին Հաթեան գժգոհ արքայազունի մը սաղբանօք՝ Գասգաները յանկարծ մեծ ապրտամբութիւն մը կը հանեն եւ պետութեան արեւելեան մեծ մասը կ'առաւանակեն մինչեւ Կանէշ քաղաքը: Խատտուլիլ Եօթնամեայ պատերազմով մը վերջապէս կը կոտորէ Գասգաներու ոյժը եւ դանոնք Հաթեան տէրութեան կը հնազանդեցնէ: Ինքը կը ստանայ «Հակմիսայի (կամ Հակըիսայի) փոխարքայ» տիտղոսը եւ իր վարչութեան չրջանակը կը բովանդակէ ամբողջ Պոնտոսի երկրէն դատ, Փոքր Հայքի եւ արեւելեան Կապադովկիոյ ընդարձակ դաւառները, որոնք այն ատեն «Վերին Աշխարհ» կամ «Վերին Ասուա» անուանով ծանօթ էին:

Յետոյ պիտի տեսնենք որ աւելի վերջերը Մելիտինէ ալ աւելցուած է Խատտուլիլի փոխարքայութեան վրայ:

Գ.

## ԱՆՑՈՒՄՆ ՀԱԹԵԱՆ ՇՐՋԱՆԷՆ ԴԷՊԻ ԱՍՈՐԵՍՏԱՆԵԱՆԸ

«ՄԵԼԻՏԻԱ, Հանիի մայրաքաղաքը» (Melitia capital of Hani) դրաւուած է՝ կ'ըսուի, Ասուրուբալլիդէն, հարկաւ Ն. Ք. 1337-էն առաջ, որովհետեւ Ասորեստանի յիշեալ թագաւորը այդ տարին մեռած է. ուրեմն՝ Մուրսիլիս Բ-ի օրով եւ ասոր ձեռքով Հայաստանի նուաճումէն անմիջապէս յետոյ (Hastings, «One Volume Bible Dictionary», p. 64. հմմտ. ՆԱԽԱՀԱՅԿԱԿԱՆ ՀԱՅԱՍՏ., էջ 130): Ասուրուբալլիդ Մելիտիան նուաճեր է Միտաննիոյ կամ Խանիդայրատի կողմէն, զոր նախապէս իր հպատակութեան տակ բերած էր, եւ Ալդիլի Աղձնեաց դաւառներուն տիրելէ յետոյ՝ Վերին Եփրատն անցնելով: Ասոր մինչեւ Մուզրի երկիրը Կատաւոնիա՞ ալ յառաջացած է նա: Չենք գիտեր թէ ո՞ւր էր այդ միջոցին Հաթեան մեծ արքան Մուրսիլիս: Այս է պատմութեան մէջ Մելիտիա անուան առաջին ծանօթ յիշատակութիւնը:

Ասորեստանեայց Մելիտիա դրած անունը Հաթեանք Մալդիյա կը դը-



րեն<sup>1</sup>: Մուրսիլիս Բ. Ասուրբալիդի մահուան յաջորդ տարին կը յառաջանայ մինչեւ Մալաս դեառ, այսինքն՝ արեւմտեան Տիգրիսի աղբերանձաւը, Զուրերու տօնը կատարելու համար (ՆԱԽ. ՀԱՅ., էջ 130): Նա իր երթին ու վերադարձին ատեն անպատճառ Մելիտիոյ կամ Մալդիոյ այցելած է. հետեւաբար այս տեղս Հաթեանք վերստին ձեռք բերած ըլլալու են: Սակայն Մուրսիլիս Բ.ի մահէն յետոյ շուրջ 1320 Ն. Ք., Մալդիոյ Հայաստանոց կողմը բռնելով ապստամբած է. բայց Մուլատտալիս մեծ արքան զայն վերստին կը նուաճէ եւ ապա ներման կ'արժանացնէ: (Կոդեան, ՄԵԼԻԴ, էջ 20): Կնքուած հաշտութեան դաշնագրին մէջ Մալդիոյ՝ Հայաստանի, Իզմիրիկիայի, Սուխմիի եւ այլոց նման իբր «Ծերեր»ով, այսինքն՝ նահապետներով, ցեղապետներով կառավարուող կը ներկայացուի (Delaporte, «Les Hittites», p. 188): Այնուհետեւ Մալդիոյ իբր յաւելուածական մաս (appendage) կը կցուի Մուլատտալիսի եղբօր՝ Խատտուլիսի փոխարքայութեան (Կոդեան, յիշ. տեղ, էջ 20):

Աւելի ետքը Մալդիոյ կամ Մելիտիա ստորակարգ քաղաքութեան մը վերածուած է (ՆԱԽ. ՀԱՅ., էջ 134): Կ'երեւի թէ Ն. Ք. 1285-ին երբ Խատտուլի Գ. դահակալեց որպէս Հաթեանց Մեծ Արքայ, այն ատեն Հակմիսայի փոխարքայութիւնը ջնջեց եւ անոր նահանգները բուն Խատտի պետութեան կցեց, բայց թերեւս իր մէկ որդին կամ աղգականը Մալդիոյ հարկատու թաղաւոր դրաւ: Այնուհետեւ Խատտուլի Գ. մի քանի անգամ Միտաննին Ասորեստանի ճիրաններէն ազատելու համար, Մելիտիան իբր խարխիս գործածելով արշաւանքներ ըրաւ Միջագետքի վրայ:

Փոխադարձաբար, Ասորեստանի Սալմանասար Ա. թաղաւորն ալ շուրջ 1260-ին Ն. Ք., Միջագետքի տիրելէ եւ Ամիդան (Տիարպեքիր) գրաւելէ ետք, յաղթելով նաեւ Աղձնիքի մէջ Շուպրիայի թաղաւորին, զայն դերի ղըրկեց Ասուր եւ երկիրը նուաճեց: Ապա Եփրատն անցնելով՝ դրաւեց Մելիդը (Մալաթիա)՝ Խանիդալրատի երկրին մէջ: Վերջապէս խաղաց դէպի Տաւրոս լեռանց խորածորերը, ուր կռուեցաւ Մուզրի անուանեալ ժողովուրդին հետ, որ Խետացոց կայսրութեան հպատակ զօրաւոր ցեղերէն մէկն էր: Բայց կ'երեւի թէ ալեւորած Խատտուլի Գ. արտակարգ ճիգերով հուսկ յետոյ կարողացաւ արդիւել Ասորեստանեայց այս խուժումը դէպի Փոքր Ասիա եւ Մելիդը փրկել (Hastings, «One Volume Bible Dict.», p. 64 հմտ. ՆԱԽ. ՀԱՅԱՍՏ., էջ 142):

Ապա Ն. Ք. 1252-ի ատենները՝ Խատտուլի Գ., որ ա'լ չափազանց ծերացեր էր, Միտաննին փրկելու համար նորէն արշաւեց Միջագետքի վրայ: Բայց ինքը եւ իր Արամէացի զինակիցները չարաչար սպարտութիւն կրեցին Սալմանասարէն Կաշեարի լեռնադաւառի անջրդի կիրճերուն մէջ եւ Միտան-

(1) Սիւրմէեան, ՍՈՒՐԻԱ, էջ 537, 539, 577, Մալաթիա դրուած անունը պէտք է Մալդիոյ հնչեւ, որովհետեւ դերմանական դրութեամբ Maldija Մալդիոյ կը հնչուի:



նի վերջնականապես կործանեցաւ Ասորեստանի հարուածներուն տակ: Այն ատեն Հաթեանց Մեծ Արքան ստիպուեցաւ իբրեւ վերջին փորձ մը Եփրատէն արեւելք մաս մը հող իր ձեռքին մէջ պահել եւ նոր կարգադրութիւն մը ընել Արեւմտեան Տիգրիսի նահանգներուն համար. Իշուվա երկրի Խարբերդի շրջանակին Ուգաշտա անուն արեւմտեան նահանգը կցեց Մելիտինէի թագաւորութեան, իսկ արեւելեան կէսը վերականգնուած Շուպրիոյ թագաւորութեան պիտի պատկանէր: Ասոր վրայ Միտանիի կամ Հուրրիի վերապրող ազնուականներէն մեծ մասը Մելիտինէի թագաւորութեան սահմաններուն մէջ քաշուեցաւ, որով Խանիգալբադ անունն ալ, որ սկզբնապէս Հուրրի-Միտանի պետութեան կը պատկանէր, այսուհետեւ Մելիտինէի թագաւորութեան փոխանցուեցաւ (ՆԱԽ. ՀԱՅԱՍՏ., էջ 134): Խատտուսիլ Գ. մեռած է շուրջ 1250-ին Ն. Ք., իսկ Սալմանասար Ա. մեռաւ 1243-ին:

Եդ. Մայէր («Gesch. Des Altertumes», II 1. 477) կը գրէ. «Սալմանասար Ա.ի արշաւանքով Միտանիի պետութիւնը վերջացաւ Միջագետքի մէջ: Խանիգալբատ անունը հետագայ ժամանակներուն սահմանափակուեցաւ Եփրատէ արեւմուտք Մելիտինէի երկրամասին, ուր հին Միտանիի հարըստութեան ժառանգները հաստատմնացին» (Հմմտ. Խաչատրեան, ՀԱՅԱՍՏ. ՍԵՊԱԳՐ. ՇՐՋ. ՊԱՏՄ., էջ 10): — Ինչո՞ւ Հուրրի-Միտանիներու մնացորդը Մելիտինէ քաշուեցաւ, որովհետեւ հաւանորէն Մելիտինէ ի սկզբանէ իսկ Հուրրեան կալուածք էր: Ուրեմն Մալդիյա անունն ալ թերեւս արեւելքէն արեւմուտք փոխադրուած է, ինչու որ ներկայիս դեռ Մալթայիա անուն տեղ մը կայ Նինուէէն դէպի հիւսիս, որ կրնար Հուրրեաններու ամենանախնական բնակած մէկ տեղն ըլլալ: Եւ դիտելի է որ անմիջապէս Սալմանասար Ա.ի օրէն Ն. Ք. 1250 թուականէն սկսած է Մալդիյայի մէջ «Նոր-Հատեան» (Neo Hiitites) ըսուած մշակոյթը, որ **թերեւս** խառնուրդ մըն է բուն հաթեան-խետական եւ հուրրի-միտանեան մշակոյթներուն:

Թէ Հուրրիները իսկապէս լաւ արհեստագործներ էին, սա օրինակով կ'ապացուցուի. Ագաքտահա անուն խաղախորդ մը Խանիգալբատէն փախուստ կու տայ եւ կ'ապաստանի Բաբելոնի Կասեան հարստութենէն Կաշտիլիաշ Գ. թագաւորին քով եւ անոր համար կը կերտէ կաշիէ հրաշալի զրահ մը: Բաբելոնի թագաւորը Ագաբտահայի ճարտարութիւնը գնահատելով, իր երկրին արեւելեան սահմանադրութիւն վրայ իշխանական կալուածք մը կը շնորհէ անոր: Բայց կալուածքը Եղամական հող համարելով, այս վերջին երկրի թագաւորը Ունտաշ-Հուբան Ն. Ք. 1249-ին պատերազմ կը բանայ Բաբելոնի թագաւորին դէմ (Georges G. Cameron, «Histoire de l'Iran Antique», Paris, 1937, p. 123):

Կերեւի թէ Մալաթիոյ թագաւորութիւնն իր կորովի դահակալին ներքեւ, որ հաւանորէն Սուլուսիլի անունը կը կրէր, կրցած է յաջողապէս ճակատ ցուցնել Ն. Ք. 1243—1221-ին իշխող Թադլաթնինիալ Ա.ի պէս հզօր աշ-



խարհակալի մը դէմ, եւ Իշուվա երկիրը Խարրերգի շրջանակն իր ձեռքը պահել: Իսկ այնուհետեւ Թաղլաթնինիայի որդւոյն ու յաջորդին օրով Բարեւոն ապստամբեցաւ Ասորեստանի դէմ, եւ ծաղող պատերազմը այնքան տկարութիւն պատճառեց երկու կողմերուն ալ, որ յաջորդող 16 տարիներու միջոցին Ասորեստան ոչ միայն ներքին յեղափոխութիւններով պառակտեցաւ, այլ եւ այդ կարճ շրջանին եօթն անգամ դահակալի փոփոխութիւն տեղի ունեցաւ: Վերջապէս Նինիալ-Փալասար 1205—1193 յաջողեցաւ Ասորի պետութիւնը վերստին կազմակերպել եւ անոր բանակներուն ոյժը մասամբ վերականգնել: (Հմմտ. ՆԱԽ. ՀԱՅԱՍՏ., էջ 147):

Մալգիյայի մէջ պեղուած ամենահին պալատը կը վերաբերի Ն. Ք. 1250—1200 տեւող յիսնամեակին, եւ պեղիչները անոր արձանադրութեանց մէջ կը կարդան «Սուլումիլի» Թաղաւորին անունը: Առ այժմ ճշգիւ չենք գիտեր այս Թաղաւորի իշխանութեան սկսելուն եւ վերջանալուն թուականները, բայց յայտնի է թէ հզօր եւ յաջող Թաղաւոր մըն էր: Ասիկա անշուշտ մեծ բարերախտութիւն մըն էր Խատտուսաս մայրաքաղաքով շիջելափառ հաթեան կայսրութեան համար, եւ նոյնպէս նպաստաւոր եղաւ հաթեան քաղաքակրթութեան տեւականացման տեսակէտէն:

Հաթեան մեծ արքայ Առնուանդաս Գ.ի օրով 1235—1215 Ն. Ք. ստակալի ու երկարատեւ սով մը տիրեց Փոքր Ասիոյ կեդրոնական եւ արեւմտեան մասերուն մէջ, որուն կ'ընկերանար սարսափելի համաճարակ մըն ալ: Բայց կ'երեւի թէ սովը եւ համաճարակը չտիրեցին, կամ շատ թեթեւ էին հիւսիսային Սիւրիոյ, Կոմմադինէի, Կիլիկիոյ եւ Մելիտինէի երկիրներուն մէջ: Այդ ժամանակ հաթեան ժողովուրդը հարուածեալ շրջանակներէն հարիւր հազարներով արտադալթեց եւ հաստատուեցաւ սովէն ու համաճարակէն քաղդաստարսը գերծ վերոյիջեալ երկիրներուն մէջ: Հարկաւ Մելիտինէ այս առթիւ ստացած է ահադին քանակութեամբ խեղացի ժողովուրդ, որոնք իրենց հետ կը բերէին նաեւ հաթեան քաղաքակրթութեան գանազան եւ լուսագոյն տարրերը դէպի այդ խաղաղ ու բարդաւաճ երկիրը:

Խեղացւոց մեղի ծանօթ վերջին մեծ արքան է Դուախալիյաս Ե. (1215—1200 Ն. Ք.), որմէ մնացած վաւերացրով մը յանկարծ վերջ կը դրանեն Պողադէօյի հաթեան բեւեռադիր դիւանները: Ասոր մեկնութիւնը շատ պարզ է: Պեղասպանի ցեղեր կամ Եդիպտացւոց բառով «Ծովու ազգեր», որոնց շատերը նախապէս հաթեան հզօր Թաղաւորներու դրօշին ներքեւ որպէս վարձկան զինուորներ կամ հարկատու դաշնակիցներ պատերազմեր եւ այսպէս Փոքր Ասիոյ եւ Սուրիոյ բոլոր ճամբաները սորվեր էին, հիմա արեւմրտեան ծովեզերքէն Աքայեանց ճնշումին ներքեւ զինակցութիւն մը կազմեցին եւ հարաւային Փոքր Ասիոյ մէջէն ահադին արշաւանքի մը ձեռնարկեցին: Մինչ հիւսիս-արեւմուտքէն ալ Փոխիւգիացիք եւ ուրիշ թրակեան ցեղեր Վասփորն ու Տարտանէլը անցած, կը քալէին ուղղակի հաթեան տէրութեան կեդրոնին վրայ: Սանկարիոս գետի ափանց վրայ Խեղացիք սաստիկ դիմադրու-



թիւն մը փորձեցին վերջիններուն . բայց իրենց զօրութիւնը խորտակուեցաւ բարբարոսաց թուական առաւելութեան առջեւ : Արշաւոդք յառաջ խաղացին արադօրէն , անցան նաեւ Ալիս գետը : Հաթեան մայրաքաղաքը՝ Խատտուսաս առնուեցաւ , անոր զօրաւոր պարիսպները քանդուեցան , պալատներն ու մեհանները հրոյ ճարակ եղան եւ Խատտիներու մեծ կայսրութիւնը կործանեցաւ ի սպառ :

Իսկ հարաւային Փոքր Ասիոյ մէջէն արշաւոդ բարբարոսները կ'երեւի թէ նախ կործանեցին Արդաւայի թաղաւորութիւնը , եւ ապա Խետաղոց մէկ մասն ալ հետերնին քշելով , Կիլիկիոյ ու Սուրիոյ մէջէն անդիմադրելի թափով մը յառաջացան մինչեւ Պաղեստին , իրենց ընտանիքներն ալ սայլակներով միասին առած . մասամբ ալ նաւերով յարձակեցան Եգիպտոսի ծովեզերքին վրայ : Սակայն Ռամսէս Գ . փարաւոնը իր իշխանութեան Տ-րդ տարին Ն . Ք . 1192 , առաջ ծովու եւ յետոյ ցամաքի վրայ կրկնակ յաղթութիւններով փրկեց Եգիպտոսը :

Ռամսէս Գ . իր յաղթանակի արձանագրութեան մէջ ամփոփի կերպով կը նկարագրէ այս արհաւիրքը . «Կղզիներն անհանդիստ էին , իրենց մէջ վըր-դովուած՝ բոլորը միեւնոյն ժամանակ : Ո՛չ մէկ երկիր կրցաւ կենալ անոնց առջեւ , Խետայէն (Փոքր Ասիա) սկսած , Կոդի (Կիլիկիա) , Կարքեմիշ , Ա-րուադ , Ալաշիա (Կիպրոս) : Իրենք կործանեցին զանոնք եւ հաւաքուեցան ի-րենց բանակատեղիին մէջ՝ Ամմովրացոց երկրին մէջտեղը : Անոնք բնաջինջ ըրին անոր ժողովուրդն ու երկիրը իբր թէ եղած չըլլային : Անոնք իրենց առ-ջեւը պատրաստուած կրակով եկան , յառաջ դէպի Եգիպտոս : Անոնց գլխաւոր ոյժը կը բաղկանար Պուլասաստի (Փղշտացիք) , ձակարայ (Տիւկրեանք) , Շակալաշա (Սաղալացիք կամ Սիկիլեանք) , Դանաունա (Դանայեան Յոյներ) , Ուաշաշա (Կրետացիք կամ Կարեացիք) ըսուած ցեղերէն : Այս ժողովուրդները միացած էին . անոնք իրենց ձեռքերը դրին երկրի վրայ մինչեւ աշխարհի շըր-ջանակը : Անոնց սիրտերը վստահ էին եւ իրենք ծրագիրներով լեցուն» : Մեծ պատմագէտ H. R. Hall կը խորհի թէ «Աշխարհի Շրջանակը» ըսելով՝ դրողը կը հասկնար Սուրիոյ հիւսիսային սահմանը , որ Տաւրոսի աղեղով կը կազմուի , երկնցած մինչեւ Տիգրիսի եւ Եփրատի վերին ընթացքները :

Այսպէս , երբ Ն . Ք . 1200-ի ատենները Հատտուսաս մայրաքաղաքով հաթեան մեծ կայսրութիւնը փչրուեցաւ , հիւսիս-արեւմուտքէն արշաւոդ թը-րակա-փոխուեան ցեղերու թափին տակ , տարակոյս չկայ թէ Մալաթիոյ թա-ղաւորութիւնը վերապրեցաւ այս աղէտէն : Այդ առթիւ , բուն Խատտիներէն եւ անոնց արենակից ցեղերէն նոր բազմութիւն մըն ալ , իրենց տեղերէն խախ-տած , դիմեցին դէպի արեւելք , Մելիտինէ եւ անոր յարակից Կատաւոնիա եւ Կոմմադինէ երկիրները , որով այս տեղերը խետական տարրը ալ աւելի խտա-ցաւ (ՆԱԽ . ՀԱՅԱՍՏԱՆ , էջ 141) : Եգիպտոսի Ռամսէս Գ . փարաւոնի վերեւ մեր մէջբերած տեղեկագրէն կը տեսնենք որ հարաւային Անատոլուի մէջէն արշաւոդ բարբարոսաց արշաւանքին հեղեղն ալ չէ դպած Մելիտինէի շըր-



ջանակին :

Հաթեան մեծ կայսրութեան ջարդ ու փշուր կտորուանքները վերապրեցան աստ եւ անդ, մասնաւորապէս Տաւրոսի եւ Անդիտաւրոսի ու Ամանոսի շղթաներուն ճառագայթած կեդրոնական հանգոյցին բոլորովն: Ապա, Պեղասգեան արշաւանաց հեղեղին թափն անցնելէ ետք, դարձեալ ժամանակի մը համար միացան հարաւային խետական կայսրութեան ձեւով, որ մէկ դարէ աւելի տեւեց (մինչեւ դրեթէ 1080 Ն. Ք.): Ոմանք-շուն դիտ հըլ դզ մղձմոկ նակցային կայսրութեան բիւրեղացուցիչ տարրը կասկանք էին, եւ ուրիշներ՝ թէ Մուշկիներ էին: Երկուքն ալ ենթադրութիւններ են լոկ. միայն դիտենք թէ հին հաթեան մշակոյթը իր հիմնական գիծերով կը շարունակէր նորակազմ պետականութեան մէջ, եւ եթէ կասկա, Մուշկի, Տուրալ, Հուրրի եւ այլ տարրեր եկան այս խտացած խետական զանդուածին մէջ բնակելու կամ իշխելու, իրենք այդ մշակոյթին ենթարկուեցան եւ հաստեանացան:

Այս հարաւային խետական կայսրութիւնն է թերեւս այն «կիլիկեան կայսրութիւնը», որ Սոլինոսի (Polyhistor) «Աշխարհագրութեան» համեմատ՝ կը պարփակէր մէկ կողմէն Լիւդիան ու Պամփիլիան եւ միւս կողմէն կը տարածուէր մինչեւ Ասորիք ու հարաւային Հայաստան: Միայն թէ հին հաթեան կայսրութեան կեդրոնական եւ հիւսիս-արեւմտեան մասերը բռնած էին ո՛չ Փոլիւդիացիք, իրենց համացեղ ուրիշ ժողովուրդներով միասին:

«Ծովու ազգաց շարժման հետեւանօք», կ'ըսէ Տրլափորթ, «ԺԲ. դարու սկիզբէն քիչ մը վերջը Փոքր Ասիա դրաւուած կը տեսնուի Եւրոպայէն նոր եկած՝ յունական ու թրակիական ծագումէ ալլազան ժողովուրդներով: Առաջին ժողովուրդը, որ կարեւոր պետութիւն մը կը կազմէ, Փոլիւդիացիք են. անոնք հաստատուած են բարձրավանդակի արեւմտեան մասին մէջ մինչեւ Ալիւս գետ, ա՛յն երկրամասին մէջ, որ իրենց անունով Փոլիւդիա կ'ըսուի դասական հեղինակներուն քով: Որոշ շրջան մը անոնք իրենց ազգեցութիւնը կը տարածեն աւելի արեւելք ալ, կապադովկիոյ մէկ մասին վրայ...: Փոլիւդիական խեցեղէններուն կը հանդիպինք մինչեւ Թուրխալ եւ Զիլէ՝ դէպի հիւսիս-արեւելք, մինչեւ Մալաթիա դէպի արեւելք եւ Ճարապլուս՝ դէպի հարաւ-արեւելք<sup>1</sup>: Այս վերջին երկու վայրերը բաժնուած են այն շրջանակէն, որ հաստի կ'անուանուի Ասորեստանեայց կողմէն՝ ԺԲ. դարէ սկսեալ մինչեւ անոնց կըցումը Ասորեստանի՝ Ը. դարու վախճանին: Այս ժամանակամիջոցին՝ Փոլիւդիացիք Ասորեստանցւոց կողմէն կը յիշատակուին, Մուշկի անուան ներքեւ, որ Տիւանայի շրջանակին մէջ հաստատուած էր իբրեւ Հատեանց միաբանութեան պատկանող ժողովուրդ մը:

«Խատտիներու աշխարհն է սոյն շրջանին՝ ամբողջութիւնն այն իշխա-

(1) Այս կիրամիկան բուն փոլիւդիական է թէ Մուշկիներունը: Պէտք է դայն որոշել: Ե. Ս. Ք.:



նութեանց, որոնց գաւառները ատենօք հպատակած էին Մեծ Արքային, նոր կայսրութեան օրով: Ան կը տարածուի հիւսիսային կողմը գոնէ Թոխմա-Սուէն սկսեալ՝ ի հարաւ մինչեւ Որոնդէսի ակունքը եւ յարեւելս Եփրատէն սկսեալ՝ մինչեւ Տիւանա եւ Իվրիզ յարեւամուտս» (De la porte, «Les Hittites», p. 315-6): Ուրեմն «Խատտի Աշխարհը» բոլորովին զատ եւ որոշ է Փոլիգիայէն: Հեղինակս սակայն չ'ըսեր թէ որո՞նք հաստատուած են Ալիւսէն արեւելք եւ Թոխմա-Սուէն ու Մելիտինէէն հիւսիս: Այս խիստ կարեւոր խընդիրը յետոյ առանձինն նկատի պիտի առնենք:

«Կարգեմիշի թագաւորութիւնն է որ ամենէն աւելի եւ առանձնապէս կը յիշուի Խատտի անուան ներքեւ: Միւս կողմէն «Մեծ Խատտի» աշխարհն աւելի ըլլալով կը բովանդակէ հետեւեալ երկիրները.— Մելիտ (Մալաթիա), Դուբալ՝ Կոմանա քաղաքով, Խիլակկու՝ որ Արգէոսի գաւառն է, Տիւանայի շուրջ Մուշկիներու երկիրը, զոր պէտք չէ շփոթել նոյնանուն երկրին հետ, որ կը գտնուէր Տիգրիսի աղբերականց վրայ. Գուրգուժ, որուն գլխաւոր քաղաքն է Մարգասի (Մարաշ), Կուէ (գաշտային Կիլիկիա), Շամալ (այժմ Զէն-ճիրլի կեդրոնով), Խատտինա (Հալէպ, Համա)» (Delaporte. «Les Hittites», p. 316):

«Ազգաբնակչութեան կողմանէ Քետացիք (Hittites) կոչումը այսուհետեւ ցեղաբանական արժէք չունի, հապա միմիայն աշխարհագրական արժէք մը: Մեր սլատմական տեսութեան մէջ զայն կը պահպանենք, ինչու որ Ասորեստանեայց եւ Ուրարտացւոց արձանագրութիւնները զայն կը գործածեն, ինչպէս որ Սուրբ Գիրքն ալ այդպէս կ'ընէ: Ուրիշ ամէն տեղ այս «հատեանացած» ցեղերը Նոր-Հատեանք (Neo-Hittites) անունով պիտի կոչենք, զանոնք տարորոշելու համար փոքր-ասիական (Asiatique) նախահաթեաններէն եւ հնդեւրոպական հաթեաններէն, որոնց մասին խօսուեցաւ մեր գիրքի նախընթաց մասերուն մէջ» (նոյն, անդ):

Հեղինակիս այս վերջին պարբերութեան մէջ «աշխարհագրական» բառին տեղ նախընտրելի էր «մշակութային» (cultural) բառը գործածել, որովհետեւ պատմութեան այս «Նոր-Հատեան» ըսուած շրջանը յատկանշական եւ ընդհանուր մշակոյթ մը ունի, որուն գլխաւոր յայտարարներն են «Հատեան» (Hittites) ըսուած մեհեմագիւրներով (Hieroglyphics) ընկերացած կամ երբեմն առանց անոնց ալ քանդակեալ պատկերներու մասնաւոր ոճ մը եւ այս տեսակ յիշատակարաններ, ուր որ գտնուին այդ տարածութիւնն է նաեւ աշխարհագրական մարզը, որ իբր «Խատտի» կը յատկանշուի, գոնէ մինչեւ Ն. Ք. 707 թուականը: (Այս «Հատեան» յիշատակարաններու գտնուած վայրերու քարտէսին համար տես՝ Սիւրմէեան, ՍՈՒՐԻԱ, էջ 570, որ Տըլափորթի գրքին մէկ քարտէսին պատկերացուած արտատպութիւնն է):

«Յիշեալ շրջանակի սիւրիական մասին մէջ, ինչպէս եւ Մելիտինէ եւ ուրիշ տեղեր կը մնան Հուրրիներ, որոնք սակայն արդէն «հատեանացած»



էին, նաեւ երկար ժամանակէ ի վեր այս երկիրներուն մէջ հաստատուած ինտացիներուն վրայ եկած աւելցած են վերոյիշեալ արշաւանաց առջեւէն փախուստ տուած ինտացիներ եւ Փոքր Ասիոյ բարձրաւանդակի ուրիշ ժողովուրդներ» (Delaporte, նոյն էջ 416):

Ինչպէս հեղինակը կը յարէ, Նոր Հատեանց շրջանէն մեզի հասած չէ հաթեան լեզուով գրուած ոեւէ բեւռագիր պատճեն (document). Թերեւս ապագայ պեղումներ դեռ ի յայտ կը բերեն անոնցմէ. բայց շատ հաւանական ալ չէ, որովհետեւ Կարքեմիշի աւերակներէն բնաւ այդպիսիներ չեն պեղուած: Ընդհակառակն մեհենագիրներու դործածութիւնը ոչ միայն չէ թողուած, այլ զարմանալի կերպով աճած եւ ընդհանրացած է, եւ այդ ոճով բազմաթիւ արձանագրութեանց կը հանդիպինք Նոր Հատեանց աշխարհին բոլոր մասերուն մէջ (նոյն, անդ):

«Նոր Հատեանց պատմութեան շրջանին (1200—700 Ն. Ք.) անասլատէն եկող Արամէացիք հետզհետէ կը լեցնեն հիւսիսային Սիւրիան (Կոմմազինէն ալ միասին առած) եւ վերջ ի վերջոյ հոն տեղերը տիրապետող տարրը սեմականը կ'ըլլայ: Բայց Տաւրոսը, մասամբ նաեւ Ամանոսը, զօրաւոր պատուարներ են եւ արգելք՝ սեմական տարրի տարածման առջեւ. եւ այս պատուարներու ետին խետացի տարրը զրեթէ անաղարտ կը մնայ, յատկապէս Մելիտինէի ու Կատաւոնիոյ մէջ, մեծաւ մասամբ նաեւ դաշտային եւ ապառաժուտ Կիլիկիա:

Այսպէս, «Ծովու Ազգերու» արշաւանքէն քիչ յետոյ, Փոքր Ասիոյ հարաւարեւելեան լեռնային մասերուն մէջ իմաստիներ վերազարթում մը կ'ունենան, եւ Փոլիզիա կը ստիպուի ինքզինք ամփոփել Ալիւս գետի արեւմտեան բունէն անդին, յատկապէս Սանդարիոս գետի աւազանին մէջ: Արշաւող ժողովուրդներէն՝ Մուշկիներ, Կասկաներ, Թուրալցիներ եւ ուրիշ ոմանք կ'ընան նոր-խատտիական քաղաքակրթութեան ազդեցութեան տակ եւ կ'ընդունուն Նորակազմ «Մեծ Իմաստի» դաշնակցային պետութեան մէջ իբր ինքնավար անդամներ:

Փրոֆ. Սէյս կը կարծէր թէ նոր-հատեան կամ կասկեան պետութեան կեդրոնն էր Իկոնիոնի արեւելեան կողմն այժմ Էմիր-Ղազի կոչուած աւանին տեղը: Բայց մեր կարծիքով՝ այս վայրը չափազանց հեռու է դէպի արեւմուտք: Այդ կեդրոնն էր հաւանօրէն, դոնէ իբր կրօնական ընդհանուր հաւաքավայր, Կատաւոնիոյ Կոմանան (արդի Շար աւանին տեղը՝ Հաճընէն դէպի արեւելք): Այսպէս խորհելու կը մղեն մեզ՝ պատմական այլեւայլ մանր յիշատակութիւններէն եւ աշխարհագրական նկատումներէ զատ, «Հատեան» կոչուած յուշարձաններու տեղադրական բաշխումը, որուն ամենախիտ մասը կը գտնուի Կոմանայի մերձակայ բոլորտիքը: Նաեւ Կատաւոնիա անունն իսկ կըրնայ ասոր ապացոյց ըլլալ, որովհետեւ ինչպէս ենսէն եւ ուրիշներ շատոնց մատնանշած են՝ այդ անունը հաւանօրէն իատտի կամ իատա անունէն ածանցուած է:



Դժբախտաբար այս հարստութեան թագաւորաց անունները մեծաւ մասամբ անծանօթ կը մնան տակաւին: Միայն երկու թագաւորներուն անունները կրնանք զիտնալ՝ իրենցմէ մնացած կնիքներու վրայ սեպագիր վերտառութենէն, որոնց կ'ընկերանան հատեան մեհենագիրներ ալ. ասոնք են Տարգուն-թիմնու կամ Թարգունմալա եւ Ինդիլիմա: Այս երկու կնիքներն իրենց երկլեզուան ոճով, ձեւով ու բովանդակութեամբ կը յիշեցնեն Սուբբիլուլիումայէ մինչեւ Դուտխալիյաս Ե. նախկին հաթեան մեծ արքաներու կնիքները: Առաջին կնիքին տիրոջը կը պատկանի հաւանօրէն նաեւ Կեսարիոյ մօտ ժայռի մը երեսը քանդակուած պատկերն ու սեպագիր արձանագրութիւնը, յորում Տարգունդիմնու անուն թագաւորի մը յաղթանակը կը նկարագրուի Արտէս անուն փոխդիւանի կամ մոսոգցի իշխանի մը վրայ (Conder, «Hittites», p. 41-2):

Տարգունդիմէ ինքզինք «Մեդան քաղաքի երկրին թագաւոր» կ'անուանէ. եւ այս Մեդան անշուշտ Կեսարիոյ մօտ Matiane գաւառն է: Ուրեմն իր մայրաքաղաքը Կեսարիայէն հեռու չէր: Ինդիլիմա ինքզինք «Շիրդանուի որդի եւ Իշխարայի սպասաւոր» կ'անուանէ. եւ Իշխարա նոյն է Իշտար դիցուհիին հետ, թերեւս Հաթեանց Արեւու դիցուհին եւ Փոքր Ասիոյ մայր-աստուածուհիին՝ Մայի կամ Կիւբիլէի հետ նոյնացուած է: Ինդիլիմամայի կնիքը Կիլիկիոյ մէջ գտնուած է (F. Hommel, «Grandriss», p. 49-50), որով իր մայրաքաղաքը հաւանօրէն Կատաւոնիոյ Կոմանան էր<sup>1</sup>:

Այս հարստութեան թագաւորները տակաւին կը պահէին «Խետացոց մեծ թագաւոր» տիտղոսը, եւ կը վայելէին տեսակ մը գերիշխանութիւն միւս խետացի կամ դաշնակից թագաւորներուն վրայ: Ք. Ա. ժ. դարուն, սոյն նոր հատեան թագաւորութիւնն այնչափ զօրաւոր էր որ Խետացիք վերջին արշաւանք մըն ալ ըրին Բաբելոնի վրայ, ուր այն ատեն կ'իշխէր Իսինեան հարստութենէն Նաբուքոդոնոսոր Ա. (1132—1101 Ն. Ք.): Իսկապէս Խետացիք գրաւեցին ալ Բաբելոն մայրաքաղաքը եւ 13 օր պահեցին իրենց ձեռքը: Բայց ասպա Նաբուքոդոնոսոր յաղթեց անոնց եւ հալածեց մինչեւ հիւսիսային Սիւրիա: Ասորեստանի Թագաւորալասար Ա. թագաւորն ալ Ն. Ք. 1110-ի ատենները սաստիկ շփումներ ունեցաւ այս Նոր հատեան կայսրութեան հետ եւ վերջնապէս զայն ստիպեց զիջումներ ընելու, ինչպէս յետոյ պիտի տեսնենք: Կը թուի թէ այդ ժամանակէն ոչ շատ ետքը՝ Լիւկիական արշաւանքի ատեն՝ փչրուեցաւ այս նոր խետական կայսրութիւնն ալ:

Այնուհետեւ անջատ-անջատ խետական թագաւորութիւններ միայն կային, Մալաթիա, Կումմուլիս, Մարաշ, Կարփեմիշ, Խատտինա կամ Պատինա,

(1) Փրոֆ. Սէյս՝ Պորի, Պուլղարմատէնի եւ մանաւանդ Իվրիզի հռչակաւոր «Հատեան» յիշատակարաններուն վրայ նկարուած թագաւորի մը մեհենագիրներով նշանակուած անունը Այմգալաս կամ Այմինիաս կը կարգար, եւ այս նախկին ժամանակին Իշտած կը համարէր: Բայց նորագոյն հաթագէտները Ուրբաւաւ կը կարգան այդ անունը եւ թագաւորութիւնասար Գ. ի օրով Իշտած Տուհանայի թագաւոր Ուրալալիային հետ կը նոյնացնեն:



Համաթ եւ այլ կեդրոններով, որոնք թէեւ երբեմն արտաքին թշնամիին դէմ միանալով զինակցութիւններ կը կազմէին, սակայն ընդհանրապէս զատ-զատ կը գործէին: Խատտինա թէ՛ իր երկրանունովը եւ թէ՛ թագաւորներէն ոմանց անուններով կենդանի կը պահէր հին խատտի պետութեան փառաւոր յիշատակները. բայց Կարփեմիշ իր հինէն ի վեր զարգացած քաղաքակրթութեամբ ու հարստութեամբ սովորաբար առաջինը եւ բո՛ւն «խատտի» թագաւորութիւնը կը նկատուէր հիւսիսային Սիւրիոյ խետական իշխանութեանց մէջ: Սակայն ան ալ հետզհետէ կորսնցնելով իր մարտական ոյժը, աւելի առեւտրական ժողովուրդի մը ոգին ստացաւ: Այս թագաւորութիւնները շարունակեցին իրենց խետական կենցաղն ու աւանդութիւնները, եւ զարգացողին խիստ բնորոշ մշակոյթ մը տակաւին երկու դարէ աւելի, որ ատեն որ Ասորեստանի տկար եւ անկեալ վիճակ մը ունէր: Բայց Ք. Ա. Թ. դարուն Ասորեստանի վերադարձումէն ետք, անոնք մէկ կողմէ աստիճանաբար արամէացան, իսկ միւս կողմէ որոնք որ կը յամառէին իրենց տոհմային յատկանիշները պահպանելու վրայ, Ասորեստանի հետ շարունակ կատաղաբար մարտնչելու ստիպուած էին. որով հուսկ ուրեմն ընկճեցան անոր ահեղ ու անդուծ զէնքերուն առջեւ: Արեւելեան Տաւրոսի մարզին մէջ ամենավերջին խետական իշխանութիւններն էին Գորգում կամ Մարքասի (Մարաշ), Կումմուխ (Սամոսատ), Կարփեմիշ եւ Մալաթիա, զորս բոլորն ալ Սարգոն Բ. կործանեց Ն. Ք. 712-ի եւ 707-ի մէջտեղ:

\*  
\*\*

Մալաթիայի աշխարհագրական դիրքն այնպէս է որ անկարելի է արեւմուտքէն արեւելք կամ հիւսիսէն հարաւ շարժող մեծ արշաւախումբի մը զայն մէկդի ձգելով անցնիլը: Ուստի Մուշկիները, որ Ք. Ա. 1170-ի ատենները Կեսարիոյ մօտերէն մեկնելով արշաւած են արեւմտեան Տիգրիսի աւազանը, նոյնպէս Կասկաներ՝ որ գրեթէ միեւնոյն ժամանակ վերին Ալիսի աւազանէն մեկնելով Եփրատացոց երկիրն արշաւած են, անպատճառ անցած պիտի ըլլան Մալաթիոյ վրայէն, որ այս խուժանային արշաւանաց երեսէն սաստկապէս վնասուած, կ'երեւի թէ իր ոյժը բաւական կորսնցուց եւ չկրցաւ վերակազմուող խատտիական պետութեան դուրսը կանգնիլ:

Ուստի երբ Ն. Ք. 1114-ին՝ Մալաթիոյ յիշատակութիւնը կ'ըլլայ, զայն կը գտնենք իբր մաս Խանիգալբատի պետութեան. որովհետեւ Ասորեստանի Թագլաթիալասար Ա. թագաւորը իր այդ տարուան վերաբերեալ արձանագրութեան մէջ «Խանիգալբատի երկրին Մելիդիա քաղաքը» կը գրէ (Annals V. 34):

Թագլաթիալասար Ա. իր աւելի վերջը գրած արձանագրութեանց մէջ սակայն կը յիշէ թէ «դարձաւ դէպի հիւսիս, նուաճեց Խատտի երկիրը, հաւանօրէն Կարփեմիշ, անոր թագաւոր Իլի-Տեշուրի վրայ տուրք դրաւ եղեւի-



նէ գերաններ, ու Տաւրոսի վրայէն անցաւ Մեծ Խատտի Միլիտիա քաղաքի դէմ եւ ընդունեցաւ Ալուի (կամ Լալլուի) ... տուրքը» (Խաչատրեան, ՀԱՅԱՍՏ. ՍԵՊ. ՇՐՋ. ՊԱՏՄ., էջ 9, ծան. 1, մէջբերում Ֆորրերէն, Reallexi Conder, Assyriologie, I. 28): Կը նշանակէ որ այս ատեն տակաւին կար Փոքր Ասիոյ մէջ «Մեծ Խատտի» ըսուած պետութիւն մը եւ Միլիտիա ալ անոր աւատական մասերէն մէկը կը կազմէր: Արդեօք սոյն միջոցին քաղաքական մեծ փոփոխութիւն մը տեղի ունեցեր էր: Շատ հաւանական է:

Բայց Ասորեստանեայց արձանագրութիւններուն մէջ բացորոշ յիշուած այդ երկու բարբարոսական արչաւանքները (Մուշկիներու եւ Կասկաներու) մինակը չէին որ անցած պիտի ըլլան Մելիտինէի վրայէն: Ժողովուրդներու ուրիշ տեղափոխութիւններ ալ կան, որոնք անոր վրայէն անցած են եւ անոր ճակատագրին վրայ ազդած: Այսպէս, նախ կը գտնենք շարք մը ցեղեր, որոնք ոչ թէ Տեշուրը, հապա Տարխու (հայկ. Տորֆ) կամ Տարխունտա, որ պատերազմի կամ յաղթութեան աստուած էր, թերեւս նաեւ գիտութեան եւ արուեստից, կը պաշտէին իբրեւ իրենց պաշտպան աստուածը եւ անոր անունով կը կազմեն իրենց անձի յատուկ անունները (Տարխունտարաբի, Տարխունտիմէ, Տարխունլարա, Տարխունագի, եւն.<sup>1</sup>): Կան նաեւ Տարխունա, Տարխանաբէ, Տարխիգամա, Տարգունա եւ նման տեղւոյ անուններ, որոնց կը հանդիպինք արեւմտեան Տիգրիսի գաւառներուն, այսինքն՝ նախկին Խանիգալքատի երկրին մէջ: «Տարխուեան» ըսուած այս ցեղերու շարքը, որ Լիւկիայէն եւ Կարիայէն սկսեալ Լիկայոնիա, Կիլիկիա, Գուրգում (Մարաշ) եւ Մալաթիա եւ անկէ անդին ալ կը տարածուէր, Նիւգօ Վինկլէրի եւ այլ պատմագիտաց կարծիքով՝ ամբողջ Փոքր Ասիան բռնող Լիւկիական արչաւանքին մնացորդն է: Ըստ Լէյման-Հաուպտի՝ Լիւկիական այս արչաւանքին ուրիշ հետքերն ալ կը գտնենք մինչեւ Մելիտինէ եւ անկէ անդի ի երկիրներուն մէջ իբրեւ տեղանուններ, որոնք Պատարա քաղաքանուան այլեւայլ ձեւաւորումներն են:

Ապա, եթէ ուղիղ է Լէյման-Հաուպտի, Վայդնէրի, Խաչատրեանի եւ այլոց պնդումը թէ Ուրուարտիները (բուն Ուրարտացւոց նախահայրերը) արեւմուտքէն գաղթած եկած են արեւմտեան Տիգրիսի աւազանը, անոնք ալ Ն. Ք. 1050 թուականի ատենները անցած պիտի ըլլան Մալաթիոյ եւ Խարբերդի վրայէն: Ըստ իմ կարծեացս՝ Զամուա կամ Զամրի ժողովուրդն ալ, որոնց հետ Ասուրնագիրպալ Բ. 833—860 Ն. Ք. կը պատերազմի Զադրոս լեռանց ձո-

(1) Ասկէ զատ, Գիրպա կամ Գալբա անունն նոր աստուած մըն ալ կ'երեւի յիշեալ տեղերէս ոմանց թագաւորներուն անուանց կազմութեան մէջ. ինչպէս՝ Գիրպարոսդա անունը, զոր կը կրեն Մաղմանաստոր Գ.ի ժամանակակից թագաւորները Խատտինայի եւ Գուրգումի. իսկ վերջին անունը Հատեան մեհենագիրներուն մէջ Գալբարոսդա կը կարդացուի: Ըստ ոմանց՝ Վանեան արձանագրութեանց մէջ Մալաթիոյ թագաւորներուն տրուած խիտերոսդա կամ խիլարոսդա անունն ալ մէկ տարբերակն է Գիրպարոսդա կամ Գալբարոսդա անունին:



բերուն մէջ, արեւմտեան ծագում ունին եւթագլաթփալասար Ա.ի մահէն քիչ ետք եւ Ուրուարտիներունառջեւէն դադթած պիտի ըլլան, եւ անցած՝ Մալաթիոյ վրայէն: Այսպէս, Մելիտինէի թագաւորութիւնը Ք. Ա. թ. դարուն, թէեւ զերծ էր Ասորեստանեայց հարստահարութիւններէն, սակայն «խախտած ազգերուն ուրական»ին պատճառաւ, համեմատաբար տկար եւ ամուլ շրջան մը կը բոլորէր:

Բայց վերջապէս Ք. Ա. թ. դարու առաջին կէսին նորէն կու գայ Մելիդիայի հզօր թագաւոր մը, որ ոչ միայն կատարելապէս անկախ իշխող մըն էր, այլ նաեւ բաւական հարստութիւն եւ խելք ունէր Մալդիյայի հին պալատմէհեանը փառաւորապէս վերաշինելու: Ան անոր մէջ կանգնեց իր կենդանագիր արձանը՝ բնականէն աւելի խոշոր, դրուած հսկայ պատուանդանի մը վրայ: Դժբախտաբար իր անունը դեռ չենք գիտեր. բայց իր արդուզարդէն եւ կրած տարազէն, նաեւ քանդակագործութեանը վրայ յայտնապէս տեսնուող ասորեստանեայ արուեստի ու ոճի խոր ազդեցութենէն, մասնազէտք սա համոզման եկած են որ այդ քանդակը Ք. Ա. թ. դարուն կը պատկանի եւ թերեւս անոր առաջին կէսին:

Այսպէս կը հասնինք Մալաթիոյ պատմութեան բուն Ասորեստանեայց շրջանին, յորում անընդմիջաբար զիրար յաջորդող Մալաթիոյ տասը թագաւորներու անունները մեզի յայտնի են Նինուէի եւ Վանի ինքնակալներուն արձանագրութիւններէն: Բայց անոնց պատմութիւնը յարմար է տալ առանձին գլխու մը մէջ:

## Գ.

### ՄԱԼԱԹԻԱ ԲՆԻԿ ԹԱԳԱՒՈՐԱՅ ՆԵՐՔԵՒ

Թագլաթփալասար Ա.ի օրով Մալաթիայէ դէպի Անտիտաւրոս դեռ Տաբալուներ չէին բնակեր, այլ ուրիշ անուններով ժողովուրդներ: Ասորեստանի այս թագաւորը երեք մեծ արշաւանքներով Նայիրին հնազանդութեան բերելէ ետք, իրեն համար դէպի արեւմուտք ճամբան բացուած դտաւ, դէպի Փոքր Ասիոյ կեդրոնը, Խետացւոց վաղեմի երկիրը, ուր տակաւին կար եթէ ոչ միաձոյլ զօրաւոր կայսրութիւն մը, դէթ առաւել կամ նուազ զգալի միութեամբ կեդրոնական կառավարութիւն մը, որուն մէջ դաշնակցային կապակցութեան կու գային ինքնավար ցեղեր եւ տեղական մեծ կամ փոքր թագաւորութիւններ: Թագլաթփալասար նախ քալեց (1114-ին Ն. Ք.) Խանիգալբատ ըսուած երկրին վրայ, որուն մայրաքաղաքն էր Մելիդիա: Բայց Մելիդիացիք չհա-



մարձակելով իրեն դիմադրել՝ անմիջապես հալատակեցան. որով Ասորեստանի թագաւորը չգտաւ իրենց քաղաքին, այլ պատանդներ միայն առաւ եւ երկրին վրայ թեթեւ հարկ մը դնելով մեկնեցաւ:

Հետաքրքրական է այս մասին Թագլաթիալասարի իր Տարեգրութեանց մէջ արձանագրած հետեւեալ տողերը կարդալ. — «Միււնոյն ռազմարչաւի միջոցին խաղացի կատաղի եւ անհնազանդ Խանիդալրատի երկրին մէջ Մելիդիա քաղաքին դէմ: Պատերազմիս հզօր յարձակումէն վախցան եւ ոտքերուս փարեցան: Անոնց դիմացի: Նոյնիսկ քաղաքը չնուաճեցի. անոնցմէ պատանդներ առի: Հոմեր մը կապար իբր տուրք պարտադրեցի անոնց տարուէ տարի անընդհատ վճարելու» (Annals, Vol. V. lines 33-41): Այստեղ «կապար» ըսուածը հաւանօրէն կապարախառն արծաթ է, զոր կ'երեւի թէ Մելիտինէի թագաւորները կը ստանային Լուսաթառիճի (արդի Քեպան Մատէնի) արծաթահանքերէն: Ասկէ կը հետեւի թէ Մելիտինէի թագաւորը Եփրատէ արեւելեան հողի վրայ ալ կ'իշխէր: Դժբախտաբար Թագլաթիալասար Մելիդիայի թագաւորին անունը չի տար, եւ իր պատմածը մինչեւ այն տաւալորութիւնը կը թողու թէ Մելիդիա այս միջոցին թագաւոր չունէր եւ քաղաքացիք իբր հանրապետութիւն կամ ազնուապետութիւն ինքզինքնին կը կառավարէին:

Թագլաթիալասար Ա. իր յաջորդ արշաւանքին կ'աւերէ Եփրատէ արեւելք, Միջագետքի մէջ, Արամէացի Ախլամիներու երկիրը մինչեւ «հանդէպ կարճեմիշ քաղաքի, որ է յերկրին Խատտի»: Ան չյարձակեցաւ այս չափազանց զօրաւոր քաղաքին վրայ՝ մինչեւ անգամ հետեւեալ տարին երբ յառաջացաւ մինչեւ Միջերկրական ծով: Անկէ ետքն է որ — հաւանօրէն 1112-ին Ն. Ք. — ան յարձակեցաւ Մելիտինէէն անդին Մուգրի երկրին վրայ, որուն հետ մէկուկէս դար առաջ Սալմանասար Ա. կռուած էր:

Թագլաթիալասար Մալաթիայէ ճամբայ ելլելով, արշաւեց Էլամուսի, Տալա եւ Խարուսա լեռներուն մէջտեղէն. ասոնց առաջինն այժմու Էլեմեննիք գիւղին ետեւը Պալթանտաղն է հաւանօրէն, երկրորդը՝ Տալանտա կամ Տարենտէ աւանէն անդին Հեղանլը տաղ, իսկ երրորդը՝ Պինպողան լեռնաշղթան: Ուրեմն Ասորեստանցին արշաւած է Արկալի, Տարենտէի եւ Փալանկալի ճամբով, ուր վերջինին մօտ՝ Արսլան-Թաշ անուն «հատեան» կոթողը կայ. եւ նորատակն էր ուղղակի Այալուսթանի դաշտը իջնել, Մուգրիներու կեդրոնին վրայ: Ասոնք հաւանօրէն արդի Եափալագ գիւղերուն մօտը ճակատեցան իրեն հետ, բայց յաղթուեցան: Այս միջոցին Մուգրիներու օգնութեան փութացած էին դրացի Քուժանիները, զորս ետ մղեց Թագլաթիալասար, եւ ապա Մուգրիներու Արիւնի բերդաքաղաքը պաշարեց Այսա լեռան ստորոտը. բայց որովհետեւ քաղաքացիք անձնատուր եղան, Ասորեստանի թագաւորը պատանդներ եւ ընծաներ առաւ անոնցմէ եւ տարեկան տուրք մը պարտադրելով մեկնեցաւ: Այստեղ լեռը թերեւս Աքլաս տաղ է, Պինպողայի մէկ ոստը, իսկ Արինի՝ արդի Եարբուզը (հինն Արարիստ), որուն մօտ իղկին անուն տեղն ալ արձանագր-



բեալ հատեան հսկայ կոթող մը կայ:

Կ'երեւի թէ Ասորեստանի թագաւորը այսչափով դոհացած պիտի վերադառնար Մալաթիոյ ճամբով. բայց Քուժմանիները, որոնց կեդրոնն ըլլալ կը թուի Կոմանա Կասպադովկիոյ (այժմու Շար Հաճնոյ մօտ), դէպի հիւսիս-արեւելք Պինպոլայի բանուկ մէկ կիրճէն ելած էին 20.000 զօրքով, թագլաթփալասարի նահանջի դիծը կտրելու համար եւ հասած՝ մինչեւ Տալա լեռը Տերենտէի մօտ: Թագլաթփալասար ստիպուեցաւ անոնց հետ շատ արիւնահեղ ճակատամարտ մը մղել հոն: Պարտուած Քուժմանիներէն մէկ մասը վերստին կը կազմակերպուի Խառուսա լեռան վրայ, բայց անոնք ալ բնաջինջ կ'ըլլան: Մէկ մասն ալ աւելի հեռուն ամրացած էին Խուլուսա (թերեւս արդի Կէօքսիւն) բերդաքաղաքին մէջ. բայց Ասորեստանցին հասնելով՝ կ'առնէ բերդը եւ կը քանդէ, մէջիններն ալ առանց զթութեան կը ջարդէ:

Անկէ ետք, հաւանօրէն Ն. Ք. 1111-ին, Ասորեստանի թագաւորը նոր արշաւանքով մը, որովհետեւ այս անգամ իր զինուորներուն հետ մարտակառֆերն առնելը կը յիշէ, բայց ոչ թէ Մալաթիոյ վրայէն, այլ Կոմմադինէէն ուղղակի Ալպուսթան հասնող «Գանկլըեոլու» ճամբայով քալեց Մուղրիներու երկրին վրայ եւ ապա Եարբուղի եւ Կէօքսիւնի վրայէն դէպի Սիս տանող մեծ պողոտան ի վար խաղաց Քուժմանիներու Կիպշուսա մայրաքաղաքին վրայ, որ Մասիերոյի, Հոլի, Սէյսի եւ այլ պատմագիտաց կարծիքով՝ դասական ժամանակներու Կապեսոսն է, Կիլիկիոյ քաղաք մը, Սիսի եւ Ֆեքէի (Վահկայի) մէջտեղ: Ասոր վրայ ամբողջ Քուժմանիք ստիպուեցան հպատակութիւն առաջարկել յաղթականին: Տարակոյս չկայ թէ Կատաւոնիոյ եւ Պոնտոսի Կոմանա անուն երկու հռչակաւոր սրբավայր քաղաքներն այս Քուժմանի ժողովուրդին յիշատակը յաւերժացուցած են: Տես Maspero, *Struggle of the Nations*, p. 656. Hall, *Ancient History of the Near East*, p. 388):

Թագլաթփալասար Ա. իր իշխանութեան շարունակութեան մէջ շատ անգամներ կը պատերազմի խատտի (հատեան) թագաւորութեանց դէմ. բայց իր այդ տարիներուն արձանագրութիւններն այնքան դէշ կերպով պահպանուած են որ դէպքերու յաջորդականութիւնը որոշել անկարելի է: Այսուամենայնիւ, ինչպէս առաջ յիշեցինք, Ամուրրույի (Փիւնիկէի) վրայ մէկ արշաւանքէ վերադարձին՝ «Մեծ Խատտիի թագաւոր» Իլի-Տեշուբի վրայ հարկեր դրաւ, որուն մէկ մասը ատաղձի ծառերէ կը բաղկանար: Բայց խնդիր է թէ ո՞վ էր «Մեծ Խատտիի» այս թագաւորը. արդեօք Մելիտինէի, Կարքեմիշի թէ Խատտինայի: Մելիտինէինը չէր կրնար ըլլալ, որովհետեւ Ասորեստանի թագաւորը Մալաթիոյ թագաւորն առանձնապէս կը յիշէ Ալու կամ Լալու անունով: Խատտինան անկարելի չէ, նկատի ունենալով որ պահանջուած տուրքի մաս կազմող փայտեղէն ատաղձը շատ հաւանօրէն Ամանոս լեռներէն պիտի կտրուէր. բայց Ասորեստանցին Խատտինայի թագաւորն ալ առանձինն կը յիշէ Լուբառնա անունով: Հետեւաբար, պատմագէտներ ամէն բան հաշուի առնելով, ամենէն հաւանականը կը համարին Կարքեմիշի թագաւորն ըլլալը:



Ուրեմն Կարքեմիշի թագաւորը դոնէ բարոյապէս կը ճանչցուէր իբր խառտիի թագաւորներուն դերագահը:

Ստուգիւ թաղլաթփալասար Ա.ի վերջին տարիներուն խառտիները վերստին զօրանալու վրայ էին. որով Մալաթիա քաղաքն ալ այնուհետեւ խանիգալբատի միւս իշխանութիւններուն հետ Մեծ խառտիի դաշնակցութեան մաս մը կը կազմէ: Թաղլաթփալասարի մահէն յետոյ, Նոր-Հատեաններն իրենց դաշնակցային միութիւնը դարձեալ ամրապնդած ըլլալով, Ասորեստանցիները պատերազմի մէջ կը ջախջախուին Կարքեմիշէն ոչ շատ հեռու տեղ մը — Ն. Ք. 1100 թուականի ատենները —: Ապա մօտաւորապէս 150 տարի, Ասորեստան համեմատաբար տկար վիճակի մէջ էր, որու միջոցին իր արձանագրութիւնները գրեթէ լուռ են: Հարկատուներն իրենց վրայէն կը թօթափեն անոր լուծը, քանի որ կը տեսնեն թէ կրնան զայս ընել առանց վախճալու որ պատիժ պիտի կրեն: Այսպէս, խառտի տէրութիւններ, ընդ որս նաեւ Մելիդիա, վերստին իրենց կատարեալ անկախութեան տէր եղած՝ հանդիստ կը վայելեն եւ պատեհութիւն ունին իրենց առանձնայատուկ ցեղային մշակոյթը զարգացնելու, հոյակապ շէնքեր շինելու եւ մեհենադիր արձանագրութիւններով քանդակազարդ յիշատակարաններ կանգնելու՝ Մալաթիա, Կիւրին եւ շրջակայքը, Ալպիսթան, Մարաշ եւ այլ բազում տեղեր:

Տեսանք թէ «Մեծ խառտի» աշխարհը Թաղլաթփալասար Ա.ի օրով կը բովանդակէր բազմաթիւ երկիրներ, եւ թէ Մելիդ ալ խանիգալբատի միւս երկիրներուն հետ «Մեծ խառտի» դաշնակցային միութեան յարեցաւ: Սակայն հետագայ երկու դարերու լուծութեան միջոցին՝ ասոնք հետզհետէ կը զատուին իրարմէ իբր առանձին թագաւորութիւններ, ինչպէս որոշ կը տեսնենք Ասուրպանիբալ Բ.ի եւ Սալմանասար Գ.ի արձանագրութիւններէն: Բայց միւս կողմէն, վանեան արձանագրութիւններէն կը տեսնենք որ Տաւրոսէն հիւսիս «խառտիի մեծ թագաւոր» ըլլալու պատիւը վերջապէս Մալաթիոյ թագաւորին կը մնայ:

Ասորենագիրապալ Բ. 882-ին Ն. Ք. վերին Տիգրիսի աւազանին մէջ Նայիրիի իշխանութիւնները հնազանդութեան բերելէ ետք, դէպի արեւմուտք կ'ուղղուի: Անցնելով Բուլեանի (արդի Բելլիսան) քաղաքին կիրճերէն, որ Հանձիթի ծովակին մօտերն էր, եւ Լուֆիա դետէն (որ հաւանօրէն խարբերդի դաշտին խարին դետակն է), յառաջացաւ մինչեւ Արտուֆ քաղաքը, որուն տեղը թերեւս կը նշանակուի արդի Արտուֆ գիւղով Եփրատի վրայ: Հոս նա ստացաւ տուրքերը Զալլայի երկրին (այժմ Բար-զալօ՝ Կարկառի մօտերն), որուն Արամէացի իշխանն էր Եախիրիի որդի Ախիրամու, խեղճաց երկրի իշխաններէն «Բախեանիի որդւոյն» եւ խանիգալբատի երկրի թագաւորներուն, որոնց մէջ այս ատեն ամենագլխաւորն էր Մելիտինէինը: Տուրքերը կը բաղկանային արծաթէ, ոսկիէ, կապարէ, պղինձի թիթեղներէ, արջառէ, խաշինքէ ու ձիերէ: Այսպէս Ասորեստանի թագաւորը կըրցաւ իր անուրը դնել Մելիդի վրայ. բայց խաբուսիկ էր երեւոյթը: Ասիկա առաջին եւ վերջին անգա-



մըն էր որ Ասուրնաղիրալալ Մալաթիոյ մօտեցաւ. դժբախտաբար անոր թագաւորին անունը չի տար:

Վրայէն քառորդ դար կ'անցնի. Ասուրնաղիրալալի որդին ու յաջորդը Սալմանասար Գ. 857-ին Ն. Ք. արեւմտեան Միջագետքի եւ Իսուա (Մեծ Ծովք) ու Ենդիտէ (Հանձիթ) երկիրներուն նուաճումէն ետք, բայց Արածանի գետէն հիւսիս անցնելէն առաջ, դէպի արեւմուտք խոտորում մը ընելով, կարճ այցելութիւն մը տուաւ Մելիդ քաղաքին (Winckler, History of Babylonia and Assyria, p. 224): Այս արշաւանքը հաւանօրէն պարզ ասպատակութիւն մըն էր եւ ոչ թէ կանոնաւոր նուաճում:

Անկէ ճիշդ 20 տարի ետքը — թող ընթերցողը լաւ ուշադրութիւն ընէ ժամանակի այս անջրպետներուն, — Ն. Ք. 837-ին Սալմանասար Գ. արշաւանք մը կ'ընէ Տաբալի երկրին վրայ, որու 24 արքայիկները չհամարձակեցան անոր դիմադրել եւ իրենց երկրին արծաթի բովերն ու աղուճակի ու մարմարիոնի հանքերն անոր թողլով՝ իրենց հանդստութիւնը շատ աժան գնուած սեպեցին: Սալմանասար կը պարծի թէ ինք այս առիթով մինչեւ Տուսնիի լեռները արշաւեց, զոր կը նկարագրէ իբրեւ «արծաթի լեռ մը», ուրեմն մինչեւ Պուլղարմատէն: Արձանագրական այս եւ ուրիշ տուեալներէ յայտնի է որ Տաբալցի ժողովուրդը շատ ընդարձակ սահմանի մը վրայ տարածուած էր: Բայց Տաբալի երկրին կեդրոնական մասին համար ամենէն հաւանական դիրքն է Ալպիսթանի բարձրագիւր ընդարձակ դաշտավայրը, ուր են Պիւրամոս (Ջահան) գետի ակնադրիւրները, չրջակայ Տաւրոսեան եւ Անտիտաւրոսեան լեռնաշղթաներով, այսինքն՝ ետքէն Կատաւոնիա կոչուած նահանգը: Թաղլաթփալասար Ա.ի ժամանակ հոս կը բնակէին Մուզրի եւ Քուժանի անուն ժողովուրդները: Կ'երեւի թէ Տաբալուները արեւմուտքէն եկեր էին Թաղլաթփալասար Ա.ի օրերէն ետք եւ այդ երկրէն վռնտած էին Քուժանիներն ու Մուզրիները. եւ այսպէս կը գտնենք որ Ադադնիրտաի Բ.ի օրով (911-890 Ն. Ք.) Քուժանիները Կորդուաց լեռնաշխարհի հարաւային մասին մէջ կը բնակին (տես ՆԱԽ. ՀԱՅԱՍՏԱՆ, էջ 203-4. 210-295): Իսկ Մուզրիներն ալ Եփրատն անցնելով՝ Արեւմտեան Հայաստան հաստատուած կ'երեւին. որով հաւանօրէն հայկական Մնձուր գուտոն իր անունը Մուզրիներէն առած է:

Սակայն հոս մեզի համար նկատի առնելիք բուն կէտը սա է. Սալմանասար Գ. Տաբալի երկրին վրայ այս արշաւանքն ընելու համար Եփրատ գետը անցնելը կը յիշէ, բայց Մելիդ հանդիպելը չի յիշեր: Քանի մը պատմագէտներ ասկէ հետեւցնել ուզած են որ Մելիդիա այն ատեն Տաբալուներուն կը պատկանէր եւ անոր թագաւորը մէկն էր այդ 24 հարկ վճարողներէն: Բայց աւելի հաւանական է որ Տաբալուները պէտք է դանադանել Մելիտինէն եւ թէ Ասորեստանի վեհապետը մոռցած է Մելիտիոյ թագաւորը յիշել առանձինն եւ կամ համառօտութեան սիրոյն զանց բրած. որովհետեւ Սալմանասարի «Սեւ Կոթողի» (Black Obelisk) այս արձանագրութեան մէջ նրման գանցառութիւններ շատ կան: Ինչեւիցէ, այս ատենէն սկսեալ ասորես-



տանեան ազդեցութիւնը երթալով կ'աճի Սատտի երկրին մէջ եւ Սալմանասար Գ. ի փայլուն յաղթանակները կը պատկերացունեն նուաճուած ուրիշ ոստաններու հետ Մալաթիոյ ալ խորաքանդակներուն ու արձաններուն վրայ, ուր կ'երեւայ Ասորեստանի այս թագաւորին նկարն ու ըրած քաջագործութեանց արձանազրութիւնը (Սիւրմէեան, ՍՈՒՐԻԱ, էջ 573) :

Ըստ Սեւ Կոթողին՝ Ն. Ք. 836-ին Սալմանասար դարձեալ այցելեց Եփրատէն արեւմուտքը եւ այս անգամ որոշ կերպով կը յիշէ Մելիդի թագաւորը, զոր Տաբալուներէն կը զատէ, ըսելով. «Իմ իշխանութեանս 23-րդ տարին նորէն անցայ Եփրատը: Մելիդցի Լալլույի բերդաքաղաք Ուխտասը նուաճեցի: Տաբալի թագաւորները եկած էին. անոնց տուրքերն ընդունեցայ» (History of Babylonia and Assyria, p. 225): Ուխտաս ամրոցը հաւանօրէն ներկայիս Օրտասու ըսուած տեղն է: Ասկէ յետոյ Սալմանասար Գ. ա'լ ոչ երբեք այցելեց Մելիտինէն, եւ արդէն Վինքլէր՝ Մալաթիոյ Լալլույին Ն. Ք. 836-ին եղած ապստամբութեան մէջ նոյն ինքն Ուրարտուի Սարգուրիս Ա. թագաւորին մատը կը տեսնէ:

Յաջորդ մէկ դարու միջոցին Մելիդիա ոչ մէկ անգամ կը յիշուի Ասորեստանեայց արձանազրութիւններուն մէջ: Բայց անոր փոխարէն Մելիտինէ կը ճնշուի ուրիշ նախայարձակ պետութենէ մը, որ գոյացած էր Եփրատի անմիջապէս արեւելեան կողմը — Ուրարդու կամ Խալդիա: Եւ նշանակելի է որ Ուրարտուի արձանազրութիւնները շատ աւելի կը յիշեն Մելիդիան եւ միանգամայն շատ աւելի մանրամասն տեղեկութիւն կը հաղորդեն այս թագաւորութեան վրայով:

Լէյման-Հաուպտ կը խորհի թէ տակաւին Ուրարտուի Մենուաս եւ Արգիստիս Ա. թագաւորութիւններուն օրով (Ն. Ք. 800—760 թուականներուն) Փոքր-Ասիոյ արեւելեան մասին մէջ կար Խետացոց դաշնակցային պետութիւն մը, գլխաւոր ղեկավար ունենալով Մալաթիոյ թագաւորը, որ բաց աստի իր ազդեցութիւնը Եփրատէն արեւելք ալ կը տարածէր մինչեւ Ծոփք Շահունոց, Հանձիթ եւ Մեծ Ծոփք (Armenien II, էջ 854): Ֆորրէրալ այս կարծիքէն է:

Մենուաս, շուրջ 800-ին Ն. Ք., Ալզիի (Աղձնեաց) երկրէն յառաջացաւ Հանձիթի վրայ, ուր Խետացոց իշխաններէն «Սադասատասի (Sadyattes) որդին» յաղթահարեց, նուաճեց անոր Սուրիսիլիս ոստանը (այժմ Սուրսուրի՝ Խարբերդէն 5 մղոն դէպի հարաւ-արեւմուտք, ուր նշանաւոր վանք մըն ալ կայ), Տարիսիգամաս քաղաքը եւ ուրիշ քաղաք մը, իր յաղթութեանց յուշարձանը կանգնելով Սուրիսիլիսի պարիսպին վրայ: Ուշագրաւ է որ Մենուասի այս դէպքը պատմող արձանազրութեան (Sayce, No. 32) եօթներորդ տողին մէջ կայ Khatinastan բառը, որ այնչափ կը նմանի Հայաստան անուան: Մենուասի արեւմտեան արշաւանքներուն առթիւ յիշուած տեղւոյ եւ անձի անուններէն կ'իմանանք որ այս ժամանակ իսկապէս Խետացիք բռներ էին՝ ի մէջ այլոց՝ Բալահովիտ եւ Խոզնայ գաւառները, ինչպէս նաեւ Պաղնատուն եւ ուրիշ գաւառներ մինչեւ արդի Հայնիի մօտերը:



Ասոր դրական փաստ մըն է նաեւ Սարբերդի մէջ գտնուած խետական քանդակագործութեան բեկորը մոխրագոյն քաղալտ քարէ (Lehmann--Haupt, Armenien, I, p. 475-6) պատկերը՝ էջ 476) :

Մենուաս ուրիշ արչաւանք մըն ալ ըրած է Եփրատէ արեւելեան եւ Արածանիէ հիւսիս խետական գաւառներուն վրայ, որոնք կ'երեւի թէ անմիջապէս կինճ գաւառէն անդին կը սկսէին : Մենուասի այս անդամուան արչաւանքի ճամբուն վրայ առաջին կարեւոր քաղաքն էր Շեպիտերիաս (արդի Բալու), զոր ան նուաճեց, ինչպէս նաեւ իրարու ետեւէ հուզանաս (հայկական հոգնայ, արդի հոգաթ) գաւառը եւ Ծուպանի երկիրը (Ծոփ Ծահունոց, արդի Չմշկածագ) : Մելիտինէի թագաւոր Սուլիէհաւալի (այսինքն՝ Սուլուվալ կամ Սուլումագ) ասոր վրայ ընծաներով ընդառաջ փութաց եւ հպատակութիւն առաջարկեց : Մենուաս իր այս յաղթութեանց արձանագրութիւնը (Sayce No. 33) քանդակել տուաւ նուաճուած Բալու քաղաքին մօտ՝ Արածանիի հիւսիսային ափի մէկ ապառաժին երեսը : Ասկէ զատ, աւելի փոքր տեղական արձանագրութիւն մըն ալ ունի Մենուաս՝ Սարբերդէ եւ Արածանիէ դէպի հիւսիս Մագկերտի կամ Մեծկերտի հին բերդին վրայ, ուր կը յիշէ որ այդ նահանգին վրայ Տիտիանի անուն խալդիացի կառավարիչ մը կարգած է, եւ ասկէ յայտնի է որ Ասորեստանցւոց ըրածին պէս անցողակի նուաճման կամ ասպատակութեան արչաւանք մը չէր Մենուասի ըրածը, հապա մնայուն կերպով այդ գաւառները կցած է Ուրարտուի պետութեան (ՆԱԽ. ՀԱՅԱՍՏԱՆ, էջ 296—297) : Թէեւ Ղափանցեան կը կարծէ որ Մենուաս այս առթիւ Եփրատէ արեւմուտք բուն Մելիտինէի վրայ ալ յարձակած ըլլայ (ՈՒՐԱՐՏՈՒԻ ՊԱՏՄՈՒԹԻՒՆ, էջ 150—1 եւ վերջին էջի ծան. 1), սակայն՝ արձանագրութիւնները զայս չեն հաստատեր : Այսու ամենայնիւ, անկարելի չէ որ գոնէ բարեկամական այցելութիւն մը տուած ըլլայ Մալաթիոյ թագաւորին :

Մենուասի որդին ու յաջորդը՝ Արդիստիս Ա. (785—760 Ն. Ք.) նախ կրկնեց իր հօրը առաջին արչաւանքը Աղճնիքէն դէպի Եփրատ : Նա 782-ին Ն. Ք. արչաւեց Խետացւոց Եփրատէն արեւելք տարածուող երկիրներուն վրայ. «Արդիստիս Մենուասեան կ'ըսէ. «Հրամանովը տիրոջս Խալտիսի, Տէիսպասի, Արդինիսի (Բիայնայի, Վանի) երկրին աստուծոց... յարչաւանս իմ դէպի երկիրն Խետացւոց (Khatina-idi) տիրեցի Նիրիբայի երկրին (Հայնիի կողմերը), ... Ուրմանի երկրին (Արդնիի կողմերը), ասոր իշխանին յաղթեցի, անոր բոլոր աւարը կողոպտեցի : Սուրիսիլիս (Սուրսուրի) քաղաքը, արքունի ոստանը գրաւեցի Խալդիսի մեծագոր որդւոց համար» (Annals of Argistis I, col. II, lines 5--14) : Արդիստիս ըսել կ'ուզէ որ Սարբերդի մօտ այդ քաղաքը խալդիացի կուսակալի մը նիստն ըրաւ :

Ան այնուհետեւ կ'արչաւէ Եփրատէն անդին, Մելիտինէի թագաւորութեան կեդրոնին վրայ. «Մօտենալով Խետացւոց երկրին ներսերը (Khatina-idi) Տուալասի որդւոյն երկրին, Մալիթա (Մալաթիա) քաղաքին սահմանները վերցուցի : Պիլաս քաղաքէն մեկնելու ատեն, զայն աւերակաց կոյտի



վերածեցի: Մելիթա գետն անցնելով, Մարմուանի եւ Քամանանի գաւառներուն այրերն ու կիները գերի տարի: Ամրոցները քանդեցի, քաղաքները հըրդեհեցի: 2529 մանուկ, 8898 այր եւ 10847 կին, ընդամէնը 22,274 հոգի, նաեւ ձիեր, խաչինք եւ 17942 արջառ տարի ի բաց: Արգիստիս Մենուասեան կ'ըսէ. Այս է աւարն այն քաղաքներուն զորս գրաւեցի խալդեան ժողովուրդին համար մէկ տարուան մէջ» (Ibid, lines 15-24)

Արգիստիս իր արձանագրութեան այս սիւնակի 6-րդ տողին մէջ Խիլարուատա կամ Խիտերուատա անունը կու տայ Մալիթայի թագաւորին համար, բայց շարունակութեան մէջ տող 16 Տուալախի անունը կու տայ: Յայտնի է որ վերջինս, որ «Տուալախի որդի» կը նշանակէ, պարզապէս հայրանունն է Խիլարուատայի: Փրոֆ. Սէյս այս Խիլարուատա Տուալախին իրաւամբ կը զանազանէ Արգիստիսի որդւոյն Սարգուրիս Բ.ի յիշած Խիլարուատայէն որ Շախուխի հայրանունը կը կրէ (Sayce, No. 50, line 2): Ուրեմն Արգիստիսի ժամանակակիցը Խիլարուատա Ա.է իսկ Սարգուրիս Բ.ի ժամանակակիցը՝ Խիլարուատա Բ. եւ բաց աստի, երկուքին յիշատակութեան թուականներուն մէջտեղ առնուազն 24 տարուայ հեռաւորութիւն կայ, որ ուրիշ բաւարար պատճառ մը կը կազմէ երկու Խիլարուատաները զանազանելու (Sayce, Cuneiform Inscriptions of Van, pp. 403—4, 558, 647):

Մելիս էր Թոխմա-Սուի հին անունը, եւ քանի որ Արգիստիս Պիլիս քաղաքը կը յիշէ Մելիա գետն անցնելէ առաջ, այս քաղաքը Մալաթիոյ շատ մօտ տեղ մը ըլլալու է: Արաբկիր-Չայի կը միանան Սարը-Չիչէք Սու եւ Միրամ Չայ անուն երկու օժանդակներ. վերջին անունը շատ կը նմանի արձանագրական Մարմուանի անուան: Ուրեմն, Մարմուանի երկիրը հաւանօրէն կը բաղկանար Արաբկիրի, Ակնայ եւ Տիվրիկի շրջանակներէն: Արձանագրութեան մէջ մասամբ եղծուած անունը Քամանանի կը լրացնեն Սանտալճեան եւ ուրիշներ ալ: Քամանանի երկիրը Մարմուանի երկրէն անդին եւ հաւանօրէն անոր արեւելեան կողմն էր, կեդրոն ունենալով Կիւրին քաղաքը: Ֆորրէր սոյն Melias, անուան տեղ Kirimelias կը կարդայ, բայց նորէն Թոխմա-Սուի հետ կը նոյնացնէ: Մինչդեռ Kirimelias բնական էր համեմատել Karamalas անուան հետ, որ կը տրուէր արդի Չամանքի-Սու ըսուածին, այսինքն Սիհուն գետի բունին, որ կը բխի ներկայիս Գայնար ըսուած տեղուան մօտէն: Բայց շատ տարբերութիւն չ'ըներ: Մարմուանի եւ Քամանանի երկիրներն իրենց անուններով — թէեւ ոչ ետքի դիրքերով — կը համապատասխանեն զասական ժամանակի Morimene եւ Chammanene նահանգներուն, որոնք Կապադովկիոյ թագաւորութեան երկու կառավարչութիւնները կը ձեւացնէին: Պատմագէտները կը խորհին թէ Մորիմէնէ եւ Քամմանենէ նահանգներուն անուն տուող ժողովուրդները նախապէս Մալաթիոյ, Արաբկիրի եւ Կիւրինի մօտ տեղեր կը բռնակէին, բայց յետոյ ցեղային տեղափոխումով աւելի արեւմուտք քշուած են:

Երկու բան կը հետեւի ասկէ. ա — Արգիստիս սոյն արչաւանքին՝ Կիւրինի, Ազիզիէի ու Կեմերեկի ճամբով թերեւս հասաւ մինչեւ Ալիւս (Գըզըլ



Ըրմադ) դետի միջին ընթացքը, որ սահմանը կը կազմէր այն ատենի Փռիւ-  
դիոյ թագաւորութեան: Բ — Մելիտինէի թագաւորութեան կամ Խետացւոց  
երկրին սահմանն ալ այն ատեն դէպի արեւմուտք թերեւս մինչեւ հոն կը հաս-  
նէր. որով Մարմուանի եւ Քամանանի ցեղերը եթէ Մելիտինէի թագաւորին  
իշխանութիւնը չէին ճանչնար, զոնէ անոր զինակիցներն էին: Այսպէս Մելի-  
տինէի դահակալն ամենայն իրաւամբ կը նկատուէր Խետացւոց մեծ թագա-  
ւորը: Եւ նշանակելի է որ «նոր Հատեան» ըսուած քանդակապատկերներով  
եւ մեհենադիր արձանագրութիւններով խումբ մը յիշատակարաններ կը դրո-  
նենք ոչ միայն Մալաթիա, այլ նաեւ Քէօթիւ դալէ, Տարենտէ, Փալանիա,  
Իսփեքչիւր, Կիւրին, Գարագուշու եւ Հալուզքէօյ:

Արգիստիս Ա. ուրիշ մեծ արշաւանք մը կ'ընէ իր մայրաքաղաքէն դէպի  
արեւմուտք, Արածանիի հիւսիսային կողմէն եւ վերստին կը նուաճէ նախա-  
պէս իր հօրը Մենուասի կողմէ նուաճուած, բայց ապստամբած Խետացւոց  
երկիրները (Ծուպանի, Էւայլն) եւ զանոնք դարձեալ ուրարտական նահանգի  
կը վերածէ. իսկ անկէ վերցուած 6000 զերի զինուորներով մարդաբնակ կ'ընէ  
Արմաւիրի շրջակայքը (ՆԱԽ. ՀԱՅԱՍՏ., էջ 339—340): Այնպէս կը թուի թէ  
մինչեւ Արգիստիս Ա.ի մահը Ն. Ք. 760 Մալաթիոյ թագաւորութիւնը Ուրար-  
տուի վեհապետին հարկատու հպատակ մնաց:

Արգիստիս Ա.ի որդւոյն ու յաջորդին՝ Սարգուրիս Բ.ի արշաւանաց  
գլխաւոր մէկ թիրախն էր Մելիտինէի թագաւորութիւնը: Սարգուրիս Բ.ի  
Մելիտինէի վրայ այս նշանաւոր արշաւանքը եղած է Ն. Ք. 759 թուականին:  
Այս ժամանակուան Մելիտինէի թագաւորն էր Խիլարուատա Բ. որդի Շա-  
խուի եւ թերեւս թոռը Խիլարուատա Ա.ի: Վերջինս եւ ասոր որդին Շախու  
հաւատարիմ հարկատուներն էին եղած Արգիստիսի:

Սակայն հազիւ թէ այդ երկաթէ բազուկը վերցաւ, Խիլարուատա Բ.,  
զուցէ Սարգուրիսը անոր հօրմէն տկար կարծելով, ապստամբեցաւ Ուրար-  
տուի դէմ, եւ ըստ փրոֆ. Սէյսի (Cun. Inscr. of Van, p. 647) իրեն  
զինակից ընելով Կուէի թագաւորը, խորհեցաւ Ուրարտուի լուծն ի սպառ թո-  
թափել իր վրայէն: Սէյսի գաղափարը զուրկ չէ հաւանականութենէ. Կուէ  
դաշտային Կիլիկիան է, բայց թերեւս այս միջոցին դէպի հիւսիս կ'երկարէր  
մինչեւ Կատաւոնիա (Կոմանա կամ Շար եւ Ալպիսթան), իսկ Մելիտինէի թա-  
գաւորութեան կը պատկանէին Տարենտէ եւ Աշոտիի կողմերը. որով երկու  
թագաւորութիւնները սահմանակից կ'ըլլային: Ըստ Սէյսի՝ Կուէցիք արե-  
նակից ալ էին Մելիտինէի խետացի ժողովուրդին: Բայց արձանագրութեան  
տուածը Կա'ուրի երկիր է, զոր Սանտալճեան կը նշանակէ Արաբկիրի եւ Կիւ-  
րինի մէջտեղ, ու թերեւս աւելի մօտ է իրականութեան: Արձանագրութեան  
մէջ կը յիշուի երրորդ կարեւոր ժողովուրդ մըն ալ, Մուշանի, զոր Սանտալ-  
ճեան կը նոյնացնէ Մուշկի ժողովուրդին հետ, բայց տեղը կը նշանակէ Տիվ-  
րիկէն մինչեւ Սատաղա: Արդ, ճիշդ այս դիրքին մէջ Քսենոփոն կ'աւանդէ  
Մոսիւնեկք անուն ժողովուրդ մը, որուն անունն ալ աւելի կը համապատաս-



խանէ արձանադրութեան Մուշանի անուան: Իսկ Կա'ուրի անունը լաւագոյնս կը յարմարի Կիւրինի դասական Gauraina անուան: Եւ կարելի է խորհիլ թէ այս երկուքը Կասկա ծագումով զօրաւոր ժողովուրդներ էին:

Ինչեւիցէ, Մելիտինէի թագաւորը բաղմամբիւ զօրք առնելով ասոնցմէ եւ Կաուրիի թագաւորին հետ միասին՝ դէմ ելաւ Սարգուրիսի, եւ զուցէ չքաւաւելով անոր յարձակման՝ իրենք նախաշարձակ եղան ու Եփրատի ձախ կողմն անցնելու փութացին, բայց Իդուլուի քով յաղթուեցան չարաչար եւ փախչելով Մելիտինէի երկրին ամբողջեանց ապաւինեցան: Սարգուրիս անոնց բանակատեղին կողոպտելէ ետք, անցաւ Եփրատը եւ մտաւ Մելիդու բնագաւառը: Աւերեց ամբողջ երկիրը, կործանեց քաղաքները եւ քանդեց դրդեակ-սլաւատներն ու մեհեանները: Կ'երեւի թէ Կա'ուրիի թագաւորն այս անշարժութեանց վրայ թողուց զինակցութիւնը եւ իր երկիրը քաշուեցաւ (հմմտ. Գր. Ղափանցեան, ՈՒՐԱՐՏՈՒԻ ՊԱՏՄՈՒԹԻԻՆ, էջ 188—9): Սարգուրիս հետապնդեց այնուհետեւ Խիւարուատան մինչեւ անոր Մելիդու մայրաքաղաքը: Վերջապէս Մելիտինէի թագաւորը տեսնելով որ Ուրարտուի թագաւորին ձեռքէն ազատում չկայ իրեն՝ ոսկեղէն, արծաթեղէն, սղնձեայ եւ երկաթեայ անոթներ ընծայ բերելով անձնատուր եղաւ:

Լաւ է սոյն արձանադրութեան կարեւորագոյն տուելը հոս թարգմանաբար տալ. «Խալդիսներուն աղօթեցի, հզօր զօրութեանց, որոնք տուին Խիւարուատա Շախուեանի, Մելիթացոց ժողովուրդի թագաւորին, երկիրներն իբրեւ ընծայ Սարգուրիս Արգիստիսեանի առջեւ: ... Սարգուրիս կ'ըսէ. — Ինծի հպատակ ժողովուրդն ապստամբեցաւ՝ վստահելով Կա'ուրի երկրի թագաւորին... Չորս օրուան միջոցին հասաւ Դումեակա քաղաքին առջեւ. կըռուեցայ անոնց այրուծիոյն հետ: Միեւնոյն օրն անցայ յայնկոյս գետոյն երկիրը: Հասայ հեռաւոր Կարնիշի քաղաքը, որ Մելիթայի թագաւորութեան սահմանն է. գրաւեցի Մուշանի գաւառը, Զապչա Քաղաքը: Հոն մէկ օրուան մէջ 14 ամբոց եւ 100 դիւղ կործանեցի. ամբոցները քանդեցի, դիւղերը հրոյ ձարակ ըրի: Մեծամեծներէն 50 աղնուականներ սպատանդ առի եւ անոնցմէ հաւատարմութեան երդում պահանջեցի: Յարձակումով նուաճեցի Նիշինի, Խիւարուատայի արքունի քաղաքը, եւ զերի տարի տյրերն ու կիները: Սարգուրիս կ'ըսէ. — Արշաւանքիս ընթացքին անկէ դացի Մելիթա քաղաքը, ուր Խիւարուատան առջեւ կանչեցի եւ ան խոնարհելով գետին՝ ոտքերուս փաբեցաւ: Անոնց սպարապետի սպատանդներ եւ տուրք տալ: Իբր ընծայ ընդունեցայ ոսկի, արծաթ, սրնոյն ամաններ, եւ Բիայնայ (Վան) դրկեցի: Ան հըսպատակեցաւ ինծի հարկատու ըլլալու: Անոր ինը կայազօր բերդաքաղաքները նուաճեցի եւ իմ երկրիս կցեցի. որոնք են Հազանի, Վուրախի, Տումեակիս, Մանինու, Արուսի, Քուլբիտառնի, Տաշէ, Քուերա աստուծոյն Տաշէն, Միւլուիաս»:

Կարնիշի ըսուած սահմանադրուի քաղաքը հաւանօրէն այսօրուան Արարկիրն է կամ անոր մօտ աւան մը: Զապչա քաղաքը կրնանք նոյնացնել դա-



սական ժամանակներու Sabus բերդաքաղաքին հետ, Արարկիրէ դէպի հիւսիս-արեւելք արդէ Շեփիֆ գիւղաւանով ներկայացուած: Նիշինի արքունի քաղաքը թերեւս արդէ Արկային տեղը կամ մօտն էր: Ինը կայազօր բերդաքաղաքները, զորս Սարգսուրիս նուաճեց եւ Ուրարտուի սկտութեան կցեց, Մելիտինէի հաւատարիմ մնացած դաւառներուն կեդրոններն էին Եփրատի արեւելք եւ ստորին Արածանիի երկու կողմերը, այսինքն՝ այդ երկրամասին մէջ, որ հայկական պատմութեան մէջ «Ծոփք Շահունաց» անունը կը կրէր: Ըստ Բելքի հաւանական կարծեաց՝ այդ Շահունաց կոչումն ալ Շախուի նահապետի գերդաստանէն ժառանգուած է: Գրաւուած այս ինը բերդաքաղաքներուն մէջ մասնաւորապէս ակնառու է Դումեսկիս, զոր Սէյս, Սանտալճեան եւ այլք կը նոյնացնեն հայկական Զմշկաձագ անունին հետ, բայց զոր Լէյման հառապ, Հայր Տաշեան եւ ուրիշներ աւելի հաւանական կը սեպէին նոյնացընել դասական Դումիսա ամրոցին հետ (արդէ Քէօմիւրիան), որ Մալաթիայէ խորքերէ տանող ճամբուն վրայ Եփրատի նշանաւոր կամուրջին արեւելեան ծայրն ըլլալով, Սարգսուրիսի արձանագրութիւնն ալ անոր մօտ փորագրուած է: Հագանի թերեւս հայկական Լուսաթառիճի եւ արդէ Քեպանմատէնի կը համապատասխանէ: Վուրախի թերեւս հայկական Գաւրէք դաւառի բերդն էր: Ըստ Ղափանցեանի (ՈՒՐԱՐՏ. ՊԱՏՄ. էջ 127)՝ Քուլպիտանի պէտք է համեմատել Թագլաթփալասար Ա.ի յիշած նայիրեան Կուլպարգինիի հետ, որ հայկական Կողոբերդ եւ արդէ Քղի անունն է նոյնանուն դետի վրայ: Իսկ զոյգ Տաշէ ամրոցները պէտք է փնտռել Հեշտենից կողմերը՝ ըստ Թագլաթփալասար Գ.ի արձանագրութեանց:

Սարգսուրիս Բ. փառասիրութիւնն ունէր իր ձեռքն անցընելու արեւմըտեան Ասիոյ կարեւոր առեւտրական պողոտաները եւ այսպէս զարգացընելու իր տէրութեան արտաքին վաճառականութիւնը (հմմտ. Ղափանցեան, ՈՒՐԱՐՏ. ՊԱՏՄ., էջ 178): Սէյսի, Լինչի եւ անոնց պէս խորհող պատմագէտներու կարծիքով, Մելիտինէի թագաւորութեան վրայ Սարգսուրիսի յաղթութիւնը թանկագին առիթ մը կ'ընծայէր իրեն Միջերկրականի ափերն իջնելու: Ասոնք կը խորհին թէ Սարգսուրիս Բ. Մելիտինէի նուաճումն աւարտելէ ետք յարձակեցաւ Կուէի թագաւորութեան վրայ ալ՝ թերեւս Թագլաթփալասար Ա.ի փորձած ճամբով, եւ արշաւեց Ալուսիա (Ալոշա) դաւառը, որ է Կիլիկիոյ «Ալիւսեան դաշտը», այժմ Զուգուր Օվա կոչուած: Ալուսիա երկիրը Սարգսուրիս Բ. յիշած է Տ-րդ տողին մէջ իր մէկ բեկորային արձանագրութեան, զոր Լինչի ուղեկիցը՝ աշխարհագրագէտ ու երկրաբան Օսվալդ գրտած է Հայաստանի Պինկէօլ լեռան վրայ եւ փրոֆ. Սէյս վերծանած ու բացատրած Felix Osvald (*The Geology of Armenia*, London, 1906, pp. 214—5), Բելք եւ Լէյման-Հառապ ալ այս ընթերցումը կ'ընդունին:

Բայց Սարգսուրիս այսչափով չզոհացաւ եւ յաջորդ արշաւանքն ուղղեց Ասորիքի վրայ: Հարկաւ Մալաթիոյ ճամբով սլիտի քալէր: Ուրարտուի Թագաւորն իր նախկին արշաւանքին մէջ Մալաթիայէ անդին գործածեր էր ա-



րեւելեան Կատաւոնիոյ ճամբան, որ Ալպիսթանի եւ Կոկիսոնի վրայէն անցնելով՝ Սսոյ մօտ կ'իջնէր Կիլիկիոյ դաշտը: Այս անգամ ընտրեց երկրորդ ճամբան, որ արեւելեան Տաւրոսի կիրճերէն կ'իջնէր Կոմմազինէ: Սարգուրիս Ն. Ք. 751-ին արշաւեց Պուլուա կամ Բուլուա երկրին դէմ, որուն Լուպլիոննի անուն ամրացեալ եւ թագաւորական քաղաքին մէջ ան արձանագրութիւն մը կը կանգնէ. նաեւ բերդ մը շինելով՝ մէջը ուրարտացի կայազօր կը դնէ: Բուլուա երկիրը Մելիտինէի եւ Կոմմազինէի մէջտեղ արեւելեան Տաւրոսի գլխաւոր լեռնանցքները բովանդակող գաւառն է, ուր Բուլա բերդը՝ արդի Պուլամ-Սու գետակին վրայ, կը յիշուի իբրեւ խաչակրաց ամենահիւսիսային կալուածը (Barhebraeus, **Chronography**, անգլ. թարգմ., էջ 350): Իսկ Լուպլիոնի քաղաքը հաւանօրէն արդի Մամուրակա ըսուած տեղն է:

Հետեւեալ տարին Ն. Ք. 750 Սարգուրիս կ'արշաւէ Կումախա երկրին դէմ եւ իրեն կը հնազանդեցնէ Կումախացիներու Կուստասպիլի թագաւորը: Կը դրաւէ երկրին Վիտանի քաղաքը, որ թագաւորական ու ամրացուած էր: Նաեւ Խալպա քաղաքը, որ նոյնպէս թագաւորական ու ամրացուած ըլլալէ զատ, ջուրի (Եփրատի) մօտ էր. ու վերջապէս Պարալա մայրաքաղաքը, ուր «նա (= Կուստասպիլի) եկաւ ինծի մօտ», կ'ըսէ Սարգուրիս, «ծնրադրեց, եւ ես հարկադրեցի որ նա ինծի տայ 40 մանա մնաս ձոյլ ոսկի, 800 մանա արծաթ, 3000 զգեստ, 2000 աման սղինձ, 1530 աման սլրոնգէ»: Կումախա Ասորեստանցւոց Կումմուխ ըսած երկիրն է, դասականաց Կումմագինէն. եւ նշանակելի է որ քիչ ետք Ասորեստանի Թադլաթփալասար Գ. թագաւորը Կումմուխի Կուշտաշպի (Վշտաշպ) թագաւորը կը յիշէ Ուրարտուի Սարգուրիս թագաւորի զինակիցներուն շարքին, որ այսպէս կը նոյնանայ Սարգուրիսի Կուստասպիլի ըսուածին հետ: Վիտանի ամրացուած քաղաքը կրնանք նոյնացընել արդի Քեախթա բերդաքաղաքին հետ, Խալպա — ըստ Ասորեստանեայց՝ Խալպի — Սամոսատի հետ, որովհետեւ տեղւոյն բնիկ եւ իրազեկ անձի մը վկայութեամբ Սամսաթի մէկ արուարձանը մինչեւ հիմա Խալպա անունը կը կրէ. իսկ բուն մայրաքաղաք Պարալան է, թերեւս Հռոմայեցւոց օրով նշանաւոր Perrhe քաղաքը, որուն աւերակներուն մօտ շինուած է ետքի Հուսնրմանուրը, արդի Ատրեաման աւանը: Սարգուրիսի առած տուրքի ճոխութենէն կրնանք հասկնալ թէ Կումմուխը Մալաթիայի չափ, դուցէ անկէ աւելի, հարուստ ու զարգացած երկիր էր այն ատեն:

Սարգուրիս երկու տարի յետոյ (Ն. Ք. 748), նորէն Մալաթիայի ճամբով, Ասորիք վերադարձաւ իր նուաճումները լրացնելու համար: Ուրարտուի թագաւորը կը նուաճէ Խուրա եւ Նուշինի քաղաքները՝ Ռիխիշա երկրին մէջ, ապա Բիէ քաղաքին գաւառը, որ Բաշատանի անուն թագաւորի մը կը պատկանէր, եւ 12,600 մանուկ, 1800 այր մարդ, 7700 կին, ընդամէնը 22,600 հոգի գերի կը տանի՝ պատերազմի մէջ սպաննուած թշնամի զինուորներէն զատ, նաեւ կողոպուտ կ'առնէ 352 ձի, 4547 արջառ եւ 13,060 ոչխար: Յետոյ կը նուաճէ Իրսինի կամ Սուրսինի եւ Մելինէ կամ Մելիտա քաղաքները, ու



ընց թագաւորն իր առջեւ կու դայ հպատակութիւն յայտնելու (N. Adontz, *Histoire de l'Arménie*, p. 170): Ռիխիշա երկիրը հաւանօրէն կ'երեւի թէ Մելիտինէի արեւմտեան կողմն էր, անոր Նուշինի քաղաքը հաւանօրէն նոյնն է Քէօմիւրխանի արձանագրութեան յիշած Նիշինի քաղաքին հետ, զոր վերեւ նոյնացուցինք արդի Ակրայի հետ: Խուրա քաղաքն անկէ անդին էր, թերեւս Տարենտէ եւ Աշոտիի կողմը: Ուրեմն Ռիխիշայի (թերեւս նոյն ընդ Լուխզուի) գաւառը մասամբ կը գտնուէր Թոխմա-Սուի հովտին մէջ: Բաշատանի հաւանօրէն Տարալցի թագաւորներէն մէկն էր, եւ անոր երկիրը թերեւս պէտք է Մալաթիայէ դէպի Մարաշ եւ Այնթապ տանող կարաւանի ճամբուն վրայ փնտռել: Բաշատանի թագաւորին անուան հետ համեմատելի է «Բասանաստան, որ է Բիշան» տեղանունը, զոր մեր Ղեւոնդ պատմագիրը կը յիշէ (էջ 188—9) Կիլիկիոյ հետ միասնաբար (Տես Տաշեան, ՀԻՆ ՀԱՅԱՍՏԱՆԻ ԱՐԵՒ-ՄԸՏԵԱՆ ՍԱՀՄԱՆԸ, էջ 97): Արդի Կէօղենէ եւ Սիւրկիւ հանդրուաններով այդ պողոտային կատարելապէս տիրանալ Ուրարտուի աշխարհակալ թագաւորին համար անհրաժեշտ էր: Ուստի Բաշատանի թագաւորին պատկանող Բիէ քաղաքը կրնանք նոյնացնել արդի Վերանշէնիւրի եւ հին Զուպարտայի հետ: Սարգուրիս Բ. կ'երեւի թէ հարկ զգաց վերագարձի ատեն Մելիտինէի երկրէն երկու ստանիկ քաղաքներու վրայ ալ իր ոյժը ցուցնել, որպէսզի այդ կարեւոր երկրի թագաւորն իր հպատակութեան մէջ հաստատէ. մանաւանդ հաւանական է որ այս միջոցին հոն դահակալի փոփոխութիւն տեղի ունեցած էր, այսինքն Շախուի որդի Խիլարուատա մեռած եւ տեղը Սուլումալ անուն մէկը անցած էր:

Սարգուրիս Բ. այս կամ յաջորդ մէկ արշաւանքին իրեն հպատակեցուցած է նաեւ Կատուկի արամէացի իշխանը Բար-գա'եա, որու երկիրը կը գտնուէր արդի Մարաշէ դէպի արեւելք Կէօլպաշը ըսուած շրջանակը, զոր միջնագարեան արար աշխարհադիրներ Քայթուկ կ'անուանեն, որ էր նշանաւոր Հատաթ (Adapha) քաղաքը, որ Տաւրոսէ վար իջնող երկու կարեւոր լեռնանցքներու բանալին էր: Ասոր վրայ Ուրարտուի թագաւորին հպատակեցան Գուրգոււմ (Մարաշ), Շամալ (Ջենճիրլի) Կարֆեմիշ (Ճարապլուս), Խատտինա (Հաթայ), վերջապէս Եփրատի ու Միջերկրականի միջեւ տարածուող բոլոր խեղտական ու արամէական ծագումէ իշխանութիւնները: Սարգուրիս Բ. ստիպեց Հալէպի մօտ Արփատի (այժմ Թիւլ-էրֆատ) իշխանը՝ Մատիիլուն ընդունիլ իր գերիշխանութիւնը եւ Կատուկի իշխանին հետ կրնաքել դաշնագիր մը, որուն արամերէն բնագիրը գտնուած է Ճապուլ աղի լճին մօտ Աֆիրէ-Սունճին գիւղը. եւ այդ արձանագրութենէն կ'իմանանք որ մինչեւ Եգիպտոսի սահմանադրուիսը ամբողջ Սիւրիա եւ Պաղեստին ենթարկուած էին Ուրարտուի թագաւորին ազդեցութեան (ՆԱԽ. ՀԱՅԱՍՏԱՆ, էջ 417—8):

Ասորեստանի նոր դահակալող թագաւորը՝ Թադլաթփալասար Գ. չուղեց ասոր հանդուրժել. ուստի իր իշխանութեան երրորդ տարին (743 Ն. Ք.)



անցաւ Եփրատը եւ եկաւ պաշարել Արփատը, որուն թագաւորը Մատիիլու Սարգուրիս Բ. ի ամենազլիսաւոր դաշնակից-հարկատուն էր Ասորիքի մէջ: Սարգուրիս ասոր վրայ մեծ բանակ մը առած՝ Մալաթիոյ ճամբով փութաց Սիւրիա իջնել՝ իր բոլոր դաշնակից-հարկատուներն ալ ի ղէն կոչելով: Իր դաշնակիցներուն մէջ յանուանէ կը յիշուին Արփատի թագաւոր Մատիիլուէն զատ, Մելիտինէի արքայ Սուլումալ, Գուրդումի (Մարաշ) արքայ Տարխուլարա, Տուրալի (Ալպիսթան) արքայ Վասուրմի, Կումմուխի արքայ Կուշտասպի, տակաւին ուրիշներ ալ կային, որոնց անունները եղծուած են արձանադրութեանց մէջ: Դաշնակից միացեալ զօրքը բանակեցաւ Կումմուխի խալալի եւ Կիշտան դաւառներուն մէջտեղը, Սինդի դետին քով, դաշտի մը մէջ: Այս դետը Եփրատին արեւմուտքէն միացող Կէօքսու բազուկն է, որ դասական հեղինակաց քով Singa անունը կը կրէ եւ Ասորիներուն ու Հայոց քով՝ Շնջէ: Ուրեմն խաչակրաց պատերազմներուն մէջ ալ հռչակուած Քեսունի ստորին դաշտավայրն էր ռազմադաշտը (Տես ՄԱՏԹ. ՈՒՌ. ՀԱՅԵՑԻ, տպ. Երուսաղէմ, էջ 443, 576. Barhebraeus, p. 251, ՄԻՍԱՅԷԼ ԱՍՈՐԻ, էջ 354):

Թագալաթփալասար փութաց Սարգուրիսն ու զինակիցները դիմադրաւել հոս: Ամբողջ օր մը տեւեց սոսկալի ճակատամարտը եւ կ'երեւի թէ Շամալի Պաննամու եւ Կարքեմիշի Պիսքիս թագաւորներուն դաւաճանութեամբ էր որ վերջապէս յաղթութիւնը շահեցաւ Ասորեստանի թագաւորը, որ կ'ըսէ թէ 72,900 դերի առած է Սարգուրիսի եւ անոր զինակիցներուն բանակէն: Ասիկա սա՛ միայն կրնայ նշանակել որ Սարգուրիսի հարկատու զինակիցներէն կարեւոր դանդուած մը ճակատամարտի վճռական քապէին Ասորեստանի թագաւորին կողմը անցեր էր:

Սարգուրիս Բ. ամբողջ օրը ճակատամարտին ընթացքը ղեկավարելէ ետք, երբ դաւաճանութեան արդիւնքը տեսաւ, գիշերուան մութը կոխելուն պէս, ձիով փախաւ դէպի հիւսիս, Սիւրակ (այժմ Պեկտաղ, հիւսիսէն քով Mons Pieria), դժուարանցանելի լեռներէն անդին Մալաթիոյ դաշտը: Թագալաթփալասար կ'ըսէ թէ երբ ինք իմացաւ Ուրարտուի թագաւորին փախուստը, զայն հալածեց «մինչեւ Եփրատի կամուրջը, որ իր երկրին սահմանազլուին է»: Այս կամուրջը առանց տարակոյսի նոյն է դասական հեղինակներու քով յիշուած Դոմիսայի հռչակաւոր կամուրջին հետ՝ ի Քէօմիւրիսան, Մալաթիայէն խորքերդ տանող պողոտային վրայ:

Աւելի յառաջ չդոցած, հոս յարմար է պզտիկ շեղում մը ընել: Ուրարտուի թագաւորը Եփրատէ արեւելք խեղտական դաւառները Մելիտինէի թագաւորին ձեռքէն առած է եւ իր պետութեան կցած էր. որով Սարգուրիս Բ. իր արձանադրութիւնն իսկ կը քանդակէ Իզուրի եւ Քէօմիւրիսանի մէջտեղ ժայռի մը երեսը. եւ հոս Թագալաթփալասար Եփրատի կամուրջը Սարգուրիսի տէրութեան սահմանազլուիւր կ'անուանէ: Գրեթէ հարիւր տարիէ ի վեր Ուրարտուի թագաւորները Մելիտինէի թագաւորութեան վրայ երբեմն արշա-



ւանքներ ընելով եւ անկէ դաւառներ յափշտակելով հանդերձ, անոր անկախութիւնը յարգած, Եփրատէ արեւմուտքի երկիրները անոր թողած եւ միայն տարեկան թեթեւ հարկ մը պահանջած էին: Բայց պիտի տեսնենք որ Թագլաթիալասարի յաղթութեան վրայէն 40 տարի չանցած, Ասորեստան պիտի ջնջէ Մալաթիոյ անջատ թագաւորութիւնը: Արդ, եթէ Մալաթիոյ Սուլումալ թագաւորն ալ Սարգուրիս Բ.ի դէմ դաւաճանողներէն մէկն էր, մեծ անմտութիւն ըրաւ, իր իսկ երկրին շահուն դէմ գործած եղաւ եւ ինչպէս առածը կ'ըսէ՝ տապալկէն կրակին մէջ ցատքեց:

Թագլաթիալասար Գ. Ուրարտուի Սարգուրիս Բ. թագաւորին վրայ իր մեծ յաղթութենէն անմիջապէս ետք դարձաւ Արփատը վերստին պաշարելու: Երբ երեք տարուան պաշարումէն ետք Արփատ ինկաւ, հոն փութացին Եփրատէ արեւմտեան բոլոր երկիրներու թագաւորները իրենց հպատակութիւնը մատուցանելու Ասորեստանի վեհապետին: Թագլաթիալասարի Տարեգրութեանց արձանագրութիւնը ճիշդ հոս սաստիկ վնասուած ըլլալով, տուրք մատուցանողներու ցանկէն հազիւ վեց թագաւորներու անուններն ընթեռնելի են: Սակայն գրեթէ տարակոյս չի վերցներ թէ Մալաթիոյ թագաւորը Սուլումալ արդէն Ասորեստանի հպատակողներէն մէկն էր: Հարկատուաց երկրորդ ցանկը, որ Ք. Ա. 738 թուականին կը վերաբերի, ամբողջական է. հոս կը յիշուին իրարու ետեւէ «Գուրգումի (Մարաշ) Տարխուլարա, Մելիդդուի Սուլումալ, Կասկայի Դատիլու, Տարալի (Կատաւոնիա) Վասուրմի, եւն. (Annales 150—7 տողեր):

Հոս նոր անուն մը կ'երեւնայ՝ Կասկայի Դատիլու, որ մասնաւոր ուշադրութեան արժանի է: Կասկայի երկիրը Թագլաթիալասարի երկրորդ յաջորդին՝ Սարգոն Բ.ի արձանագրութեանց մէջ շատ յաճախ կ'երեւի եւ այդ յիշատակութիւններէն հաւանական կերպով կ'եզրակացուի թէ այս ժամանակ յիշուած Կասկա երկիրը, Մալաթիայէն հիւսիս կը գտնուէր, Կիւրինի, Արաբկիրի եւ Ակնայ շրջանակները բովանդակելով:

Թագլաթիալասար Գ.ի իշխանութեան վերջին տարիներուն Ասորեստանի դէմ ապստամբութիւններ ելան Մելիտինէի, Տարալի եւ Կուէի երկիրներուն մէջ, բայց անյաջող կերպով եւ ըմբոստացողներուն համար կործանարար հետեւանքով: Ամենէն աժան պրծողն եղաւ Տարալ, որ Հուլլի անուն՝ Ասորեստանի հլու հպատակ ուրիշ թագաւոր մը ստացաւ. Կուէի երկիրը (դաշտային Կիլիկիա), վերածուեցաւ Ասորեստանեան նահանգի մը. իսկ Մելիտինէի թագաւորութիւնը կիսուելով, մէկ մասը շնորհուեցաւ Կաւմանուի կամ Խաւմանուի թագաւոր Գունգիւանին, եւ միւս մասը ուղղակի նահանգի վերածուեցաւ:

Մելիտինէի շրջանակին նուաճման վերաբերեալ հետաքրքրական տեղեկութիւն մըն ալ կայ Թագլաթիալասար Գ.ի Տարեգրութեանց բեկորներուն մէջ. «Քութիի երկրէն եւ Բիտ-Սանգիբուտիի երկրէն 457 կանայք բնակեցուցի Տուհիւմի քաղաքին մէջ: Քութիի երկրէն եւ Սանգիբուտիի քաղաքէն 555



կանայք ալ բնակեցուցի Տիւլ-Գարմի քաղաքին մէջ: Չանոնք Ասորեստանցւոց պէս սեպեցի: Ասորեստանեայցը նման ծառայութեան կատարումը պարտադրեցի անոնց»: Այս կը նշանակէ որ Թադլաթփալասար արեւմտեան սահմանադրութիւն այս քաղաքներուն մէջ ասորեստանցի կայազօր դրած է, եւ Մեղացւոց սահմանադրութիւն քաղաքներէն ալ երկու խումբ գերի կիներ կը բերէ անոնց ծառայելու համար: Պատմագիտաց ընդունածին համեմատ՝ Տիւլ-Գարմէ կամ աւելի սովորական գրութեամբ՝ Տիւլ-Գարիմի անունը վաղեմի մեծ խատտի կայսրութեան ժամանակի Տիգարամա անունէն աղաւաղում մըն է, եւ արդի Կիւրին (հինն Gauraina) քաղաքը կը ցուցնէ, եւ թէ հայկական Թորգոմ աղգանունն ալ ասկէ ծագում առած է: Իսկ Տուհիմմի քաղաքն է Կիւրինէն քիչ մը արեւելք Թոխմա աւանը, որմէ կ'առնէ Եփրատի Մելաս կամ Կաւկասա անուն բաղուկը իր արդի Թոխմա-Սու կոչումը:

Տարակոյս չկայ թէ Ասորեստանցւոց Կամմանու կամ Խամմանու կոչած երկիրը նոյն է Ուրարտուի Արգիստիս Ա. Թադաւորի նուաճած Քամմանի երկրին հետ: Մարմուանի եւ Քամանանի երկիրներուն բնակչութիւնը հաւանօրէն Կասկեան ծագում ունէր. բայց շատ կանուխէն չափով մը հատեանացած էր: Կամմանուի այս Կասկաները կ'երեւի թէ Սարգուրիս Բ.ի հետ պայքարի միջոցին Ասորեստանի քաջալերութիւնը վայելելով, զօրացան իրենց Դատիլու Թադաւորին ներքեւ, որ այնուհետեւ միշտ Ասորեստանի հաւատարիմ վասալ մնացած կ'երեւի: Դատիլուի յաջորդն եղած ըլլալու է ուրեմն անոր քաղաքական ուղղութեան հետեւող Գունդինան Թադաւորը Խամմանուի: Ասի Ասորեստանի հնազանդ հարկատու մնաց Թադլաթփալասար Գ.ի օրերէն մինչեւ Սալմանասար Ե.ի վերջին տարին (722 Ն. Ք.):

Բայց այդ տարին, մինչ Ասորեստանի բանակները սաստիկ զբաղած էին Պաղեստինի մէջ ու եգիպտական սահմանադրութիւն վրայ, մէկ կողմէն Մուշկիի Միտա (Փոխդիոյ Միդաս Գ.) եւ միւս կողմէն Ուրարտուի Ռուսաս Ա. Թադաւորներուն դրամամբ, նոր խմորումներ եւ խլրտումներ յառաջ եկան Տաւրոսի եւ Անդիտաւրոսի լեռնաշխարհներուն մէջ: Կամմանուի Թադաւորը Գունդինան, որուն յանձնուած էր նաեւ Մելիտինէի կառավարութիւնը, թերացաւ իր հպատակութեան պարտեաց մէջ: Այն ատեն, Սարգոն կ'երեւի թէ Սալմանասար Ե.ի սպարապետի եւ Կուէի սահմանապահ կուսակալի հանդամանքով, ղրկուեցաւ Գունդինանի վրայ, որ յաղթուելով երկրէն վտարուեցաւ եւ հաւանօրէն Փոխդիա ապաստանեցաւ՝ Ալիւս գետէն անդին: Այսպէս, ոչ միայն Մելիտինէի երկիրը, այլ նաեւ բուն իսկ Կամմանուի Թադաւորութիւնն իր ձեռքէն առնուելով, տրուեցան Տարխոււնազի անուն յայտնապէս հին խեռական ցեղէն իշխանի մը: Բայց առանձին չէր այս դէպքը, հապա մաս կը կազմէր աւելի լայնատարած շարժումի մը:

Խիստ ուշագրաւ դէմք մըն է «Մուշկիի Թադաւոր Միտա», — ինչպէս Սարգոն զայն կ'անուանէ, — որ ճիշդ այս միջոցին արեւմտեան հորիզոնին վրայ կ'երեւնայ իրրեւ փոթորկալից ամպ մը: Սա այնչափ հզօր իշխան մըն



էր որ հեռաւոր Կարթեմիշի թագաւոր Պիսիրիս Ն. Ք. 717-ին անոր դեսպաններ ղրկեց եւ հպատակութիւն կամ գոնէ զինակցութիւն առաջարկեց, եւ Ուրարտուի ահեղ ինքնակալը Ռուսաս Ա. ալ զայն ամենակարեւոր անդամը կը սեպէր Ասորեստանի դէմ իր կազմած զինակցութեան: Արդէն Վինքլըր եւ անոր հետեւելով Մասիերօ, Կարսթանկ, Օլմսթէր, Ն. Ադոնց եւ ուրիշներ կ'ընդունին թէ Մուշկիի Միտան նոյն ինքն Փռիւզիոյ Միդաս Գ. թագաւորըն էր: Ոմանք ասկէ հետեւցնելով կ'ըսեն թէ Մուշկիները եւ Փռիւզացիք միեւնոյն ազգն ու ժողովուրդն են: Մենք զայս բոլորովին ուղիղ չենք դտներ:

Թադլաթփալասար Գ.ի եւ Սարդոն Բ.ի արձանագրութիւններէն կը տեսնենք որ այս ժամանակ Մալաթիայէ անմիջապէս արեւմուտք կը բնակէին Տաբալունները, որոնք բռնած էին ետքէն Կատաւոնիա կոչուած ամբողջ երկրամասը: Ասոնցմէ արեւմուտք, գլխաւորապէս լեռնազաւատները բռնած էին Խիլակկուներ, այսինքն՝ ապագայ Կիլիկեցւոց նախահայրերը. այս դաւառներն էին Մուհաճիրէ սկսեալ մինչեւ Զամանթի-Սուրի եւ բուն Սիհունի (Սարոս) միացած տեղը եւ Արգէոս լեռան հարաւէն մինչեւ արդի Պողանդի, երկըրին կեդրոնն ըլլալով արդի Ֆարաքցին աւանը, որուն տեղն էր հին Դաստարկոն, եւ ուր նշանաւոր «Հատեան» յիշատակարաններ կան: Խիլակկուէն աւելի անդին էր Մուշկիներուն երկիրը, որ Կեսարիա-Մաթաքի գիւղէն դէպի Իկոնիոն կը տարածուէր, կեդրոն ունենալով արդի Քիլիսէ Հիսարը, որ է հինն Տիւանա (Tyana) եւ որու գաւառը «Փոքր Ասիոյ Դամասկոսը» կոչուած է՝ իր արտակարգ բարերեր ուխտսիր մը հանդամանքովը: Արդ, կ'երեւի թէ Միտա (Փռիւզիոյ Միդաս Գ.ը) աշխարհակալութեամբ կամ ժառանգաբար տիրացած էր Մուշկիներու (Մոսոքեանց) աշխարհին. եւ քանի որ Մուշկիները Ասորեստանցւոց հնուց ի վեր ծանօթ էին իբրեւ կեդրոնական Փոքր Ասիոյ հզօր ժողովուրդ մը եւ քանի որ Մուշկիներու երկիրը Ասորեստանցւոց ամենամօտ մասն էր ժամանակակից Փռիւզիոյ, հետեւաբար Ասորեստանցւոց կողմէն ամբողջ Փռիւզիոյ քաջածանօթ անունով մը «Մուշկիներու երկիր» յորջորջուելը շատ բնական էր:

Նոյնինքն Միդասի անունը պարունակող փռիւզերէն արձանագրութեան մը Տիւանա (Քիլիսէ Հիսար) գտնուելը ապահով ապացոյց մըն է, որ Տիւանիտիսի երկիրը ստուգիւ Փռիւզիոյ թագաւորութեան կը պատկանէր այս ատենները. որով սեպագիրներու «Միտան» Փռիւզիոյ Միդաս թագաւորին հետ նոյնացնելուն դէմ որեւէ առարկութիւն չի կրնար ըլլալ: Բայց Միդաս Գ. չոկ Մոսոքեանց աշխարհն իր Փռիւզիոյ թագաւորութեան կցելով չէր դոհացած, եւ այս աշխարհակալ թագաւորին ներքեւ Փռիւզիա ահագին ծուալում ունենալով, իսկապէս կայսրութեան մը ձեւ առած էր: Արդէն իր անմիջական նախորդները Ալիւս գետի աղեղին ներքի գաւառները գրաւած էին մինչեւ ապագայ Փոքր Հայքի սահմանները: Միտաս Գ., ինչպէս կրնանք Սարդոն Բ.ի արձանագրութիւններէն մականերէլ, կրցած էր նաեւ նուաճել Խիլակկուներու եւ Տաբալուններու երկիրները մինչեւ Զահանի ահնադրիւրները եւ վերջէն



«Ապառաժուտ Կիլիկիա» ըստած դաւառներն ալ նուաճելով՝ հասած իջած էր մինչեւ Կուէի երկիրը կամ դաշտային Կիլիկիա:

Միտայի այս արշաւանքները եղած էին Ն. Ք. 723—722 թուականներուն եւ Սարգոնին առնուազն եօթը տարիներ պէտք եղան մինչեւ որ կարողացաւ Միտան ետ մղել այս դրաւուած երկիրներէն: Միեւնոյն ատեն՝ Ն. Ք. 717-ին ջնջած էր Կարքեմիշի թագաւորութիւնը, հին հզօր Խետացոց այդ վերջին շառաւիղը՝ Պիսիրիսը շղթայակապ դերի տանելով ի Նինուէ, Ն. Ք. 713-ին ալ ջնջեց Տաբալի թագաւորութիւնը, նոյն վարմունքը ցուցնելով անոր Ամբարիտի թագաւորին, որոնք երկուքն ալ Միտայի կողմը բռնելով՝ ապրտամբեր էին Ասորեստանի դերիշխանութեան դէմ:

Յաջորդ տարին (Ն. Ք. 712) աւելի մեծ ապստամբութիւն մը պայթեցաւ: Մելիտինէի թագաւորը Տարխունազի, որուն յանձնուած էր նաեւ Խամմանու կամ Կամմանու լայնատարած երկրին կառավարութիւնը՝ նախորդ Գունդինան թագաւորին վտարումէն ետք, հետեւեցաւ Տաբալի Ամբարիտի թագաւորի քայլերուն, միեւնոյն ողբերգական հետեւանքներով: Կերեւի թէ Տարխունազի ալ դիմեր էր Միտային եւ Ուրարտուի մէջ նոր դահակալող Արդիստիս Բ.ին: Բայց անոնցմէ ոեւէ օգնութիւն հասնելուն չմնացած՝ Սարգոն յարձակեցաւ Մելիտինէի երկրին վրայ եւ պաշարմամբ առաւ ու կործանեց Մելիդու մայրաքաղաքը: Տարխունազի ինքն ապաստանած էր Տիւլ Գարիմմու (արդի Կիւրին) բերդաքաղաքին մէջ, զոր նաեւ խստիւ պաշարեց Սարգոն եւ անօթութեամբ ստիպեց անձնատուր ըլլալու: Տարխունազի թագաւորն իր ազնուականներուն հետ երկաթի շղթաներու զարնուելով դերի տարուեցաւ Ասուր քաղաքը, նոյնպէս իր կիներն ու որդիները ու աղջիկները: Իր 5,000 զինուորներն ալ առնուեցան Ասորեստանի բանակին մէջ: Այսպէս վերջացաւ Մալաթիոյ բնիկ հատեան թագաւորութիւնը:

Յարմար է մէկ ամփոփ ցանկը տալ այս գլխուս մէջ յիշուած Մալաթիոյ թագաւորներուն: Առանց հոս նկատի առնելու Մալդիյայի վրայ Ն. Ք. 1250—1200 թուականներուն իշխած գեղարուեստասէր թագաւորը, որու «հատեան» մեհենագիրներով գրուած անունը Սուլումիլէ կը կարդան, եւ Թագլաթիալասար Ա.ի շուրջ 1110 Ն. Ք. յիշած Ալու կամ Ալլու թագաւորը, Սալմանասար Գ.ի օրէն մինչեւ Սարգոն Բ.ի օրը՝ Ասորեստանեայց եւ Վանի արձանագրութիւններուն մէջ յիշուած տասը իրերայաջորդ թագաւորներն ունինք Մալաթիոյ.—

1.— Լալլի, Սալմանասար Գ.ի կողմէն յիշուած՝ Ն. Ք. 854—836-ին:

2.— Սուլումալ Ա. (Suliekhavali) Ուրարտուի Մենուասինկողմէն շուրջ Ն. Ք. 800-ին յիշուած Բալուի արձանագրութեան մէջ: Բայց կարելի եւ մինչեւ իսկ հաւանական է որ Լալլիի եւ Սուլումալ Ա.ի մէջտեղ Մալաթիոյ ուրիշ թագաւոր մը իշխած է:

3.— Տուալաս:

4.— Խիլարուատա Ա., որդի Տուալասի, Ուրարտուի Արդիստիս Ա.ի



Տարեդրութեանց մէջ յիշուած, Ն. Ք. 782-ին:

5.— Շախու. Տուալասի եւ Շախուի համար առանձին յիշատակութիւն չունինք թէ թագաւոր եղած են, բայց ժամանակագրութիւնը դժուարութիւն չի յարուցաներ անոնց ալ թագաւորած ըլլալուն:

6.— Խիլարուատա Բ. որդի Շախուի, Սարգուրիս Բ. Արդիստեանի կողմէն յիշուած Ն. Ք. 758-ին, Իզուրի արձանագրութեանց մէջ:

7.— Սուլումալի Բ., Թագլաթիալասար Գ.ի կողմէն յիշուած Ն. Ք. 743 եւ 738 թուականներուն:

8.— Դադիլու՝ թագաւոր Կասկայր, Թագլաթիալասար Գ.ի կողմէն յիշուած իբրեւ Սուլումալ Բ.ի ժամանակակիցը, որու կառավարած աշխարհը սակայն Մելիտինէի նախկին ընդարձակ կալուածներէն կտրուած կազմուած է:

9.— Գունգիւան՝ Խամմանուի թագաւոր, թերեւս Դադիլուի որդին, որ ըստ Սարգոն Բ.ի արձանագրութեանց՝ Մալաթիոյ վրայ ալ իշխած է Ն. Ք. 730—722 թուականներուն:

10.— Տարխունագի, նոյն Սարգոնի կողմէն յիշուած, թերեւս որդի Սուլումալ Բ.ի. Ն. Ք. 722—712 թուականներուն իշխած Մալաթիոյ հետ Խամմանուի երկրին վրայ ալ:

Սուլումիլի կամ Սուլումալ — Սուլիէհաւալի, ինչպէս նաեւ Լալլու կամ Լալլի անունները, Խատտինայի Սալալուլու թագաւորին անուան պէս, հաւանորէն համառօտուած ձեւերն են վաղեմի Հաթեանց մեծ աշխարհակալ Սուրբիլուլիումա թագաւորին անուան, զոր ժամանակակից Եգիպտացիք Սապլէլ կը հնչէին:

## Ե.

### ՄԵԼԻՏԻՆԷ ԱՍՈՐԵՍՏԱՆԵԱՅՅ ՆԱՀԱՆԳ

Տարխունագիի գերեզմարութենէն ետք, բուն Մելիտինէի թագաւորութիւնը կործանեցաւ, եւ երկրին մէկ մասը Մելիդու քաղաքին հետ շնորհուեցաւ Կումմուխի Մուտագլու թագաւորին, որ Կարքեմիշի նուաճումէն ի վեր ամենագլխաւորը կը համարուէր «խատտի» իշխաններուն մէջ: Մնացած մասն ալ Խամմանու երկրին կցուելով եւ Տիւրքարիմու (Կիւրին) բերդաքաղաքը կեդրոն ունենալով, մասնաւոր կառավարչութեան մը վերածուեցաւ:

Կ'երեւի Սարգոնի մէկ սպարապետը այս միջոցին կեդրոնական Փոքր Ասիան նուաճեր էր մինչեւ Կեսարիայէն չատ անդին: Այսպէս Փոքր Ասիոյ



մէջ ստեղծուեցաւ Մարգարանութեան շրջանակ մը ահագին տարածութեամբ, որուն ալ տրուեցաւ Կամմանու կամ Խամմանու անունը, որովհետեւ նախկին Խամմանու երկիրն ալ անոնց կցուած էր:

«Այդ երկրին — Խամմանուի մարգարանութեան — մէջ 10 ամրոցներ հիմնեցի», կ'ըսէ Սարգոն: «Բնակիչներուն ապահով բնակարաններ հայթայթեցի: Լուխգու, Բուրդիր, Անմաւրու, Կիակի, Անդուարսալիա քաղաքներն Ուրարտուի դէմ իբրեւ պահականոց ամրացուցի: Ուսի, Ուսիանէ, Վարգին քաղաքները հիմնեցի Մուշկիներու սահմանագլուխին վրայ. անոնց ելքի դռները փակեցի: Ելիբիր եւ Շինդարարա քաղաքները ..... ժողովուրդին դէմ ամրացուցի»: (Սարգոնի Տարեգրութիւնք, տողեր 190—194): Արձանագրութիւններէն այնպէս կը մակարերուի թէ Սարգոն շատ ընդարձակ Ասորեստանցի ու Միջագետացի գաղթականութիւն մըն ալ բերաւ հաստատեց Խամմանուի մարգարանութեան մէջ:

Դժբախտաբար դիւրին չէ Սարգոնի ամրացուցած այս տասը քաղաքներուն տեղերը որոշել: Ֆորրեր առաջարկած է որոշ նոյնացումներ (Die Provinzial—Einteilung des Assyrischen Reiches, pp. 75—6) եւ Պրոֆ. Ն. Ադոնց (Histoire d'Arménie, pp. 118 et n. 2, 314—5) քանի մը քննադատութիւններով կ'ընդունի զանոնք: Արդ, Տիւլգարիմէի նահանգին եւ Կամմանուի մարգարանութեան մէջ ամրացուած տասը քաղաքներուն հինգը Ուրարտուի դէմ էր, ինչ որ կը ցուցնէ թէ կա'մ Ուրարտուի համեմատական ոյժը գերակշիռ էր եւ կա'մ այս կողմի սահմանագլուխը աւելի ընդարձակ ու բաց էր: Ֆորրեր կը դիտէ որ Սարգոնի ամրացուցած քաղաքները գետային կամ լեռնային անցքերու վրայ՝ գլխաւոր ճամբաներուն հսկող տեղեր էին: Սանտալճեան արդէն այս հինգ քաղաքներէն երեքը — Անմուրու, Անդուարսալիա եւ Բուրդիր — նշանակած է իր քարտէսին վրայ՝ Արեւմտեան Եփրատի աջ ափունքը, Քեպանմատէնէն դէպի Քեմախի դիմացը: Ֆորրէր կ'առաջարկէ Բուրդիրը նոյնացնել Զիմարայէն 7 քիլոմետր հարաւ-արեւմուտք Փութէյրլու գիւղին հետ: Ն. Ադոնց այս նոյնացման կ'առարկէ, բայց ըստ մեզ՝ անտեղի է առարկութիւնը: Անմաւրու Քեպանմատէնի դիմացը Նամերլի կամ Էնմերլի գիւղին հետ կը նոյնացուի, եւ Կիակի շատ իրաւամբ կըրնայ համեմատուիլ Քեպանմատէնի քիչ մը վարօք՝ Եփրատի աջ ափին վրայ հին Կիակա բերդաքաղաքին (այժմու Զերմուկ գիւղը) հետ, որ հռովմէական ժամանակներուն լեգէոնի մը կայանն էր: Ֆորրէր կ'ըսէ թէ Լուխգու կրնայ Տիւլըիկէն դէպի Զարա ճամբուն վրայ ըլլալ. ասիկա առարկելի է, որովհետեւ ինքը այդ ճամբուն վրայ կը գնէ արդէն Ելիբիր եւ Շինդարարա տեղերը. իմ կարծիքովս՝ Լուխգու նոյն է Կանեչեան առեւտուրի, պողոտային վրայ Լուխուգատիա կայանին հետ (Delaporte, Hittites, p. 49) որ Կիւրինի եւ Մալաթիոյ միջեւ տեղ մը պիտի ըլլայ: Ֆորրէր կը կարծէ թէ Ան-



դուարսալիա արդի Իզոլիի դիմացն էր. առ ալ առարկելի է, որովհետեւ այդ տեղը Մալաթիոյ շրջանակին մէջ կ'իյնայ: Ըստ իս' Անդուարսալիա պէտք է համեմատել հռովմէական զինուորական ուղեգրութեանց յիշած Teukila կամ Theucira կայանին հետ, որուն դիրքը մօտաւորապէս Ակնայ (արդի Էկինի) դիրքին կը համապատասխանէ (Ramsay, Hist. Geog. of As. Minor, p. 275 and Mapopp. p. 266) :

Ըստ Ֆորրէրի՝ Մուշկիներու դէմ ամրացուած քաղաքներէն Ուսի հաւասար է Chusa -յի՝ Գարսաւիրայի եւ Տիւանայի մէջտեղ, այժմ Պար-հիւլիւկ՝ Գըզըլըրմադ թափուող Թաթլար-Սու գետակի ափանց վրայ. Ուսիանու = Ossana, այժմ Թուզքէօյ՝ Թաթլար-Սուի գետախառնունքին վրայ: Ֆորրէր եւ Ազոնց Վարզինի դիրքն անորոշ կը ձգեն, բայց ըստ մեզ՝ դասական Եւագինա եւ արդի Կէօնէ աւանին հետ պէտք է նոյնացնել, որ Եոզղատէն դէպի արեւելք տանող մեծ պողոտային երկճիւղած տեղն է: Այս կը ցուցնէ որ Խամմանու ընդարձակ Մարզպանութիւնը Ալիւսի մեծ աղեղին ներսի կողմէն ալ խոշոր մաս մը կը բովանդակէր: Այս երեք բերդաքաղաքներու դիրքը փաստ մըն է որ Սարգոն Մուշկիներու եւ Սալտակ Ասորոց երկիրներէն մէյմէկ մասը կտրեր է Փռիւզիայէն. որով Կիլիկեան դռներէն մինչեւ Սինոպ երկարող առեւտրական պողոտային տէր ըլլալ կ'ուզէ Ասորեստան: Ուրեմն Խամմանու ըսուած մարզպանութիւնը ահագին տարածութիւն ստացած է: Այսպէս, Սարգոնի զօրութիւնը հասած է մինչեւ Փոքր Ասիոյ սիրտը. սակայն քիչ յետոյ պիտի տեսնենք թէ նորահաս Կիմմերեան ոյժերը սահման կը դնեն անոր առջեւ ու Ասորեստանը յետո ընկրկման կը ստիպեն:

Ֆորրէր Կասկա բառով կ'ուզէ լրացնել Սարգոնի Տարեդրութեանց տող 194 պակսող անունը. ես խորհած եմ որ թերեւս Գիմիրրա (Կիմմերեանք) բառն աւելի հաւանական է. բայց կարելի է որ մեզի համար երկուքէն ալ աւելի շահեկան անուն մըն է հոս եղծուածը: Ըստ Ֆորրէրի Շինդարարա արդի Սինջարն է Տիվրիկէն քիչ մը դէպի արեւմուտք, Ջարայի ճամբուն վրայ. իսկ Ելիբիր արդի Խալպուր անուն աւերակն է՝ Մալաթիայէ Սերաստիա ճամբուն վրայ: Այս երկու նոյնացումներն ալ հաւանական են:

Այսպէս, Կամմանու կամ Խամմանու մարզպանութեան մեզի համար կարեւոր մասը, Տիւզարիմմէի (Կիւրինի) նահանգը, հարաւէն կը սահմանուէր մօտաւորապէս Տարենտէէ սկսեալ Թոխմա-Սուով, արեւելքէն՝ Եփրատ գետով, հիւսիսէն՝ Չալթա Ըրմադ գետով եւ արեւմուտքէն՝ Գըզըլ Ըրմադի վերին ընթացքով Շահրգըլլայէն մինչեւ Կէմէքէք: Ֆորրէր ինքն ալ կ'ընդունի թէ Տիվրիկ, Ակն եւ Արարկիր մէջն էին Տիւզարիմմու նահանգին: Այս երկիրը յաջորդող յիսուն վաթսուն տարիներուն մէջ մեր ուշադրութիւնը շատ պիտի գրաւէ Հայոց ազգի ծագման խնդիրի վերաբերմամբ:

Ն. Ք. 709-ին Սարգոնի զօրապետներէն Կուէի (Դաշտային Կիլիկիա) կուսակալը Կալիկադնոսի հովիտն ի վար արշաւանք մը ըրաւ եւ դժուարին



գաւառներ կտրել անցնելէն ետք հասաւ մինչեւ Պիսիդիոյ լճաշատ երկիրը, որ Փռիւզիոյ թագաւորութեան հարաւային մասը կը կազմէր: Ասորեստանի թագաւորն իր զօրավարին այս յաղթութեան կը վերագրէ միեւնոյն տարուան մէջ Մուշկեցի Միտայի (Փռիւզիոյ Միդաս Գ. թագաւորին) իրեն հըպատակութիւն առաջարկելը: Բայց գուցէ ուրիշ շարժառիթ մըն ալ կար անոր մէջ:

Երբ այսպէս, կամմանու կամ Խամմանու մարզպանութեան կազմութենէն երկու երեք տարի վերջը «Մուշկիի Միտան» հարկ կը զգայ Ասորեստանի հետ հաշտուելու եւ անոր թեւարկող զինակցութիւնը խնդրելու, որո՞ւ դէմ էր այս: Հարկաւ ճիշդ այդ միջոցին (Ն. Ք. 710) Թրակիայէն մեկնող եւ Փոքր Ասիոյ վրայ խուժող նորահաս աղէտին, Կիւմեր-Տրերներու արշաւանքին դէմ պաշտպանուելու համար: Սարգոն կը բարեհաճի այս առաջարկը նըկատել իբրեւ հպատակութիւն, ինչ որ Ասորեստանեայց սովորական յոխորտանքն է միշտ: Բայց եւ այնպէս, կ'երեւի թէ Մուշկեցի Միտա, որ է Փռիւզիոյ Միդաս Գ. թագաւորը, այս հաշտութեամբ իսկապէս կը ստանայ Խամմանու ընդարձակ երկրին ալ իշխանութիւնը փոխանորդաբար:

Տաբալունները Մուշկեցի Միտային հին զինակիցներն էին. սակայն Փռիւզիոյ թագաւորին այսպէս Ասորեստանի թեւարկութեան տակ մտնելով Խամմանուի մարզպանութեան ալ տիրանալուն բարկացան եւ մեզի անծանօթ միջոցով մը զօրացած, գուցէ Ուրարտուի Արգիստիս Բ. թագաւորին ալ դըրդումովը, յանկարծ ոտքի ելան, ապստամբեցան եւ հիւսիս արշաւելով՝ Տիլ-Պարիմմուի նահանգին ալ տիրացան: Այս միջոցին Ուրարտուի թագաւորն ալ տակաւին իր երկրին հիւսիս-արեւմտեան կողմերը դեգերող Կիմմերեան հորդաները կը ստիպէ Եփրատէն արեւմուտք անցնելով Փոքր Ասիա դիմելու: Ասիկա նոր բարդութիւն մը եւ արտաքոյ կարգի ճգնաժամ մը կը ստեղծէ: Սարգոն, որ Ն. Ք. 707-ին Արգիստիս Բ. ի Նինուէի վրայ արշաւանքին սպառնալիքովը ետ կանչուած էր Պարսից ծոցի եզերքէն եւ Բաբելոնի գործերը կիսատ թողլով մայրաքաղաք աճապարելու ստիպուած էր, նոյն տարուոյ աշնան Կապադովկիա կը փութայ, եւ առժամն փրկեց Տիլ-Պարիմմէի (Կիւրինի) նահանգը բարբարոսաց դրաւումէն եւ Տաբալուններն ալ ետ դէպի հարաւ հրեց:

Սարգոն յաջորդ տարին Նինուէ անցուց՝ թէ՛ Տիւր-Սարգինի (արդի Պորսապատի) իր նոր ապարանքի շինութեանը հսկելու, զոր աւարտեց ալ վերջապէս, եւ թէ անհրաժեշտ հանդիստով մը կազդուրուելու: Բայց ահա, Ն. Ք. 705-ին ստիպուեցաւ դարձեալ արշաւել «Կուլլումացի էշպայ» անուն հզօր ցեղապետի մը դէմ եւ ճակատամարտին մէջ սպաննուեցաւ: Օլմըս-թէտ (Assyria, 267) կը կարծէ թէ «Կուլլումացի էշպայ» Կիմմերացի հրոսապետ մըն էր եւ թէ ճակատամարտը Մարաց երկրի էլլիպ գաւառին մէջ (արդի Քիրմանշահի մօտերը) տեղի ունեցաւ: Սակայն Ն. Ադոնց (Histoire d'Arménie, p. 122, notice No. 1) Բաբելոնեան ժամա-



նախադրութեան մէկ տուեալին համաձայն կը մատնանշէ որ ճակատամարտը Տարալի երկրին մէջ պատահեցաւ, եւ մենք ալ հիմա դայօ աւելի հաւանական կը գտնենք: Փռիւզիա, Միդատ Գ.ի կամ անոր յաջորդին՝ Գորդիոս Դ.ի ներքեւ, մեծապէս օգտուած պիտի ըլլայ Սարգոնի սպանման յառաջ բերած խառնակ կացութենէն: Եւ արդէն Ֆորրէր, Լէյման-Հաուպտ, Ն. Ազոնց եւ ուրիշներ կ'ընդունին թէ Ք. Ա. Ը. դարու դէպի վերջերը Փռիւզիա յանկարծ մեծ ծաւալում մը ունեցաւ դէպի Եփրատի հովիտը:



Հոս հարկ է անդրադառնալ Հայոց ազգի ծագման խնդիրին, որուն վերեւ ակնարկեցինք: Մեր ազգը կրկնակ անուններ ունի՝ Հայ եւ Արմէն, առաջինը բնիկ անուն մը՝ սովորաբար ազգին անհատներուն կողմէն դործածուած, երկրորդը սովորաբար օտարներուն կողմէն կը դործածուի մեր ազգին եւ անոր անհատներուն համար: Շատ ջանքեր եղած են այս կրկնակ անուններու երեւոյթը բացատրելու համար, մանաւանդ ստուգարանական ճամբով, բայց մինչեւ հիմա ոեւէ դոհացուցիչ արդիւնք չեն տուած այդ փորձերը:

Նորագոյն բեւեռագրական գիւտերը գեղեցիկ կերպով լուսարանել կը թուին այս մութ խնդիրը՝ ցուցնելով թէ մեր ազգը կազմուած է երկու հիմնական տարրերէ կամ խաւերէ, ինչպէս արդէն կարգ մը օտար եւ ազգային գիտնականներ ենթադրած էին:

ա — տարրէ մը, որ արդէն Ք. Ա. ԺԵ. դարուն վերջերը մեծ պետութիւն մըն էր՝ գոնէ ամբողջ արեւմտեան Հայաստանը բռնող, Խայասա կամ Հայասա անուն, որ Խետացւոց կամ Հաթեանց մեծ կայսրութեան հետ չափուելու աստիճան կարողութիւն ունէր: Հիմա ընդհանրապէս կը խորհուի թէ ազգին բնիկ եւ հարազատ Հայ անունը Ժառանգ մնացած է սոյն Հայասայի Ժողովուրդէն: Վերջերս ակադեմիկոս Գր. Ղափանցեան ուսերէն լեզուով 287 էջնոց գիրք մը հրատարակած է (Երեւան, 1947), որ շատ օգտակար եւ թելադրիչ տեղեկութիւններ բովանդակել կը թուի, բայց դժբախտաբար ինծի անմատչելի է. անունն է «ՀԱՅԱՍԱ — ՀԱՅԵՐԻ ՅՐՐԱՆ», ինչպէս կը սորվինք Պրոֆ. Ա. Աբրահամեանի գրած քննադատական-գրախօսականէն՝ Սովետական Հայաստան թերթին մէջ (1949, թիւ 2, էջ 41—43): Հայասացիք Հայկական Բարձրալանդակին տիրած են Ուրարտացիներէն դարեր առաջ:

բ — Արմէն տարրէն, որ Ք. Ա. Ի. դարուն նախ մտած կ'երեւի Ուրարտուի սահմաններուն մէջ, եւ Եփրատի արեւմտեան կողմէն գալով: Ու դարմանալի է որ մինչ հայ տարրին — Հայասացւոց — մասին մեր տեղեկութիւնը կը ստանանք Հայաստանէ շատ հեռու տեղէ մը, Փոքր-Ասիոյ կեդրոնական արեւմտեան մարզին մէջ Եոզղատի մօտ Պողադքէօյէն, ուրկէ պեղուած են հին Հաթեանց պետութեան արխիւները, միւս կողմէն Արմէն տարրին բնագաւառին մասին, որ բուն Հայաստանի սահմաններէն դուրս կը գտնուէր,



մեր տեղեկութիւնը կը ստանանք բնիկ հայ հողին վրայ, Տարօն դաւառին մէջ, Մշոյ մօտ, Թրմերտ գիւղը գտնուած բեւեռագիր արձանագրութեան մը: Բայց ասիկա շատ բնական է՝ հին ժամանակաց պարագաները նկատի առնելով:

Թրմերտ գիւղի գերեզմանոցին մէջ գտնուած այս շահեկան արձանագրութիւնը Ուրարտուի հին թագաւորներէն Մենուասին կը սկստականի (Ք. Ա. շուրջ 810—785): Կոթողին յետաակողմը, որ ամբողջ ու անեղծ է, լոկ նըղովքի բանաձեւէ կը բաղկանայ: Յառաջակողմը, որ զժբախտաբար կտորկտոր եղած է, երկու կարեւոր բեկորներէն առաջինին մէջ կը գրուի թէ Մենուաս այդ իր արշաւած երկրին մէջ 400 աւաններ կողոպտելէ ետք, հրոյ ճարակ ըրած է, որոնց շարքին Կուլմէ եւ Էկարսու բերդաքաղաքները: Միւս կըտորին մէջ կ'ըսուի թէ ան ապա Ալաու երկրին վրայ, գէպի Ուրմենիուխի ժողովուրդը արշաւած է. Ալաու երկիրը կործանած, Ուրսայինի քաղաքի բնակչութիւնը կոտորած եւ Արմենիուխի երկիրը նուաճելէ ետք, զայն հողին հաւասարեցուցած է (Lehmann-Haupt, *Corpus Inscriptionum Chaldicarum*, No. 32, N. Adontz, *Histoire d'Arménie*, p. 153—4):

Լէյման-Հաուպտ անմիջապէս վճռեց թէ Ուրմենիուխի բառը հոս հայ ժողովուրդի Արմենեան անուան կը համապատասխանէ. եւ քանի որ արձանագրական Ուրարտու ձեւը Հին Կտակարանի Արարատ երկրին եւ Հերոդոտոսի Alarodii ժողովուրդին կը համապատասխանէ, յեղուական արգելք մը չկայ Urmeni եւ Armeni անունները նոյնացնելու:

Բայց ո՞ւր է Ուրմենիուխի ժողովուրդին բնակած Ալաու երկիրը: Լէյման-Հաուպտ իսկոյն Փոքր Հայք (Armenia Minor) երկիրը մատնանշեց իբր այն: Իր մեծ աշխատութեան մէջ կ'ըսէ. «Ուրմենի (ու խի) տեղանունը կը յիշէ Մենուաս իր գէպի արեւմուտք արշաւանքին առթիւ...: Այս անունը քաջապէս կը համաձայնի Orminion անուան հետ եւ կրնայ՝ վերոյիշեալ մարտարշաւներու հասողութեան համեմատ բուն Հայաստանի անմիջական մօտաւորութեան մէջ գտնուող հանգրուաններէն մէկը նշանակել, այսինքն Ալիւսի աղբերականց վրայ գտնուող Armenion լեռը: Ուրեմն Արմէններ Ք. Ա. Ը. դարուն սկիզբը հոս կը բնակէին» (*Armenien einst und jetzt*, II, p. 682):

Ուրմենիուխի ժողովուրդի բնավայրը Փոքր Հայքի մէջ փնտռելու կարծիքին ես ալ դարձած եմ գլխաւորապէս նկատի առնելով Թրմերտի արձանագրութեան մէջ Ուրմենիուխի անուան յարակցաբար յիշուած «Ուրսայինի քաղաք» եւ «Ալաու երկիր» անունները: Արդ, Ուրսայինի բոլորովին նոյն է Orsene անուան հետ, զոր Պաղոմէոս աշխարհագիրը կու տայ իբր մէկը Փոքր Հայքի հինգ բաժանումներուն, որու տեղը կ'որոշուի արդի Տիվրիկ աւանէն գէպի հիւսիս, եւ որու կեդրոնն եղող Orsa կամ Orsana քաղաքն ալ պիտի ըլլայ արդի Կուրճենիս գիւղաքաղաքին տեղը: Իսկ Ալաու երկրի անունը՝ հաթեան արձանագրութեանց «Հալիուս լեռներկիր» անուան պէս՝ կրնար Ալիւս (Գրգըլ ըրմագ) գետի անուան հետ հաղորդակցութեան բերուիլ: Թրմերտի արձանագրութեան մէջ յիշուած Էկարսու բերդաքաղա-



քին անունը համեմատելի է Փոքր Հայքի նշանաւոր Carsagis կեդրոնին հետ, որ է արդի Մելիքշերիֆ գիւղաւանը. իսկ արձանագրութեան Կուլմէ բերդաքաղաքին տեղն ալ կարելի է նոյնացնել Կուրճենիսէ աւելի հիւսիս՝ արդի Bardatchor = Բերդաձոր ըսուածին հետ: Ուստի Մենուատի յիշած Ուրմէնիուխի ժողովուրդին բնակավայրը կը բաղկանար Պոնտական Գայլ գետի (Քելքիթ, Lycus) վերին ընդարձակ աւազանէն՝ բովանդակելով թերեւս մաս մըն ալ Ալիւսի աղբերականց գաւառէն: Ամբողջը խիստ բարեբեր երկիր մըն է այսօր ալ, եւ խիստ բազմամարդ էր հին ժամանակ:

Բայց ես հաւանական չեմ գտներ որ Ուրարտուի թագաւորն «Ուրմէնիուխի» ըսուած ժողովուրդին, այսինքն Արմէն տոհմերու բնակած երկրամասին ամբողջութիւնը նուաճեց, այլ թէ անոր մինչեւ հիւսիսային Փոքր Հայք՝ դէպի Երզնկա յառաջացեալ հատուածը միայն շօշափեց: Ես կը խորհիմ թէ Արմէն տոհմերու մեծ զանգուածը տակաւին անկէ անդին՝ իր տարածուն բնակութիւնն ունէր Զելայի, հիւսիսային Կոմանայի, Նէո-Կեսարիոյ եւ Սերաստիոյ մէջտեղի բարձր հովիտներուն մէջ ու լեռնադաշտերուն վրայ, քոչուորութեան վիճակի մէջ: Ասոր փապացոյցներն ուրիշ տեղ մանրամասնօրէն տուած եմ: (Տես Պէյրութի ԱԶԴԱՐԱՐ շաբաթաթերթը, 1953, Յունուար 16 թիւը, էջ 10—1): Արմէն տոհմերը հոն խաղաղ կը բնակէին բարեկամ Կասկա ցեղերով շրջապատեալ, եւ ժամանակաւ անոնց Արեշի մեծ ժողովուրդին դէպի հարաւ՝ Կոմմաղինէ գաղթելով պարապ ձգած երկրամասը գրաւած են:

Արդ, Ն. Ք. 750 թուականի ատենները Կիմմերացիք անուն հիւսիսային ժողովուրդը՝ հիւսիս-արեւելքէն յարձակող Սկիւթացի բարբարոսներէն յաղթուած, եւ հարաւային Ռուսիոյ մէջ իրենց բնակավայրերէն արտաքսուած, գաղթեցին հիւսիսային Փոքր Ասիա: Մէկ մասը ուղղակի Խրիմի թերակղզիէն մեկնելով՝ նաւերով Սեւ ծովու վրայէն իջաւ ու գրաւեց Սինոպը. երկրորդ մէկ մասը Կովկաս լեռներու վրայէն անցաւ մինչեւ Ուրարտուի հիւսիսային սահմանները եւ ապա ասոնց կարեւոր մէկ բազուկը Սեւ ծովու եզերօք յառաջացաւ մինչեւ Թերմոտոնի բերանը (այժմու Զարչամպա Օվասը). երրորդ մէկ զանգուածը Դանուբի վրայէն յառաջացաւ մինչեւ Թրակիա, եւ այդ տեղէն Տրեբներու հզօր ցեղն ալ միասին առած, անցաւ Վոսփորը եւ մտաւ Փոքր Ասիա: Այս վերջին զանգուածները Պոնտոս հասան Ն. Ք. 720 եւ 710 թուականներուն, եւ առաջին զանգուածին հետ միացած՝ սկսան յարձակիլ Փոլսիոյ, Սպիտակ Ասորւոց եւ այլ երկիրներու վրայ:

Տարակոյս չկայ թէ Պոնտոս բնակող ընդարձակ Կասկա ցեղերը եւ անոնց մէջտեղ բնակող Արմէն տոհմերն ալ, արդէն Ն. Ք. 750—740 թուականներէն սկսեալ, իրենց կռնակէն, Սեւ ծովու եզերեայ մասերէն Կիմմերեան նորեկ բարբարոսներու յարձակումները կրելով, խախտեցան իրենց տեղերէն եւ մաս առ մաս անցնելով վերին Ալիւսի ձորը, դիմեցին դէպի արեւմտեան



Եփրատի հովիտը: Հոս Մելիտինէէ հիւսիս՝ արդէն Կասկա երկիր էր, որով այս նոր գաղթողները բարի ընդունելութիւն գտան, եւ նորեկներով զօրացած ըլլալու արդիւնքն էր թերեւս որ Կամմանու կամ Խամմանու երկրին Կասկեան ծագումով թագաւորները, Դագիլու եւ Գունգինան, համարձակեցան Ասորեստանի թագաւորներուն դէմ պայքարիլ: Արդէն Ենսէն գերմանացին Գունգինանը նախապատմական հաշ թագաւոր մը կը համարէր եւ անունն ալ Կունծիկ հայ անուան հետ կը համեմատէր (տես ՆԱԽ. ՀԱՅԱՍՏ., էջ 455 եւ ծան. 562—4): Եւ նշանակելի է որ Մարաշցիք հայերէն Թաթուլ անունը Թաթիլօ կ'արտասանեն, որ այնչափ մօտ կը հնչէ Դադիլու արձանագրական անունան: Ասկէ զատ, հաւանական է որ Խամմանու կամ Տիլ-Գարիմմու նահանգը պաշտպանելու համար Սարգոնի ամրացուցած Ուրարտական սահմանի հին քաղաքներէն Անմաւրուն այսպէս յառաջապահ եղած Արմէններուն հաստատուած կեդրոններէն մէկն էր նոյն իսկ արեւմտեան Եփրատի վրայ. այսինքն՝ Անմաւրու թերեւս Ամմաւրու կամ Արմաւրու հնչուած անուն մը ըստ լսողութեան վերարտադրութիւնն է, եւ այսպէս կրնայ Արմաւիր հայկական անունն նախաձեւն ըլլալ (անդ, էջ 563):

Վերոյիշեալ էշպայ հրոսապետը, որուն դէմ ճակատամարտին մէջ ըսպաննուեցաւ Սարգոն, կրնայ Կեմմերեան ըլլալ, բայց նոյնչափ եւ աւելի հաւանական է որ Կասկեան ու մինչեւ իսկ Արմէն ըլլայ: Արդ, Կուլլումացի կ'ըսուի Սարգոնի այս ախոյեանը, եւ Կուլլումա հաւանօրէն նոյն է Կուլմէ բերդաքաղաքին հետ, զոր վերեւ տեսանք իբրեւ Ուրմենիուի երկրին պատկանող կամ անոր մօտակայ տեղ մը: Ասիկա ի՞նչ կը նշանակէ: Ամէն նշաններ կը ցուցնեն թէ երբ Զելա—Սեբաստիա շրջանակի լեռնագաւառներուն մէջ վաղուց ի վեր բնակող Արմէններու մեծ զանգուածը վերջապէս ստիպուեցաւ իր տեղէն շարժիլ, մի միակ ուղղութեամբ չգաղթեցին, հապա գոնէ երեք ուղղութեամբ: Մէկ կարեւոր բազմութիւն հարաւ-արեւելեան ուղղութեամբ գաղթեց դէպի Կիւրին եւ Մելիտինէ. երկրորդ մաս մը գուցէ Կեսարիոյ վրայէն դէպի Հաճնոյ կողմերը գաղթեց. բայց անշուշտ երրորդ եւ ամենակարեւոր մարմինը ուղղակի արեւելք գաղթեց Երզնկայի եւ Սատաղայի ուղղութեամբ: Բայց հոս երկու դժուարութեան բախեցան: Նախ Ուրարտուի պետութիւնը դեռ չափազանց զօրաւոր էր եւ զիրենք կ'արգիլէր Վերին Եփրատէն անդին անցնելու. երկրորդ, հոն արդէն Հայաստաններու մէկ հոծ մնացորդը կեդրոնացած կար, եւ աւելի նոր գաղթականներուն գալը երկրին սննդական կարողութիւնը կը սպառէր: Հետեւաբար, կ'երեւի թէ Կասկա—Արմէն գաղթականները որոշեցին սահմանազլուխէն հարաւ անցնելով, արշաւել Ասորեստանեայց հպատակ նահանգներուն վրայ:

Այսպէս կամ այնպէս, վերջապէս Արմէններու մեծ զանգուած մը հաստատուած պիտի ըլլայ ներկայիս Ուգուլնեայլա ըսուող ճարակաշատ լեռնադաշտին վրայ, որուն արեւելեան ստորոտը կը գտնուի արդի Կիւրին աւանը: Ասիկա կեդրոնն էր Տիլ-Գարիմմէի նահանգին, եւ արդի պատմագէտներ միա-



քան եւս սա կէտին վրայ թէ այս անունը Ասորեստանցւոյ կողմէն ստուգարանական աղաւաղում մըն է հին Հաթեանց ժամանակի Տիգարամա անուն (ՆԱԽ. ՀԱՅԱՍՏ., էջ 79, 89, N. Adontz, *Hist. d'Arménie*, p. 35 եւ 42), իսկ այս վերջինը աւելի եւս կը կշռի «Թորգոմայ Թորգարմայի Տուն» անուն հետ (ԵԶԵԿ. ԻԷ. 14), որ թէ՛ Բիւզանդ. Փաւստոսի եւ ուրիշ հին հեղինակներու եւ թէ՛ Տելիշի, Բակագինի եւ ուրիշ նոր պատմագէտներու կողմէն նոյնացուած է Արմէններու կամ Հայոց հետ:

Հոս ուրիշ երեւոյթ մը մեր ուշադրութիւնը կը դրաւէ: Պոնտոսի երկրրին մէջ բնակող Կասկա ցեղերը եւ անոնց մէջտեղ տեղաւորուած Արմէն տոհմերը հաւանորէն վարժուած էին վայելել Փոխւելոյ թագաւորին հեռաւոր հովանաւորութիւնը. եւ հիմա երբ Փոխւելա՝ Սարգոնի սպանումէն եւ անոր Փոքր Ասիոյ մէջ կազմած լայնատարած Խամմանուի մարդպանութեան փլուզումէն օգտուած, դէպի արեւելք կը տարածէր իր ոյժը, մինչեւ Եփրատ հասնելու որոշմամբ, կ'երեւի թէ Կասկաները, բայց մասնաւորապէս Արմէնները սիրով եւ ուրախութեամբ ողջունեցին Փոխւելացւոյ դալուստը: Իմ կարծիքովս՝ Արմէններու «փոխւելական» ծագման մասին Հերոդոտոսի քով պահուած աւանդութիւնը պէտք է այս իմաստով ըմբռնել:

Ուրեմն, Փոքր Ասիոյ մէջ Սարգոնի կազմած ընդարձակ մարդպանութիւնը տասը տարի անգամ չէ տեւած: Այլեւայլ արձանագրութիւններէ մակաբերելով կը գտնենք որ Ասորեստանցիք Միլիդգու քաղաքը իր անմիջական շրջակայքով տակաւին կը պահէին իրենց ձեռքը, բայց քանի որ Ուրարտու, Արգիստիս Բ. ի ներքեւ, վերստին տիրացած էր Խարբերդի նահանգին (ՆԱ. ԽԱ. ՀԱՅԱՍՏԱՆ. ՀԱՅԱՍՏԱՆ, էջ 506, 510, N. Adontz, *Hist. d'Arménie*, p. 120), Ասորեստանցիք՝ Մալաթիա հասնելու համար ստիպուած էին Կոմմագինէի ճամբով եւ Արեւելեան Տաւրոսի կիրճերուն մէջէն արշաւել: Այսպէս, կը տեսնենք որ Արմէններ իրենց այս նոր բնակավայրին, այսինքն՝ Խամմանու երկրին մէջ՝ Տիլ-Գարիմմու (Կիւրին) կեդրոնով, կրնային ապահով ապրիլ փոխւելական իշխանութեան ներքեւ, եւ կ'երեւի թէ իրաց այս վիճակը տեւեր է մինչեւ Փոխւելոյ թագաւորութեան անկումը (Ն. Ք. 676 կամ 674-ին):

Սարգոնի որդին ու յաջորդը Սանհերիբ կամ Սենեքերիմ (705—681 Ն. Ք.) պատերազմներ ունեցաւ Դաշտային Կիլիկիոյ մէջ Սանդուարրի անուն իշխանի մը հետ, որ տէրն էր Կուսրու եւ Սիգու անուն երկու ամրոցներու, որոնցմէ առաջինը կը գտնուէր արդի Մերսինի հիւսիս-արեւմտեան կողմը, իսկ երկրորդը Կիլիկիոյ հանրածանօթ Սիս քաղաքն է: Սենեքերիմ նուաճեց Տարսոն մայրաքաղաքն ալ եւ ձերբակալեց ու դերի տարաւ Սանդուարրին: Ապա Ն. Ք. 696-ին ճգմեց ապստամբութիւնն ալ Իլուքրու (Լամբրոն) բերդի իշխան Կիռնայի. եւ ասոր վրայ ինքզինք բաւական զօրաւոր զգաց Տաւրոս լեռներէն հիւսիս ալ արշաւելու: Սանհերիբ կը գրէ. «Խիլակիի մարդիկը որ անտառապատ լեռներու վրայ կը բնակին, զէնքերուս ուժովը հնազանդեցու-



ցի․ անոնց քաղաքները քանդեցի, կործանեցի եւ հրոյ ճարակ ըրի։ Տիլ-Գարիմու քաղաքը՝ Տարալի երկրին մէջ՝ նուաճեցի եւ անոր տեղն արօրադրուած գետնի վերածեցի» (Nébi Junus Inscr. 17—19 տողեր)։ Վերջին նախադասութիւնը սուտ է, ինչպէս քիչ յետոյ պիտի տեսնենք, այսինքն՝ Ասորեստանի թագաւորը դուցէ Տիլ-Գարիմուի առջեւ պարտուած՝ ամօթով վերադարձաւ։

Իսկապէս Սանհերիբի մէկ աղօթքն առ Արեգ աստուած, իր պաշտօնական արձանագրութեան ճիշդ հակառակը կը խօսի․ եւ Ֆորրէր անկէ մականբերելով, կը խորհի թէ Ն․ Ք․ 705 թուականին Սարգոնի դէպի արեւելեան կասպադովկիա փութալուն առիթ տուող դէպքն էր Արմէն-Փոիւզներու ներարշաւն իրենց հրամանատար Գուրդիի ներքեւ, որ Խիլակիու նահանգը (լեռնային Կիլիկիան) կտրած անցած ըլլալով, տեղաւորուեցան Տիլ-Գարիմուի կամ Կամմանուի նահանգին մէջ՝ Անտիտաւրոսի ու Եփրատի մէջտեղ։ Այս երկրէն անոնք վռնտեցին բնիկները, որոնք դէպի արեւմուտք քաշուելով Միջին Ալլիւսի վրայ՝ իրենց անունով կոչուած Քամմանենէ երկրին մէջ նոր հայրենիք մը գտան։ Իսկ Կամմանու երկիրն այնուհետեւ Արմենափոիւզներու պատճառաւ Փոքր Հայք (Armenian Minor) անունը ստացաւ։ Այսպէս Ն․ Ք․ 706 թուականով մենք ճիշդ դարագլուխ մը կը գտնենք Արմէններու Փոքր Հայք ներգաղթին եւ հոն հաստատման (Die Provinzial-Einteilung des Assyrischen Reiches, p. 81)։

Ֆորրէրը այսպէս խորհելու դրդող եղելութիւնը սա է․— նոր գտնուած քեւեռագիր արձանագրութեան մը համեմատ, որ, ինչպէս ըսինք, առ Արեգ աստուած աղօթք մըն է, Սենեքերիմ Ն․ Ք․ 695 թուականին, այսինքն՝ իբր թէ Տիլ-Գարիմուին հիմնայատակ կործանելէն մէկ տարի ետքը, իր զօրավարներէն մէկը կը ղրկէ այդ միեւնոյն քաղաքին դէմ, ուր Գուրդի անուն իշխան մը ինքնիրեն համար թագաւորութիւն մը հիմներ էր, որը՝ Ֆորրէրի կարծիքով՝ արդէն բաւական տարիներէ ի վեր ալ հոն գոյութիւն ունէր։ «Արդ, քանի որ Գուրդի միեւնոյն է Գորդիոս փոիւզական անուան հետ», կ'ըսէ Ֆորրէր, «մենք հոս ունինք ամենահին նշմարն Արմէններու ներարշաւին, որ հին ու նոր հեղինակներու միաձայն վկայութեան համեմատ՝ ծագումով Փոիւզացուց մէկ շառաւիղն էին» (Ibid, p. 80)։ Ըստ Լէյման-Հաուպտի՝ արձանագրութեանս «Գուրդի»ն, Փոիւզիոյ ժամանակակից Գորդիոս թագաւորը չըլլալով հանդերձ, Փոիւզիոյ արքայական գերդաստանին պատկանող իշխան մըն էր։ Պատմադէտս թէեւ պատրաստ չէ Ֆորրէրի հետ ընդունելու թէ Գուրդիի առաջնորդութեան տակ Կամմանուն նուաճող մարտիկներն անպատճառ Արմէններ էին, բայց եւ այնպէս ինքն ալ արձանագրական այս տուեալը նշանակելի կը գտնէ Արմէններու ներարշաւին վերաբերմամբ (Armenien, II, 2. «Nachtrage 4. Birichtigungen, pp. 47—8)։ Ն․ Ադոնց ալ միեւնոյն կարծիքէն է (Hist. d'Arm., p. 125 et notes 2 et 3; pp. 316, 320)։

Ֆորրէրի կարծիքը կարծւոր թելադրութիւններ եւ հաւանական իրաւ-



կանութիւններ պարունակելով հանդերձ, քանի մը ճշգրտութեանց կը կարօտի. —

1. Մենք Լէյման-Հաուպտի սկզբնական կարծիքին հետ կ'ընդունինք թէ Արմէններ, գոնէ մասամբ, իբրեւ Ուրմենիուիսի, արդէն Ն. Ք. շուրջ 800 թուականէն ի վեր բուն կամ Հիւսիսային Փոքր Հայքի, այսինքն Գայլ գետի վերին աւազանին մէջ էին: Ասոր կրնանք աւելցնել թէ այդ Արմէնները որ Ալաու երկրէն աւելի արեւմուտք կը բնակէին, անոնք ալ արդէն Սարգոնի գահակալէն առաջ իսկ սկսած էին Վերին Ալիւսն անցնիլ եւ տեղաւորուիլ Փոքր Հայքի այն մասերուն մէջ որ Մելիտինէի աւելի մօտ կը գտնուէին: Բայց նախ 705-ին Ն. Ք. հիւսիսէն, բուն Փոքր Հայքի կողմէն էր հաւանօրէն որ Արմէնք, Կասկաներուն հետ, դէպի Տաբալու երկիրն արշաւեցին, եւ «Կուլլումայի էշպայ» ըսուած հրամանատարին ներքեւ, ու ոչ թէ Գուրգիի: Այս վերջինը, մեր կարծիքով, Ն. Ք. 700 թուականէն յետոյ կը յառաջանայ դէպի արեւելեան Կապադովկիա, ուր արդէն Արմէնները տեղւոյն վրայ էին, բայց զանոնք Գուրգի կրնար իր բանակին միացնել եւ անոնցմով տիրել Կիւրինի: Սա իրականութիւն է որ Սարգոնի մահէն յետոյ Կասկաներ բոլորովին կ'անհետանան Փոքր Ասիոյ հորիզոնէն եւ այնուհետեւ անոնց տեղը կը բռնեն Տաբալուները: Որո՞նք էին որ Կասկաները դէպի Կովկասիա քշեցին, չենք գիտեր. սակայն ինչ ալ ըլլայ ազդակը, ասիկա անպատճառ չի նշանակեր թէ Արմէններն ալ քաշուեցան այդ կողմերէն, այլ թէ անոնք այսուհետեւ կը զատուին Կասկաներէն: Բայց գուցէ չեն յարիր ալ Տաբալուներուն, հապա երբ արեւմուտքէն Փռիւզիացիք կը յառաջանան Գուրգիի առաջնորդութեան ներքեւ, Արմէններն անոնց կը յարին՝ վաղեմի յարաբերութեանց բերմամբ:

2. Քամմաննէ եւ Մորիմնէ տեղանուններուն դէպի արեւմուտք տեղափոխութիւնն ի՞նչ կը նշանակէ: Եթէ Փորրէրի ըսածին պէս՝ Արմէններն էին Քամմաննի եւ Մարմուանի գաւառներու ժողովուրդները Մալաթիոյ մօտերէն դէպի հեռաւոր արեւմուտք քշողները, կրնայի՞ն միթէ Արմէններն ուղղակի արեւմուտքէն, Խիլակիուի վրայէն եկած ըլլալ. աւելի հաւանական չէ՞ որ Արմէնները հիւսիսէն հարաւ յարձակելով նախ Եփրատի եզերքները դրաւեցին, որով կրցան Մարմուանիներն ու Քամմաննիները քշել դէպի Արեւմուտք: Ուրեմն, Փորրէրի այս ցուցումն իսկ աւելի կը յարմարի մեր մինչեւ այս տեղ մատնանշածին, թէ Արմէններու բնագաւառը Պոնտոսի մէջ էր՝ Փոքր Հայքի անմիջապէս կռնակը:

Վերոյիշեալ իրադարձութիւնները մեզի սա գաղափարը կը թելադրեն, թէ այդ դէպքերուն բերմամբ Փռիւզիացի երակէն ուժեղ պատուաստ մըն ալ եկած պիտի ըլլայ Արմէններու ցայսվայր խաղաղ ժողովուրդի արիւնին վըրայ, որով ասոնք — «Թորգոմայ Տունը» — նոր կեանք մը սկսած են նուաճումի եւ ծաւալումի: Անոնք նաեւ իւրացուցած են երկրին բնիկ մէկ զբաղումը — արտածութեան համար ձիեր եւ ջորիներ բուծանել, նաեւ ձիավարութիւն: Ոեւէ անպատեհութիւն չկայ ընդունելու թէ բարբարոսաց հինա-



հարուժիւններէն փախչող ժողովուրդ մը նոր եւ քաջ առաջնորդներ ստանալով, յանկարծ ինքը սկսի յարձակողական ընթացք մը. բոլոր հանգիստութիւններ ասոր ի դէպ են քան թէ հակառակը: Եւ հարկաւ Արմենափոխիւզները Կիւրինի տիրանալէն յետոյ՝ անմիջապէս աչք պիտի տնկէին անկէ ոչ հեռու Մելիդու հարուստ շահաստանին վրայ. եւ զայս ալ կ'ուսանինք Սանհերիբի ուրիշ մէկ աղօթքէն առ Արեգ աստուած:

Բայց Մելիտիոյ պէս ոստանի մը, որ հատեան քաղաքակրթութեան ամենամեծ կեդրոնը եղած էր, կորուստը հարկաւ շատ ցաւալի պիտի ըլլար Ասորեստանցւոց համար, որովհետեւ ան կ'իշխէր այդ միակ յարմար պողոտային վրայ որ Մաթաքէն դէպի արեւելք մինչեւ Եփրատ կ'երկարէր, եւ գետն ալ անցնելով Խարբերդի շրջանակին մէջէն մինչեւ Ամիդա եւ վերջապէս Նինուէ կը հասնէր: Հետեւաբար, կ'երեւի թէ Ասորեստանցիք Կոմմա-դինէի վրայէն մեծ ճիգ մը ընելով Մելիտիան փրկեցին՝ զայն գրաւել ուղող Փոխիգ-Արմէններէն: Այս եղած ըլլալու է Սենեքերիմի իշխանութեան վախճանէն առաջ, որովհետեւ Սենեքերիմի սպանումէն յետոյ՝ Ասարհադոնի եւ իր հայրասպան եղբայրներուն միջեւ պատերազմը Ն. Ք. 681-ին եղած է Խա-նիգալբատի երկրին մէջ, որ Մելիտինէի նահանգն իսկ է:

Ոմանք կարծեր են թէ Ասարհադոնի եղբայրները Կիմմերեաններէն օժանդակութիւն գտնելու յոյսով Խանիգալբատ — Մելիտինէ — դիմեցին. սակայն նորագոյն դիւտերու լոյսով պէտք չէ՞ ըսել որ անոնք աւելի հաւանօրէն Տիլ-Գարիմմուի Արմենափոխիւզներէն օգնութիւն կը սպասէին, որոնք շատ աւելի մօտ էին տեղւոյն. բայց կ'երեւի թէ իրենց այս յոյսն ալ ի դերեւ ելաւ: Ասարհադոն Մելիդուի քով ճակատամարտին մէջ յաղթական ելլելէ վերջը՝ իր պարտուած եղբայրները հալածեր է Եփրատն ի վեր մինչեւ Բիզանա կամ Բազանիս, որ ըստ Ռամսէյի Անի-Կամախի դիմացը կը գտնուէր: Այս դէպքը հարկաւ մեծ ազդարարութիւն մը պիտի ըլլար Արմէններուն, որոնք փորձով կը տեսնէին թէ մեծ քաղաքներ մտնել եւ մանաւանդ Ասորեստանցւոց չափազանց մօտենալ վտանգաւոր է իրենց գոյութեան համար: Ուստի իմ կարծիքս այն է թէ Արմէններն Ասարհադոնի արշաւանքի լուրն ստանալնուն պէս, թողուցին Մելիդուի մօտ տեղերը եւ լեռնային տեղեր քաշուեցան:

Եւ աղէկ որ այսպէս ըրին. որովհետեւ երբ Ասարհադոն երեք տարի հետքը Ն. Ք. 678-ին Կիմմերիացի Տիււշպայի ճամբայ տուաւ որ Շուպրիայի վրայէն Փոքր Ասիա անցնի իր հորդայով, անշուշտ իր ծրագիրն էր այս բարբարոսներուն ձեռքով ճզմել Փոխիգիացիները, որոնք յամառօրէն դէպի Եփրատ կը յառաջանային: Եւ ապա երբ տեսաւ որ արեւելեան Կապադովկիոյ Փոխիգիացիք յաջողապէս կը դիմադրեն արշաւող Տիււշպային եւ անոր զինակիցներուն, հետեւեալ տարին Ն. Ք. 677 ինք անձամբ Խիլակիուի ճամբով արշաւեց Փոքր Ասիա՝ իբր թէ բարբարոսները հալածելու կամ անոնց անցած տեղերու ժողովուրդներուն խլրտումները մարելու պատրուակով, բայց իրապէս Կիմմերիացիները մինչեւ Փոքր Ասիոյ սիրտը ապահով առաջնորդելու եւ



այսպէս Փոխգիւղի զօրութեան մահացու հարուածը տալու նպատակով (համար. Կողեան, ՄԵԼԻԴ, էջ 25), եւ յաջորդող դէպքերը կը ցուցնեն թէ լաւ ալ յաջողեցաւ իր այս ծրագիրը:

Խիլակիւղի վրայէն Ասարհադոնի ըրած այս աւերիչ արշաւանքին ետեւէն, երբ յաջորդ տարին Ն. Ք. 676 Տրերներ, Կիմմերիացիք եւ Սապարդացիք միասնադամայն արեւմուտքէն, հիւսիսէն ու արեւելքէն խուժեցին Փոխգիւղի վրայ, վերջապէս խորտակուեցաւ ասոր դիմադրական ոյժը: Յունական աւանդութիւնը կ'ըսէ թէ երբ Փոխգիւղի թագաւորը Միդաս Դ. տեսաւ որ ազատում չկար վայրագ բարբարոսներու ձեռքէն, ցուլի արիւն խմելով ինքզինք թունաւորեց ու մեռաւ: Կիմմերիացիք Փոխգիւղի թագաւորութիւնը կործանելէ յետոյ, ջարդեցին ու վռնտեցին աղնուական դասակարգը եւ ստրկութեան դատապարտեցին հասարակ ժողովուրդը:

Ասորեստանցիք Մելիտինէն փրկելու համար Փոխգիւղի կործանել տուին, բայց չի կարծուիր թէ մեծ բան մը շահեցան: Կ'երեւի թէ Փոխգիւղի վերապրած ազատանիէն ու զինուորականներէն նշանակելի մաս մը դէպի արեւելք փախչելով՝ Տիլ-Գարիմմուի չրջանակն ապաստանեցաւ: Ըստ Լէյման-Հաուպտի եւ Ն. Ադոնցի՝ Ուրարտուի Ռուսաս Բ. թագաւորին երկու արձանագրութիւնները դրական լոյս կու տան այս մասին: Արծկէի արձանագրութիւնը կը յիշէ այս թագաւորին մէկ ընդհարումը Մուշկի, Խատէ, Խալիտու, եւ այլ երկիրներէն եկած ժողովուրդներու հետ: Ասիկա պատահած ըլլալու է Ն. Ք. 674-էն ետքը եւ 670-էն առաջ: Լէյման-Հաուպտ այս յիշուած ժողովուրդները կործանուած Փոխգիւղի թագաւորութենէն փախստականներ կը համարի. իսկ ըստ Ն. Ադոնցի, անոնք պարտուած Միդաս Դ. ի բանակին փրշրանքն են: Ըստ Լէյման-Հաուպտի՝ Ռուսաս ասոնց հանդիպեցաւ Եփրատի եզերքին վրայ. բայց թերեւս աւելի հաւանական է Ն. Ադոնցի գաղափարը թէ այդ ընդհարումը եղաւ Եփրատի ու Արծկէի մէջտեղ վայր մը, զոր օրինակ՝ Մադկերտի բերդին մօտերը, ինչպէս այս բերդի մէջ Ռուսաս Բ. էն մնացած սեպագիր արձանագրութիւն մը ենթադրել կու տայ: Բայց ո՛րն ալ ըլլայ, մեծ տարբերութիւն չ'ըներ: Երկու պատմագէտներս ալ կ'ընդունին թէ «Մուշկի» բառը հոս Փոխգիւղ կը նշանակէ, եւ քիչ մըն ալ այս վերջին անուան ներքեւ Արմէնները միասին կը հասկնան: Ն. Ադոնց որոշ կը համարի թէ այս արշաւանքը Տիլ-Գարիմմուի (Կիւրինի) կողմէ կու դար եւ թէ արշաւողք արդէն ուրարտական հող թափանցած էին, իսկ ըստ Լէյման-Հաուպտի՝ թափանցելու կը ջանային: Բայց յամենայն դէպս Ռուսաս Բ. յաջողած է կասեցնել արշաւողներու այս թափանցումը եւ զանոնք ետ քշել Եփրատէն արեւմուտք: Կրնանք ընդունիլ թէ Միդաս Դ. ի այդ պարտուած բանակի մնացորդին մէջ Արմէններն ալ ներկայացուած էին. այնպէս որ Ռուսասի հետ ընդհարման այս դէպքը կրնանք նկատել իբրեւ Արմէններու առաջին լուրջ փորձը Եփրատէն արեւելք անցնելու, որ սակայն այս անգամ ձախողեցաւ:

Ի՞նչ եղաւ այս ընդհարման հետեւանքը: Գուցէ Փոխգիւղացիք մեծ մա-



սամբ նահանջեցին Ալիւսի աղեղին ներսի կողմը: Սալիստուներ (Հալիդոնք) կ'երեւի թէ դէպի Կովկասիա մեկնեցան. բուն Մուշկիները (Մոսոք) թերեւս առժամապէս միացան իրենց ցեղակից Տաբալուններու հետ. իսկ Սատէները՝ այն ժողովուրդին հետ որ ապագային Կասառնուացիք անունով ծանօթ պիտի ըլլար: Գալով Արմէններուն, կ'երեւի թէ կրկնուած դառն փորձառութիւններ անոնց սորվեցուցին թէ ապահովագոյն կերպն էր իրենք իրենց մէջ ամփոփուիլ եւ բուն Փոքր Հայքի մէջ կեդրոնանալ՝ Երզնկայի ետեւը, Սատաղա եւ այլ վայրեր: Գրեթէ քառորդ դար վերջը, արդէն Հայաստանոց մնացորդին հետ ալ միացած, ուրեմն Հայ-Արմէն ժողովուրդը, աւելի դիւրին դտան Եկեղեցի գաւառէն մտնել Ուրարտուի հողերը. քանի որ Երզնկայի դաշտաձեւ հովիտը բնական դուռ մը կը ներկայացնէ հայկական բարձրավանդակը մըտնելու եւ քանի որ մինչեւ Ն. Ք. 650 թուականը Սալդ-Ուրարտեան պետութիւնն այնչափ տկարացած էր որ չկրցաւ դիմադրել:

\*  
\*\*

Ի՞նչ եղաւ Գուրդիի հիմնած Տիլ-Գարիմմուի թագաւորութիւնը: Ն. Ադոնց կ'ըսէ թէ Գուրդիի հիմնած այս թագաւորութիւնը վաղանցուկ բան մը չէր, մնայուն էր (Histoire d'Arménie, p. 316—7), Մենք կ'ըսենք թէ անիկա, դոնէ իբրեւ փոխգական հիմնարկութիւն, մինչեւ Փաիւդիոյ պետութեան անկումը միայն, կամ առ առաւելն մինչեւ Ն. Ք. 670 թուականը կըրնար շարունակել, որովհետեւ Ասորեստանցոց արձանագրութեանց մէջ, այդ թուականէն յետոյ այլեւս Տաբալուններու թագաւորներ կը յիշուին Կիւրինի եւ Մալաթիոյ կողմերը:

Այսպէս, Ասարհադոնի վերջին տարիներուն — շուրջ 670—668 — յանկարծ Մուգալլու անուն մէկը իր բանակովը կ'երեւնայ Մելիդիոյ առջեւ, եւ Ասորեստանի ինքնակալը այս պատահարը իր աստուծոյն տեղեկացնել փութալով, անձկանօք կը հարցնէ թէ Նինուէէն ճամբայ հանուած բանակը պիտի կրնա՞յ արդեօք Մուգալլուն ստիպել որ Մելիդիոյ պաշարումը վերցնէ: Սակայն կ'երեւի թէ Ասորեստանցիք չյաջողեցան քաղաքը փրկել, որովհետեւ յաջորդ պատգամախօսութեան մէջ «Մելիտինեցի» տիտղոսը կը տրուի Մուգալլուին: (Olmstead, Assyria, p. 419, Winckler, Babylonia and Assyria, p. 267): Ահա քիչ յետոյ կը գտնենք որ Մելիտինեցի Մուգալլուն զինակցեր է Տաբալի թագաւոր Իշգալլուին հետ՝ Իշտի'արու քաղաքին դէմ, որ հաւանօրէն Սեբաստիայէն հարաւ արդի Շահր-Գըշլա տեղով կը ներկայացուի: Սակայն Իշգալլու, որ հաւանօրէն յունական աւանդութեան մէջ յիշուած Սկոլոպիտոս արկածախնդիր Սկիւթացին է, շատ չանցած կ'անհետանայ եւ Մուգալլու ինքը «Տաբալի թագաւոր» կ'անուանուի՝ երեւութապէս առանց Մելիտինէն կորսնցնելու: Այս Տաբալ բառով հոս անշուշտ Տիլ-Գարիմմուի — Կիւրինի — նահանգը կ'իմացուի՝ ինչպէս արդէն



Սենեքերիմի արձանագրութեան մէջ: Մեր տեսութեամբ, այս Մուգալլուի թագաւորութիւնը նշանակելի կերպով ընդարձակ էր, թերեւս Ալիւսի աղբերականց հետ բուն Իրիսի աղբերականց գաւառն ալ բովանդակելու չափ: Յիշենք որ Ենսէն շատոնց սա կարծիքը յայտնած էր թէ մենք նորէն վաղեմի հայ քագաւոր մը տեսնելու ենք Մուգալլուին մէջ, եւ անոր անունն ալ հայերէնով մեկնելու կը ջանար: Մեր կարծիքով Իշգալլուի Սկիւթացի եւ Մուգալլուի Տաբալցի ըլլալը արդեւք մը չէ որ անոնք իրապէս ժամանակ մը Արմէններու վրայ իշխած ըլլան:

Բայց մի քանի տարի վերջը, անկէ յետոյ է որ Լիւդիոյ Գիւգէս թագաւորը Ասորեստանի նոր գահակալին՝ Ասուրբանիպալի դեսպանութիւն մը ղրկած է, այսպէս Ն. Ք. 664-էն յետոյ կամ 660-ի ատենները, կը տեսնենք որ Տաբալի եւ Մելիտինէի թագաւորը Մուգալլու յանկարծ որոշած է հաշտուիլ Նինուէի վեհապետին հետ, եւ իր ղրկած ընծային կամ տուրքին մէջ կարեւոր տեղ կը բռնեն Կապադովկիոյ կամ «Թողարմայի Տան» նշանաւոր ձիերը (Olmstead, Assyria, p. 419—420): Ահա այս մասին Ասուրբանիպալի գրածը. «Մուգալլու, Տուբալի թագաւորը, որ անմատչելի լերանց վրայ կը բնակէր եւ իմ թագաւոր հայրերուս դէմ պատերազմներ մղած էր, իր երանքէն սերած իր մէկ դուստրը Նինուէ բերաւ ինծի երկրորդական կին ըլլալու, մեծահարուստ հարսանեկան օժիտով մը, եւ իմ ոտքերս պագաւ: Ես Մուգալլուին պարտադրեցի իբրեւ տարեկան հարկ խոշոր ձիեր ղրկել» (Rassam Cylinder, տողեր 68—74. հմմտ. Taylor Cylinder, Rev. 22 ff.):

Ի՞նչ եղաւ Մուգալլու թագաւորին վախճանը. չենք գիտեր: Կ'երեւի թէ անոր մահէն ետք, եթէ ոչ առաջ իսկ, Մալաթիա նորէն Ասորեստանեայց նահանգ դարձաւ, եւ այսպէս շարունակեց մինչեւ Ք. Ա. 620 թուականները: Այս միջոցին Կիմմերեանները Լիւդիայէն արտաքսուած, դէպի արեւելք դարձած էին: Ն. Ք. 650-ին ատեններն էր որ Տրերներ զատուեցան բուն Կիմմերներէն, որովհետեւ կ'ուզէին ուղղակի դէպի արեւելք գարնել մինչեւ Եփրատի վերին ջուրերը. բայց Կիմմերներուն թագաւորը Լիւգդամիս (Ասուր. Tugdammi) կ'ուզէր Տաւրոսեան դռներէն դաշտային Կիլիկիա իջնել եւ անկէ արշաւել Սիւրիա, ուր կը յուսար ճոխ աւար գտնել իր հորդաներուն համար:

Բայց դեռ Կիլիկիա չիջած՝ Տաւրոսի կիրճերուն մէջ իր դէմն ելաւ իր զօրքէն խիստ գերազանց Ասորեստանցւոյ բանակ մը, որուն հետ պատերազմի մէջ սպանուեցաւ Լիւգդամիս (Ք. Ա. 645): Անոր որդին Սանդախշատրա այս պատահարէն վերապրող Կիմմերները Տաւրոսի կիրճերէն ետ հանեց դէպի Փոքր Ասիոյ կեդրոնը: Վերջապէս Կիմմերեանք կամ Գամիւրք կ'երեւի թէ ամենէն աւելի կեդրոնացան Ալիւս գետի մեծ աղեղին ներսը՝ այժմու Եոզղատի կողմերը: Հաւանօրէն Սանդախշատրայի յաջորդն էր Տրերեան ծագումով Կոբոս, որու մասին Ստրաբոնի ըրած յիշատակութիւններէն յայտնի է որ անիկա իր անդուլթ հարստահարութիւններովը մեծ սարսափ ձգած է Փոքր Ա-



սիրոյ բոլոր կողմերը, որով իր անունը Լենկթիմուրի մը սոսկալի նմանութիւնը կը կրէ հին յունական աւանդութեան մէջ: Բայց վերջապէս Կորոս իր հարստահարութեանց արժանի պատիժը դտաւ:

Տեսանք թէ արդէն Ք. Ա. 670 թուականներուն Սկիւթացի կամ Սակեան բախտախնդիրներ թափանցեր էին մինչեւ Փոքր Ասիա եւ հասած մինչեւ Թերմոզոնի հովիտը, որով կ'երեւի թէ հիներ Իռիս կամ Գայլ գետը կը հասկընային: Հոս Կիմմերիացիք եւ Սկիւթացիք պայքարիլ սկսան եւ այնպէս կը թուի թէ ի սկզբան, առաջին ընդհարմանց մէջ, Սկիւթացիք պարտուեցան, մանաւանդ Կիմմեր-Տրերներու թագաւոր Կորոսէն: Սկիւթացիք Ք. Ա. 620-ի ատենները ստիպուեցան ետ քաշուիլ ետքէն Փոքր Հայք ըսուած երկիրը եւ լուր ղրկեցին Իրանի Սկիւթացւոց մեծ թագաւորին Մադիւէսի: Այդ հզօր յաղթականը փութաց իր Փոքր Ասիոյ ցեղակիցներուն օգնութեան. այս անգամ Կիմմերիացիք յաղթուեցան Զելայի քով, եւ Կորոս ալ գերի ինկաւ Մադիւէսի ձեռքը, որ քիչ յետոյ զանի մեռցուց:

Կ'երեւի թէ այս բախումներուն միջոցին Սկիւթացւոց կեդրոնացած վայրն էր Մելիտինէ, եւ գուցէ այս վերիվայրումներուն առիթով էր որ ամենահին Մալաթիան կործանեցաւ: Գոնէ պեղումներու փաստը դէպի այս թուականը կը մատնանշէ այդ կործանումը: Ինչ որ է, Կորոսի սպանումէն ետք՝ կերպով մը համաձայնութիւն գոյացաւ մարտնչող երկու բարբարոս ժողովուրդներուն մէջ, ու Կիմմերեանք իբրեւ ճորտեր Սկիւթացւոց՝ միացան անոնց հրոսակային արշաւանքներուն: Մադիւէս արեւմուտքի մէջ իրեն փոխանորդ թողլով Իդանթիւրսոս անուն սկիւթացի պետ մը՝ վերադարձաւ արեւելք: Հերոդոտոսի քով պահուած աւանդութեան համեմատ՝ միացեալ բարբարոս հորդաներն ապա Իդանթիւրսոսի առաջնորդութեամբ՝ Մելիտինէէ սկսեալ ասպատակեցին Ասորեստանեայց նահանգները մինչեւ Եգիպտոսի սահմանագլուխը, ուր հասած կ'երեւին Ն. Ք. 615-ի ատենները: Իսկ անկէ մի քանի տարի վերջը Ն. Ք. 612-ին Նինուէ ինկաւ Բաբելոնացւոց ու Մեդացւոց (Մարադ) միացեալ յարձակման առջեւ, որուն հետեւեցաւ Ասորեստանեայց պետութեան կործանումը (Ն. Ք. 607 կամ 606-ին): Իսկ մինչեւ այն ատեն Հայ-Արմէնք արդէն իրենց զրաւման անցուցած էին Ուրարտուի երկիրներուն մեծագոյն մասը:

Այսպէս վերջացած կրնանք համարիլ Հատեան Մալաթիոյ պատմութիւնը:



## Զ.

## ՀԱՏԵԱՆ ՄԱԼԱԹԻՈՅ ՄՇԱԿՈՅԹԸ

ՄԱԼԱԹԻՈՅ ՊԵՂՈՒՄՆԵՐԸ. — Հոս կը վերարտադրենք հաղորդակցութիւն մը Հալէպի Revue Archéologique Syrienne պարբերականէն Tome II, fascicules 9—10: Novembre—Décembre, 1932, Alep, p. 101)

Մ. Լուի Տըլափորթէ՝ պեղումներուն մասին, զոր ինքը ստանձնած էր կատարել Փոքր Ասիոյ մէջ Մալաթիոյ մօտ Արսլանթէփէի աւերակներուն մէջ: — Արսլանթէփէ Մալաթիոյ բուն դիրքն է՝ ամենէն ուշը շուրջ Ք. Ա. 2500-ին հիմնուած եւ Ասորեստանեայց պետութեան կործանումէն ետք իր բնակիչներուն կողմէն թողլքուած, որոնք քիչ մը դէպի հիւսիս տեղափոխուեցան եւ ստեղծեցին այն ատենուան Մալաթիան (հմտ. վերել՝ էջ 11—12): Պեղումներու սկսելէն աւելի քան 50 տարի առաջ հոն Արսլանթէփէ պատահաբար գտնուած են խորաքանդակներ, որոնց ամենահին ծանօթները վաճառականի մը կողմէն Ֆրանսա տարուած ըլլալով, հիմա Լուվրի մէջ են: [Garstong մինչեւ իր ժամանակը յայտնուած բոլոր հատեան հնութիւնները նկարագրած է իր Land of the Hittites պատկերազարդ դիրքին մէջ]:

Մ. Տըլափորթի պեղումները տեղի ունեցած են աւերակի բարձրագոյն մասին մէջ: Ինքը հոն, դէպի հարաւը գտած է Ասորեստանեայց շրջանին պատկանող քաղաքին մնացորդները, եւ դէպի հիւսիսը՝ վարի կառուցուածքները քրիստ. ժ. դարէն մնացած թրքական պալատի մը: Սոյն թրքական կառուցուածքին անմիջապէս տակը կան խետական պալատի մը մնացորդները, որոնց հիւսիսային մասը միայն պեղուած է դեռ: Քարաշէն պատերը եւ դաւիթներուն սալաշատակները լաւ վիճակի մէջ են եւ յուշարձանին մուտքի դուռը, առիւծներով ամբարտակուած (flanquée), որոնց դուռները բոլորակաձեւ քանդակուած՝ դէպի առաջ կը դատուին, զարդարուած է Սուլումիի անուն թագաւորի մը մեհենագիրը կրող հարթաքանդակ պատկերներով: Այս իշխանը չորս անգամ ներկայացուած է եւ ամէն անգամին նա դինեձօնք (libation) կը մատուցանէ տարրեր աստուածութեան մը, — Լուսնի դից, Մելիտինէի Տեշուր դից, եւայլն: Մէկ անգամին թագուհին ալ կ'ընկերանայ կրօնական արարողութեան եւ գինեձօնքը կը մատուցանէ Արեւու դիցուհւոյն. ասիկա պատկերով հաստատութիւն կու տայ կրօնական բնագիրներուն ըսածին, որոնք մեր ձեռքը հասած են:

Այս պալատի նախագաւիթին մէջ, մօտ այն պատուանդանին, որուն վրայ անիկա հին ատեն կանգնուած էր, նախաքրիստ. թ. դարու թագաւորի մը վիթխարի արձանը գտնուած է գերեզմանի մը մէջ, ուր ան բարեպաշտօրէն



թաղուած պահուած էր: Այս իշխանը որդեգրած էր Ասորեստանացոյ ուրա-  
հիւս երկայն խոսողիկը, որ այդ շրջանին կը պարտադրուէր այն երկրին վը-  
րայ գերիշխող վեհապետին կողմէն:

**ՆՈՐ-ՀԱՏԵԱՆ ՄՇԱԿՈՅԹԸ** — Հոս հարկ կը սեպենք ընդհանուր աղ-  
նարկ մը նետելու «Հատեան» (Hittite) կամ «Նոր-Հատեան»  
(Néo-Hittite) ըսուած քաղաքակրթութեան վրայ: «Նոր-Հա-  
տեան» ըսուած գեղարուեստական ոճը Ն. Ք. 1250-ի ատեններէն կը սկսի  
Մալդիյայի (Մալաթիոյ) մէջ, բայց անոր ծաղման պատճառներն ու ազդակ-  
ները մեզի անծանօթ կը մնան առ այժմ: «Հաթեանց երկրին մէջ պեղումնե-  
րու գլխաւոր շահեկանութիւնը յայնմ կը կայանայ», կ'ըսէ Մարսէլ Պրիոն,  
«որ իւրաքանչիւր դիրք տարբեր խնդիր մը կը ներկայացնէ, առանց ամէն  
անգամ փափաքուած լուծումը բերելու: Ասիկա կը ծագի անկէ որ մենք Հա-  
թեանները կը ճանչնանք լոկ իրենց պատմական գոյութեան մէկ մասին մէջ...  
եւ այս ալ այն մասն է, երբ Հաթեան քաղաքակրթութիւնն արդէն ամբողջա-  
պէս կաղմուած է իր հիմնական յատկանիշներով, առանց որ մենք կարող ըլ-  
լանք իմանալու այդ երկար ուղեւորութիւնը որ զայն մինչեւ այդ տեղ հաս-  
ցուցած է» (Marcel Brion, *La Résurrection des villes mortes*, p. 264):

«Նոր-Հատեան» գեղարուեստը կը բաղկանայ կարգ մը իւրայատուկ  
ճարտարութեամբ չէնքերէ, — գլխաւորապէս պալատներ, անոնց կցեալ մե-  
հեաններով, եւայլն: Ասոնց պատերուն վրայ, մասնաւորապէս գետնի մօտի  
շարքերուն երեսը ազուցուած սալաքարերուն վրայ, ինչպէս նաեւ բնական  
տապառաքներու երեսը, հարթաքանդակ պատկերներ փորուած են, որոնք գըլ-  
խաւորապէս կրօնական ծէսերու տեսարաններ կ'ընծայեն, բայց նաեւ որ-  
սորդութեան, ընտանեկան կեանքի, ինջոյքներու եւ նման եղելութեանց  
պատկերները:

Հարթաքանդակները սովորաբար ընկերացուած են արձանագրութիւն-  
ներով ալ, եգիպտականէն բոլորովին տարբեր մեհեմագրական (hieroglyphic)  
դրութիւնով մը գրուած, որ վերջին 80 կամ աւելի տարիներու  
միջոցին՝ ամենասուր եւ փորձառու հնագէտ-լեզուագէտներու կողմէն եղած  
յամառ ու անխոնջ ջանքերուն հակառակ, դեռ գոհացուցիչ կերպով վերծա-  
նուած չեն: Բայց քննողներուն մեծամասնութեան համոզումը սա է թէ ար-  
ձանագրութիւններն ալ առ հասարակ կրօնական բովանդակութիւն ունին, եւ  
ոչ թէ որոշ կերպով յաղթանակի յիշատակարաններ են:

**ՃԱՐՏԱՐԱՊԵՏՈՒԹԻՒՆ** — Ինչպէս ըսինք, Արսլանթեփէի մէջ, Մելի-  
դիայի դիրքին վրայ, Մ. Տըլափորթի ձեռքով յառաջ տարուած պեղումները  
ցոյց տուած են նախաքրիստոնէական Ք. հազարամեայի գէպի մէջտեղերը  
հիմնուած եւ ապա տակաւին բոլորովին չլուսարանուած պատճառով մը իր  
բնակչաց կողմէ լքուած քաղաք մը: Մ. Տըլափորթ այս աւերակներու մէջ  
ճանչցած է Սուլումիլի թաղաւորին պալատը, որուն դրանդիները զարդա-



րուած էին առիւծներով եւ թագաւորն ու թագուհին Տեշուր աստուծոյն զոհ մատուցանելու վրայ պատկերացնող հարթաքանդակներով, որոնք լաւ վիճակի մէջ պահպանուած են: Ի՞նչ է այս գեղարուեստին ծագումը: Իմ կարծիքովս՝ իր սկիզբով Սումեր-Ակկատեան ազդեցութիւն մըն է ասիկա, որ մէկ կողմէն ուղղակի փոխանցուած է Ասորեստանացոյ, իսկ միւս կողմէն՝ Հուրքեան միջնորդութեամբ՝ Մալդիյայի ու մինչեւ հեռաւոր Էօյիւք իսկ: Նոյնը ճշմարիտ է նաեւ Կարքեմիշի եւ նման տեղերու գեղարուեստին համար: Մալդիյայի մէջ՝ Սուլումիլի ապարանքին վրայ՝ Ասորեստանեայց ազդեցութիւն ալ տեսնուած կը կարծուի, մանաւանդ տեսարաններուն բազադրութեան մէջ, բայց եւ այնպէս կ'ընդունուի թէ արուեստին գործադրութիւնը տարբեր կը մնայ:

Ըստ Պրիոնի, պատկերներուն կազապարումը մթազգած է եւ կորովի կերպով արտայայտիչ ուժականութիւն մը ունի: Հարթաքանդակներուն վրայ պատկերացուած տեսարանները իրական կեանքի եղելութիւններ են ամենամեծ մասամբ եւ այսպէս օգտակար լուսաբանութիւններ կը հայթայթեն արարողութեանց, բարքերուն եւ տարազներուն վրայ՝ հաթեան կայսրութեան այս մարզին մէջ, որ Անատոլեան ազդեցութեան ենթարկուած կ'երեւի:

Ամենէն հետաքրքրականը, եւ թէ՛ գեղարուեստական արժէքով, թէ՛ դրաւոր բնագիրը լուսաբանելու մասին մեզի ներկայացուած շահեկանութեամբը, ա'յն է որ մեծ աստուածը կը տեսնենք Իլլույանկա վիշապը սպաննելու վրայ, փոթորիկի մը մէջ, որ սարսափելի աստուածութեան էութիւնը կը բացատրէ մեզի, իբր Ամպրոպի ոգին կամ տարերային ոյժերու որ մարդուն մէջ շղթայազերծուած են (Marcel Brion, *La Résurrection des villes mortes*, p. 264):

Ըստ նոյնինքն Տըլափորթի, Նոր Հատեանք որոնց ամենագլխաւոր կեդրոնն էր Մալաթիա, շարունակած են Հաթեան մեծ կայսրութեան օրով Փոքր Ասիոյ կեդրոնին մէջ սկսած գեղարուեստական շարժումը եւ նշանակելի յուշարձաններ արտադրած՝ ճարտարապետութեան եւ քանդակագործութեան մարդերուն մէջ: Նոր Հատեանց երկիրներուն մէջ շինարուեստը նախապէս մեզի ծանօթացուցած էին Կարքեմիշի, Ջէնճիրլիի եւ Սաքչէկէօզլիւի պեղուած պարիսպներն ու պալատները: Հիմա կարելի է անոնց վրայ աւելցնել Մալդիյայի (Մալաթիոյ) վաղեմի պալատին վրայ նախաքրիստոնէական Ը. դարուն կատարուած վերձեռնումները: Քարէ հիմերու վրայ կը բարձրանան պատեր, ուր անթուրժ, տափակ ու լայն աղիւսներու շարքեր եւ փայտէ հեծաններու շարքեր հերթովի հիւսուած են: Ինչպէս մինչեւ ներկայ օրս Արեւելքի բազմաթիւ վայրերուն մէջ, նոյնպէս ԺԳ. դարուն (Ն. Ք.) Մալդիոյ մէջ կը գրանենք միեւնոյն կառուցուածքին մէջ փոխնիփոխ գործածութիւնը քարի, աղիւսի ու փայտի: Պատերը դրսուանց հաւասարեցուած, հարթուած եւ մէկ մակարդակի վերածուած են: Ներսուանց սենեակներու յատակը երբեմն ցեխաղաղախով ծեփուած են, երբեմն ալ թրծեալ քառակուսի կղմինտրներով սալաշատակուած: Ընդարձակ սրահներու եւ դաւիթներու, ինչպէս նաեւ



դրանդիներու ամբողջ առաստաղը վեր բռնելու համար դրուած են տաշեալ փայտէ սիւններ կամ գերաններ, որոնք սովորաբար քարէ խարխիւններ կամ պատուանդաններ ունին՝ առաւել կամ նուազ քանդակազարդ:

Ճարտարապետութեան մէջ աղիւսի դործածութիւնը շատ հաւանական է որ Հաթեանք Միջագետքէն սորվեցան: Բայց ընդհանուր առմամբ՝ շինութեան ոճը նման է Եգիպտական ոճին: Պարիսպներուն յատակը հորիզոնական զիրքով դրուած հեծաններու դործածութեան եղանակին դեռ մինչեւ այսօր կը հանդիպինք եւրոպական ցամաքին վրայ: Ք. Ա. Ժ. դարուն կառուցուած Հաթեան պալատներու մէջ արդէն որմանկարներ (fresques) դրուած են սրահներու որմերուն վարի մասին վրայ. նոյն դարու հաթեան պալատներու որմերուն վարի քարաշարները նաեւ կը կրեն փորագրուած զարդեր իրենց վրայ: Մինչդեռ Միջագետքի մէջ չենք հանդիպիր նման արուեստի, մինչեւ այն օրը՝ երբ Ասորեստանցիք կը սկսին հետեւիլ Հաթեան ոճին եւ որմերուն ստորոտը կը դետեղեն փորագրուած սալաքարեր (plaques) Մալդիյայի մէջ, Ք. Ա. Ժ. Գ. դարուն, չէնքերու մէջ դրուելիք փորագրուած խոշոր քարերը մարդու հասակի չափ են: Դարձեալ Հաթեանց կը պարտինք քաղաքներու եւ Պալատներու դրանց մուտքը իրական կամ երեւակայական էակներ ներկայացնող կոթողներ դնելու սովորութիւնը: Ասորեստանցիք ու Աքեմենեան Պարսիկները ասոնցմէ պիտի փոխ առնէին այդ զարդարուեստը, բայց ոչ թէ ուղղակի կերպով, այլ Նոր-Հատեանց միջնորդութեամբը: Ինչպէս արդէն յիշեցինք, շինութեանց մէջ կիրարկուած հաթեան այս ոճը նոյնութեամբ կը տեսնուի թէ՛ Մալդիյայի եւ թէ՛ Հիւսիսային Սիւրիոյ Նոր-Հատեան բոլոր քաղաքներուն մէջ: «Առիւծներու դուռն» ու տաճարին դուռը գրեթէ նոյնաձեւ են. իսկ «Սփինքաներու» դրան վրան ու շուրջը կը տեսնուին փորագրուած զարդեր: Մուտքի ամենէն աչքառու զարդերը կը կազմեն զոյգ առիւծները՝ մարդու հասակով, որոնք դրուած են սեմէն վեր քանի մը քարէ աստիճաններու վրայ: (Քաղուած Delaporte, *Les Hittites*, pp. 327—331-էն. հմմտ. Արտասաղ Արքեպ. Սիւրմէեան, ՍՈՒՐԻԱ, էջ 539—577):

ՔԱՆԴԱԿԱԳՈՐԾՈՒԹԻՒՆ. — Նոր-Հատեանք իրենց քանդակները կը գնեն քաղաքներու եւ պալատներու դրանդիներուն, պատերուն, սիւններու պատուանդաններուն վրայ, նաեւ կոթողներու վրայ եւ ժայռերու կուշտին:

Սիւններու պատուանդանները բոլորչի եւ հաստ բարձիկներ են, եւ անտարակոյս նախատիպը կը կազմեն հելլեններու յոնիական սիւնի պատուանդանին: Երկու տեսակներ կան: Նուազ քաղաղբեալին մէջ բարձիկը, պարզ կամ կրկնակ, զարդանկար մը կը կրէ՝ թեթեւօրէն բարձրաքանդակ տերեւներէ, արմաւենիի ճիւղէ, վարդաձեւերէ (rosette), հանգոյցներէ (torrade) կամ խղնջաձեւ դիժերէ (volute) քաղկացեալ: Միւս տեսակ պատուանդանին վրայ երկու կենդանիներ, յաճախ տիինքսի



տեսքով, քով քովի դրուած են եւ միասին ուսամբարձ կը շալկեն պարզ բաբ-  
ձիկ մը: Այս տեսակ պատուանդաններէ նմոյշներ պեղուած են Զենճիրլի եւ  
Սաքչեկէօղլու. կարելի է որ անոնք գործածական էին Ք. Ա. Թ. եւ Ը. դա-  
րերուն նոր Հատեանց երկիրներու մեծ մասին մէջ, որովհետեւ Մաք Իվան  
երկու տեսակներէն ալ գտած է 1935-ին՝ Թալինաթի մէջ, Որոնդէսի ե-  
ղերքը:

Քաղաքներու կամ պալատներու դրանդեաց զարդարանքին մէջ դրուած  
ները (relief) երբեմն քանդակուած են տաշուած քարերու վրայ, որ  
կառուցուածքի մաս կը կազմեն, եւ երբեմն պատին երկայնութեամբ փակցը-  
ւած սալաքարերու վրայ: Ամենաշատ պարագաներու մէջ ասոնք իբրեւ ստա-  
րեզր պարունակ (plinthe) դետնի հողին վրայ տեղաւորուած են.  
բայց յաճախ ալ մարդու հասակին բարձրութեամբ դետեղուած, ինչպէս Մ.  
Տըլափորթ անձամբ ստուգած է Մալդիայի Ք. Ա. ԺԳ. դարէն շինուածոց  
վրայ:

Մալաթիոյ մէջ, Ք. Ա. Թ. դարէն, կառքով որսորդութեան երկու տե-  
սարաններ, որոնց կ'ընկերանայ մեհենադիր նշանադրերով արձանադրութիւն  
մը, քանդակուած են ազուցման (revêtement) սալաքարերու վրայ.  
բայց հոն չի դիտուիր արագութեան այն տպաւորութիւնը, որ յատկութիւնը  
պիտի ըլլայ աւելի վերջերն Ասորեստանեայց դեղարուեստին. անասուննե-  
րուն ծառացումը ո՛չ Եգիպտոսինն է եւ ո՛չ Ասորեստանինը, հապա տեղակայու-  
ման դեղարուեստի ստեղծագործութիւն մը:

Ինչպէս արդէն յիշեցինք, Թազաւորի մը հսկայական անդրին, Մալա-  
թիոյ Առիւծուց Դրան մէջ կանգնուած, երկրաչարժի մը ժամանակ կ'ընայ իբր  
պատուանդանին վրայէն, եւ կը Թաղեն զայն իր ինկած ու դլորուած տեղուան  
քով շինուած գերեզմանին մէջ: Անիկա Իվրիզի աստուածին հետ միեւնոյն ցե-  
ղազրական տիպը կը ներկայացնէ: Տարագը կը բաղկանայ կապայէ մը ու ե-  
րիզուած (frangé) երկար ցփսիէ մը, որու մէկ ծայրը աջ ուսին վրայ-  
էն նետուած է եւ անութին տակէն ետ կու գայ դէպի առջեւը, որ ձախ ձեռքը  
զայն կը բռնէ: Մօրուքը եւ մազերը վիրայուած են Ասորեստանեայց ոճով եւ  
գլուխը շրջապատուած է anthomianներով զարդարուն պսակով մը,  
կարգ մը Ասորեստանցի պաշտօնատարներու կրածին նման: Ծանր ասպարանե-  
ջանները, որոնք դաստակները կը զարդարեն, դոցուած չեն, եւ ինչպէս յԱ-  
սորեստան՝ առիւծներու գլուխներով վերջաւորող ծայրեր ունին: Մուճակ-  
ները (sandales) բնաւ չեն տարբերիր Ասորեստանացոյ քանդակնե-  
րուն վրայ տեսնուածներէն: Աջ բազուկի վարի մասը երկնցած է դէպի աստու-  
եւ ձեռքին մէջ կը բռնէ դրեթէ գնդաձեւ ու côtelé բան մը՝ որ հրա-  
մանատարութեան խորհրդանշան մ'ըլլալ կը թուի: Այս առարկան բռնող ձեռ-  
քը ճշդօրէն պատկերացնելու դժուարութիւն ունենալով արուեստագէտը եւ  
չկրնալով այդ դժուարութեան յաղթել, որոշեր է ամէն մէկ մաս չորս մասո-  
նոսկրներով ներկայացնել (Delaporte, Les Hittites, pp. 331-2):



ՄԱԼԴԻՅԱՅԻ ԽՄԲԱՆԿԱՐ ՔԱՆԴԱԿԸ .— Մալդիյա, պալատի դրանդիկոսը՝ հարթաքանդակներուն մէջ, վեց հատը կը կրեն անունը միեւնոյն իշխանին, առժամապէս Սուլումիի ընթերցուած: Ինքը հոն պատկերացուած է տարբեր աստուածութեանց դիմացը, ինչպէս արդէն յիշեցինք, որոնց իբրեւ հեղման պատարագ (libation) կը մատուցանէ անասունի մը արիւնը: Հեղուկը կը ծորի ձեռքին մէջ բռնած ամանէ մը եւ կը հոսի մերթ գետինը եւ մերթ ուրիշ ամանի մը մէջ: Զոհի անասունը, զոր ծառայ մը կը քշէ, գինեձօնք մատուցանողին ետեւը պատկերացուած է: Աստուածներն են՝ դրանդիի գաւիթին մէջ աջ կողմը՝ Մալդիյայի Ամպրոպի աստուածը եւ ուրիշ քաղաքի մը Ամպրոպի աստուածը, որ հեծած է իր ստորոգելիքը ցուցնող անասունի մը վրայ եւ ձեռքին մէջ կը բռնէ ծռած ծայրը գետնին դաշող գաւազանը, քուրմերուն յատուկ: Մեծ գաւիթին մէջ, դրանդիի անցքին վրայ, դէպի ձախ կողմը՝ անկիւնաքարին վրան, որ մուտքը պահպանող առիւծին ետեւը եւ հակառակ ուղղութեամբ գետեղեալ փոքր առիւծով մը զարդարուած է, կան չորս աստուածութիւններ՝ որոնց անունները փորագրուած չեն, բայց իրենց նմաններն ունին Պողազքէօյի մօտ Եազըլը գայայի չքախումբ թափոններուն մէջ: Դրացի քարահատորին վրայ իշխանը ներկայացուած է երկու անգամ, անմօրուս աստուածութեան մը դիմացը, որ յատկանշուած է գետնին դաշող ծայրը կորացած գաւազանով եւ արեգակնային սկաւառակով որ կը սաւառնի իր գլխուն վերեւը, ճշդիւ ինչպէս որ է Եազըլը գայայի մէկ աստուածութեան պարագային, եւ մօրուսաւոր ու թեւաւոր աստուծոյ մը դիմացը՝ կացինով մը զինուած, որու կոնաձեւ խոյրը, կողերէն կիսաբոլորակներով զարդարուած ու պաշտպանուած, կը կրէ խոշոր մահիկ մը, մինչդեռ Եազըլը գայայի պատկերին մէջ այս մահիկը դրուած է գլխարկի վարի եզերքին վրայ: Մեծ գաւիթին մէջ՝ աջ կողմը՝ գինեձօնքը կ'ուղղուի քաղաքի մը աստուծոյն, որ եղջերուի մը վրան կայնած է եւ աղեղով մը զինուած: Հարկ է դիտել որ այս հարթաքանդակները, որոնց ոճը միօրինակ է, պատարագ մատուցանողի կեանքին տարբեր շրջաններուն կը վերաբերին: Յիրաւի ասի կը հետեւի ոչ միայն հագուած տարազի տարբերութիւններէն, այլ մանաւանդ իր անուան այլաձեւ փորագրուելներէն: Իբր սկզբունք, այս անունը բարձրաքանդակ փորագրուած է եւ այսպէս կը գտնուի առանց ուրիշ յաւելումի. ուրիշ անգամներ անունը արքայութիւն նշանակող երկու գաղափարագրերու մէջտեղ քանդակուած է. ինչ որ նմանութիւն կը յայտնէ Մեծ Արքայի կնքագրոյմին (édicule), որուն օրինակներն ուրիշ տեղ ալ կը գտնուին դրօշարուեստի (glyptique) մէջ: Վերջապէս երեք դրուագներու վրայ՝ իշխանին արքայութեան բարձրացուելէն ետքը փափաքուած է այս նոր տիտղոսը աւելցնել, բայց ասիկա բարձրաքանդակով ընել անկարելի ըլլալուն, խորաքանդակ փորագրուած է եւ այս յաւելումին անախորժ տպաւորութիւնը չէզոքացնելու համար՝ արդէն բարձրադիր դրուագրուած գանապոստ տառանշաններ կրկնուած են խորաքանդակ (Delaporte, p. 293, fig. 16):



Մալղեյայի դրանդիի միւս երկու քանդակներէն մէկը, ներքին դաւիթին մէջ եւ ձախ կողմը զետեղուած, նմանապէս կը ներկայացնէ գինեձօնքի տեսարան մը: Հոն Սուլուսիլի տեղը կը բռնէ թագուհի մը, որու հագուստը կը բովանդակէ, ինչպէս Եազըլը գայայի դիցուհիներուն, երկայն քօղ մը՝ որ կոնաձեւ գլխարկը ծածկելէ վերջ մինչեւ գետինը կ'իյնայ: Թեւաւոր աստուածութիւնը երկու թռչուններու վրայ կայնած, կը կրէ կոնաձեւ գլխարկը՝ կողերէն կիսաբոլորակներով դարդարուած, եւ պատմութեանը՝ ծունկին վերեւը վերցուած եւ համակեդրոն բոլորակներու պատկերներով փոթփոթուած, որ Եազըլը գայայի վրայ աստուածներու չքախումբի անդամներէն ոմանց տարագն է:

Վերջին քանդակապատկերը կը գտնուի պալատի մեծ բակի աջ սլառին ձառքերէ: Ան կը պատկերացնէ նախորդներէն բոլորովին տարբեր տեսարան մը, եւ զժրախտարար վնասուած է առարկային ամենէն կարեւոր մի քանի տեղերէն. իր ոճովը, անձնաւորութեանց տարազին մասնայատկութիւններովը, առանց տարակոյսի ան կը պատկանի միեւնոյն ժամանակաշրջանին ինչպէս Մալղեյայի միւս քանդակները եւ Եազըլը գայայի չքախումբի թափորները (fig. 12): Աստուած մը՝ կարճ հագուած, գլուխը կը կրէ խոյր մը քովընտի կիսաբոլորակներով շրջանակուած, կողին ունի սուր մը, գինեւոր է երկայն նիզակով մը եւ ընկերացած՝ իրեն նմանող աստուածով մը, որ կը կռթնի մանկլաւի (մեծ մուրճի) մը չափազանց հաստ կռթին վրայ եւ կը կրէ ուսին վրայ ուրիշ դէնք մը: Առաջինը կը յարձակի եւ կը զարնէ բազմադրլիւեան օձի մը, երեք անգամ ինքիր վրայ գալարուած. իսկ անոր օղներու համար երկինքէն ոգիներ կ'իջնեն à micorps եւ իւրաքանչիւրը կը բռնէ անձրեւի խոչոր կաթիլներու պարկ մը, որոնցմով կը ոմբակոծեն հրեշային՝ գազանը (fig. 12 p. 250): Ասիկա քանդակագործութեամբ պատկերացումն է Իլլույանկա վիշապի վերաբերեալ դիցաբանութեան, որու դրաւոր պատմութեան ար ունինք Պոդագքէօյի պեղուած սեպագիր քննագիրներուն մէջ:

Պարտինք յիշել Սուլուսիլի մէկ ուրիշ քանդակագործութիւնն ալ. այս եւս մաս կը կապմէր մեծ դրան դարդարանքին, բայց երկնցուած էր մինչեւ արտաքին մուտքին մօտը: Ամենամեծն է, եւ երկու պատաստի կտրուած: Միւսներուն պէս կը պատկերացնէ գինեձօնքի տեսարան մը: Հոս աստուածը իր յատուկ գաղափարադրովը (ideogramme) նշանակուած, Ամարոպի մեծ աստուածն է՝ երկու ձիերէ քաշուած կառք մը հեծած, որմէ վար կ'իջնէ՝ թագաւորին երկրպագութիւնն ընդունելու համար (Delaporte, Les Hittites, p. 293-4):

ՄԱԼԴԻՅԱ ԵՒ ՈՒՐԱՐՏՈՒ. — Արդէն պատմագէտներու կողմէն գինեւոր իրողութիւն մըն է որ մէկ կողմէն Կասեանց (Kassites) եւ միւս կողմէն Մելիտինացուց ու խալդեանց միջեւ մշակութային հասարակաց բաժանան եզրեր կան: Ասկէ դատ, կ'երեւի թէ սկզբնական Բիայնացիք շատ կա-



նուխէն ենթարկուած են արեւմուտքէն ճառագայթող քաղաքակրթական նոր ազդեցութեան եւ թէ ատոր վառարանն էր Մալդիյա, ուր Ք. Ա. ԺԳ. դարուն մշակութային վերելքը ստեղծեց այն դարմանալի քաղաքակրթութիւնը՝ զոր պատմագէտք «Նոր-Հատեան» կը կոչեն: Եւ վերջապէս յիշելի է որ Բելք եւ Լէյման-Հաուպտ միշտ այն համոզումն ունեցած են թէ Ուրարտուի Մե. նուաս թագաւորը Մալաթիոյ Սուլիեհաւալի թագաւորը պարտութեան մատնելէ ետք Մալաթիան այցելեց եւ անոր շրջակայ դրախտանման պարտիզաքաղաքը տեսնելով հիացմամբ, անկէ թելադրուեցաւ Տուսպայի Վանի մօտ նրման պարտիզաքաղաք մը ստեղծելու: Թէեւ այս մասին դրական ապացոյց կը պակսի, սակայն անտեղի չէ այսպիսի գաղափար մը ունենալ:

ՄԵԼԻՏԻՆԷԻ ՆՈՐ-ՀԱՏԵԱՆ ՄՇԱԿՈՅԹԻՆ ՆՇԱՆԱԿՈՒԹԻՒՆԸ. — Այն խոր հնութեան մէջ Մալաթիոյ պատմութեան համար առ այժմ մեր առաջնորդներն են հին Հաթեանց, Ասորեստանեայց եւ Ուրարտացոց բեւեռագիր արձանագրութիւնները: Սոյն արձանագրութեանց շնորհիւ կրնանք պատասխանել կարգ մը հարցումներուն, բայց ոչ ամէն հարցումին: Բարեբախտաբար վերջերս պեղումներ մասամբ կատարուած են Մալաթիոյ ամենահին դիրքը ձեւացնող Արսլանթեփէի աւերակաց մէջ, եւ գոնէ երեք հարցումներ իրենց բաւարար պատասխանը ստացած կ'երեւին. ա — Ե՞րբ հիմնուեցաւ այդ վայրը. կը թուի թէ Ն. Ք. 2500-ի, մինչեւ անգամ Ն. Ք. 3000-ի պէս շատ կանուխ թուականի մէջ մէջ: Բ — Ե՞րբ լքուեցաւ. հաւանօրէն Ն. Ք. 620—615 թուականներուն եւ դուցէ Սկիւքացոց դործած աւերներուն երեսէն: Գ — Ե՞րբ սկսաւ Մալաթիոյ (Մալդիյայի) գեղարուեստական մշակոյթը. ըստ պեղումներու արդիւնքին՝ Ն. Ք. 1250—1200 թուականներուն, յամենայն դէպս՝ Պատտուսասի կործանումէն առաջ: Հոն ամենականուխ շինուած պալատ-տաճարի քանդակներուն վրայ կը կարդացուի Սուլումիլի թագաւորի մը անունը եւ ամէն նշաններ կը յայտնեն որ Սուլումիլի կ'ապրէր ու կը տիրէր Ն. Ք. 1250—1200 թուականներուն, նախ իբրեւ փոխարքայ իշխան եւ ապա իբրեւ անկախ թագաւոր, դուցէ վերջինը՝ Պատտուսասի անկման ու կործանման վրայ: Արուեստասէր անձ մըն էր նա, եւ հին Հաթեան գեղարուեստի գաղափարներն ու տարրերն առնելով զարգացուց՝ նոր եւ ընդարձակ ոճով մը, եւ այսպէս հիմնադիրն եղաւ «Նոր Հատեան» ըսուած ընդարձակածաւալ քանդակարուեստին: Ան օղակն ըլլալ կը թուի Մեծ Կայսրութիւնը Նոր Հատեանց օրերու թոյլ կազմակերպութեամբ կայսերական դաշնակցութեան հետ զօղաւորող: Բայց անկարելի ալ չէ որ Մալդիյայի գեղարուեստին եւ մտաւոր մշակոյթին հիմնարկութեան մէջ Հաթեան Մեծ Արքայ Պատտուսիլ Գ. եւս կարեւոր բաժին մը ունեցած ըլլայ, քանի որ ըստ Հրոզնիի՝ Պատտուսիլս ատեն մը, իր երէց եղբօր՝ Մուվատտալիսի օրով, իբր ստորակարգ թագաւոր իշխեր է Մալդիյայի մէջ (Կոդեան, ՄԵԼԻԴ, էջ 20):

Հաթեանք, Ասորեստանեայք եւ Ուրարտացիք այդ հին ու երկար դա-



թերուն, իրենց բեւեռագիր արձանագրութիւններովը, համայն Փոքր Ասիոյ հետ Մալաթիոյ անցեալին ալ պատկերը կը պարզեն: Բայց այդ պատկերը գլխաւորապէս արեան ու կրակի միջոցով գծագրուած է: Միայն «Նոր-Հատեան» ըսուած բնիկ յիշատակարաններն են որ մեզի խաղաղութեան, բարօրութեան, շինարարութեան եւ յառաջդիմութեան պատկերներ կը գծեն: Եւ Մալաթիա բարեբախտ է ասոնցմով եւ պանծալի:

Մալաթիայի յուշարձաններուն մէջ՝ Պողոզքէօյի մօտ Եազըլը գայայի, Էօյիւկի եւ նման յուշարձաններուն բուն Հաթեան մոտիւնները միացուած են Միջագետքէ ուղղակի փոխանցուած ձեռարուեստին հետ, զոր կրնանք «Խա-նիգալբատեան» անուանել: Հաթեան Մեծ Արքաներու կնիքներուն վրայ գործածուած մեհենական նշանագիրներն ալ աւելի կատարելագործուած են եւ անոնցմով՝ բնիկ լեզուն կամ լեզուներն արտայայտելու յարմար գրական կա-նոնաւոր դրութիւն մը ստեղծուած է. իսկ այնուհետեւ «Խատտի» երկիրնե-րուն մէջ բեւեռագիր դրութեան գործածութիւնը գիտակցօրէն զանց առնուած է, եւ այնպէս կը թուի թէ Կարքեմիշ, Մարաշ, Մալաթիա եւ այլ կեդրոններ նախապէս քիչ թէ շատ գոյութիւն ունեցող բեւեռագիր պատճէններ դիտմամբ փճացուած են: Հիւսիսային Սիւրիա — Ջենճիրլի — եւ Կիլիկիա՝ աւելի ետքի ժամանակներ (Ն. Ք. 8-րդ դարուն) խատտի բարբառներ գրուած կ'երեւին նաեւ «փիւնիկեան» ըսուած ալփաբետով, եւ երբեմն միալեզու (արամերէն) եւ երբեմն ալ երկլեզու (նոր-հատեան մեհենագիրներու ընկերացած արամե-րէն), կարգ մը արձանագրութիւններ ալ այդ յիշուած տեղերը գտնուած են:

Վերեւ մեր մէջբերած իրողութիւններէն կարելի է որոշ տեսնել թէ «Նոր Հատեան» ըսուած յուշարձանները խաղաղասիրական յիշատակարաններ են, զուտ գեղարուեստական ճաշակի գոհացման համար ստեղծուած հոգեկան նուաճումներ: Մալաթիոյ պատմութեան համար այս փաստը մասնաւոր շա-հեկանութիւն ունի: Տեսանք որ Մալաթիոյ արտաքին պատմութիւնը կցկը-տուր կերպով գրուած է զայն նուաճող տէրութեանց՝ Հաթեանց, Ասորես-տանեայց եւ աւելի ետքերն Ուրարտացւոց արիւնալի յաղթանակներովը: Բայց ասիկա պատկերին մութ, թէեւ արտաքին կողմն է միայն. ներքին եւ ա-ւելի լուսաւոր պատկեր մը կայ: Այդ յաճախ չափազանց երկար ընդհարում-ներով կէտկիտուած ռազմական դէպքերուն մէջտեղերը ժողովուրդը եւ իր բնիկ կառավարութիւնը կը շարունակէին իրենց խաղաղ ու շինարար ներքին կեանքը, զոր մասամբ կ'արտացոլացնեն մեզի հասած յիշատակարանները, եւ երբ անոնց ընկերացող մեհենագիր արձանագրութիւններն ալ յաջողապէս եւ գոհացուցիչ կերպով կարդացուին ու մեկնաբանուին, անշուշտ մեծապէս պի-տի լուսաւորեն այդ ժամանակներու հասարակական կենցաղին վրայով ալ մեր գաղափարը:

Ասորեստանեայց եւ Ուրարտացւոց արձանագրութիւնները մեզի կու տան Ն. Ք. 837-էն սկսեալ մինչեւ 700 թուականը Մալաթիոյ ժամանակակից թաղաւորներու բաւական կատարեալ ցանկ մը, զոր վերեւ տեսանք: Բայց



նկատելի է որ Մալաթիոյ թագաւորութեան այս շրջանը, յորում իր գահա-  
կալները յանուանէ ծանօթ են մեզի, անոր ամենափայլուն շրջանը չէ. ընդհա-  
կառական տկարութեան եւ անկման շրջանն է: Արալանթեփէի ցարդ եղած խու-  
զարկութիւնները անոր բնիկ թագաւորներու յուշարձաններէն ինչ որ երե-  
ւան բերած են, նախաքրիստ. թ. դարէն աւելի ասդին չեն անցնիր. որով վըս-  
տահ չենք թէ այդ յուշարձաններէն ամենէն ուշն իսկ անունը մեզի Ասորես-  
տանեայ արձանագրութեանց միջոցաւ հասած թագաւորներէն ոեւէ մէկուն  
պատկանի: Ուրեմն, Մալաթիոյ այդ շէնքերն ու քանդակները կը պատկանին  
գլխաւորապէս այն թագաւորներուն, որոնց անունները չեն յիշուիլ ասորես-  
տանեան արձանագրութեանց մէջ, այսինքն՝ աւելի կանուխ են քան Սալմա-  
նասար Գ.ի գրաւման տարին: Հետեւաբար, բնիկ արձանագրութեանց վեր-  
ծանումը միայն կրնայ մեզի յայտնել զանոնք արտադրող թագաւորներուն ա-  
նունները, եւ վստահ ենք որ անոնք մեզի մշակութային եւ բնիկ զարգացման  
նոր ու խիստ շահեկան էջեր պիտի բանան:

Հ. Սահակ Կողեան ուղիղ դատողութիւն մը կ'ընէ Մալաթիոյ աշխար-  
հագրական դիրքին անոր ընդհանուր պատմութեան հետ ունեցած աղերսին  
վրայով. «Մալաթիա ախորժակ գրգռած ու կռուախնձոր եղած է», կ'ըսէ,  
«պատմութեան ամբողջ ընթացքին: Քրիստոսէ առաջ իբր 1300-էն սկսած,  
երբ Մելիդ անունը կը յիշուի առաջին անգամ, եւ այն՝ իբրեւ դաշնակից Հա-  
յասաներու եւ Խուրիններու, հակառակ Հիթթիթներու թագաւոր Մուրսիլիս  
Երկրորդի եւ Մուվատտալիսի, Մալաթիա կռուի առարկայ է հարեւան պե-  
տութիւններու: Արեւմտեան հզօր պետութիւններ (Հիթթիթ, Յոյն, Հռով-  
մայեցի կամ Բիւզանդացի) երբ ցանկան (ու ե՞րբ չեն ցանկացած) տիրանալ Եփ-  
րատի ձախ կողմին, պէտք է որ բանակ դնեն դետին աջ կողմը՝ Մալաթիա-  
յի մէջ: Իսկ երբ արեւելեան հզօր պետութիւն մը (Ասորեստան կամ Ուրար-  
տու, Պարսիկ կամ Արաբ) ձգտի Եփրատի աջ կողմ, նախ պէտք է Մալա-  
թիան ապահովէ: Ու եթէ ներկայ քաղաքակիրթ ըսուած դարուս չի կրնար  
ըլլալ պատերազմ ու աշխարհակալութիւն առանց աւերի, ի՞նչպէս կրնային  
նախկին աշխարհակալները տիրապետել առանց կործանելու եւ կողոպտելու»  
(ՄԵԼԻԴ, էջ 4):

Հեղինակս ապա Ն. Ք. 1200—700 թուականներու պատմութեան մասին  
ասա դիտողութիւնը կ'ընէ. «Ահա այն հինգ դարերու միջոցին էր որ Մելիդ  
կ'ունենար իր թագաւորները, որոնց ամբողջ գործը եղած է յարիւ կա'մ Ասո-  
րեստանի կա'մ Ուրարտուի: Այս երկուքն ալ Եփրատի ձախ կողմն են, բայց  
երկուքն ալ աչք ունին Մելիդի եւ շրջակայ երկիրներու վրայ: Մելիդի թա-  
գաւորները ստիպուած էին տկարներու յատուկ քաղաքականութիւն խաղալ:  
Ուրարտուի գիրկը կը նետուէին, երբ Ասորեստան տկարանար. Ասորեստանի  
առջեւ կը խոնարհէին, երբ Ուրարտու տատանէր» (ՄԵԼԻԴ, էջ 20—21): Այս  
դիտողութիւնը սուր եւ մասամբ իրաւացի է. բայց առաւելապէս կ'արժէ Ն.  
Ք. 900—700 թուականներուն համար: Ասկէ զատ պէտք է նկատի առնել —



նախ, որ եթէ «բարգաւաճ շրջաններ բոլորած է Մալաթիա», եւ եթէ ունեցած է «խսկական փառքի, անկախութեան ու թագաւորութեան դարերը» (անդ, էջ 6 եւ 16), անոնք յիշեալ հինդ դարերու մասնաւորապէս առաջին երեքներն էին. երկրորդ, պէտք է մոռնալ որ ո՛չ Ասորեստան Ն. Ք. 707-էն առաջ եւ ո՛չ Ուրարտու մնայուն կերպով չեն կրցած տիրանալ Մելիտիային, այլ կարճ-կարճ շրջաններ միայն, երկար անջրպետներով իրարմէ անջատուած, եւ երկուքն ալ դրեթէ առանց բացառութեան խնայած ու պահած են իրենց յաղթահարած բնիկ թագաւորները անոնց դահուն վրայ. երրորդ, օտար գերիշխանութենէ ազատ եւ հարստահարութիւններէ զերծ շրջաններուն, որոնք զգալիօրէն երկարատեւ էին, այս բնիկ թագաւորները դիտցած են իրենց ժողովուրդը խնամել, երկրագործութիւնն ու արհեստը զարգացընել եւ վաճառականութիւնը քաջալերել. որով կրցած են դիզուած հարբստութեամբ գեղեցիկ շէնքեր շինել եւ զանոնք գեղարուեստական յուշարձաններով զարդարել:

Ուրեմն, Արսլանթեփէի, Կիւրինի եւ շրջակայքի ծանօթ ու պեղուած եւ դեռ պեղուելիք «Նոր-Հատեան» կոթողները անշուշտ կը պահեն ոչ միայն շատ աւելի հին յիշատակներ, այլ նաեւ պիտի տարփողեն մոռցուած հին փառքեր, որոնք՝ ինչպէս ըսինք՝ խաղաղութեամբ շահուած փառքեր են, եւ ոչ թէ աւերիչ զէնքերով: Քանզի ինչպէս հին փիլիսոփաները կ'ըսէին, «խաղաղութիւնն ալ իր նուաճումներն ունի», որոնք աւելի գերազանց են: Ու թէեւ ըսուած է թէ «խաղաղութեան ժամանակները պատմութեան էջերը ճերմակ կը թողուն», սակայն ոչ այնպէս՝ երբ խաղաղութիւնը վայելող ժողովուրդը ստեղծագործ հանճար ունի, դիտէ շինել եւ արտադրել: «Նոր-Հատեան» յուշարձանները իսկապէս խաղաղութեան նոր գրականութիւն մը մեր առջեւ պարզելու բնոյթն ունենալ կը թուին: Սպասենք:

Մալաթիոյ շրջանակին մէջ հետեւեալ տեղերը «Հատեան» ըսուած յիշատակարաններ եւ արձանագրութիւններ գտնուած են. — Մալդիյա (Արսլանթեփէ), Քէօթիւղալէ, Տարենտէ, Փալանկա (Արսլանթաշ), Իսփեքչիւր, Կիւրին, Ուզունեայլայի արեւելեան մասին մէջ եւ կամ Թոխմա սուի Այվատերէսի ըսուած երկայն օժանդակին վրայ՝ Գարագույու եւ Հավուղքէօյ. նաեւ Ալպիութանի մօտերը եւ Իզկին: Կ'երեւի թէ Մանչըլըզի շրջանակին մէջ այս տեսակ յիշատակարաններ չեն գտնուած:

Մալդիյայէ զատ մէկալ տեղերու «Հատեան» յիշատակարանները դեռ քննականօրէն չեն ուսումնասիրուած. որով չենք գիտեր անոնցմէ իւրաքանչիւրին պատկանած ժամանակագրական կարգն ու թուականը: Անոնց մէջ թերեւս գտնուին այնպիսիներ, որոնք մինչեւ Ն. Ք. 600 թուականի չափ ուշ ժամանակի մը վերաբերին: Այսպէս խորհելու կը թելադրեն մեզ հետեւեալ իրողութիւնները. —

Նախ, տեսանք Մուգալլու անուն թագաւոր մը, Ն. Ք. 670—640 թուականներուն իշխած, գլխաւորապէս Կիւրինը եւ ատեն մը Մալաթիան իրեն



մայրաքաղաք ունեցած՝ ըստ ասորեստանեայ արձանագրութեանց, որոնցմէ կ'իմանանք նաեւ որ Մուգալլու մեծահարուստ իշխան մըն էր եւ իր ժողովուրդն ալ ձիարուծութիւն եւ այլ օգտակար զբաղմունք ունէր: Մուգալլու «Տաբալցի» կ'ըսուի, բայց այս ժամանակ Կիւրինի շրջանակը Տաբալի երկիրը համարուէր, եւ միւս կողմէն՝ Տաբալցիք արդէն երկար դարեր առաջ հատեանացած էին: որով արգելք մը չկայ Մուգալլուի պէս թագաւորի մը Մելիտինէի եւ Կիւրինի շրջանակներուն մէջ «Նոր-Հատեան» յիշատակարաններ թողած ըլլալուն:

Ապա, Վանի մօտ Թուփրազգալէի աւերակաց մէջ, որոնք Ն. Ք. 700-600 թուականներուն կը պատկանին, երեւան հանուած է արքայական դինեմառան մը, ուր գտնուած են յիսունէ աւելի խոշոր կարասներ բեկորային վիճակի մէջ, որոնց իւրաքանչիւրին պարունակման չափը նշանակուած է բերնին շուրջը՝ մեհենագիրներով: Բեւեւ եւ Լէյման-Հաուպտ հաւանական կը համարին որ այս կարասները մէջերնին գինի լեցուած վիճակով Բիայնայի (Վանայ) ինքնակալին իբրեւ տարեկան տուրքի մաս կը դրկուէին իրեն հպատակ եւ մեհենագիր գործածող ժողովուրդներու կողմէն, զորօրինակ Խարբերդի եւ Հայնիի կամ մինչեւ իսկ Մալաթիոյ շրջանակներէն:

Միւս կողմէն եզրակացութեան կը տանի Թուփրազգալէէն գտնուած կաւեայ պնակիտ մը, նմանապէս մեհենագրական նշանագիրներով զրուած, որ կը ցուցնէ թէ «Հատեան» կամ անոր նմանող մեհենագրական դրութեամբ մը գրող ժողովուրդ մը կաւէ պնակիտն ալ որպէս վրան գրելիք նիւթ գործածեր է: Բայց այսպէս ընողները հաւանօրէն ոչ թէ Խալդէացիք իրենք էին, այլ արեւմտեան ժողովուրդ մը: «Հիմա Պերլինի թանգարանին մէջ պահուող մեհենագրեալ արոյրէ կոնքը», կ'ըսէ Լէյման-Հաուպտ, «եւ այս մեհենագիր աղիւս-նամակը յայտնապէս արեւմտեան ծագում ունին, եւ կը ցուցնեն թէ Թուփրազգալէի մեհենանին իր վերջնական ձեւը տուող խալդէացի թագաւորներն ունէին հպատակներ կամ դաշնակիցներ, որոնք այսպիսի մեհենագրական դրութիւն մը գործածող ժողովուրդի մը կը պատկանէին: Անոնցմէ ձօնուած պիտի ըլլայ այդ կոնքը, ինչպէս նաեւ այդ նամակն ալ դրկուած: Մեհենագրական նշանագիրներով զրուադեալ այդ արոյրէ կոնքը եւ Թուփրազգալէէն մեր պեղած այս մեհենագիր աղիւս-նամակը կը կրեն նշանագիրներ որ Փոքր Ասիոյ Հատեանի (Hittite) կոչուած արձանագրութեանց մեհենագրական տառերուն հետ նոյն են եւ կամ յոյժ նման: Այս առարկաները հաւանօրէն Ռուսախինայի տաճարին նաւակատեաց տօնին առիթով էին դրկուած Բիայնայի վեհապետին խեղացի հպատակներուն եւ դաշնակիցներուն կողմէն»: (Materialien, p. 108-9; cf. ibid., pp. 68-9, 100): Եւ պէտք է դիտել որ այդ «Խատտի» երկիրներուն մէջ Ուրարտուի ամենամօտը միշտ Մելիտինէն է:



Է.

## ԿԱՏԱԽՈՆԻԱ ԵՒ ՄԵԼԻՏԻՆԷ՝ ՊԱՐՍԿԱԿԱՆ ԵՒ ՅՈՒՆԱԿԱՆ ՇՐՋԱՆՆԵՐՈՒՆ

Սկիւթացի բարբարոսներու արշաւանքի հեղեղին անցնելէն ետք՝ վերաշինուեցաւ Մելիտա, սակայն ոչ առաջուան տեղը, հապա ա՛յն տեղ, ուր ան տեւած է մինչեւ մեր թուականի 1839 տարին, եւ որուն աւերակները դեռ կը կենան եւ ծանօթ են «Էսքի Մալաթիա» անունով (Lehmann—Haupt, Armenien, I, pp. 484-6):

Ասորեստանեայց պետութեան անկումէն ետք, Մելիտինէ մաս մնաց կամ պիտի մնար Մարաց կամ Մեդացոց պետութեան: Ըստ Հերոդոտոսի՝ Կիաքսար Ն. Ք. 591-ին ձեռնարկած ըլլալու է «Վերին Նահանգներու» նուաճման գործին, որ տեւեց վեց տարի (Herodotus, I, 73, 74): Նախ հարկ էր կործանել Ուրմիոյ լիճին եզերաց վրայ Մաննայի եւ Վանայ ծովուն բոլորտիքը խալդ-ուրարտեան թագաւորութիւնները. ապա կային հայկական բարձրաւանդակին վրայ նորակազմ («Այրարատեան») Հայ-Արմէն թագաւորութիւնը եւ թերեւս երկրորդ կարգի իշխանութիւններ: Հայ-Արմէններուն զինակից օժանդակ էին մէկ կողմէն Անդրկովկասի եւ հիւսիսային Հայաստանի Սկիւթացիք («Ասքանաղեան» գունդեր) եւ միւս կողմէն հեռաւոր Լիւդիոյ պետութիւնը (հմմտ. (Lehmann - Haupt, Armenien, I, pp. 1-4): Կիաքսար տարիներ գործածեր է ասոնք մէկիկ-մէկիկ ընկճելու. որով վերջապէս կրցաւ հասնիլ Արեւմտեան Եփրատի (Գարասուի) գիծը: Անկէ անդին, Մելիտինէի մէջ առանձին իշխանութիւն կա՞ր թէ ոչ, որոչ չենք գիտեր. բայց աւելի արեւմուտքը կար Գամրաց կամ Կապադոկիոյ (Katapatuka) թագաւորութիւնը, զոր նաեւ պէտք էր հնազանդութեան բերել՝ Ալիւսի գետի (Գըզըլ ըրմագի) ստորին հովիտը չհասած: Հուսկ ուրեմն հոս տեղի ունեցաւ Լիւդիոյ եւ Մեդացոց միջեւ Ալիւսի մեծ ճակատամարտը, արեւու կատարեալ մէկ խաւարման բերած ակամայ զինադուլը եւ անոր յաջորդող հաշտութեան դաշնագիրը՝ Ն. Ք. 585 Մայիսին: Այս դէպքերու վերայով արդէն մանրամասնօրէն կը պատմուի տիեզերական պատմութեան գիրքերուն մէջ:

Այս դաշնագրով Կիաքսարին կը մնային Մարաստանէ մինչեւ ստորին Ալիւսի գիծը բոլոր երկիրները, որոնց կարգին հարկաւ նաեւ Մելիտինէ: Ոմանք խորհեր են թէ նախ այս թուականէն ետք Կիաքսար առաւ Արմէնները Մելիտինէէն եւ տարաւ հաստատեց զանոնք հայկական բարձրաւանդակին վրայ: Մենք այս գաղափարն ամէն տեսակէտէ հակապատմական կը գտնենք: Հայ-Արմէնները շատոնց (Ն. Ք. 650-ի ատենները) մտած էին Ուրարտուի սահ-



ժամանակներուն մէջ եւ հետզհետէ Հայաստանի այլեւայլ մասերուն մէջ տեղաւորուած եւ մինչեւ իսկ թագաւորութիւններ հիմնած՝ Խալդէ-Ուրարտեան կամ Բիայնայի թագաւորութեան անկումէն առաջ եւ անոր զուգահեռաբար (տես ՆԱԽ. ՀԱՅԱՍՏ., էջ 561—581: Նաեւ ԱԿՕՍ, Ժ. Գիրք, Պէյրութ, 1945, էջ 109—117, «Թէ ի՛նչպէս Ուրարտուն փոխանցուեցաւ Հայ-Արմէններուն»):

Երբ Ն. Ք. 550-ին Կիւրոս յաղթելով Մարաց վերջին թագաւոր Աստիա-գէսին (Աթղահակ)՝ Իրանի պետութեան տէր դարձաւ, բնականաբար Մելիտինէ ալ մաս կազմեց Աքեմենեան Պարսից պետութեան: Դարեւ Վշտասպեանի օրով Պարսից պետութեան քաղաքական բաժանումներուն մէջ կ'երեւի թէ Մելիտինէ կը պատկանէր Արմենիա (արեւմտեան Հայաստան) սատրապութեան: Ըստ Հերոդոտոսի՝ բուն Հայաստան համարուած այս նահանգը արեւմուտքէն կը հասնէր մինչեւ Ալիւս գետի աղբերակունքը եւ սահմանակից էր Կիլիկիոյ, որ այն ատեն դէպի հիւսիս չափազանց կը տարածուէր՝ բովանդակելով ոչ միայն Կեսարիա-Մաթաքի մարզը, այլ եւ միջին Ալիւսի աղբիւրն կարեւոր մէկ մասը. իսկ արեւելքէն ալ Կոմմագինէ աշխարհը մէկ մասն էր Կիլիկիոյ, որ այսպէս կը հասնէր մինչեւ Եփրատ: Միւս կողմէն, քանի որ Ալիւս գետի աղբերակունքը կը բովանդակուէին Արմենիոյ մէջ (Herodotus, I. 73), հետեւաբար այն ատեն Արմենիոյ մաս էր հետագային Փոքր Հայք կոչուած մարզը. բայց ոչ միայն այսչափ, այլեւ կ'երեւի թէ Մելիտինէի ընդարձակ գաւառն ալ Արմենիոյ սահմաններուն մէջ էր, եւ ասիկա անկէ յայտնի է որ Հայկական Լեռնանց (Pylae Armeniae) անունը կը կրէին արեւելեան Տաւրոսի հիւսիսէն հարաւ կարեւոր կիրճերը, այսինքն՝ անո՛նք, որ Մելիտինէն կը կապեն Կոմմագինէի հետ (Strabo, Geography, Engl. transl. vol. I, pp 123, 124, Book II, chap. i. 26, 27):

Բայց միշտ այսպէս չմնաց: Ն. Ք. 400 թուականէն առաջ արդէն կարգ մը սատրապութեանց սահմանները պզտիկնալ եւ կարգ մը ցեղեր անկախութիւն կամ ինքնավարութիւն ստանալ սկսած էին: Այսպէս, Կիլիկիա եւ Արմենիա սատրապութեանց միացած տեղը, Անտիտաւրոսեան ու Տաւրոսեան լեռնաշխարհին մէջ, գոյացաւ Կատաւոնիա անուն քաղաքական նոր միութիւն մը, բնիկ իշխաններու ներքեւ ինքնօրէն կառավարուած, հաւանօրէն տարեկան փոքր հարկ մը վճարելով Աքեմենեան ինքնակալին: Կ'երեւի թէ Կատաւոնիոյ իշխանները դրամ ալ կը հատանէին եւ հետզհետէ թագաւորի դիրք ալ բռնեցին: Ինչեւիցէ, Մելիտինէ այսուհետեւ մաս կը կազմէր Կատաւոնիոյ, որ ժամանակ մը կը տարածուէր մինչեւ արեւմտեան Հայաստանի Եկեղեաց գաւառն անդամ:

Մեծն Աղեքսանդրի աշխարհակալութեամբ Փոքր Ասիա Աքեմենեան Պարսից միւս երկիրներուն պէս, մակեդոնական ստացուածք եղաւ, եւ երբ Ն. Ք. 301-ին Իպսոսի դաշնադրութեամբ Աղեքսանդրի կայսրութիւնը չորսի բաժնուեցաւ, Կատաւոնիա, Մելիտինէ, Կոմմագինէ եւ յարակից նահանգներ Սելեւկեան ինքնակալութեան կալուածք մնացին: Բայց արդէն Կապադովկիա եւ Պոնտոս անկախ թագաւորութիւններ եղած էին, ինչպէս նաեւ Հայաստան:



Իբր կէս դար յետոյ, երբ Սելեւկոս Բ. էր Անտիոքի ինքնակալը, անոր եղբայրը Անտիոքոս Հիերաքս, որ Հայոց Արշամ Թագաւորին մտերիմ բարեկամըն էր, ապստամբեցաւ իր եղբորմէն եւ Սելեւկեանց փոքր-ասիական կալուածոց բռնատիրելով, անկախաբար կ'իշխէր՝ իրեն ոստան ունենալով Եփեսոսը: Սակայն Սելեւկոս Բ. ի աներն ու զինակիցը, Պերգամոնի Ատտալոս Թագաւորը, չախորժեցաւ Անտիոքոս Հիերաքսի դրացութենէն եւ սկսաւ զայն ճնշել արեւմուտքէն, մինչ Սելեւկոս ալ զօրաւոր բանակով մը Կիլիկիա կը յառաջանար: Անտիոքոս՝ Ատտալոսի յաղթական զէնքերուն առջեւէն փախուստ տալու ստիպուած՝ Կապադովկիա ապաստանեցաւ, յետոյ խորհեցաւ իր զինակից բարեկամին, Հայոց Արշամ Թագաւորին օգնութեամբը բարւոքել իր բախտը: Ուստի փորձեց իր եղբոր բանակին թիկունքը դառնալ՝ Եփրատը շատ վերէն անցնելով եւ Հայաստանի մէջէն յառաջանալով ու յանկարծ Միջագետք իջնելով: Տարակոյս չկայ թէ Անտիոքոս Հիերաքս գործածեց ատենօք Հաթեանց մեծ արքայ Սուպպիլուլիումայի բռնած ճամբան, այսինքն՝ Մալաթիոյ քով Փիրոթէն անցնելով Եփրատը, Խարբերդի ու Ամիդայի վրայէն յառաջացաւ մինչեւ Մծբինի մօտերը, բայց իր նախորդին յաջող բախտը չունեցաւ: Արդարեւ ծրագրին առաջին մասը յաջողեցաւ իր հայ բարեկամին պաշտպան ձեռնտուութեամբը, սակայն Միջագետքի մէջ պատրաստ բանակով մը իրեն կը սպասէր Սելեւկոսի զօրավարը: Անտիոքոս յաղթուելով Եփրատոս փախաւ (Ն. Ք. 235), ուր ութ տարի բանտի մէջ հիւծելէ ետք մեռաւ:

Կատաւոնիա աւելի ետքի ժամանակներուն մէկ կառավարչութիւնն էր Կապադովկիոյ Թագաւորութեան, այսինքն՝ ա'յն կառավարչութիւնը, որ կը բովանդակէր Սարոս եւ Պիւրամոս գետերուն վերին ընթացքները՝ Կոմանաս սրբազան եւ Կոկիսոն ու Արաբիսոս գլխաւոր քաղաքներով: Ստրաբոն կ'ըսէ որ Կատաւոնացիք ի բնէ Կապադովկացիներէն տարբեր ժողովուրդ մը չէին՝ ո'չ լեզուով ու ո'չ սովորութիւններով, սակայն առանձին իշխանութիւն մը կը ձեւացնէին, մինչեւ որ Արիարաթ Դ. ի օրով (Ն. Ք. 220—160) Կատաւոնիա միացուեցաւ Կապադովկիոյ Թագաւորութեան:

Կատաւոնիոյ մեզի որոշապէս ծանօթ առաջին տիրապետողն (dynast) էր Ասպիս ոմն, որ Պարսից Արտաշէս Բ. Թագաւորին դէմ ապստամբեցաւ Ն. Ք. 375-ին: Դատամէս, որ դեռ նոր սատրապ կարգուած էր հարեւան Կապադովկիոյ նահանգին, արքայէն հրաման ստացաւ ապստամբ Ասպիս իշխանը հնազանդութեան բերելու, եւ զայս ըբաւ ալ իր վեհապետին բարձր դոհունակութեան արժանանալու ձեւով մը: Հիմակուան Մալաթիա նոր քաղաքին տեղը Ասիւրգու անուն գիւղ մը կար, որ կրնայ իր կոչումն ստացած ըլլալ սոյն Ասպիսէ: Կատաւոնիոյ մայրաքաղաքը բնականաբար Կոմանա (Շար) էր, բայց Ասիւրգու ալ կրնար իշխանին իբրեւ երկրորդ ոստան ծառայած ըլլալ Մելիտինէի մէջ:

Ասկէ ետք գրաւոր աղբիւրներու մէջ Կատաւոնիոյ իշխանները յանուա-



նէ չեն յիշուիր. պատճառն ալ հաւանօրէն սա է որ ատեն մը դադրած է Կատաւոնիոյ իշխանութիւնը, մինչեւ որ Մեծն Աղեքսանդրի մահէն ետք, ինչպէս Արեւմտեան Ասիոյ ուրիշ ժողովուրդներ, Կատաւոնացիք ալ իրենց անկախութիւնը վերստացան: Այսպէս, կան կարգ մը պատկերաւոր դրամներ՝ վերատառութիւններովս — Մորիսարի, Արիայոս, Քարասպէս, Արդիսարէս, Անիսատէս, զորս դրամագէտներ տարակուսանօք կ'ընծայեն Փոքր Հայքի կամ Արեւմտեան Հայաստանի կարծեցեալ արքայիկներուն: Բայց քանի որ զորօրինակ Արիայոսի դրամը Տիւանայի պէս Հայաստանէ շատ հեռու քաղաքի մը մէջ տպուած է, իմ կարծիքովս՝ այս դրամները շատ աւելի իրաւամբ կրնային Կատաւոնիոյ իշխաններուն ըլլալ, որովհետեւ Կատաւոնիա այլեւայլ ժամանակներ տարածուած է Տիւանայէն մինչեւ Մելիտինէ: Ասկէ զատ, այս անունները բոլորն ալ խեղտական կամ հատեան (Hittite) տիպ ունին, եւ ինչպէս Ստրաբոնի վկայութիւններէն սրոշ կը տեսնենք, Կատաւոնները յայտնապէս կը զանազանուէին Հայերէն եւ կը նոյնանային Կապադովկացւոց հետ: Արդ, Կատապատուկա (= Կապադովկիա) եւ Կատաւոնիա երկրանուններէն երկուքն ալ միեւնոյն Կատա (= խառնուրդ) արմատը կը բովանդակեն: Արդէն ինչպէս Անիսատէսի դրամին վրայի «Ծարի» տիտղոսին մէջ հատեան բառ մը տեսած էր «իշխան» իմաստով: Ուրեմն Մորիսարի, Արիայոս, Քարասպէս, Արդիսարէս եւ Անիսատէս շատ լաւ կրնան իշխաններն եղած ըլլալ Կատաւոնիոյ՝ Ն. Ք. 260—190 թուականներուն մէջտեղ:

Արդեօք կրնա՞նք Կատաւոնիոյ վերջին իշխանը նկատել Ակուսիլոքոսը, որ Պոնտոսի Փառնակ Ա. թագաւորին հետ Ն. Ք. 181-ին նշանաւոր հաշտութեան դաշնագիրը կնքողներէն մէկն էր: Ասոր մահէն ետք Կոմմագինէի կառավարիչը Պտղոմէոս, որ Սելեւկեանց հպատակութիւնը թօթափած էր, ջանաց Ն. Ք. 163-ին Կատաւոնիան ալ Մելիտինէին հետ դրաւել, բայց Կապադովկիոյ Արիարատ Դ. թագաւորը յաջողապէս զիմադրեց անոր եւ Կատաւոնիան ամբողջ կցեց Կապադովկիոյ թագաւորութեան, անշուշտ Մելիտինէն ալ միասին:

Տեսանք թէ Մելիտինէ ատեն մը մաս կը կազմէր մինչեւ Եկեղեաց գաւառը տարածուող, ընդարձակ Կատաւոնիոյ: Երբ Կապադովկիոյ թագաւորութեան կցուեցաւ Կատաւոնիա, հարկաւ Մելիտինէ ալ միասին դնաց: Բայց երբ Կապադովկիոյ թագաւորութիւնը պաշտօնապէս տասը կառավարչութեանց (strategisi) կը բաժնուի, Մելիտինէ Կատաւոնիայէն անջատաբար կառավարչութիւն մը կ'ըլլայ, որուն կառավարիչին նիստն էր անշուշտ Մելիտա ամրոցը:

Երբ Կապադովկիոյ թագաւորը Ն. Ք. 160-ի ատենները Մեծ Հայքի Արտաքսիաս (Արտաշէս) թագաւորին դէմ կը պաշտպանէ Ծոփաց Զարիադրիս (Զարեհ) թագաւորի Միհրբուժան որդւոյն իրաւունքը, որպէս փոխարինութիւն այս վերջինէն կը ստանայ Տումիսա աւանն, որ Մելիտինէէ խարբերդ տանող ճամբուն վրայ Եփրատի կարեւոր կամուրջին արեւելեան կամրջագը-



լուխն էր :

Մելիտինէ նահանգը կը գտնուէր բոլորովին արեւելեան Տաւրոսի լեռնաշղթային հիւսիսային կողմը, որ զայն կը բաժնէր լեռանց հարաւային կողմը գտնուող Կոմմագինէ երկրէն : Մելիտինէ կը տարածուէր Կատաւոնիոյ եւ Եփրատի մէջտեղ, եւ իր հիւսիսային կողմն էր Փոքր Հայք երկիրը : Հարկաւ Մելիտա ամրոցին շուրջը կամ մօտը կար նաեւ ժողովուրդին բնակութեան համար անպարիսպ աւան մը, ինչպէս շրջակայքն ալ բազմաթիւ դիւղեր կային : Մելիտինէ Կապադովկիոյ այն մասն էր, որ կ'երկարէր դէպի Հայաստան՝ Եփրատի մէկ կարեւոր ծունկին դիմաց : Մելիտինէի հիւսիսը գտնուող Փոքր Հայք եւ հարաւը գտնուող Կոմմագինէ, երկուքն ալ նախաքր. Բ. դարուն սանկախ փոքր թագաւորութիւններ եղան, եւ քանի որ վկայուած է թէ երկուքն ալ հայաշատ մարզեր էին, պէտք է ընդունիլ որ երկուքին մէջտեղը՝ Մելիտինէն ալ նշանակելի հայ բնակչութիւն ունէր :

Մելիտինէ Կապադովկիոյ մաս մնաց մինչեւ Հայոց Մեծն Տիգրան թագաւորին աշխարհակալութիւնը : Տիգրան, որ կանուխէն նուաճեց Ծոփաց թագաւորութիւնը եւ միացուց Մեծ Հայքին, հարկաւ իր աչքը տնկած պիտի ըլլար Ծոփաց երկրին դիմացը, Եփրատին արեւմտեան կողմը տարածուող Մելիտինէի արգաւանդ երկրին վրայ ալ, որ արդէն կարեւոր մասամբ հայաբնակ էր, եւ կ'երեւի թէ երկրին բնիկ խետական (Hittite) ծագումով բնակչութիւնն իսկ հայանալու անատակ չէր : Այս առիթը եկաւ՝ երբ Ն. Ք. 77-ին Տիգրան Մելիտինէն ալ գրաւեց ամբողջ Կապադովկիոյ հետ : Յետոյ նահռովմէական հեղինակներ բացորոշ կը պատմեն թէ Մեծն Տիգրան Կապադովկիոյ եւ Կիլիկիոյ 12 յունաբնակ քաղաքներու բնակիչները փոխադրեց իր նորաչէն Տիգրանակերտ մայրաքաղաքը. բայց չենք կարծեր որ Մալաթիոյ Մեծն Տիգրանի օրով յունաբնակ եղած էր, դուցէ տակաւին «քաղաք» (polis) իսկ չէր :

Տիգրան Փիւնիկէ կամ Պաղեստին կը գտնուէր, երբ Լուկուլլոս իր Ապպիոս Կղոդէոս տեղակալը ղրկեց՝ Հայոց թագաւորին հետ տեսակցելու համար : Այս տեսակցութիւնը տեղի ունեցաւ Ասորոց Անտիոքին մէջ, ուրկէ Տիգրան Հայաստան փոխադրուեցաւ : Եւ քանի որ Անտիոքէ Հայաստան ընկալան համբան Մելիտինէի վրայէն է, Տիգրան այս անգամ ալ Մալաթիոյէն անցած պիտի ըլլայ :

Կը յաջորդէ Լուկուլլոսի արշաւանքը Տիգրանակերտի վրայ : «Թէ Լուկուլլոս Եփրատը անցաւ Իզոլիի մօտակայքը», կ'ըսէ Լէյման-Հաուպտ, «սահմանց ալլեւայլի կ'եղրակացուի Սարաբոնի գրածէն» (Geogr. XII. ii. 1), թէ այդ անցքը Ծոփքի մէջ, Մելիտինէի հանդիպակաց Դոմիսայի բերդին ոտով ջեւ տեղի ունեցած է» : (Armenien, I, p. 511) : Բայց ըսողներ ալ կան թէ Լուկուլլոս Քեպանմատէնի առջեւէն անցաւ Եփրատը. եւ նկատի առնենք որ Լուկուլլոս Պոնտոսէն կու գար եւ կ'աճապարէր օր առաջ Տիգրանոսի կերտ հասնելու, անհաւանական չէ որ Արաբկիրէն Խարբերդ տանող ճամփայով



բռնեց, որ աւելի կարճ է եւ Քեպանմատէնի առջեւ կ'անցնի Եփրատը գետա-  
յին խոշոր նաւակներով: Ես ըրած եմ այս անցքը, եւ դիտեցի որ Արածանիի  
եւ Գարասուի գետախառնունքէն ետք միացեալ Եփրատը հոս չափազանց  
լայննալով լիճի մը կերպարանքը կ'առնէ եւ շատ խաղաղ ընթացք մը ունի:

Մեծն Տիգրան Ն. Ք. 67-ին, Լուկուլլոսը նահանջի ստիպելէ ետք, կըք-  
կին անգամ Եփրատն անցաւ եւ Մելիտինէն գրաւեց: Բայց կարճատեւ եղաւ  
այս գրաւումն ալ: Քանզի թէեւ Տիգրան կը փափաքէր դնէ Մելիտինէն Հա-  
յաստանի կցուած պահել, սակայն յաղթական Պոմպէոս Ն. Ք. 64-ի դաշ-  
նագիրով վերջ տուաւ Մեծն Տիգրանի կազմած հայկական կայսրութեան եւ  
պահանջեց որ Հայոց թագաւորը հրաժարի Եփրատէն արեւմուտք իր դրաւած  
ամբողջ երկիրներէն:

Այսպէս Մելիտինէ վերադարձուեցաւ Կապադովկիոյ թագաւորութեան,  
որ արդէն Հռովմի հովանաւորեալն էր, եւ այս հանգամանքը ունէր Մելիտի-  
նէ՝ երբ վերջին անգամ Ն. Ք. 33-ին Մարկոս Անտոնիոս եռապետն անկէ ան-  
ցաւ՝ Հայաստանի վրայէն դէպի Պարթեւաց երկիրն արշաւելու համար:

Երբ Յ. Տ. 17-ին Գերմանիկոս կեսար Կապադովկիոյ թագաւորութիւ-  
նը ջնջելով, երկիրը հռոմէական նահանգի վերածեց, բնականաբար Մելիտի-  
նէ ալ հռոմէական տիրապետութեան տակ մտաւ: Այնուհետեւ Մելիտա ամ-  
բողջ հռոմէական կայսրութեան սահմանապահ լեզէոններուն կայանը  
դարձաւ:

Ստրաբոն աշխարհագիրը (+ ca. 25), որ այդ ժամանակներուն կը  
գրէր իր մեծ երկը, շատ հիացումով կը խօսի Մելիտինէի մասին: Ան իր Աշ-  
խարհագրութեան մէջ յաճախակի կը յիշէ Մելիտինէն, եւ յարմար է հոս մէջ-  
բերել իր կարգ մը յիշատակարանները: Ստրաբոն կը ցուցնէ թէ Մելիտինէ  
նահանգը հարաւէն սահմանակից էր Կոմմազինէի հետ եւ երկուքին մէջտեղ  
սահմանադրուիս կը կազմէր Արեւելեան Տաւրոսի լեռնաշղթան, դուր ինք յա-  
ճախ «Ամանոս» ալ կը կոչէ: «Ազգերը համընդու առնեն», կ'ըսէ, «անանք [հի-  
ները] Կատաւոնիան կը դնէին Կապադովկիոյէն ետք եւ ասլա Եփրատը...  
այնպէս որ Մելիտինէն անգամ Կապադովկիոյ (ուղիղը՝ Կատաւոնիոյ) մաս  
կը համարէին, թէպէտեւ Մելիտինէ, որ Կատաւոնիոյ ու Եփրատի մէջտեղ կը  
դնուի եւ Կոմմազինէին շատ կը մօտենայ, Կապադովկիոյ տասներորդ մասն  
է՝ այդ թագաւորութեան տասնեակ կառավարչութեանց բաժանման համե-  
մատ» (Geography, XII, i. 2). «Նա [Պոլիւքիոս] կը սկսի Կոմմա-  
զինէի մէջ Սամոսատէն, որ կը դնուի [Եփրատի] հունին վրայ. եւ կ'ըսէ  
թէ Սամոսատի քով Եփրատի կամուրջէն եւ Կապադովկիոյ Տաւրոս լեռներուն  
վրայէն մինչեւ Դոմիսա 450 ասպարէզ է»: (XIV, ii, 29). «Քանզի Քա-  
լիւբեանց երկրէն անցնող միջօրէականը Փոքր Հայքի մէջէն եթէ մինչեւ Եփ-  
րատ երկնցնենք, բոլոր արեւմտեան կողմը կը մնան Կապադովկիա, Կոմմա-  
զինէ, Ամանոս լերինք եւ Իսոսի ծովածոցը» (XIV, V. 24): «Ապա մէկ  
կողմէն Ամանոս կը բաժնուի անկէ (Տաւրոսէն), եւ միւս կողմէն՝ Անտիտաւ-



րոտը: Վերջինիս մօտն է Կոմանա, որ վերին Կապադովկիոյ կը պատկանի: Ան [Անտիտաւրոսը] կը վերջանայ Կատաւոնիոյ մէջ. իսկ Ամանոս լեռը կը շարունակուի մինչեւ Եփրատ ու Մելիտինէ, ուր Կոմմագինէ կը տարածուի Կապադովկիոյ հարաւը» (XI, xii, 2): Յայտնի է թէ Ստրաբոն հոս «Ամանոս» ըսելով Արեւելեան Տաւրոսի լեռնաշղթան կը հասկնայ:

«Կապադովկիա կը բաղկանայ շատ մասերէ, եւ յաճախակի փոփոխութիւններ կրած է: — Միեւնոյն լեզուն խօսող ազգերը զլիսաւորապէս անոնք են որ հարաւէն սահմանուած են Կիլիկեան Տաւրոսով, ինչպէս կը կոչուի. արեւելքէն՝ Հայաստանով, Կողքիսով ու մէջտեղը դանուող ժողովուրդներով, որոնք այլազան լեզուներ կը խօսին. հիւսիսէն Եւքսինեան ծովով մինչեւ Ալիւսի բերանը. արեւմուտքէն Պափլագոնացիներով, նաեւ Գաղատացիներով, որոնք Փոխլիա դաղթած են ու մինչեւ Լիկաոնիա տարածուած, ու Կիլիկեացիներով, որոնք կը գրաւեն լեռնային Կիլիկիան» (Strabo, Geography, XII, i, 1):

«Այս ազգերուն մէջ, որ միեւնոյն լեզուն կը խօսին, հիները կը դասէին Կատաւոնացիները առանձինն, զանազանելով զանոնք Կապադովկացիներէն, զորս կը նկատէին իրրեւ տարբեր ժողովուրդ մը: Ազգերու թուահամարման ատեն Կատաւոնիան կը դնէին Կապադովկիայէն ետք, ապա Եփրատը եւ այն ազգերը, որ այդ գետի միւս կողմն են. այնպէս որ Մելիտինէն անգամ Կատաւոնիոյ մէջ կը պարփակէին, թէպէտեւ Երկրին տասը կառավարչութեանց բաժանման [ներկայ] դրութեան համեմատ՝ Մելիտինէ կը դանուի Կատաւոնիոյ ու Եփրատի մէջտեղ եւ Կոմմագինէին կը մօտենայ ու կը կազմէ Կապադովկիոյ տասներորդ բաժինը: Քանզի մեր ժամանակի թագաւորները, որ Արքեղայոսի նախորդած էին, Կապադովկիոյ թագաւորութիւնը այս կերպով կը տրոհէին: — Կատաւոնիա մէկ տասներորդ բաժինն է Կապադովկիոյ: Մեր օրով ամէն կառավարչութիւն իր յատուկ կառավարիչն ունէր, եւ քանի որ Կատաւոնացւոց լեզուին մէջ ոեւէ տարբերութիւն չի նշմարուիր ուրիշ Կապադովկացւոց լեզուին հետ համեմատելով, ոչ ալ ոեւէ տարբերութիւն իրենց սովորութիւններուն մէջ, զարմանալի է թէ ինչպէս օտար ազգի մը առանձնայատուկ նշանները բոլորովին անհետացեր են, մինչդեռ անջատ ազգեր էին անոնք առաջ: Արիարաթ Առաջին, որ Կապադովկիոյ թագաւորի տիտղոսը կրէց, Կատաւոնացիները կցեց Կապադովկիացւոց» (XII, i, 2):

«Բայց մինչ [Կապադովկիոյ] երկիրը Արքեղայոսի եւ անոր նախորդներուն իշխանութեան տակ կը գտնուէր, տասը կառավարչութեանց բաժնուած էր. հինգը Տաւրոսի մօտ կը համրէին՝ Մելիտինէ, Կատաւոնիա, Կիլիկիա, Տիւանիտիս եւ Գարսուերիտիս. մնացած հինգն էին՝ Լաւինեանիս, Սարգարաւսինէ, Սարաւենէ, Քամմանինէ, Մորիմենէ» (XII, i, 4):

«Մելիտինէ կը նմանի Կոմմագինէի, քանզի ամբողջովին պտղատու ծառերով տնկուած է, եւ Կապադովկիոյ միակ մասն է՝ այս կերպով տընկուած: Չէթ կ'արտադրէ եւ Մոնարիտ կոչուած գինին, որ Յունաստանի գինիներուն հետ կը մրցի: Դիրքը Մոփաց դիմացն է, ունենայով Եփրատ գետը



որ կը հոսի անոր եւ իրեն մէջտեղ. եւ Կոմմադինէ՝ որ սահմանակից է Գետի նանգիի կողմն եղող դաւառին մէջ է Դոմիսա, Կապադովկիոյ մէկ կարեւոր ամրոցը: Անիկա 100 քանքարի ծախուած էր Ծովաց իշխանին. բայց Լուկուլլոս զայն նորէն իրրեւ քաջութեան մրցանակ պարգեւեց Կապադովկիոյ իշխանին՝ Միհրդատի դէմ պատերազմի մէջ մատուցած ծառայութեան փոխարէն» (XII, ii, 1):

«Ոչ Կատաւոնացոյց դաշար եւ ոչ Մելիտինէ ունի ոեւէ քաղաք, այլ ամրոցներ՝ լեռներու վրայ, ինչպէս Ազամորա եւ Դաստարկոն, որուն շուրջը կը հոսի Կարմազաս գետը: Կայ հոս Կատաւոնեան Ապողոնի մեհեան մըն ալ, որ սլաշտելի է ամբողջ Կապադովկիոյ մէջ, եւ զոր Կապադովկացիք ընտրած են իրրեւ տիպար իրենց մեհեաններուն...: Մնացածներէն՝ Սարգարաւսինէ ունի Հերպա անուն փոքր աւան մը՝ Կարմազաս գետի վրայ...: Միւս նահանգներէն մէկուն մէջ է Արդոս, բարձր ամրոց մը Տաւրոսի մօտ...» (XII, ii, 6):

«Պոնտոսի ու Կապադովկիոյ սահմանագլուխը լեռնաշղթայ մըն է Տաւրոսի զուգահեռական, որ Քամմանինէի արեւմտեան ծայրերէն սկսեալ, ուր կը կանգնի Դասմենտա, ամրոց մը՝ ապառաժի մը վրայ շինուած, կ'երկարի մինչեւ Լաւինեանինէի արեւելեան մասերը: Քամմանինէ եւ Լաւինեանինէ՝ երկուքն ալ Կապադովկիոյ կառավարչութիւններն են» (XII, ii, 10):

## Ը.

## ՄԵԼԻՏԻՆԷ ՀՌՈՎՄԱՅԵՑԻՈՅ ՕՐՈՎ

Ըսինք թէ Յ. Տ. 17-ին՝ երբ Գերմանիկոս կեսարը Կապադովկիոյ թաւաւորութիւնը ջնջելով երկիրը հռովմէական նահանգի վերածեց, բնականաբար Մելիտինէ ալ հռովմէական տիրապետութեան տակ մտաւ, եւ այնուհետեւ Մելիտինէ ամրոցը հռովմի կայսրութեան սահմանապահ լեզէոններուն կայանը դարձաւ: Հայաստանի թաղաւորութեան համար Պարթեւաց դէմ մըղուած ներոնեան պատերազմներուն մէջ Մելիտինէ շատ անգամ կը յիշուի, որովհետեւ Հայաստան արշաւող հռովմէական լեզէոններուն միացեալ խորհուրդ կը կազմէր այս ամրոցը, որ կը պահպանէր Դոմիսայի կամուրջը, որ Թիրատի ամենադժուոր անցքը կը նշանակէր:

Այդ պատերազմներուն հայթայթած աշխարհադրական եւ այլ գիտապահ տեղեկութիւնները կը շահագործէ Երէցն Պլինիոս իր «ԲՆԱԿԱՆ ՊԱՏՄՈՒԹԻՒՆ» հռչակաւոր մատեանին մէջ, ուր Ստրաբոնի նման չափազանց կը պովէ Մելիտինէն եւ կը դրէ որ Մելիտա կոչուած ամրոցն ըստ աւանդութեան Ասորեստանի Շամիրամ թագուհին շինեւ է: Ամրոցին այս առասպելական հիմնադիրին անունը թերեւս կը պահպանուէր տակաւին մեր թուականի ԺԲ դարուն, երբ Միքայէլ Ասորին կը յիշէ Շամիրին ամրոցը Մալաթիոյ սեւա-



հող (sawad) գաւառին մէջ (Chronographie, Թարգմ. Ghabot, III, p. 272)

Պլինիոս գիտունը մեռած է 79 թուականին՝ Վեսուվ հրաբուխի մեծ բռնկումին ատեն:

Հռովմայեցւոյ շրջանին Մալաթիա իր ծաղկումն ու բարգաւաճումը կը պարտի իր դիրքին՝ կայսրութեան ամենէն արեւելեան սահմանին վրայ: Տիտոս կայսեր օրով (Յ. Տ. 79—81) եղած զինուորական կարգադրութեանց համեմատ՝ Մելիտա մնայուն կայանը եղաւ Երկոտասաներորդ Լեգէոնին, իսկ անկէ առաջ Մելիտայի մէջ սահմանապահ կայազօր էր Քսաներորդ Լեգէոնը: Յովսեպոս կը պատմէ որ Յ. Տ. 70-ին Երուսաղէմի նուաճումէն ետք՝ Տիտոս կեսարը, որ այն ատեն իր Վեսպասիան հօրը փոխանորդ սպարապետ էր Պաղեստինի մէջ, թոյլատրեց որ Տասներորդ Լեգէոնը Երուսաղէմ մնայ եւ Լեգէոնի շրջանի Եփրատէն անդին, ուր անոնք գտնուած էին նախապէս: Իսկ միանգամայն յիշեց Երկոտասաներորդ Լեգէոնի մասին, որուն կայանը նախապէս Անտիոքի մօտ Ռափանէա էր, թէ իր Կեստիոս հրամանատարին ներքեւ տեղի տուած էր Հրէից յարձակման առջեւ. ուստի զանոնք զրկեց Եփրատի մօտ Մելիտինէ, որ Հայաստանի ու Կապադովկիոյ սահմանագլուխին վրայ կը գտնուէր (Josephus, *Bella Jud*, VII, i, 3):

Մելիտայի օտար այցելուներուն մէջ կրնանք համարել Չինաստանի Ֆանչաոյ կայսեր Հռովմայեցւոյ քով զրկած սլաւոգամաւորը, Քիուֆան-Եինկ անուն մեծ սլաւոնեան, որ մեր 97 թուականին Հայաստանէն ալ անցած է, եւ իր օրագրութեան մէջ կը յիշէ որ Ծոփաց երկրէն ետք մեծ դետը — Եփրատն — անցաւ եւ վերջապէս Սիւրիոյ Անտիոքը հասաւ: Նա հարկաւ Մելիտայի քով անցած է Եփրատը, Դոմիտայի կամուրջով, որովհետեւ Ծոփաց երկրէն դէպի Անտիոք կարճ եւ բնական ճամբան ա՛յս է:

Կերեւի թէ այս ատենները ամբողջին շուրջ աւելի ընդարձակ բնակչութիւն հաստատուած է եւ անոնց մէջ յունախօս Ժողովուրդ ալ կայ. որով ասն աստիճանաբար քաղաքի ձեւ կ'առնէ: Այսպէս, Տրայիանոս կայսրը, երբ Հայաստանը կը նուաճէ՝ Յ. Տ. 114-ին, Մելիտինէ նահանգն ալ միացնելով հռոմէական վարչութեան տակ մտած հայկական նահանգներուն, բոլորին մայրաքաղաք եւ կուսակալանիստ կ'որոշէ Մելիտինէ քաղաքը: Գ. Ատտիլիոս Յուլիանոս Կղաւտիոս Ռուփինոս անունով մէկը կը կարգուի այն ատեն «Օգոստեան տեղակալ փոխպրետոր» Հայաստանի:

Բայց շատ չի տեւեր քաղաքական այս կացութիւնը, որովհետեւ Տրայիանոսի մահէն ետք (Յ. Տ. 117) անոր յաջորդող Սզրիանոս կայսրը, որ Արեւելք ալ այցելած է, թերեւս մինչեւ Մելիտինէ իսկ եկած, թոյլ կու տայ որ Հայաստան նորէն իր Թագաւորութիւնն ունենայ եւ Մելիտինէն վերադասունալ կառավարով կ'իյնայ՝ մաս կազմելու իր նախկին վիճակին: Սակայն Մելիտինէ քաղաքն իր մայրաքաղաքի աստիճանին բարձրացումովն շահած զարգացումը չի կորսնցնէր. «Այս բարձրացումով կը կրկնապատկուի դաշտին ձողակաւանութիւնը», կ'ըսէ Հ. Սահակ Կոզեան (ՄԵԼԻԴ, էջ 13), «կը խմբուին հոն շինարար-



բար տարրեր: Շէնքեր կը բարձրանան ամբողջին չորս կողմը: Ընդարձակ հը-  
րապարակներ քաղաքին կու տան հռոմէական կերպարանք: Գեղեցկութեան  
չուք կը տարածեն տաճարները, բաղնիքները եւ թէատրոնը՝ անհրաժեշտ թէ՛  
գրօսանքի եւ թէ՛ կրթութեան համար: Այսպէս գեղակերտ ու բարեզարդ կը  
ճանչնայ զայն Պրոկոպիոս 562-ին՝ հինգ դարու աշխատանքին արդիւնքը նը-  
կարագրելով» (ՎԱՍՆ ՇԻՆՈՒԹԵԱՆՑ, Դ. 15):

Քրիստոնէական Բ. դարու մէջտեղը դրած է Պտղոմէոս գիտունն ալ իր  
Աշխարհագրութիւնը եւ նոյն ատենները պատրաստուած են «Անտոնինեան Ու-  
ղեգրութիւնք» անուանեալ քարտիսաւոր տախտակները: Սոյն երկու աղբիւր-  
ներն ալ Մելիտինէ քաղաքը կը նշանակեն իբր հռոմէական կայսրութեան ար-  
մենակարեւոր սահմանապահ մէկ վայրը:

Հռոմէական քաղաքին տեղը, որ ներկայ Մալաթիայէն երկու ժամ ուղե-  
պի հիւսիս-արեւմուտք գտնուող Էսփիշէի կամ Էսփի Մալաթիա լքեալ վայր-  
րով կը ներկայացուի, դժբախտաբար գիտական պեղումներու եւ խուզարկու-  
թեանց առարկայ եղած չէ: Ինչպէս Murray's Handbook of Asia Minor  
գիրքը կ'ըսէ (էջ 256), պարիսպներու, մզկիթներու, եկեղեցիներու,  
խաներու եւ այլ շինութեանց փլատակները հոն կը ծածկեն շատ  
ընդարձակ տարածութիւն մը, բայց խառն ի խուռն եւ առանց չահեկա-  
նութեան կը մնան: Հռոմէական Մելիտինէէն եւ կամ ԺԲ. «Որոտացող» լե-  
գէոնի մնայուն բանակատեղիէն գրեթէ ոչ մէկ մնացորդ կայ տեսանելի: Հռո-  
մէական շրջանէն քանի մը սիւներ միայն ինկած կը պառկին Ալամիմարէ հա-  
միին մօտերը:

Հոս պատշաճ կը համարինք Լէյման-Հաուպտի ՀԱՅԱՍՏԱՆ ԱՏԵՆՕՔ  
ԵՒ ՀԻՄԱ գիրքէն քաղուածք մը տալ թարգմանաբար. — «Քառասուն ժամ  
տեւող, տաքութեամբ ու ծարաւով դժուարացած աշխատանքէ եւ վերջին 1,5  
ժամը կատարեալ մութի մէջ ձիավարելէ ետք», կ'ըսէ, «հասայ Իզմիլ կամ  
Գատրֆէօյ: Քանի որ կ'ըսէին թէ միւս ամիւր լաւագոյն պիտի ըլլար օթեւա-  
նումը, ուստի իսկոյն Եփրատի վրայէն նաւակով անցայ եւ դիմացը գտնուող  
Փիրոթ գիւղին մէջ անցուցի գիշերը, Եփրատի երկու ամիանց հետազօտու-  
թիւնը միւս առտուան ձգելով: Փիրոթէն մեկնելով Յունիս 26-ին՝ աւելի  
հարաւ-արեւմուտք ուղղուեցայ դէպի ՄԱԼԱԹԻԱ: Մալաթիա — Նոր քաղա-  
քը — որ Եփրատէն քանի մը ժամ հեռու կը գտնուի, իր գիրքին ու շինուած-  
քին համեմատ՝ մեծ նմանութիւն ունի Պարսկաստանի Մարաղա քաղաքին  
հետ: Ասոր պէս ան ալ կ'երկարի մէկ ու կէս գերմանական մղոնէ աւելի տեղ:  
Տուները կատարելապէս կը կորսուին ծառաստաններու եւ սլողաքեր պար-  
տէզներու մէջ: Մալաթիա հռչակաւոր է իր հասցուցած պտուղներով: Եւ  
մասնաւորապէս հիւրասէր ընդունելութիւն գտայ Միւթեսարը՝ Ճեմիլ փա-  
շայի քով, որ լաւ դաստիարակուած թիւրք էՖէնտի մըն է եւ սահուն Ֆրան-  
սերէն կը խօսէր: Իր լուսամիտ դադափարներուն շնորհիւ լաւ յարաբերութիւն  
կը մշակէր ամերիկացի միսիոնարներու եւ տեղացի բողոքական դասանոցի:



Թիւնն ընդունած Հայերու հետ: Պատահամբ Մալաթիա գտնուող Մր. Պրատունը եւ միանգամայն Մալաթիոյ Հայ Աւետարանականաց հոգեւոր հովիւը նախաճաշի հրաւիրեց ինծի հետ:

«Պատուելին Վանք անուն գիւղի մը բնիկն էր Աղբնի մօտ, որ այս վերջինին կը հասնի մարդ՝ եթէ Մալաթիայէն առանց Արարկիր հանդիպելու դէպի էկին ճամբորդէ: Ան ինծի հաղորդեց որ Վանք գիւղի մօտ գալա մը կայ, որ իսկապէս քարայրներու քաղաք է, որուն ապառաժին երեսը արձանագրութիւն մը փորագրուած է. ասոր կարելի է միայն հասնիլ իրարու ծայրը կըցուած երկու երկայն ելարաններով, իսկ արձանագրութեան գրութիւնը ճիշդ Քէօմիւրիսանի արձանագրութեան գիրերուն կը նմանի: Վանք գիւղի տեղացիէ մը այսչափ ճշգրտեամբ տրուած սոյն մանրամասնութիւնները զիս համոզեցին Մալաթիայէն անդին ճամբաս յիշեալ գիւղին վրայէն ընտրելու» (Armenien einst u. jetzt, vol., I, p. 483-5):

«Մալաթիայէն մեկնեցայ Յունիս 27-ին, դէպի Վանք գիւղը. ճամբան նախ կը տանի դէպի հին քաղաք — էսքի Մալաթիա — որ իր ինկած պարիսպներուն եւ մինարէներու եւ պալատներու աւերակներուն մէջտեղ տակաւին կարեւոր թիւ մը թիւրք բնակիչներ կը պատսպարէ, մինչդեռ հոն բնակած Հայերը կոտորածի ժամանակ բնաջնջուած են բացի երեք եղբայրներէ, որոնց մէկուն հետ ես խօսակցեցայ»:

«Մալաթիայէ դէպի Սիվաս ուղղագիծ խճուղիին վրայ, էսքի Մալաթիայէ քիչ մը անդին, հանդիպեցայ հռոմէական մզոնաքարի մը...» (որուն ընդօրինակութիւնն ու կաղապարն առեր է): «Քիչ վերջը անցայ Գըրգ Կէօզ Քէօփրիւ ըսուած կամուրջը՝ Թոխմասուի վրայ, ճիշդը՝ կեդրոնի գլխաւոր թեժ աղեղէն դատ՝ ասդին 10 եւ անդին 12 նեղ կամարներ կը ներկայացնէ: Անիկա աստ եւ անդ հանդիպող, լաւ պահպանուած միջնադարեան կամուրջներէն մէկն է, բայց անշուշտ աւելի հին, Հռոմայեցոց օրուան կամուրջի մը տեղը շինուած պիտի ըլլայ: Ապա խճուղին կը հետեւի, ինչպէս մզոնաքարն ինկէ կ'աւազուցանէ, հռոմէական հին պողոտայի մը, որ, ինչպէս . . . պիտի տեսնենք, Լուկուլլոսի եւ Կորբուղոնի ալ գործածած զինուորական պողոտան է, բանակով Հայաստան արշաւելու համար, Մալաթիա-Իզմիլ ճամբով եւ Պարբերդի դաշտին մէջէն» (Ibid, p. 486):

Մեր ճամբորդը ապա դէպի ձախ ձգելով Սիվաս տանող խճուղին, բըռնած է հին ժամանակ մինչեւ Սատաղա տանող հռոմէական զինուորական պողոտայի գիծը, Եփրատի ընթացքն ի վեր, եւ գետին դէպի արեւմուտք ցցուած մէկ ծունկը անցնելէ ետք, ուր Էդրիպիւք անուն գիւղ մը կայ, Գըղըլպաչ կամ Միլալլահի աղանդէն մարդոցմով բնակեալ, ապա Քեպանմատէնի մօտ Մուրասուի եւ Գարասուի գետախառնունքը դէպի աջ ձգելով, Յունիս 29-ին անցաւ Արարկիր-սու գետակի միակամար կամուրջը եւ յետոյ գետակի ձախ կողմէն միացող վտակի ձորին մէջ հասաւ Վանք գիւղը եւ անոր ժայռաբերդը: Շատ դժուարութեամբ մագլցեցան ապառաժն ի վեր եւ դտան արձանագրութիւնը, որ սակայն սեպագիր չէր, այլ 10 ոտանաւոր տողերէ բաղկացեալ



յուևարէն արձանագրութիւն մը, որուն մէջ Աթենայիս անուն իշխանուհիի մը, որ Մարկոս Անտոնիոս եռապետէն սերած ըլլալ կը թուի, վաղաժամ կորուստը կ'ողբայ իր ամուսինը, որ ինքն ալ նոյն սերունդէն պիտի ըլլայ: Լէյման-Հաուպտ եւ արձանագրութեանս վերծանումին մէջ իրեն օգնող լեզուագէտ պատմագէտներն այն եզրակացութեան եկեր են որ հոս Արաբկիրի շրջանակին մէջ տեղական փոքր իշխանութիւն մը գոյութիւն ունեցած է տակաւին Յ. Տ. 130-ի ատենները. բայց թէ Աթենայիս իշխանուհին եւ իր ամուսինը դեռ քրիստոնէայ չէին, որովհետեւ երկնային ու սանդարամետական աստուածները կ'ոգեկոչուին եղերերգութեանս մէջ (Armenien, I, pp. 488-494, արձանագրութեան լուսանկարով եւ այլ պատկերներով): Ծանօթագրենք որ Փրոֆ. Լէյման-Հաուպտ կրնար լաւ հայերէն խօսիլ, եւ Մալաթիա հանդիպած է համիտական ընդհանուր կոտորածներէն մի քանի տարի վերջը՝ 1899-ին:

## ՔՐԻՍՏՈՆԵՈՒԹԻՒՆԸ ՄԵԼԻՏԻՆԷԻ ՄԷՋ

Մալաթիա քաղաքը շատ կանուխէն ճանչցած պիտի ըլլայ քրիստոնէական կրօնքը, աւելի կանուխ քան բուն Հայաստանը, որով արդէն Դ. դարուն ան դարձած էր քրիստոնէութեան կարեւոր կեդրոններէն մէկը: Զրոյցներ հիւսուած են Մալաթիոյ մէջ քրիստոնէութիւնն առաջին քարոզողի մասին՝ ձեւուած բուն Հայաստանի առաքեալներուն աւանդութեանց վրայէն: Այսպէս, կը զրուցուի թէ Թադէոս առաքեալն է որ քարոզեր է, եւ իր այցելութեան անմոռաց յիշատակ թողեր է հոն՝ Քրիստոսի խաչելութեան դամբարէն մէկը (Սրուանձտեանց, ԹՈՐՈՍ ԱՂԲԱՐ, Բ., էջ 320): Այս հետաքրքրական զրոյցներու վրայ առանց ծանրանալու՝ անկախ աղբիւրներու տեղեկութեանց հիմամբ՝ կրնանք ընդունիլ որ արդէն Բ. դարու վերջերը Մալաթիա քրիստոնէայ էր եւ իր մարտիրոսներն ալ ունեցած, մինչ Եփրատի ձախ կողմը բուն Հայաստանը տակաւին հեթանոսութեան խոր խաւարին մէջ կը քնանար:

Արդէն Պետրոսի Առաջին թուղթին մէջ, որ ըստ Փրոֆ. Բեմսէյի՝ թեւեւ քրիստ. 80 թուականին գրուած է, կը յիշուին եկեղեցիներ՝ Փոքր Ասիոյ միւս երկիրներուն հետ՝ Կապադովկիայի (Ա. Պետ. ա. 1), որու մասն էր Մելիտինէ: Եւ արդէն Պենտեկոստէի հրաչքին ականատեսներուն մէջ կը յիշուին Կապադովկիացի մարդիկ (Գործք. Բ. 9): Նոր Կտակարանի քննական սերտողութեամբ սա համոզման եկած եմ որ շատ հաւանօրէն Շիղա առաքեալի ձեռքով էր որ Աւետարանը քարոզուած է Փոքր Ասիոյ արեւելեան երկիրներուն մէջ, եւ նշանակելի է որ Մելիտինէի անմիջական դրացի Կոմմա-դինէի մէջ, Սամոսատի մօտերը, «Շիղայի վանք» մը կը յիշեն ասորի պատմիչները:



Կ'ըսուի թէ երբ մեր 177 թուականին Մարկոս Աւրելիոս կայսրը Պաննոնիոյ երկրին մէջ կը պատերազմէր, սաստիկ երաշտութեան պատճառաւ ջուր չկար բանակին խմելուն համար իսկ: Այն ատեն կայսրը հրամարեց որ բանակին մէջ ամէն զինուոր աղօթէ իր հաւատացած մէկ աստուածին, որ պէտքի անձրեւ դայ: Վերջին անգամ աղօթեց բանակին մաս կազմող «Որոտացող» (Fulminata) մականուանեալ ժի. Լեզէոնը, որուն զինուորները բոլորն ալ քրիստոնեայ էին. ասոնք դաշտին մէջտեղ ծունկի եկան եւ Յիսուս Քրիստոսի անունով Աստուծոյ աղօթեցին. եւ իսկապէս անձրեւ եկաւ, բանակին բոլոր զինուորները անձրեւի կաթիլներն իրենց վահաններուն մէջ բռնելով խմեցին եւ բանակը ծարաւէն մեռնելէ ազատեցաւ: Իրականին մէջ ալ այսպիսի տեսարանի մը պատկերը քանդակուած կայ Հռովմի մէջ Մարկոս Աւրելիոսի յաղթութեան կամարին վրայ:

«Որոտացող լեզէոնի» այս աւանդութիւնը կը ցուցնէ որ Մարկոս Աւրելիոս կայսեր օրերուն (Յ. Տ. 161—181) արեւելեան Կապադովկիոյ մէջ քրիստոնէութիւնը բաւական ընդհանրացած էր, որովհետեւ Fulminata կոչուած Երկոտասաներորդ Լեզէոնի սովորական կայանն էր Մելիտինէ, եւ անոր զինուորներն ալ հաւանօրէն մեծաւ մասամբ այս դաւառի տեղացիներէն կ'առնուէին: Միեւնոյն լեզէոնի պատկանող Պողիկտոս Մելիտինեցին նահատակուեցաւ Դեկիոս կայսեր հալածանքին ատեն (Յ. Տ. 250), երբ արդէն զօրաւոր եկեղեցիներ կային Մելիտինէի եւ այլ քաղաքներու մէջ:

«Մելիտինեցի կամ ի Մելիտինէ նահատակեալ», կ'ըսէ, Հ. Ղեւոնդ Ալիշան, «բայց Հայ ճանչցուած եւ այսպէս կոչուած մէկը մինչեւ հիմա կը պատուով Նափոլիի երկրին Կաղանիա դաւառին Աչչի-Րէալէ քաղաքին մէջ. յատուկ եկեղեցի մը նուիրուած է իրեն. անունը լատինաբար կը կոչուի Ex-peditus, որ անշուշտ թարգմանուած է բնիկ լեզուէն... Աւանդութիւնը նոյնիսկ Մելիտինեան Շանթաձիգ Լեզէոնի գնդապետ կը կարծէ այս սուրբը: Անունը կրնայ առնուած կամ նմանցուած ըլլալ նաեւ հայ բառէ մը, ինչպէս ասպետ կամ Սպետ: Մելիտինէի նահատակաց հռչակագրոյններն են Սուրբ Պօլիեկտիս եւ Նէարխոն (Նոր իշխան), Դեկոս կայսեր հալածանաց ժամանակ. ասոնց երկնաւոր փառքը՝ յերկրի կամ ի դպրութեան ալ անմահացունց փրանկ բանաստեղծն Քորնէլի իր գերահռչակ թատերական ողբերգութեամբը» (ԱՐՇԱԼՈՅՍ ՔՐԻՍՏՈՆԵՈՒԹԵԱՆ ՀԱՅՈՑ, էջ 88—9):

Մեծն Տրդատի գահակալութեան առթիւ հռովմէական նահանգներէն հաւաքուող օթանդակ գունդերու ժամադրաւայրը հաւանօրէն Մելիտա էր: Եւ հարկաւ Գրիգոր Պարթեւն ալ, Հայաստանի ապագայ Լուսաւորիչը, իբր սպասաւոր Տրդատ արքայազունին, այս միջոցին այցելեց Մելիտինէն: Այս պարագան անորոշ կը թողու Ագաթանգեղոս, որ սաչափը միայն կ'ըսէ թէ Կայսրը «գումարեաց ի ձեռն նորա (Տրդատայ) զօրս բազումս յօգնականութիւն նմա, եւ արձակեաց յիւրական աշխարհն Հայոց» (էջ 48): Մովսէս Խորենացի կ'աւանդէ որ երբ Տրդատ Կեսարիա հասաւ, Հայոց նախարարներէն



Հաստեր անոր ընդառաջ ելան հոն (ՊԱՏՄ. Բ. ձբ. էջ 346) : Այս ճշմարիտ ըլլալով հանդերձ, Մելիտինէն պէտք է որ ընդունինք իբր ընդհանուր հաւաքավայր օժանդակ հռովմէական բանակին : Արդ, Ֆարգինի յունարէն արձանագրութեան համաձայն, զոր գտնողը՝ Փրոֆ. Լէյման-Հաուպտ սխալմամբ մեր Պապ թագաւորի ժամանակին կ'ընծայէ, մինչդեռ բոլոր ներքին նշանները կը ցուցնեն թէ անիկա Մեծն Տրդատի դահակալութեան պարագային կը վերաբերի, Հայոց թագաւորին օժանդակ դունդեր հասած են ԵՓՐԱՏԱՅԻՔ, Մատիանէ, Մելիտիա, Կոմմազինէ եւ Ուրոյենէ նահանգներէն (Lehmann—Haupt, Armenien, I, p. 416) : Ասոնց բոլորին համար ամենադիւրին եւ բնական հաւաքավայրն է Մելիտիա : Այսպէս, երիտասարդ գահաժառանգը հսկայազօր եւ իր հաւատարիմ հայ նախարարները, հռովմէական քաջ զօրավարներուն ու զինուորներուն հետ, իրենց շեփորներով գոռացուցին եւ իրենց երկվարաց սմբակներուն տրոփիւնով թնդացուցին Մալաթիոյ պողոտան՝ անցնելու համար Հայաստան եւ անկէ վանելու Պարսից բանակները, որ «գաշխարհն գրաւեալ էին յինքեանս ի ծառայութիւն» : Իսկ պատերազմը պիտի յանգէր քաջն Տրդատի թագադրութեան եւ Հայաստանի մէջ Արշակունի հարստութեան վերահաստատման :

350 թուականին Կոստանդինոս կայսրը իր Կոստաս եղբօր նշանածը, Աբլարիոս կոմսի Ողոմպիադա անուն դուստրը, Հայոց Արշակ Բ. թագաւորին հետ կ'ամուսնացնէ Կապադովկիոյ Կեսարիա քաղաքին մէջ, եւ ապա զանոնք ճամբայ կը դնէ Փոքր Հայքի Մելիտինէ քաղաքէն, եւ ինքն ալ Եփրատ գետն անցնելով Եդեսիա կ'երթայ : Այսպէս կը գրէ հռովմայեցի պատմիչ Ամմիանոս Մարկեղինոս (XX, 1) : (Հ. Ն. Անդրիկեան, ԲՈՒԶԱՆԴԻ ՄԱՄԻ-ԿՈՆԵԱՆՆԵՐԸ, էջ 38—9-ի ստորեւ ծանօթութիւնը) :

Հաւանօրէն Մալաթիա է դարձեալ տեսարանը Հայոց Պապ երիտասարդ թագաւորին մէկ սխրագործութեան, զոր կը պատմէ ժամանակակից լատին հեղինակ Ամմիանոս Մարկեղինոս : Պապ թագաւորը Վաղէս կայսեր գաղտնի հրամանաւ եւ հռովմայեցի Տերենտիոս զօրապետի խաբկանօք Կիլիկիա — Տարսոն — տարուած էր իր 300 քաջ պալատականներով եւ հոն արգելափակուած : Վերջապէս Հայոց թագաւորն ու պալատականները կերպը գտնելով, փախուստ կու տան եւ կայսերական նահանգապետին հետապնդումէն ալ մազապուր կ'ազատին : «Ետեւէն հասնող լեզէոն մըն ալ Պապին յանկարծական յարձակումին առջեւ ցիրուցան եղաւ : Թէեւ հալածուելու վտանգէն ազատած, սակայն երկու օրուան անընդհատ արշաւանքէն բոլորովին խոնջած էին, երբ Եփրատի եզերքը հասան Պապ եւ իրենները : Մերձակայ տուններէն թաւական անկողիներ հայթայթելով, որոնց ներքեւ հաստատեցին երկերկու — ուռած — տիկեր, թագաւորը եւ մեծամեծները նստան այդ վտանգաւոր անդրովարներուն վրայ եւ անցան գետին միւս կողմը. մաս մը ձիաւորներ ալ ալիքներուն դէմ կռուելով՝ մօտեցան ափունքին ահագին դժուարութիւններով» (Եղիշէ Արք. Դուրեան, ԱԶԳԱՅԻՆ ՊԱՏՄՈՒԹԻՒՆ, էջ 288)<sup>1</sup> : Պէտք է

(1) Տես նաեւ Աստուրեան, ՀԱՅԱՍՏԱՆ ԵՒ ՀՌՈՎՄ, էջ 306-9 :



նկատի առնել դարձեալ որ Կիլիկիայէն Հայաստան ամենակարճ եւ բնական  
ճամբան ան է, որ Մալաթիոյ մօտ կ'անցնի Եփրատը:

Վերջապէս, Մովսէս Խորենացին Վարազդատ Թագաւորին համար կ'ա-  
ւանդէ հրաշալի արարք մը: Այս սրտոտ, անձնեղ, ուժով ու շատ ճարտար նե-  
տաճիգ երիտասարդ իշխանը երբ Թագաւորելու համար Հայաստան կ'երթար,  
Գարանաղեաց դժուար կիրճերուն մէջ խումբ մը ասորի աւազակաց կը հան-  
դիպի, զորս զարնելով փախստական կ'ընէ: Անոնք ալ Եփրատի նեղ տեղը չի-  
նուած կամուրջէն անցնելով, զայն իրենց ետեւէն կը քանդեն. բայց Վարազ-  
դատ մէկ ոստումով գետէն անդին կը ցատկէ, որմէ զարհուրելով աւազակ-  
ները՝ զէնընկէց անձնատուր կ'ըլլան (Մ. Խորենացի, ՊԱՏՄ. Գ. Խ. էջ 483—  
5): Ասիկա եթէ Պապ Թագաւորի դէպքին մէկ վարիանտը չէ, որովհետեւ Բիւ-  
զանդ Փաւստոս այսպիսի բան մը չի պատմեր Վարազդատի մասին, նորէն  
Մալաթիոյ կողմերը պատահած ըլլալու է: Բայց ուշագրաւ է Խորենացւոյ այս  
աւանդութեան մէջ ասորի աւազակներու յիշատակութիւնը, որովհետեւ ետ  
Արաբկիրէ մեկնելով Անջրդիի վրայէն դէպի Շնկախ՝ Եփրատը (Գարասու) անց-  
նելէ ետք, Չմշկածագի ճամբուն վրայ հանդիպեցայ քանի մը լքեալ վանքե-  
րու եւ եկեղեցիներու, որոնց պատերուն վրայ ասորերէն արձանագրութիւն-  
ներ կային: Ուրեմն, թերեւս Հայ Արշակունեաց հարստութեան անկումէն ա-  
ռաջ իսկ Ասորիներ հաստատուած էին Մելիտինէի կողմերը:

«Չորրորդ դարուն Մալաթիա քաղաքը բոլորովին յունացած կը դըտ-  
նենք», կ'ըսէ Հ. Ս. Կոզեան: «Յունական էր հոն եկեղեցական իշխանութիւնը  
եւ յոյն էին անոր եպիսկոպոսները: Մելիտինէի մէջ հայ եպիսկոպոս կանու-  
իւն տեսնելու փափաքը առիթ տուած է Հայ Մետրապոլիտութիւն մը երեւա-  
կայելու հոն ներսէս Մեծի օրէն (Հացունի, ԿԱՐԵԻՈՐ ԽՆԴԻՐՆԵՐ ՀԱՅ ԵԿԵ-  
ՂԵՑԻՈՅ ՊԱՏՄՈՒԹԵՆԷՆ, Վենետիկ, 1927, էջ 169—172): Կորիւնի յոռութիւ-  
նը լաւագոյն եւ անհերքելի փաստն է որ Մելիտինէ չունէր հայ եպիսկոպոս  
այդ դարերուն» (ՄԵԼԻԴ, էջ 15): Բայց եպիսկոպոսները յունածէս ըլլալով  
հանդերձ, անոնցմէ ոմանք կրնային ծագումով հայազգի ըլլալ: Այսպէս էր  
հաւանօրէն Մեսրոպ Մաշթոցի ժամանակակից Ակակիոս եպիսկոպոսը Մելի-  
տինէի (տես Ն. Ադոնց, ՄԱՇԹՈՅ ԵՒ ՆՐԱ ԱՇԱԿԵՐՏՆԵՐԸ, էջ 38):

Մեծն Թէոդոսիոսի օրովն էր 385 թուականին, որ Հայաստան բաժնուե-  
ցաւ Հռովմայեցւոց ու Պարսից միջեւ: Հայաստանի բաժանումէն չորս տարի  
ետք մեռաւ Արեւմտեան Հայաստանի Թագաւորը Արշակ Գ.: Այն ատեն կայս-  
րը ջնջեց Յունահայաստանի Թագաւորութիւնը եւ Բիւզանդիոնի կողմէն Կո-  
մէս մը իբր ընդհանուր կառավարիչ նշանակուեցաւ այս երկիրներուն վրայ:  
Սա ալ յիշատակելի է որ Հայաստանի բաժանումէն տասը տարի ետք, 395  
թուին, Հռովմէական Կայսրութիւնը ինքը երկուքի բաժնուեցաւ եւ բնակա-  
նաբար Մելիտինէ մաս մնաց Արեւելեան Հռովմէական Կայսրութեան: Կայ-  
սրութեան այս մասին մայրաքաղաքն էր Կ. Պոլիս, հին անունով Բիւզան-  
դիոն, որով Արեւելեան Հռովմէական Կայսրութիւնը սովորաբար Բիւզանդա-



կան Կայսրութիւն ալ կը կոչուի: Ասկէ զատ, Կ. Պոլիս եւ շրջակայքը յունարէն խօսէր, եւ հետզհետէ լատիններէն լեզուն կառավարութեան մէջ անգամ դործածութենէ իյնալով, տեղը յունարէնն անցաւ: Ասոր համար ալ մեր սլաւոմիչները սովորաբար «Յունաց Կայսրութիւն» կ'անուանեն Արեւելեան Կայսրութիւնը, թէեւ անոր բնակիչները Հռոմէի ալ կը կոչեն, որ Հռովմայեցիք բառին համառօտութիւնն է:

Բայց Մելիտինէ յունական դառնալուն հետ նաեւ հայկական դարձած է: Արդէն Դիոկղետիանոս (284—305 Յ. Տ.) Փոքր Հայքը եւ Մելիտինէ գաւառը բաժնելով Կապադովկիայէն, զանոնք ինքնուրոյն նահանգ ըրած էր՝ անոր մայրաքաղաք նշանակելով Մելիտինէ քաղաքը: Վաղէս կայսեր օրով՝ Փոքր Հայքի նահանգը բաժնուեցաւ երեք մասերու՝ Առաջին, Երկրորդ եւ Երրորդ Հայք անուններով, եւ Մելիտինէ 378 թուականին՝ Երկրորդ Հայքի մայրաքաղաքը մնաց: Հայաստանի բաժանումէն ետք՝ անկէ գաղթականութեան նոր հոսանք մըն ալ սկսաւ դէպի յունական երկիրներ, Մելիտինէ, Կատաւոնիս եւ Փոքր Ասիոյ ուրիշ մասերը: Արդէն 404 թուականին՝ Ս. Յովհան Ոսկեբերանի աքսորուած ժամանակ՝ հայ գիւղացիութիւն կար Կոկիսոնի եւ Արարիսոնի շրջանակներուն մէջ: Մանաւանդ 428 թուին, Արշակունեաց թագաւորութեան բարձումէն ետք՝ արտագաղթի այս հոսանքը սուելի սաստկացաւ: Հայ ծաւալումը հետզհետէ հասած է մինչեւ Կեսարիա-Մաթաք անգամ: Իսկ Մելիտինէէ հարաւ, Կոմմադիինէի մէջ, Հայեր շատ կանուխէն Ասորիներուն հետ խառն կը բնակէին:

Մկրտիչ Եպս. Աղաւնունին հետեւեալ խիստ հետաքրքրական տեղեկութիւնը կու տայ մեզի Մելիտինէի քրիստոնէական դպրոցին վրայով. «Ս. Եւթիմէոսի կենսագիր՝ Կիւրեղ Սկիւթոպոլսեցին կը գրէ որ Մելիտինէի եպիսկոպոսին դպրոցը արտաքին գրականութենէ զատ, կ'ուսուցանէր Ս. Գիրքը եւ աստուածաբանութիւն: Եւթիմէոս կ'աշակերտէր հոն Դ. դարուն եւ անոր յաճախած այդ դպրոցը կային նաեւ Հայեր, վասնզի Մելիտինէ հայաշատ կեդրոն մըն էր» (ՏԱԹԵԻ տարեգիրք, Բ. տարի, 1926, Հալէպ, էջ 83):

Հայոց գրի գիւտին կատարելագործումէն ետք, Ս. Սահակ կ'որոշէ նաեւ Հայաստանի յունական բաժնին մէջ հայ դպրոցներ բանալ: Զարմանալի է որ Յոյները քրիստոնէայ ըլլալով հանդերձ, արգելքներ կը յարուցանէին իրենց բաժնին մէջ հայ դպրոցներու բացման, հայ դպրութեան ծաւալման եւ Հայոց եկեղեցիներուն մէջ պաշտամունքը հայերէնով կատարելու դէմ: Ս. Սահակ Պարթեւ վերջապէս — 422-ին — ստիպուեցաւ Կ. Պոլիս դրկել Ս. Մեսրոպ-Մաշթոցը, Վարդան Մամիկոնեանի ընկերակցութեամբ: Մաշթոց իրեն հետ կը տանի իր աշակերտներէն խումբ մըն ալ մինչեւ արտասահմանի առաջին կայանը, որ է Մելիտինէ քաղաքը: Աւելի անդին ուղեւորելու առթիւ իր աշակերտներուն բազմութիւնը Մելիտինէ կը թողու, եւ զանոնք քաղաքին Ակակիոս եպիսկոպոսին յանձնելով հանդերձ, անոնց վրայ դասապետ կամ ղլխաւոր կը կարգէ Վանանդեցի Ղեւոնդ Երէցը: Սա ալ մինչեւ իր վար-



գապետին Կ. Պոլիսէն վերադարձը արթուն կերպով հսկեց իր աշակերտներուն վրայ, միանգամայն իրեն ու ընկերներուն մտաւոր զարգացման հոգ տանելով Մելիտինէի վերոյիշեալ մետրապոլիտական բարձր ուսումնարանին մէջ (ԿՈՐԻԻՆ, էջ 27) :

Ս. Մեսրոպ կայսերական թոյլտուութեան հրամանն առած՝ Բիւզանդիոնէ վերադառնալէն ետք, առաւ իր աշակերտները Մելիտինէէ եւ անոնցմով կազմակերպեց կրթական դործը Յունահայաստանի մէջ : Այնտեղ հիմնեց բազմաթիւ վարժարաններ, որոնց վրայ շրջանային տեսուչներ ալ կարգեց : Մենք տարակոյս չունինք թէ հայ դպրոց մըն ալ Մելիտինէ քաղաքին մէջ բացուեցաւ՝ յունական ուսումնարանի կողքին : Ինչպէս Հ. Ս. Կոզեան ուղիղ կերպով կը դիտէ, կարեւոր էր հայ դպրոցին դերը Մելիտինէի մէջ՝ հայ տարրը ազգային ուժացումէն եւ գաղթելու վտանգէն ազատելու համար : Եւ ի՞նչ աւելի բնական եւ հաճելի է քան «խորհիլ, թէ Մաշթոցի աշակերտները եղան ուսուցիչ Մելիտինէի համատոհմ եւ համալեզու հայ մանուկներուն» (ՄԵԼԻԴ, էջ 14—5) :

Մելիտինէի Ակակիոս եպիսկոպոսը, զոր վերեւ յիշեցինք, իր ժամանակին ամենակարեւոր անձնաւորութիւններէն մէկն էր, եւ դաւանական խընդիրներու մասին՝ Աղեքսանդրիոյ Կիւրեղ եւ Կոստանդնուպոլսոյ Պրոկլոս Պատրիարքներու հետ թուղթեր գրած է մեր Սահակ եւ Մեսրոպ հայրապետներուն (Օրմանեան, ԱԶԳԱՊԱՏՈՒՄ, էջ 312) : Պէտք է ընդունիլ թէ մեր գլխաւոր թարգմանիչները՝ Ղեւոնդ, Եղնիկ եւ Կորիւն, դաւանաբանօրէն խորապէս ազդուած պիտի ըլլան Եդեսիոյ Ռաբուլա եւ Մելիտինէի Ակակիոս եպիսկոպոսներէն, Կիւրեղեան դաւանութեան պինդ փարելու մասին : «Հայերը բռնել էին որոշակի Կիւրեղի կողմը», կը գրէ Ն. Ադոնց. «Մելիտինէի եպիսկոպոս Ակակը, որ երեւում է եւ ծագումով մօտ էր Հայերին, վճռական դեր ունեցաւ եւ այս խնդրում, հաւատ ներշնչելով իր հայրենակիցներին՝ նա նպաստեց մեծապէս Կիւրեղեան հոսանքի յաղթանակին : Հայ Եկեղեցու Եփեսոսեան դաւանանքի հիմը դրուեցաւ, որ այնուհետեւ անաստան մնաց դարերի ընթացքում : Ո՛չ միայն Կիւրեղին նրա անմիջական մասնակցութեան, այլեւ Մելիտինէի նշանաւոր եկեղեցականին եւ նրա ջանքերին է պարտական Հայ Եկեղեցին իր դաւանաբանական խարիսխը» (ՄԱՇԹՈՅ ԵՒ ՆՐԱ ԱՇԱԿԵՐՏՆԵՐԸ, էջ 38—9. հմտ. նաեւ էջ 50—1) :

Հիմա նորէն դառնանք Մելիտինէի քաղաքական կեանքին : Մեծն Յուստինիանոս Յունահայաստանի մէջ հայ նախարարութեանց դոյութիւնը երկրին պաշտպանութեան տեսակէտէն վնասակար համարելով, զանոնք ջնջեց, եւ ապա իր իշխանութեան տակ զտնուող բոլոր հայաբնակ նահանգները բաժնեց չորս մասի, իւրաքանչիւրը առանձին զինուորական կազմակերպութեամբ : Բարձր Հայք նահանգը անուանեց Առաջին Հայք, Եփրատէն արեւմուտք Փոքր Հայքը՝ Երկրորդ Հայք, Մելիտինէի երկիրը՝ Երրորդ Հայք, եւ Եփրատի արեւելեան կողմը Ծովաց աշխարհը՝ Չորրորդ Հայք : Այս կարգադրութիւն-



ները եղան 536 թուականին: Ասոր վրայ Հայոց նախարարները անյաջող փորձ մը ըրին իրենց անկախութիւնը պահպանելու, բայց եօթը տարուան պատերազմէ ետք, որու միջոցին Պարսից թագաւորին օժանդակութիւնը կը վայելէին, ընկճուեցան, եւ Յունահայաստանի հայ ժողովուրդը ստիպուեցաւ կայսերական նոր կարգադրութեանց համակերպիլ: Երբ 536-ին Մեծն Յուստինիանոս Երրորդ Հայքի մայրաքաղաքը ըրաւ Մելիտինէն, ան հիմնական պապական մը ունէր, որ պատերազմի պարագային շատ ծանր կը կշռէր. այսինքն՝ քաղաքը զուրկ էր պարիսպէ, ինչպէս կը հաղորդէ ժամանակակից Պրոկոպիոս պատմիչը (ՎԱՍՆ ՇԻՆՈՒԹԵԱՆՅ, Դ. 15): Արդարեւ Անաստաս կայսրը (491-518) սկսած էր դարմանել այդ պակասը, բայց կիսաւարտ մնացած էր կայսեր մահուան պատճառով: Սկսուածը կը շարունակէ Յուստինիանոս Ա. (527-565), ու ոչ միայն պարիսպը կ'ամբողջացնէ, այլեւ կը շքեղացնէ քաղաքը նորանոր շինութիւններով (Հ. Ս. Կոզեան, ՄԵԼԻԴ, էջ 15-6):

Մալաթիա քրիստոնեայ կայսրերու շրջանին Դ.—Ձ. դարերուն այսպէս փայլուն ժամանակներ ունեցած էր. բայց ափսո՛ս որ Յուստինիանոս Մեծի մահէն քիչ ետք, մեծ աղէտի ենթարկուեցաւ Պարսիկներուն կողմէն: Երկրորդ Վարդանանց ապստամբութեան առթիւ, 571 թուականին, մեծ ու երկարատեւ պատերազմ մը սկսաւ Յունաց եւ Պարսից միջեւ: Խոսրով Ա. Անուշիրվան արքան, որ մինչեւ Սեբաստիա արշաւած էր, վերադարձի ատեն Յոյներէն պարտուեցաւ Մալաթիոյ քով ու մազապուր կ'ազատէր՝ փիղի վրայ հեծած անցնելով Եփրատը, բայց իբր վրէժխնդրութիւն եւ որպէսզի քաղաքն իր գեղեցիկ վիճակով չմնար Յունաց, մեկնելէ առաջ հրաման ըրած էր իր զինուորներուն որ հրոյ ճարակ ընեն Մալաթիան: Յոյներն ապա վերաշինեցին զայն, բայց ոչ առաջուան շքեղութեամբը (նոյն, անդ, էջ 6):

Բայց յարմար է այս դէպքին վրայով մեր Սեբէոս պատմիչին մանրամասն նկարագրութիւնն ալ լսել. «Խոսրով իսկոյն անձամբ օգնութեան փութաց իր տեղակալին [ի Հայաստան], իրեն հետ առնելով խիստ զօրաւոր բանակ մը՝ դարձեալ բաղմաթիւ փիղերով: Ճամբայ ելաւ Հայաստանի Արտազ դաւառէն, անցաւ Բագրեւանդը եւ Կարինն աջ կողմը թողլով անցաւ Եփրատէ արեւմուտք եւ մտաւ Կապադովկիա: Առաւ Սեբաստիան ու հրոյ ճարակ ըրաւ: Յոյնք քիչ մը անդին մեծ ոյժով ընդդիմացան եւ յաղթեցին, ու եթէ իրենց մէջ անհամաձայնութիւն չիյնար, կրնային Պարսիկները փճացնել: Խոսրով ասկէ համարձակութիւն գտած՝ վերակազմեց իր բանակը եւ գնաց առաւ Մելիտինէն ալ, զոր նոյնպէս այրեց եւ քանդեց: Յոյնք որ զինքը կը հետապնդէին, վերջապէս հասան իրեն Մելիտինէի արեւելեան կողմը եւ Եփրատի մօտ սաստիկ յարձակում մը գործեցին: Պարսիկները խուճապի մատնուեցան եւ փութացին մեծ գետն անցնելու. սակայն հունին ճիշդ տեղը չգիտնալնուն, անհամար բաղմութիւն մը ջրահեղձ կորաւ: Մովսէստան մովսէտին հետ գետամոյն կորաւ նաեւ սրբազան հօւրը, զոր արքան միշտ իրեն հետ կը պտըտցնէր: Իսկ Խոսրով իր արքայական խորանը եւ նոյնիսկ բամ-



բիշներէն մէկը Յունաց ձեռքը թողլով, Ծովաց ու Աղձնիքի մէջէն աճապարեց դէպի Տիգրոն (ՍԵՒԷՈՍ, տպ. Թիֆլիս, 1913, էջ 41—2, հմմտ. էջ 53) :

Կ'արժէ այս մասին լսել Միխայէլ Ասորույ խիստ հետաքրքրական պատմութեան ալ. «Այս ժամանակ հպարտացաւ Պարսից Խոսրով Թադաւորը յաղթութեամբը, որ եղաւ իրեն Միջագետքի մէջ. եւ եկաւ Հայոց երկիրը եւ Հայեր մեծ քաջութիւն ցուցուցին Յունաց սատարելովը. երկու անգամ զայն զարնելով դարձուցին: Ապա երրորդ անգամին՝ Թադաւորը իր բանակը ժողովելով, հիւսիսային կողմերը գնաց՝ լերանց բոլորտիքը դառնալով. ապա Հայաստանը թողլով՝ Կապադովկիա եկաւ, ուր Յոյներ դիմադրեցին իրեն: Եւ Սեբաստիա եկաւ, զայն առաւ եւ կրակով այրեց: Յոյներ դարձեալ զօրացան եւ դալով առին անոր բանակը եւ կրակատուներ, զոր կը շրջեցնէր իր ետեւէն, ու քակեցին. եւ եթէ Յոյներ իրենց մէջ երկպառակութիւն չունենային, Պարսիկները կը բնաջնջէին: Բայց երբ Յունաց մէջ չփոթութիւն ինկաւ, Պարսիկները զօրացան եւ գնացին առին Հայոց Մելիտինէն եւ այրեցին: Եւ Յունաց զօրքը անոր մարդ ղրկելով՝ ըսին. «Ի՞նչ է այդ քու ըրած աւերումդ ու այրումը. այդ է Թադաւորի վայել. եւ մենք զինուորներս առանց Թադաւորի քու երկրիդ մէջ եղած ատեննիս ալ անանկ չըրինք: Հիմա եղած տեղդ կեցիր եւ պատերազմէ, եւ եթէ յաղթես այս երկիրը քուդ թող ըլլայ»: Եւ Պարսիկը զայս լսելով ամչցաւ. եւ կանգ առաւ քաղաքին արեւելեան կողմը. Յունաց զօրքերն ալ դացին ու կանգնեցան անոնց դիմացը, առտուընէ մինչեւ օրուան իններորդ ժամը եւ չկռուեցան: Եւ ապա Պարսիկները սկսան երթալ անցնիլ Նիւրատը: Յոյներն ալ ելան անոնց ետեւէն. եւ Պարսիկները շտապելով անցքը՝ շատեր դետակուր եղան. եւ մնացածները Հայաստանի մէջէն իրենց երկիրը դացին» (ԺԱՄԱՆԱԿԱԳՐՈՒԹԻՒՆ, տպ. Երուսաղէմ, 1871, էջ 272—3) :

Մաւրիկ կայսրը, որ արդի Ալպիսթանի մօտ Արաբիսոս աւանը ծնած էր եւ հայ ծագումով էր՝ կ'ըսուի, 591 թուականին, Պարսից փախստական Խոսրով Բ. Պարուէզ արքան դահին վերադարձնելուն ի վարձատրութիւն՝ ստացաւ Հայաստանի մեծագոյն բաժինը: Մաւրիկ իր իշխանութեան տակ միացուած ամբողջ հայաբնակ ընդարձակածաւալ երկրամասին նոր նահանգային բաժանում մը տուաւ, որ չափազանց բարդ է: Միայն սաչափ ըսել բաւական է որ Մելիտինէ հիմա Երրորդ Հայքի մայրաքաղաք եղաւ, եւ թէ Կապադովկիոյ Կեսարիան անգամ «հայկական» ըսուած շրջանակի մը մէջ կը մտնէր իրոք նոր «Առաջին Հայք» նահանգին մասն ու ոստան: «Եւ [Մաւրիկ] հրամայեց», կ'ըսէ Միխայէլ Ասորի, «ընդարձակել Արփսուս [Արաբիսոս] քաղաքը, ուրկէ էր ինքն, եւ որ Երկրորդ Հայքի (Մելիտինէ երկրին) մէջ էր. բայց չորս տարի ետք շրջեցաւ երկրաչարժէ, եւ կայսրը զայն դարձեալ շինեց լաւագոյն քան առաջինը՝ մեծ հողածութեամբ. բայց վերստին ընկղմեցաւ երկրաչարժէն» (ԺԱՄԱՆԱԿԱԳՐՈՒԹԻՒՆ, տպ. Երուսաղէմ, 1871, էջ 281): Ըսուածներէս կարելի է տեսնել որ Հայերը հպատակ վիճակ մը ունենալնուն



հակառակ՝ կարեւոր դիրք ունեցող տարր մը կը կազմէին եւ հակառակ որ զաւանակաւ խտրութեանց պատճառաւ Հայեր եւ Յոյներ իրարու թշնամացած էին, Հայութիւնն ինչպիսի՝ ընդարձակ ծաւալում կ'ունենար դէպի Փոքր Ասիոյ խորերը:

Մաւրիկ կայսրը հայ ծագումէ կարծուելուն հակառակ, Հայոց ազգին ամենէն վնասակար քաղաքականութիւն մը որդեգրեց, այսինքն՝ հայ նախարարներն ու զինուորները բռնի թրակիա փոխադրել ու հաստատել: Ասոր երեսէն շատ մը ապստամբութիւններ ծագեցան եւ արինահեղ խռովութիւններ տեղի ունեցան, որոնք միայն 601-ին Մաւրիկի սպանումովը վերջացան: Ապա Պարսից Խոսրով Պարուէզ արքան իբր թէ իր բարերարին վրէժը լուծելու համար՝ պատերազմ հրատարակեց Մաւրիկը սպաննող, յափշտակիչ Փոկաս կայսրին դէմ՝ 604-ին: Պարսիկները հետզհետէ ամբողջ Փոքր Ասիան — բնականաբար Մելիտինէն ալ միասին —, Սիւրիան ու Պաղեստինը եւ մինչեւ անգամ Եգիպտոսը Բիւզանդացոց ձեռքէն առին, եւ 621 թուականին Կ. Պոլիսը պաշարած էին Սկիւտարի կողմէն: Բայց հետեւեալ տարին Հերակլ քաջ կայսրը պատերազմի դաշտը իջաւ եւ վեց տարի տեւող հեռաւոր ու արկածալից արշաւանքներով այնպիսի չարաչար պարտութեան մատնեց Պարսիկները, որ ասոնք հարկադրուեցան Խոսրով արքան սպաննել եւ որդին Կաւատ Բ.ը դահնստեցնել՝ 628-ին, հաշտութիւն ընել Հռոմոց հետ, բոլոր առածներնին ետ տալով:

Սակայն մէկ քարորդ դար տեւող այս շարունակական եւ երկուստեք ապաստիչ պատերազմն ա՛յնչափ տկարացուցած էր թէ՛ Սասանեան եւ թէ՛ Բիւզանդական կայսրութիւնները, որ մի քանի տարի յետոյ — 632-ին — հարաւէն արշաւող իսլամ Արաբացոց բանակներուն առջեւ երկուքն ալ խորտակուեցան, եւ Պարսից պետութիւնը վերջնականապէս կործանեցաւ՝ 651-ին: Խակ Բիւզանդացիք Սիւրիան, Պաղեստինն ու Միջագետքը կորսնցնելով, Տաւրոս լեռներէն հիւսիս քաշուելու ստիպուեցան:

Հիմա որ հռովմէական տիրապետութեան վախճանին հասած ենք, յարմար կը սեպենք հոս տալ Մ. Խորենացոյ ընծայեալ Աշխարհագրութենէն երկու հատուածիկներ՝ ըստ Հ. Սիւքրեանի հրատարակութեան: Վերջերս ապացուցուած կը համարուի թէ այս Աշխարհագրութիւնը 667 թուականին խրմբագրուած է Անանիա Շիրակացի մեծ հայ գիտնականին ձեռքով. բայց իսկապէս հիմնական մասերը թարգմանութիւն են Պտղոմէոսի Աշխարհագրութեան համառօտութենէն, զոր Պապպոս անուն հեղինակ մը ըրած էր, եւ ուստի յաճախ աւելի կանուխ ժամանակի պարագաները կը ցոլացնէ:

Էջ 24. — «Ժէ. Աշխարհ՝ Երկրորդ Հայք, որ արդ կոչին Առաջին Հայք, յեւից կալով Կիլիկիոյ առ Տաւրոս լեռամբ՝ երի Ամանոս լերին, որ բաժանէ ընդ նա եւ ընդ Կոմագինէ Ասորւոց մինչեւ Եփրատ: Ունի եւ այլ լերինս. զՋալոն (Պինպոլա) եւ զԲասիլիսկոս (Պէյտաղ) եւ զԿոորմանտոն (Չիյաքէթ կամ Փիրան տաղ), եւ զԷտ զնոյն Պիռամիս (Չահան) եւ զՊառատիս (այ-



սինքն կամ Աշոտի ջուրը եւ կամ Թոխմա սուր լերի բազուկը), եւ զԿաւկասա (Թոխմա սուր) եւ զԿառամասոս (Սուլթան սո՞ւ թէ Շահնա սուր), եւ դրոսնա (կիրճեր) երկու ելանելոյ Ասորոց»:

Էջ 30. — «Որոց հանդէպ ի հարաւէ Գաւրէք գաւառ. ընդ որս եկեալ Արածանի (Մուրատ սուր), խառնի յԵփրատ ի քաղաքն Լուսաթառիճ (Քեպանմատէն), եւ երթալով զմտիւք ելանէ ի սահմանս Փոքր Հայոց, յելից Մելիտինէի. եւ ապա խառնի ի նա Կաւկասա (Թոխմա սուր), գալով ի մտից կուսէ ի լերին, որ կոչի Զիզոն (Պինպողա կամ Սունկուրլու տաղ) եւ Բասիլիկոն (Պէյ տաղ). եւ նախ քան զանկանել նորա յԵփրատ խառնի ի նա գետն Կառամասոս (կամ Կառամասոս, Սուլթան սո՞ւ թէ Շահնա սուր), որ գայ ի Տօրոս լեռնէն. եւ ընկալեալ յԵփրատ, գնա ընդ հարաւ, հասանէ զլեռն Տօրոս»:

Երբ մահմետական Արաբները աշխարհակալութեան համար Արաբիայէն դուրս խուժեցին, ինչպէս վերեւ ըսինք, Արեւելեան Հռովմէական կամ Բիւզանդական պետութեան բանակներուն յաղթելով, անոր ձեռքէն խլեցին Պաղեստինը, Սիւրիան, Միջագետքը եւ Կոմմագինէն: Սակայն Տաւրոսի լեռնագօտին, որ Կոմմագինէն հիւսիսէն կը սահմանէր, քիչ եւ դժուարանցանելի կիրճեր ունի, զորս ամբացուցին Հռոմները եւ թող չտուին Արաբացւոց սուլէի անդին անցնիլ: Այսպէս Մելիտինէ դեռ ժամանակ մըն ալ կը մնար քրիստոնեաներուն ձեռքը, եւ մոռնալու չենք որ այդ տեղերը մեծաւ մասամբ հաստատուած զարճեր էին արդէն:

Արաբները Միջագետքէն ետք նուաճեցին Ամիդայի շրջանակը կամ Վերին Տիգրիսի աւազանը եւ զայն Տիարպեֆիր անուանեցին: Անկէ հիւսիս՝ Բաղէշի (Պիթլիսի) կիրճին ճամբայովը մտան Արեւմտեան Հայաստան, որ այն ատեն դեռ Բիւզանդացւոց ձեռքն էր, եւ նուաճեցին երկիրը մինչեւ Կարին. սու նուաճուած երկիրը Արգոնում կոչեցին՝ զայն Հռոմներէն գրաւած ըլլալնուն համար: Ապա գրաւեցին Շիմշատ (Աշմուշատ կամ Արշամաշատ) քաղաքն ալ Խարբերդէն դէպի հիւսիս-արեւելք, նաեւ Քեմալս (Անի-Կամախ) բերդաքաղաքը Գարասուի (արեւմտեան Եփրատի) վրայ:

Վերջապէս հիճրէթի 36 թուականին (Յ. Տ. 657) Մասլամայի տրոփ Հապիպ զօրապետը Չորրորդ Հայքի կառավարիչ Իյադ Բին-Ղանիմի կողմէն զրկուելով, անցաւ Եփրատը եւ հիւսիսէն հարաւ անակնկալ արշաւանքով մը Մալաթիան առաւ Յոյներուն ձեռքէն: Բայց այդ միջոցին Արաբներու խալիֆան՝ Օթման ամիրապետը մեռնելով, Դամասկոսի մեծ փոխարքան Մուալիս եւ Մարգարէին հօրեղբորորդին ու փեսան Ալի թշնամացան իրարու հետ, իւրաքանչիւրը ուղեւոր ինքը բաղմիլ ամիրապետական աթոռին: Այսպէս Արաբները երկու կուսակցութեանց բաժնուած, սկսան կատաղի ներքին պատերազմ մղել, եւ Բիւզանդիոնի Կոստաս Բ. կայսրը Արաբներու երկպառակեալ վիճակէն օգուտ քաղելով, 658 թուականին իսկ եկաւ եւ ետ առաւ Մալաթիան մինչեւ Արեւելեան Հայաստան ալ արշաւեց:

Չորս կամ հինգ տարուան ներքին պատերազմէն ետք, երբ Ալի ամիրապետը



պետը սպաննուեցաւ իրեններէն, Մուաւիա իշխան արաբ-իսլամ աշխարհի միահեծան տէրը դառնալով, Սալիֆայութեան մայրաքաղաքը Մետինէէն փոխադրեց Դամասկոս՝ 661ին։ Այն ատեն Արեւելեան Հայաստանի նախարարները Ներսէս Գ. Իշխանցի (Շինող) կաթողիկոսին գլխաւորութեամբ՝ հաշտութեան համար դիմեցին Մուաւիային, առաջարկելով տասը տարի առաջ Մուաւիայի եւ Թէոդորոս Ռշտունիի միջեւ կնքուած դաշնագրի սլաշմաններով հարկատու ըլլալ արաբ մեծազօր տէրութեան։ Մուաւիա հաւանեցաւ Հայոց այս առաջարկին եւ Հայաստանի ընդհանուր կառավարիչ զրկեց Գրիգոր Մամիկոնեանը, որ տասը տարիէ ի վեր Դամասկոսի մէջ պատանդ էր իր քով։ Գրիգոր Մամիկոնեան համոզեց Յունահայաստանի ընդհանուր կառավարիչ Շապուհ Բագրատունին, որ ան ալ ինքնակամ հպատակի Արաբաց, որպէսզի երկու բաժիններու Հայերը իրարու դէմ պատերազմելու վտանգէն զերծ մընան։ Շապուհ հաշտուեցաւ Արաբաց հետ, եւ այսպէս Մալաթիան կրկին անցաւ իսլամներու իշխանութեան տակ։

Բիւզանդիոնի կայսրը բարկանալով ասոր, 662 թուականին պատերազմ բացաւ Հայոց եւ Արաբաց դէմ։ Բայց Թէոդորոս Ռշտունիի որդի Վարդ Պատրիկ, որ հայազգի գունդով մը տակաւին Բիւզանդեան բանակին մաս կը կազմէր, ըստ մեր Ղեւոնդ պատմագրի աւանդածին՝ իր մեռած հօրը կտակին անսալով, ճակատամարտին մէջ, որ Եփրատի եզերքը (Սամոսատի մօտ) կ'ըլլար, Յունաց դաւաճանելով՝ Արաբներուն կողմն անցաւ. որով Բիւզանդացիք չարաչար պարտուեցան ու ետ քաշուեցան։

Այս թուականէն սկսեալ կրնանք Մալաթիան այլեւս մնայուն կերպով Արաբացուոց կալուած դարձած համարել։

Եւ հոս կը վերջացնենք Մալաթիոյ մասին մեր պատմական տեսութիւնը։

ԵՂԻԱ Ս. ՔԱՍՈՒՆԻ





Թ.

## ՄԱԼԱԹԻԱ ԱՐԱԲԱԿԱՆ ՇՐՋԱՆԻՆ

Արաբներու անօրինակ եւ յանկարծական յաջողութիւնը մեկնութեան կարօտ հարց մըն է, զոր զանազան կերպ կը լուծեն ուսումնասէրներ: Առանց յամենալու այս տեսութիւններուն վրայ, միայն իրողութիւնները առնելով իրենց պարզ ձեւին մէջ, բսենք թէ անոնք շատ արագ յառաջխաղացութեամբ մը տակնուվրայ բրին Մերձաւոր Արեւելքը եւ Բիւզանդական Կայսրութիւնը սահմանափակեցին Փոքր Ասիոյ մէջ:

Բիւզանդիան չհանդուրժեց իր հողային կորուստներուն եւ ինչ որ Արաբները գրաւած էին իրմէ, աշխատեցաւ վերագրաւել է. դարէն մինչեւ ԺԱ. դար, անընդհատ գօտեմարտելով արաբ խալիֆաներու տիրապետութեան դէմ, քիչ շատ բնական հաստատուն սահմանադիծի մը վրայ, որ կը սկսէր Տայքէն մինչեւ Կիլիկիա կամ Սեւ ծովու հարաւ-արեւելեան ծայրէն՝ Պաթումէն մինչեւ Իսկենտէրունի ծոց, հետեւելով լեռնաշղթաներու եւ գետահովիտներու, անցնելով Հայաստանի մէջէն<sup>1</sup>: Այս սահմանադիծին մէկ մասն էր Եփրատի հովիտին այն մասը, ուր էր նաեւ Մալաթիա, որ իբր կարեւոր կամրջադուռ թիւզանդ-արաբական գօտեմարտին ամենէն կարեւոր հանդիսավայրերէն մէկը եղած է, եւ քանի՜, քանի անգամներ առնուած-տրուած է, սակայն կանուխէն Իսլամներու ենթարկուած քաղաքներէն մէկը եղած եւ մինչեւ ցարդ մնացած է մահմետական իշխանութիւններու տիրապետութեան տակ<sup>2</sup>:

(1) Նշանակելի է որ Միջագետքի արաբ ղինուորական հրամանատարութիւնը կը տարածուէր Մարաշէն Կամախ՝ անցնելով Մալաթիայէն (տես Laurent, L'Arménie entre Byzance et l'Islam, էջ 10 եւ 244):

(2) Մալաթիոյ պատմութեան իսլամական շրջանին համար իբր աղբիւր ունեցած եմ E. Honigmann-ի արժեքաւոր ուսումնասիրութիւնը՝ հրատարակուած Encyclopédie de l'Islam-ի Գ. հատորին մէջ (էջ 208-214): E. Honigmann մասնաւորապէս ԺԲ. եւ ԺԳ. դարերու խառնակ ժամանակամիջոցին համար ունեցած է գլխաւոր աղբիւր Մալաթիա ծնած երկու մեծ ասորի պատմաբաններու քրոնիկները: Ասոնցմէ առաջինն է Միքայէլ Ա. Պատրիարք (1126-1199), որդի Եղիաս երէցի, որ Մալաթիոյ Քինտանի կամ Գանդիտեան ընտանիքէն կը սերէր: Անոր գլխաւոր աղբիւրն էր Բգնատիոս (+ 1105), որ նոյնպէս Մալաթիոյ ասորի արքեպիսկոպոսն էր: Այս ստուար գործը թարգմանած է ֆրանսերէնի J. B. Chabot, Chronique de Michel le Syrien, Patriarche Yacobi d'Antioche (1126-1199), Editée pour la première fois et traduit en français par J. B. Chabot (1890-1906, Paris) եւ հրատարակած երեք հատորներով, ասորերէն բնագրին հետ: Այս գործին երկու տարբեր համառոտագրութիւնները թարգմանուած են հայերէնի եւ երկուքն ալ տպագրուած Երուսաղէմ. ԺԱՄԱՆԱԿԱԳՐՈՒԹԻՒՆ ՏԵԱՌՆ ՄԻԽԱՅԷԼԻ ԱՍՈՐԻՈՅ ՊԱՏՐԻԱՐԿԻ ՀԱՆԵԱԼ Ի ՀՆԱԳՈՅՆ ԳՐԶԱԳՐԷ, 1871: Հայերէն թարգմանութիւնները



Պատմութենէն յայտնի է որ արաբական առաջին յարձակումները արհամարհանքով դիտուած են բիւզանդական պետութեան կեդրոնին մէջ, բայց երբ 634-ին Բոսորան՝ հռոմէական Արաբիոյ գլխաւոր քաղաքը՝ Մահմետականներու ձեռքը ինկաւ, այն ատեն ցնցուեցաւ Բիւզանդիոն: Հերակլ կայսրը (610—641) անձամբ զնաց Անտիոք, բայց չկրցաւ կասեցնել Արաբները, որոնք անհաւատալի յաջողութիւններով կ'առաջանային դէպի Դամասկոս եւ բիւզանդական ամբողջ արեւելքը՝ Անտիոքն ալ մէջը ըլլալով, իրենց իշխանութեան կ'ենթարկէին:

Երբ Հերակլ մեռաւ (641 Փետր. 11), բիւզանդական կայսրութիւնը Ասիոյ մէջ միայն Փոքր Ասիան ունէր իր տիրապետութեան տակ:

Աներկբայ Մալաթիան եւ իր շրջակայքը առաջին անգամ գրաւուած պէտք է ըլլան այն շրջանին, երբ արաբական բանակները՝ Ասորիքի եռանդուն հրամանատարին՝ Մուավիէի հրամանատարութեամբ կ'արշաւէին բիւզանդական երկիրներ: Այսպէս Օմարի խալիֆայութեան (634—644) շրջանին՝ 641-ին Արաբները գրաւեցին Միջագետքը Իյատ Իպն Ղանըմ զօրավարին ձեռքով (ՊԵԼԼԱՏ ՀՈՐԻ, էջ 172—181) եւ առաջացան մինչեւ Հայաստան, իսկ միւս կողմէն 645-ին Մուավիէ մինչեւ Ամորիոմ (կամ Ամորիա, այժմ Համզա Հաճի ըստ ոմանց, կամ Սիվրի Հիսար՝ ըստ այլոց) արշաւեց: Այս միջոցին Մուավիէ պէտք է գրաւած ըլլայ նաեւ Մելիտինէն:

Մուավիէի այս յաղթական առաջացման հետեւանքով Անտիոքի եւ Տարսոնի միջեւ գտնուող բերդերը պարպած են Բիւզանդացիք եւ Մուավիէ ասոնց մէջ արաբ պահակազօրք զետեղած է որպէսզի մինչեւ իր դառնալը հոն մնան (ԱՊՈԻ ՍԱԼԵՀ):

Ըստ նշանաւոր արաբ աշխարհագիր Եագութի Ապու Սալէհ պատմած է թէ Մուավիէ 651-ին Միսիսի կողմերէն արշաւելով մինչեւ Տարավալիա հասած է եւ իր նահանջած կամ քաշուած պահուն այդ քաղաքին եւ Անտիոքի միջեւ գտնուող բոլոր բերդերը քանդած է (տես ԻՊՆ ԽԱԼԻՔԱՆ, Թրգ. Գէորգ Մըսրէան, էջ 338)՝ անշուշտ ի նախատեսութիւն ապագայի:

Այսպէս, Մահմետականներու տիրապետութեան կ'ենթարկուէր այս շրջանակը, որուն՝ ըստ Ապու Սալէհի՝ նշանակուեցան քաջ եւ ռազմագէտ

ԺԳ. դարուն կատարուած են:

Honigmann-ի երկրորդ աղբիւրն է Մաքրհեան Կրեկոր Ապու'Լ Պարաճ, յորջորջուած Բարհեբրէոս (Barhebraeus) (1226-1286), որուն հայրը, Ահարոն, հրեայ բժիշկ մըն էր, քրիստոնեայ մկրտուած: Ասիկա իր համաքաղաքացիները արգիլած է թաթարներուն առջեւէն աճապարանքով փախչելէ: Ապու'Լ Պարաճ ասորական եկեղեցական պատմութեան մէջ նշանաւոր դէմք մըն է:

E. Honigmann ձեռքի տակ ունեցած է նաեւ բազմաթիւ արաբ եւ եւրոպացի պատմագիրներու գործերը: Որոշ չափով օգտուած է նաեւ հայ աղբիւրներէ՝ անոնց Ժրանսերէն թարգմանութիւնները գործածելով:

Իր ուսումնասիրութիւններուն վրայ աւելցուցած է ուրիշ աղբիւրներէ առնուած զանազան տեղեկութիւններ, որոնք Մալաթիոյ Հայութեան կեանքը լուսաբանելու կը ծառայեն:



հրամանատարներ (տես նոյն) : Արաբ-բիւզանդական պայքարը այս հողամասին վրայ եւ շուրջ անընդհատ շարունակուեցաւ : Գրեթէ Արաբները ամէն տարի գարնան կանոնաւորաբար կը մտնէին բիւզանդական երկիրներ եւ ձմեռը ետ կը քաշուէին՝ մեծ աւարով :

Մուլաւիէ այս պարբերական յարձակումներուն միջոցին մեծ յաղթանակներ չաճած է բիւզանդացիներու դէմ Փոքր Ասիոյ մէջ եւ առաջացած նոյնիսկ մինչեւ բիւզանդիոնի պարիսպներուն տակ (653 Քր.ի) : Այս յարձակումներուն առաջին թիրախը Մալաթիան էր, զոր Արաբները գրաւեցին կանուխ, բայց յետոյ լքեցին մեծ տարածութեամբ երկիրներու հետ, երբ Օթման Իպն Աֆֆան խալիֆային (644—656) մահէն ետք Խալիֆայութեան ամբողջ շուրջ պայքար ծագեցաւ Սիւրիոյ հրամանատար՝ Մուլաւիէ Իպն Ապի Սուֆիայի եւ Ալի Իպն Ապի Թալլալի (Խալիֆա 656—661) միջեւ (տես վերը) : Կոստանս Բ. կայսրը (641—668) օգտուելով ասկէ՝ 658-ին ետ առաւ Մալաթիան եւ մինչեւ Արեւելեան Հայաստան առաջացաւ (տես վերը) :

Մուլաւիէ հարկադրուեցաւ ոչ միայն խաղաղութիւն կնքելու, այլ նաեւ յանձն առաւ տուրք վճարելու (Հ. Գելցեր, ՀԱՄԱՌՕՏՈՒԹԻՒՆ ԲԻԻԶԱՆԴԱԿԱՆ ԿԱՅՍՐՆԵՐԻ ՊԱՏՄՈՒԹԵԱՆ, Թրգ. Մեսրոպ Վրդ. Տ. Մովսէսեան, 1901 Վաղարշապատ, էջ 128) :

Խալիֆայութեան մայրաքաղաքը Դամասկոս հաստատուելէն եւ Մուլաւիէի Խալիֆայութիւնը ձեռք բերելէն, այսինքն 661-էն ետք, երբ ներքին խռովութիւնները վերջ գտան, սկսան վերստին արաբ-բիւզանդական պատերազմները :

Առաջին անգամ Հապիպ Իպն Մասլամա ալ Ֆեհրի Մալաթիայի դէմ շրկուեցաւ՝ Դ. Հայքի կառավարիչ Իյատ Իպն Ղանըմի կողմէ եւ գրաւեց քաղաքը, որ սակայն ետ առնուեցաւ բիւզանդացիներէն :

Երբ Մուլաւիէ Սիւրիոյ եւ Միջագետքի կուսակալ եղաւ, նորէն Մալաթիոյ վրայ շրկեց Հապիպ Իպն Մասլաման, որ 662-ին (Հիճրէթի 36-ին) գրաւեց քաղաքը յարձակումով եւ հոն իսլամ պահակազօրք ու կառավարիչ դրաւ (ՊԵՂԼԱՏՀՈՐԻ. տես Թրգ. ԲԱԶՄԱՎԷՊ, 1953, էջ 132 եւ Encyclopédie de l'Islam Գ., էջ 208) :

Մուլաւիէ ինքն ալ Մալաթիա գնաց Փոքր Ասիա արշաւած ատեն եւ քաղաքին կայազօրքին թիւը աւելցուց : Պելլատհորիի համաձայն Մուլաւիէ Մալաթիան «լեցուց Սիւրիոյ եւ Միջագետքի եւ ուրիշ ժողովուրդներով, եւ եղաւ ամառնային արշաւանքներու նամբայ» ընդդէմ Պիլատ-ալ-Ռումիի (Հոռոմ երկիր) եւ կարեւոր կայան մը զինուորական (տես ԲԱԶՄԱՎԷՊ, նոյն) :

Արաբները այս կամրջագլուխէն կ'անցնէին եւ առաւել կամ նուազ ընդարձակ հողամասեր ոտնակոխ կ'ընէին, կը կողոպտէին եւ աւարառութեան կ'ենթարկէին :

Պելլատհորի արաբ պատմիչը կը հաւաստէ թէ յետոյ Մալաթիոյ բնակիչները անկէ հեռացած են Ապտալլահ Իպն Ճոպէիրի ժամանակ (ԲԱԶՄԱ-



ՎէՊ, նոյն), գուցէ չկարենալով տոկալ քաղաքին պատերազմական վայր մը ըլլալուն: Այն ատեն է որ «Քրիստոնեայ Հայեր ու Նաբատացիներ» եկան քաղաքին մէջ բնակեցան (անդ):

Իսլամները Ապտալլահ Իպն Ապտըլ Մելիքի արշաւանքէն ետք, 702-ին կ'իջնեն Տարենտէ, որ Մալաթիայէն երեք օրուան հեռաւորութիւն ունէր եւ կից էր Պիլատ-ալ-Ռումիի եւ հոն կը կառուցանեն բնակարաններ, մինչ նոյն օրերուն՝ Մալաթիա աւերակ էր, մէջը մարդ չկար բացի ոչ-մահմետական Հայերէ եւ ուրիշներէ (ՊԵԼԼԱՏ ՀՈՐԻ, ԲԱԶՄԱՎԷՊ, նոյն 133): «Ամառ ատեն անոնց յառաջապահ գունդը կու գար, որ Միջագետքի զինուորներէն էր, եւ հոն կը բնակէին մինչեւ որ ամեն իջնէր ու ձիւնը գար: Եւ երբ ամենը գար, կը փաշուէին» (նոյն):

Այսպէս 668-ին եւ 673-ին, երկու անգամ մինչեւ Բիւզանդիոն առաջացան եւ Բիւզանդացիք մեծ դժուարութեամբ կարողացան պաշտպանել իրենց մայրաքաղաքը:

677-ին կնքուած Երեսնամեայ դաշինքը Բիւզանդացիք 690-ին խզելով Արաբները գրգռեցին: Ապտալլահ Իպն Ճոպէիր 683 եւ Ապտ էլ Մելիք Իպն Մրուան (685—705) խալիֆաներու կատարած յարձակումներուն ատեն Մալաթիոյ բնակիչները լքեցին քաղաքը, զոր Յոյները գրաւեցին եւ աւերեցին<sup>1</sup>:

Դամասկոսի Ումմեան Ապտէլ Մելիք Իպն Մրուան խալիֆային (685—705) բանակները 690-ին կրկին սկսան կռիւի Բիւզանդիոնի դէմ եւ Կապադովկիան վտանգի ենթարկեցին (Հ. Գելցեր, նոյն 141) եւ տեղաւորուեցան Կիլիկիոյ մէջ (նոյն, 144) եւ սկսան ազատօրէն արշաւել Փոքր Ասիա, իրենց բանակներուն գլխաւոր յենակէտերէն մէկը ընելով Մելիտինէի ռազմական դիրքը (տես Ա. Ալպոյաճեան, ՊԱՏՄ. ՀԱՅ ԿԵՍԱՐԻՈՅ, էջ 303—5):

Հերակլեան հայ տոհմին կայսրները, որոնք այնքան քաջութեամբ կը ոռւած էին նախ Պարսիկներու եւ յետոյ Արաբներու դէմ, բիւզանդական դահլիճը կորսնցուցին, Պերգամոնի հայ ազնուականներու զաղութէն (ՊԱՏՄ ՈՒԹ. ՀԱՅ ԳԱՂԹԱԿԱՆՈՒԹԵԱՆ, Ա., 178) Նիկեփոր Պատրիկին որդին՝ Փիլիպիկոս Վարդանէս կամ Վարդան Փիլիկ (Pilépieus կամ Philippius Bardanes) հայ յայտնի զինուորականին<sup>2</sup> ապստամբութեան եւ դահլիճը բռնի յափշտակելուն հետեւանքով (Brooks CMH, p. 420): Այս պատճառով բիւզանդական կայ-

(1) ENCYCLOPEDIE DE L'ISLAM, Գ. հատորը՝ E. I. համառոտագրութեամբ պիտի նշանակուի միշտ յաջորդ գլուխներուն մէջ: Անդ, էջ 248:

(2) Փիլիպիկոս Վարդան հայ զօրավարը, որ բիւզանդական կայսրութեան տիրապետութեան տակ գտնուող Քերսոն (արդի Քերչը՝ Ազախու ծովը Սեւ ծովուն միացնող նեղուցին վրայ) կը նստէր իբրեւ Բիւզանդիոնի ներկայացուցիչ, երբ ապստամբեցաւ, Խաղարներու օգնութեան դիմեց, անցաւ ապստամբներու գլուխը եւ նաւարկեց դէպի Պոլիս, զոր բարձարոս զօրքերով գրաւեց եւ կայսր հռչակուեցաւ (Գելցեր, էջ 164 եւ ՊՀԳ., Ա., էջ 260):



աըրութիւնը մատնուեցաւ աննախանձելի վիճակի մը, վասնզի Փիլիպիկոս թէեւ լաւ զօրավար, անընդունակ հանդիսացաւ երկիրը կառավարելու: Պուլկարները ասպատակային արշաւանքներով մինչեւ մայրաքաղաք առաջացան, իսկ Արաբները 712-ին՝ Ամասիան եւ Միսթեան եւ 713-ին Պիսիտիական Անտիոքը գրաւեցին (Գեղեցեր, նոյն 147):

Փիլիպիկոս փոխանակ իր ռազմական տաղանդը գործածելու Արաբներու դէմ եւ անոնց գրաւած հողերը ետ առնելու, կրօնական վէճերու խառնուեցաւ: Օրթոտոքս եկեղեցին վերանորոգելու մտայնութեամբ՝ Ջենոն կայսեր (474—491) նման փորձ մըն ալ ինքն ըրաւ, սահմանափակելով պատկերներու գործածութիւնը եկեղեցիներու մէջ (Paparizopoulo, *Histoire de la Civilisation Hellénique*, 1878, էջ 189), Փոքր Ասիոյ մէջ արդէն ժամանակէ մը ի վեր խմորուող պատկերամարտութեան չարժուժը կասեցնելու համար, ինչ որ չյաջողեցաւ, վասնզի քիչ յետոյ, Լեւոն Գ. Իսաւրացի կայսեր (717—741) ատեն պատկերամարտութիւնը ասեղ պոռթկումի մը տեղի տուաւ:

Փիլիպիկոս Հայերը սիրաշահելու համար միանգամ ընդմիջտ կորսուած Հայաստանը վերագրաւելու աշխատելու տեղ, Արաբներէն հալածուած եւ խոյս տուող Հայերուն բնակութեան տեղեր տուաւ 712-ին աւերակ դարձած Մելիտինէի շրջանակին եւ Դ. Հայքի մէջ (ԹէոփԱնէՍ, էջ 385, Գեղեցեր, նոյն 148, E. I. էջ 208) եւ Միակամութեան դաւանութիւնը ընդգրկեց, թերեւս Հայերը սիրաշահելու համար (Գեղեցեր 148):

Թէեւ մեր հայ պատմիչները կը հաւաստեն թէ հրամայած է որ Յոյները հայկական ծէսը ընդունին, սակայն օտար պատմիչներ տարբեր կերպով կը ներկայացնեն եւ չեն հաստատեր մեր պատմիչներու այս տեղեկութիւնը:

Brooks (CMH, Բ. հատոր, էջ 414), բիւզանդական պատմութեան ուսումնասիրողներէն մէկը, կ'ըսէ թէ «Փիլիպիկոս անծանօթ պատճառներէ մղուած Հայերը կայսրութենէն դուրս վնասեց եւ անոնք Արաբներու կողմէ Դ. Հայքի եւ Մելիտինէի նահանգին մէջ հաստատուեցան»<sup>1</sup>:

«Անծանօթ պատճառները» ուրիշ բան չէին կրնար ըլլալ եթէ ոչ Հայերուն բիւզանդական կայսրութեան սահմաններուն մէջ կրած կրօնական եւ քաղաքական հալածանքները: Կրօնականին պատճառը որոշ է թէ այն դաւանական տարբերութիւնն էր որ Հայերը ունէին Յոյներէն, իսկ քաղաքականը՝ ապահովարար դժգոհ Հայերուն՝ Արաբներու հետ գործակցութիւնն էր:

(1) J. Lamrent (էջ 197 եւ 207) նոյն համոզումը կը յայտնէ հիմնուելով Թէոփանէսի (382), Michel le Syrien-ի (Բ. 482) եւ Ապուլ Ծարաճի (*Chronicum Syriacum*, 121) վկայութիւններուն վրայ: Յայտնի չէ թէ ի՞նչպէս Հ. Գեղեցեր (148) Փիլիպիկոսի կը վերագրէ գրաւումը Դ. Հայոց՝ Մելիտինէ մայրաքաղաքով, եւ Լեցնելը այդ շրջանակը գողթական Հայերով: Ասոնց ալ իբր աղբիւր ցոյց կու տայ նաեւ դարձեալ Թէոփանէսը (585), որուն գրածը սա է. «711 Թուին Փիլիպիկոս կայսրը Հայաստանէն տարագրեալ Հայերը ստիպեց որ Մալաթիա եւ Դ. Հայոց երկիրները բնակին»:



(Michel le Syrien, Բ. 482) :

Փիլիպիկոսի գահակալութենէն սկսեալ Մելիտինէի երկիրին եւ Դ. Հայքի մէջ բնակեցուցուած հայ գաղթականները, արաբ էմիրներու բարեկամ դարձան, վասնզի Յոյները զանոնք հալածեցին :

Նոյնը կը հաստատէ Թէոփանէս՝ գրելով թէ «Հռոմայեցիք խելագարութիւնը իր կատարելութեան հասցուցին բոլոր ոչ-Օրթոտոքսներու դէմ իրենց ատելութեամբ» :

Այս հալածանքներուն պատճառով Հայերը բիւզանդական երկիրներէն հեռացան եւ հաստատուեցան արաբական երկիրներ, Մելիտինէի շրջակայքը, ուր եղան անկէ ետք Հռոմէներու կատաղի թշնամիները (Michel le Syrien, Բ. հտ., էջ 482 եւ J. Laurent, էջ 188) :

Փիլիպիկոս իր երկու տարուան (711—13) իշխանութեան միջոցին իր հաճոյքներուն համար վատնելէ ետք պետութեան գանձը, որ արաբական պատերազմներու մեծ ծախքերուն հետեւանքով արդէն իսկ դատարկացած էր (Գելցեր, էջ 156—7), Ռեսիկեան թեմի զինուորականներու ապստամբութեամբ գահընկէց եղաւ 713 Յունիս 3-ին (Ալպոյաճեան, ՊԱՏՄ. ՀԱՅ ԿԵՍԱՐԻՈՅ, էջ 395—6) :

Իր երկու յաջորդներու Անաստաս Բ. ի (713—715) եւ Թէոդոսիոս Գ. ի (715—7) խռովալից եւ անհաստատ իշխանութենէն ետք գահը գրաւեց Լեւոն Գ. Իսաւրացի (25 Մարտ 717—741), որ հերոսական քաջութեամբ մաքառեցաւ Արաբներու դէմ, սակայն չկրցաւ վճռական յաղթանակ մը չահիլ եւ Արաբները վանել Նիքիայէն անդին :

Սակայն Յոյները հոն չկրցան տոկալ եւ նահանջեցին : Այն ատեն Հայերը եւ «Նաբատացիները», այսինքն արամերէն խօսող գիւղացիները (Noldeke), զորս Փիլիպիկոս կայսրը վտարած էր իր պետութենէն, հաստատուեցան Մալաթիա եւ ամբողջ Դ. Հայքի մէջ (ՊԵԼԼԱՏ ՀՈՐԻ, էջ 185, Michel le Syrien Բ., էջ 482) :

Բնակիչներու թիւը աճեցաւ շատ մեծ համեմատութեամբ եւ Արաբները բնակիչներուն հետ (Հայերուն եւ Նաբատացիներուն) զինակցեցան Բիւզանդիոնի դէմ իրենց պայքարներու մէջ (Michel le Syrien, նոյն) :

Օմար Իպն Ապտիւլ Ազիզ Խալիֆան (717—720) Մալաթիա բերաւ Տարենտէի բնակիչները, ըստ Պելլատհորիի անոնց վրայ դիմելով, վասնզի վախնալով թշնամիներէն դուրս հանած էր զանոնք Տարենտէէն, որովհետեւ իրենց կամքին հակառակ հոն կը բնակէին :

Անոնք իրենց հետ տարին ինչ որ ունէին՝ առանց բան մը ձգելու, մինչեւ իսկ կոտորեցին քացախի եւ ձէթի ամանները :

Օմար Իպն Ապտիւլ Ազիզ Խալիֆան զանոնք իջեցուց Մալաթիա ու կործանեց Տարենտէն, իսկ Մալաթիոյ կուսակալ նշանակեց Ճաուանա Իպն ալ Զարիթ, Ամրը Իպն Սասաայի որդիներէն մին (E. I. էջ 208, ԲԱԶՄԱՎԷՊ, նոյն) :



Արաբներ օրէ օր աւելի սպառնական դարձան եւ շարունակեցին իրենց արշաւանքները: Այսպէս 726-ին Միւսլիմէ Իպն Ապտիւլ Մելիքի հրամանատարութեամբ առաջացան մինչեւ Կեսարիա եւ Նէոկեսարիա, 729-ին Սալիտ Իպն Հաշամի եւ 732-ին Սիւլէյման Իպն Հաշամի հրամանատարութեամբ կըրկին առին Կեսարիան եւ նոյնիսկ Ամասիան, եւ մինչեւ Նիկիա եւ Պափլագոնիա (= Գասթեմունի) առաջացան, անշուշտ Մելիտինէն իրենց ռազմական ունենալով, բայց չկրցան Փոքր Ասիոյ մէջ տեղաւորուիլ եւ ամրանալ (Արշակ Ալպոյաճեան, ՊԱՏՄ. ՀԱՅ ԿԵՍԱՐԻՈՅ, էջ 305):

740-ին Լեւոն Իսաւրացիի ժամանակ 20.000 յոյն զօրքով բիւզանդական բանակ մը Մալաթիոյ վրայ եկաւ եւ քաղաքին շրջակայքը աւերեց: Բնակիչները փակեցին իրենց դուռները եւ կիները երեւցան պատնէշին վրայ՝ իրենց գլուխները ծածկած գլխարկներով, եւ պատերազմեցան: Այն ատեն Մալաթիացիները պատգամաւոր ղրկեցին Հաշամ Իպն Ապտիւլ Մելիքին, որ կը գտնուէր Ռասսաֆայի<sup>1</sup> մէջ: Հաշամ կոչ ըրաւ ժողովուրդին Մալաթիա երթալու, բայց քիչ ետք իմացաւ որ Յոյները քաշուած էին անկէ: Հաշամ պատգամաւորները ետ ղրկեց հեծելազօրքերու ջոկատի մը հետ, որպէսզի պաշտպանեն քաղաքը, եւ յետոյ ինքն անձամբ արշաւեց դէպի Մալաթիա, բանակ դրաւ քաղաքին առջեւ, մինչեւ որ քաղաքը, զոր թշնամիները կործանած էին, վերաշինուեցաւ. (ՊԵԼԼԱՏ ՀՈՐԻ, Michel le Syrien Բ., էջ 506, ԹԷՈՓԱՆԷՍ, ԵԼԱՅԼ. E. I. 605):

Լեւոն Իսաւրացի սակայն վերջապէս Արաբները հարկադրեց որ քաշուին (Գեղցեր, ԲԻԻԶ. ԿԱՅՍՐ. ՊՏՄ. էջ 154 M. Ph. le Bas, Asie Mineure, էջ 532. ՊԱՏՄ. ՀԱՅ ԿԵՍԱՐԻՈՅ, էջ 305): Բիւզանդական պատմութեան այդ շատ յատկանշական շրջանին, ուր «անհաւատ»ներու դէմ պայքարը սաստկութեամբ կը շարունակուէր, Հայերու թիւը զգալապէս աւելցաւ բիւզանդական երկիրներու մէջ, վասնզի արաբական տիրապետութիւնը Հայաստանի մէջ որքան իր տնտեսական խիստ նշանակալից հետեւանքներով, նոյնքան նաեւ իր անհանդուրժելի բռնութիւններով, ստեղծած էր այնպիսի մտայնութիւն մը, որ հակառակ անոր որ Հայերը դառնացած էին Բիւզանդիոնի դէմ զիրենք անպաշտպան ձգած ըլլալուն համար, երբ անոր կողմէն պղտիկ յոյս մը կը տրուէր, կրկին Բիւզանդիոնի կը յարէին եւ արաբական լուծէ փրկուելու համար քրիստոնեայ Բիւզանդիոնի կը գործակցէին եւ գրեթէ միշտ լքուած եւ յուսախաբ, արաբական վրէժխնդրութեան սարսափովը դարձեալ նախամեծար կը համարէին Բիւզանդական երկիրներ ապաստանիլ:

Այսպէս Կոստանդին Ե. Կոպրոնիմոսի (741—775) ատեն Հայերը քաջալերուած անոր Արաբներու վրայ Փոքր Ասիոյ մէջ տարած մի քանի յաղթութիւններէն, փորձեցին ապստամբիլ: Գրիգոր Մամիկոնեան եղաւ գործին նախաձեռնարկը եւ միւս նախարարները ըմբոստանալ հրաւիրողը:

(1) ԱԼ-ՌՈՒՍԱՓԱ (Al-Rusafa = Resafa, Sergispolis), Բագդադի արեւմտեան կողմը:



Նախարարները առ հասարակ կը համաձայնին եւ կը հաղորդեն իրենց խորհուրդը Աշոտ Վասակեան Բագրատունի Պատրիկին, որ շատ կ'աշխատի զիրենք համոզելու, որպէսզի հրաժարին այդ գաղափարէն, սակայն չեն համոզուիր եւ իրեն ալ կը սպառնան: Վերջապէս Աշոտ եւ Գրիգոր համաձայնութեամբ ոստիկանը կը վանեն, ապստամբութիւն կը հռչակեն եւ Տայքի լեռները կ'ամրանան եւ Պոնտոսի բիւզանդական բանակին պաշտպանութեան կը վստահին 747-ին (ՂԵԻՈՆԴ, էջ 154):

Սակայն տարի մը չանցած Աշոտ մաս մը նախարարներով բաժնուած Բագրեւանդ կը մեկնի, իրեն սեպհական գաւառը, եւ նորէն Արաբներու հետ հաշտուելու մասին կը խորհի:

Գրիգոր կը պաշարէ Աշոտը եւ կը կալանաւորէ եւ կուրցնել կու տայ, իսկ ինք իբրեւ Հայոց իշխան, Կարին կ'երթայ եւ յաղթութեան աւետիսը կը տարածէ եւ կը հռչակէ Կոստանդին Կոպրոնիմոսի տիրապետութիւնը (748) Հայաստանի վրայ:

Գրիգոր շուտով կը մեռնի եւ իրեն կը յաջորդէ իր եղբայրը՝ Մուշեղ Մամիկոնեան, որ կարճ իշխանութիւն մը կ'ունենայ:

Հայերը — ինչպէս նաեւ Յոյները — որ օգտուած էին Ումմեանց եւ Աբբասեանց պայքարի պատճառով արաբ պետութեան մէջ ստեղծուած ներքին պառակտումներէ, չարաչար կը պատժուին, երբ Աբբասեանք յաղթական՝ միահեծան տէր կը դառնան արաբ պետութեան (750) եւ ապստամբ նահանգները խստութեամբ պատժելու կը ձեռնարկեն:

Հայաստան անօրինակ խստութեանց թատերավայր կ'ըլլայ երկու տարի (750—752):

Կոստանդին Ե. Կոպրոնիմոս (741—775) կայսրը նոր արշաւանքի մը կը ձեռնարկէ դէպի Հայաստան, ուր կրկին նպաստաւոր էր մթնոլորտը:

Կոստանդին 750-ին կ'երթայ Մալաթիա, որ Կամախի պէս այն օրերուն իսլամներուն ձեռքն էր, կառավարիչ ունենալով Պանի Սուլայմ ցեղէ մէկը:

Կամախի բնակիչները օգնութիւն խնդրեցին Մալաթիոյ բնակիչներէն, որոնք 800 ձիաւոր զրկեցին: Ասոնք յարձակում կրեցին յունական ձիաւորներէն եւ պարտուեցան, Բիւզանդացիք շարունակելով իրենց արշաւը բանակեցան Մալաթիոյ առջեւ եւ պաշարեցին զայն 751-ին (ՊԵԼԼՍՏՀՈՐԻ, եւ E. W. Brooks, CMH, Դ. 121):

Մալաթիացիները պատուիրակ զրկեցին Միջագետքի կառավարիչին եւ օգնութիւն խնդրեցին, բայց ան չկրցաւ օգնութեան հասնիլ Մալաթիոյ, վասնզի Միջագետք խառնակութեան մէջ էր: Այնպէս որ քաղաքը ստիպուեցաւ անձնատուր ըլլալ: Կայսրը կը պահանջէր որ բնակիչները իրենց շարժումն ըստացուածքներով հեռանան եւ պարպեն քաղաքը:

Նախ մերժեցին, բայց երբ սովի ենթարկուեցան, ստիպուեցան համակերպելով կայսեր հրամանին, հեռանալ իրենց բոլոր ունեցածներով եւ Մի-



Ջագետք (Ճեզիրէ) երթալ: Այն ատեն Կոստանդին Մալաթիան քարուքանդ ըրաւ E. W. Brooks CHM, Դ. 121) եւ միայն ցորենի կիսաւեր մթերանոց մը կանգուն ձգեց: Կոստանդին առաւ նաեւ Գլոտիասը<sup>1</sup> կամ Գլոտիոպոլիսը (Cladias = Glaudia, հին Գալաուտիա = Kalewdhija = Klaudias) և բնակիչները, ինչպէս Դ. Հայքի միւս բնակավայրերու բնակիչները, իբր գերի կը տանի բիւզանդական հողեր (ՊԵԼԼԱՏՀՈՐԻ, Michel le Syrien, Բ. հտ. 518 եւ այլ եւ այլ E. I. էջ 208):

Կայսրը կը ձախողի Արշամուշատի առջեւ, սակայն ինչպէս Մելիտինէն եւ Գլոտիասէն, նոյնպէս Դ. Հայքէն, բնակիչներ կը փոխադրէ բիւզանդական երկիրներ (J. Laurent 192 եւ 198):

Այս արշաւանքին միջոցին, Խուզան (Խուլիկ) անուն Հայր կը պաշարէ Կամախը, ուրկէ 750-ին Բիւզանդացիք փախած էին:

Կոստանդին Ե. կը յառաջանայ նաեւ մինչեւ Կարին եւ կը գրաւէ Հայաստանի սիրտին վրայ կանգնած այս ռազմական կարեւոր քաղաքը 752-ին (ՊՀԳ., Ա. 216) եւ աւարի կու տայ:

Բայց գիտնալով որ իր տիրապետութիւնը տեւական պիտի չկարենայ ըլլալ թէ՛ Կարինի եւ թէ՛ Մելիտինէի մէջ, հայ եւ ասորի բնակիչները իբրեւ պատերազմական գերի կը փոխադրէ Թրակիա (ԹԷՈՓԱՆԷՍ, 6247. Նիկեփոր 60), ուր արդէն վաղուց հաստատուած կային Հայեր (ՊՀԳ., Ա. 180), որոնց վրայ կ'աւելնային այս նոր գաղթականները (նոյն, Բ. 229 եւ 557): Մասնաւորապէս յիշուած է թէ Կարինի բերդապահ գունդը գերի տարուած եւ արաբ բնակիչները տեղահան եղած են, իսկ քաղաքը աւերուած է (Brooks նոյն, 122):

Հայ բնակիչներն ալ կամաւորապէս հետեւած են այս տեղահանեալներուն, վասնզի ըստ Ղեւոնդի (էջ 129) «Բագումֆ ի բնակչաց գաւառացն իւրնդրեալ արքայէն, զի գնացեն զկնի նորա: Եւ նորա տուեալ հրաման վաղվադակի հանդերձեալ գաղիս իւրեանց խաղային յառաջ...: Թողին գերկիրն ծընընդեան իւրեանց եւ հատուածեալք անկան ի կողմս արքայի բարեպաշտի»:

Ոչ միայն հասարակ ժողովուրդը, այլ նաեւ հայ նախարարներէն ոմանք «մերժեալք լինն զժառանգութիւնս իւրեանց եւ փախստեալ անկան յաշխարհն Յունաց, ապաւինեալք առ կայսրն Կոստանդին» (ՂԵՒՈՆԴ, գլ. ԼԲ.):

Կոստանդին Կոպրոնիմոս, որ շատ մը բիւզանդական կայսրերու պէս մոլեռանդութենէ տարուած էր, մասնաւոր կերպով ուշադրութիւն դարձուց Պաւլիկեաններուն վրայ, որոնց աղանդը արմատախիլ ընելու համար Հայաստանի արեւմտեան եփրատամերձ գաւառներէն, ուր էր այդ աղանդին կեդրոնը, մեծ բազմութիւն մը բռնի տեղափոխեց Պուլկարիա, եւ հոն հաստատեց թէ՛ զանոնք ձուլելու համար Օրթոտոքսներու հետ եւ թէ՛ զանոնք իբրեւ պատնէշ գործածելու համար Պուլկարներու եւ Սլաւոններու դէմ (տես Պրոֆ. Կոնիպէրի ԱՇԽԱՐՀԻ ԿՐՕՆԱԿԱՆ ԴՐՈՒԹԻՒՆՆԵՐԸ):

(\*) Այս քաղաքը կը գտնուէր Մալաթիոյ հարաւ-արեւմուտքը, Եփրատի եզերքը







ցաւ Խորասանի մէկ բանակին հետ քաղաքը պաշտպանելու համար թշնամիներուն դէմ: Նախկին բնակիչները, գէթ անոնք որ դեռ ողջ էին, Մալաթիա դարձան (E. I. Գ. 209):

Այսպէս Մալաթիա վերստին շէնցաւ, սակայն երկար խաղաղութիւն մը չվայելեց, վասնզի Բիւզանդացիներու եւ Արաբներու պայքարը կը շարունակուէր միշտ, Մալաթիան ունենալով իբրեւ գլխաւոր ռազմական կայան:

Արաբները անկէ կը սկսէին իրենց արշաւանքները: Անոնք Մալաթիայէն անցնելով կը մտնէին Կիլիկիա եւ Պամփիլիա, ուր Խալիֆային եղբայրը՝ Աբբաս 760-ին շահեցաւ Մելասի<sup>1</sup> ճակատամարտը (տես Arabic par Noël des Vergers, Paris 1817, էջ 363) ՀայկականԲանակաթեմի զօրավար (stretigus) Պողոսի դէմ, որ այս պատերազմին մէջ մեռաւ: Բանակը ունեցաւ ծանր կորուստներ եւ 42 գլխաւոր սպաներ գերի ինկան Արաբներու ձեռքը (Brooks CMH, Գ. 122):

Արաբները իրենց այս յաջողութիւնը կը պարտէին այն իրողութեան որ Կոստանդին Ե. Պուլկարներու հետ պատերազմի մէջ էր եւ չկրցաւ զբաղիլ Ասիոյ գործերով:

Կոպրոնիմոսի որդին Լեւոն Գ. (775—780) Արաբներու հետ շարունակեց կռիւները եւ Գերմանիկէի (Մարաշ) մօտ 778-ին շահած յաղթութեամբ, Ժամանակի մը համար կայսրութեան ասիական սահմանազլուխը ապահովեց:

Իր մահէն (780 Սեպտեմբեր 8) ետք իր անչափահաս զաւակին՝ Կոստանդին Զ.ի իբրեւ խնամակալ, կայսրութիւնը կառավարեց Իրենէ կայսրուհին, որ իմաստուն, բայց չափազանց փառասէր կին մըն էր:

Իր իշխանութեան ատեն շարունակուեցաւ Աբբասեաններու դէմ պատերազմը՝ իբրեւ թատերավայր ունենալով Փոքր Ասիան:

Պատերազմները Բիւզանդիոնի համար ձախող վախճան ունեցան եւ Իրենէ ստիպուեցաւ 783-ին եռամեայ զինադադար կնքել՝ տարեկան 70.000 ոսկի հարկ վճարել յանձն առնելով:

Հարուն էլ Ռաշիտ (786—809) օգտուելով այս զինադադարէն 783—786-ին շինեց շարք մը ամրութիւններ, որոնք յետոյ մեծ օգտակարութիւններ ունեցան արաբական բանակներուն (Գելցեր, նոյն, էջ 164):

Այս ամրութիւնները Մալաթիայէն մինչեւ Տարսոն կ'երկարէին եւ խիստ կը նպաստէին Արաբներուն, որոնք այս կերպով առաւելութիւններ կ'ունենային բիւզանդական բանակներու վրայ:

Այնպէս որ զինադադարին պայմանաթամբ լրանալուն, այսինքն 789-ին, երբ պատերազմը վերսկսաւ եւ Բիւզանդացիք փորձեցին դէպի Մալաթիա արշաւել, Հարուն ալ Ռաշիտ (786—809) յաջողեցաւ զանոնք ետ մղել (ՊելլԱՍՀՈՐԻ, էջ 185—8, ԲԱԶՄԱՎԷՊ, 1953, էջ 134):

(1) Մելաս կը գտնուէր Մալաթիոյ եւ Կեսարիոյ միջեւ (CMH, Գ., էջ 122):



790-ին Ալեքս Մուշեղի հրամանատարութեան տակ գտնուող զօրագուն-դին պահանջումով երբ Կոստանդին ինքնիշխան եւ առանց մօրը խնամակալութեան կառավարել սկսաւ, ինքն ալ մաքառեցաւ 790—792-ին Արաբներու դէմ՝ շատ քիչ անգամ յաջողելով:

792-ին մեծ սխալ մը գործեց կրկին գահակից առնելով իր մայրը, որ յաջողեցաւ զայն անժողովրդական դարձնել զանազան խարդաւանքներով (տես Գելցեր, նոյն, էջ 166):

Իրենէ կուրցուց իր որդին 15 Օգոստոս 797-ին եւ կրկին ինքը կառավարել սկսաւ Բիւզանդական Կայսրութիւնը եւ Արաբներու դէմ կռիւը շարունակեց, բայց պարտաւորուեցաւ նուաստացուցիչ պայմաններով խաղաղութիւնը գնել:

802-ին Իրենէ գահընկէց եղաւ եւ իր տեղը տուաւ ելեւմտից նախարար Նիկեփորի, որ իբրեւ կայսր (802—811)՝ պետութեան տնտեսական վիճակը բարւոքեց Իրենէի մսխող իշխանութենէն ետք: Ան հակառակ որոշ ընդդիմութիւններու՝ գործադրեց խիստ միջոցներ եւ նոյնիսկ եկեղեցական կալուածները տուրքի ենթարկեց:

Նիկեփոր դժբախտաբար ռազմական յաջողութիւններ չկրցաւ ձեռք բերել: Երբ անիկա չուղեց հարկ վճարել, Արաբները բիւզանդական երկիրներ մտան եւ յաղթեցին կայսերական բանակներուն եւ զրաւեցին սահմանին վրայ գտնուող կարգ մը բերդերը: Նիկեփոր 806-ին աւելի ստորնացուցիչ պայմաններով խաղաղութիւն կնքեց:

Բիւզանդական կայսրութիւնը տագնապի մէջ էր, վասնզի իր արեւելեան եւ արեւմտեան սահմանները վտանգի տակ էին արտաքին թշնամիներու յարձակման սպառնալիքին տակ ըլլալով, եւ կայսրութեան ներքին միութիւնը ամուր չէր, աղանդաւորական շարժումներու եւ զինուորական ըմբոստութիւններու հետեւանքով, եւ Բիւզանդիոնի վարիչները կարող չէին գոնէ ներքին պառակտումներու տեղի չտալու:

Մասնաւորապէս Պաղիկեաններու դէմ կը շարունակուէին հալածանքները Միքայէլ (Ռանգարէ) (811—813) եւ Լեւոն Հայկազն (813—820)՝ կայսրներու ատեն: Միքայէլ կայսրը 813-ին Պատրիարքին խորհուրդով ջնջել կ'աշխատէր Պաղիկեան եւ այլ աղանդաւորները Փռիւզիոյ եւ Լիկաւոնիոյ մէջ (ԹէոֆԱնէՍ):

Կայսեր հրամանը գործադրել կը յանձնարարուի Նէոկեսարիոյ Թովմաս եպիսկոպոսին եւ Փոքր Հայքի կառավարիչ Պարակոնդասին: Ասոնք այնքան անողոք խստութիւն մը ցոյց կու տան որ կը սպաննուին Պաղիկեաններու կողմէն 812-ին: Այս սպանութիւնները կատարելէ ետք Պաղիկեանները փախան Մալաթիոյ Մոնոքերարէ կամ Մանոքերարէս Էմիրին քով եւ անոր օժանդակութեամբ հաստատուեցան Արգաուս<sup>1</sup> կամ Արկաւուն եւ շարունակեցին

(1) Արգաուսը կամ Արկաւունը (=Արգաւն) այժմեան Արգովան է, որ կը գտնուի



երենց պայքարը Բիւզանդիոնի դէմ (Ս. Տ. Մելիք-Բախշեան, ՊԱԽԼԻԿԵԱՆ ՇԱՐԺՈՒՄԸ ՀԱՅԱՍՏԱՆՈՒՄ, 1953, Երեւան, էջ 172. Կարապետ Եպս. Տէր-Մկրտիչեան, ՊԱԽԼԻԿԵԱՆՔ, Երուսաղէմ, 1938, էջ 38) :

Անոնք տեղաւորուելով արաբական տիրապետութեան սահմաններուն մէջ կը վայելէին անոնց պաշտպանութիւնը եւ անոնց հետ դաշնակցելով կ'աւերէին Բիւզանդական երկիրները, մարդկային եւ նիւթական հսկայ վնասներ պատճառելով կայսրութեան : Անոնց նոր բնակավայրը գտնուելով Բիւզանդարաբական սահմանին վրայ, կը կազմէին ռազմական դօտի մը երկու ախոյեան պետութիւններու միջեւ : Անոնք պատրաստ էին միշտ կոուելու զիրենք ճնշողներուն դէմ, գլխաւորապէս Բիւզանդիոնի դէմ : Ուստի Արաբները, որոնց ամենէն լուրջ թշնամիները Բիւզանդացիք էին, Պաւլիկեաններու հետ բնական դաշնակիցներ եղան եւ անոնց բնակութեան տեղեր եւ արտօնութիւններ տուին :

Այս պառակտումէն զատ գահուն չուրջն ալ պայքար կար :

822-ին Թոմաս Ժեր զօրապետը կ'ապստամբէր Փոքր Ասիոյ մէջ եւ դրեթէ ամբողջ երկիրը կը գրաւէր եւ յարաբերութեան մէջ կը մտնէր Արաբներուն հետ, որոնք թոյլ կու տային որ Անտիոքի պատրիարքը զայն կայսր օծէր (Գելցեր, նոյն, էջ 178) : Արաբները ասով կը ջանային Բիւզանդական Կայսրութիւնը ներքին քաղաքային պատերազմով տկարացնել :

Բիւզանդիոն 824-ին այս վտանգը կրցաւ դիմագրաւել Թոմասը մէջտեղէն վերցնելով :

Բիւզանդական կայսրութեան այս տագնապի չրջանին Արաբները չղադրեցուցին կռիւր : Էլ-Մամուն (813—838) Խալիֆայի որդին, Աբբաս, Ճեզիրէի (Միջագետք) կառավարիչի հանգամանքով, քալեց Բիւզանդացիներուն դէմ՝ Մալաթիան խարխալ ընելով (Weil, նոյն, Բ., էջ 289) :

Յաջորդ Խալիֆային Մուլթասիմի (833—842) իշխանութեան ժամանակ ալ նոյնպէս Տարսոն-Մարաշ-Մելիտինէ գիծին վրայ դրեթէ շարունակ կռիւ կար, փոփոխական յաջողութիւններով, որոնց մանրամասնութիւններուն մէջ մտնել աւելորդ կը նկատեմ (տես ՊԱՏՄ. ՀԱՅ ԿԵՍԱՐԻՈՅ, էջ 306), միայն դիտել կու տամ թէ Թէոփիլոս կայսեր (829—842) ատեն եւ աւելի առաջ Փոքր Հայք արդէն մեծ մասամբ Բիւզանդական տիրապետութենէն կորզուած եւ արաբական իշխանութեան ենթարկուած էր :

Արաբները հոն զինուորական իշխանութիւն մը հաստատած էին (ՊԱՏՄ. ՍԵՖԱՍՏԻՈՅ, էջ 109) կամ ինչպէս թէ՛ Բիւզանդացիներու եւ թէ՛ Արաբներու համար սովորութիւն էր, հոն հաստատած էին սահմանապահ կուսակալութիւն մը, որ բաւական անկախ դիրք մը ունէր : Այս իշխանութեան

Մալաթիայէն մօտաւորապէս 40 ԳՄ. դէպի հիւսիս՝ ըստ Ա. Վասիլիեւի : Մուշեղ Սեբեդեան (ՈՍԿԵԳԵՏԱԿ, Գ., էջ 12) կը կարծէ թէ Արկաւուն ամրոցը Արաբկիրի մօտն է (հմմտ. Ալպոյ., ՊԱՏՄՈՒԹԻՒՆ ՀԱՅ ԳԱՂԹԱԿԱՆՈՒԹԵԱՆ, Ա., 270) : Իսկ Ստ. Տ. Մելիք-Բախշեան (ՊԱԽԼԻԿԵԱՆ ՇԱՐԺՈՒՄԸ ՀԱՅԱՍՏԱՆՈՒՄ, էջ 190) զայն կը նոյնացնէ Արկա = Արգայի հետ, հիմա Աղճատաղ, Մալաթիոյ արեւմտեան կողմը :



գլուխը դրած էին էմիր մը, որուն նստոցը յետոյ փոխադրուեցաւ Մալաթիա:

Բիւզանդական կայսրութեան ներկայացուցած քայքայուն վիճակէն օգտուելով Արաբները եթէ չկրցան վճռական հարուած մը տալ, պատճառը այն էր որ անոնց երկիրն ալ խառնակութիւններու ենթարկուած էր:

Այս շփոթութիւններուն մէջ ամենէն նշանաւորն էր Բաբելի յարուցած տնտեսական յեղափոխութիւնը, որ կը յիշեցնէ արդի համայնավարութիւնը:

Այս տագնապէն օգտուելով 837-ին (222 Հիճրէթի) ամառը, Թէոփիլոս կայսրը (829—842) արշաւեց Հայաստան, ճամբու վրայ գրաւելով Սամոսատը, եւ կործանելով Զապետրան (=Սողոպետրա), որ Խալիֆային ծննդավայրն էր: Այս արշաւանքէն վերադարձին կայսրը մտաւ Մալաթիոյ սահմանները, գրաւեց քաղաքը, քայքայեց ամրութիւնները եւ յոյն ու հայ բնակիչները փոխադրեց Կ. Պոլիս (ՊԱՏՄ. ՍԵՖԱՍՏԻՈՅ, էջ 395)<sup>1</sup>:

Միայն խնայեց բուն քաղաքին, զոր իրեն յանձնեցին քաղաքին մէջ գտնուող բիւզանդացի զերինները՝ վախնալով թշնամի բանակէ մը, որ կը մօտենար:

Դէպի յաջորդ տարուան վերջերը (838) Մուլթասիմ Խալիֆան սահմանապահ էմիր Ապու Սայիտ Մէհմէտ Իպն Եուսուֆը մեծ ոյժերով ղրկեց Փոքր Ասիա Բիւզանդացիներուն դէմ: Ասիկա կործանեց կայսերական տոհմին օրօրանը եւ պետութեան մեծ ամրոցը՝ Ամորիումը, զարհուրելի վրէժխնդրութիւն մը ցոյց տալով:

Այս մեծ ճակատամարտին, զոր Մուլթասիմի մեծ բանակը շահեցաւ Յոյներու Թէոփիլոս կայսեր դէմ՝ Dazimen-ի ամրոցին (=Եւդոկիոյ) մօտ (E. I. Գ. 209), մասնակցեցան Մալաթիոյ բնակիչները, Աֆշինի եւ Արաբներու Փոքր Հայքի մէջ հաստատած զինուորական իշխանութեան պետը՝ էմիր Սաուտի որդին Ուաթէքի հրամանատարութեան տակ գտնուող Հայերու եւ 10.000 Թուրքերու օգնութեամբ յաղթեցին:

Ուաթէքի յաջորդեց Օմար, որ Փոքր Հայքի էմիր նշանակուելէն ետք, նստած է Մալաթիա եւ հպատակելով Խալիֆային, արաբ բանակներու հետ բազմաթիւ կռիւներու մասնակցած է Բիւզանդիոնի դէմ (Անդրէաս Վ. Աղեքսանդրեան, ՊԱՏՄ. ՍԵՖԱՍՏԻՈՅ, 1911, Վենետիկ, էջ 109):

Բիւզանդացիք Ամորիումի աղէտէն ետք, պարտուած վերստին խաղաղութիւն կնքեցին, պատերազմի ծախքերը վճարելով՝ իբր տուգանք: Սակայն Բիւզանդացիները 841-ին գրաւեցին Al-Hadath -ը<sup>2</sup>, Մարաշը եւ Մա-

(1) Michel le Syrien Գ. 89. Էւ Մասուտեմի, Էթ-Թասուրի, Եագութ եւ ուրիշ արաբ պատմագէտներ սխալմամբ այս արշաւանքը կը դնեն 838-ին: Այս կարծիքին համաձայն չեն (Weil Բ. 310), Bury (History of the Eastern Roman Empire, 1912, էջ 260), Markwart (Հ. Ա. 1914, էջ 44):

(2) Al Hadath-ի (բիւզանդական Adata-ի) տեղը չէ ճշդուած, սակայն կասկած չկայ թէ կը պաշտպանէր այն կիրճը, որ Մարաշէն (Գերմանիկէ) Al Bactar (Arabisius = Արաբիսոս) կ'երթար եւ կը գտնուէր այժմեան Ագ-Սուի տփերուն վրայ (տես, Le



լաթիոյ շրջանը (Michel le Syrien Գ. 102) :

Թէոդորա հայ կայսրուհին, որ իբր խնամակալ կայսրութիւնը կառավարել սկսաւ իր որդւոյն Միքայէլ Գ. Արբշիտի կամ Հարբեցողի (842—867) անչափահասութեան պատճառով, ցոյց տուաւ նախանձելի կարողութիւն մը, սակայն մեծ սխալ մը գործեց 843—844-ին Պաւղիկեանները, որոնք դէպի Թ. դարուն կէսերը մեծ մասամբ հաստատուած էին Մալաթիոյ արեւմուտքը եւ հիւսիսը՝ Եփրատի ձորին մէջ, Կողոնիա<sup>1</sup> եւ Մելիտինէ քաղաքներուն միջեւ, եւ որոնք իսլամներու դէմ սահմանադրութիւն աշխոյժ ու գործօն ամբողջութիւնը կը հանդիսանային, հալածելով եւ պատճառ ըլլալով որ անոնք ապստամբին Բիւզանդիոնի դէմ : Մալաթիոյ էմիր Օմար Իպն Ապտալլահ Ալ-Ազթա զանոնք պաշտպանեց զիրենք հետապնդողներուն դէմ (E. I. Գ., 209) :

Բիւզանդական զօրքերը Թէոկտիստի հրամանատարութեամբ առաջացան դէպի արեւելք՝ Մելիտինէի Արարներուն վրայ, որոնք մտած էին Բիւզանդական կայսրութեան սահմանը, զանոնք ետ մղելու եւ ապա Պաւղիկեանները բնաջնջելու համար :

Առաջին բախման իսկ Կեսարիոյ հիւսիսը Մաւրոպոտամոնի<sup>2</sup> (Սեւ Զուր) ճակատամարտին մէջ, բիւզանդական բանակը բոլորովին ջախջախուեցաւ եւ 40.000 Յոյներ լքուեցան բախտի քմահաճոյքին, հազարաւորներ անոնցմէ գերի ինկան եւ կրօնափոխ եղան, եւ Թէոկտիստ փախաւ (843-ին) :

Թէոդորա սակայն չդադրեցուց Պաւղիկեանց դէմ հալածանքը. «Արեւելի մէջ Պաւղիկեանները ուղիղ հաւատքի բերելու եւ կամ արմատախիլ ընելու եւ մնացեալները հեռացնելու աշխատեցաւ : Անիկա մեր երկրին շատ աղէտներ պատճառեց : Որովհետեւ զրկեց մագիստրոսներէն մէկ քանին : Անոնք ոմանք խաչեցին փայտի վրայ, միւսները սրախողխող ըրին կամ նետեցին ծովուն անդունդը : Այդպէս, ինչպէս կը հաշուուի, գոհուեցան 100.000 մարդեր : Անոնց հարստութիւնը տարուեցաւ եւ յանձնուեցաւ կայսերական գանձուն» (Թէոֆանէս ՇԱՐԱՅԱՐԵԱԼ) :

Թէոդորա մաքառեցաւ նաեւ Պատկերամարտներու դէմ, որոնք գրեթէ համախոհներ էին Պաւղիկեաններու :

Եկեղեցին Թէոդորան սուրբերու դասը անցուց՝ Յունադաւանութեան պաշտպանութեան համար ըրած կատաղի եւ արիւնոուշտ պայքարին համար, որ սակայն ապարդիւն եղաւ, վասնզի Պաւղիկեանները նոյնիսկ այդ օրերուն համախմբուեցան ուրիշ աւելի տաղանդաւոր առաջնորդի մը՝ Կարբէասի շուրջը :

Strange, The lands of the Eastern Caliphate, էջ 122) :

(1) Կողոնիա = Կոլոնիա, հիմա Քէօյլիւ Հիւար. կը գտնուի Լիկոսի եզերքը, Նէոկեսարիոյ հարաւ-արեւելքը : Հին ատեն ամբողջ մըն էր. Պոմպէոս Պոնտոսը նուաճելէ ետք այդ ամբողջը վերածեց քաղաքի եւ կոչեց Կողոնիա (Գոլոնիա) :

(3) Ալիս գետի հովիտին մէջ :



Կարբէաս Անատոլեան թեմի կուսակալ Թէոդոս Մելիսէնի գրադիրն էր, որ վերջին կոտորածներու ժամանակ կը գտնուէր բիւզանդական բանակին մէջ եւ ունէր սպայի աստիճան:

Անիկա լսելով որ Պաւղիկեաններու հալածանքի զոհ եղած էր նաեւ իր ծերունի հայրը, վրէժխնդրութեամբ լեցուած իր շուրջ հաւաքեց 5000-ի մօտ մարդեր եւ անցաւ Մելիտինէի Էմիր Օմար Իպն Ապտալլահ ալ-Ադթայի կողմը՝ անոր հետ պայքարելու համար բիւզանդացի հալածիչներու դէմ:

Մելիտինէի Էմիրը ուրախութեամբ զայն ընդունեցաւ եւ ղրկեց Սալիֆային, որ անոր բնակութեան տեղ շնորհեց Արկաւուն եւ Ամարա՝ քաղաքները: Արաբներու ցոյց տուած այս ջերմ ընդունելութիւնը կը բացատրուէր այն բանով, որ Արաբները յատկապէս Թ. դարու կէսերուն անհրաժեշտ պէտք ունէին մարտունակ մարդերու՝ դիմակալելու համար Բիւզանդացիներու դէպի արեւելք յառաջացումը, եւ Պաւղիկեանները ճիշդ փնտռուած մարդիկն էին եւ ասոր համար շատ գնահատուած Արաբներէն, ինչպէս կը վկայէ Գոտամա արաբ պատմիչը (հմմտ. Ստ. Տ. Մելիք-Բախշեան, ՊԱԽԼԻԿԵԱՆ ՇԱՐԺՈՒՄԸ ՀԱՅԱՍՏԱՆՈՒՄ, էջ 174—7):

Ըստ Թէոփանէս Շարայարեալի (էջ 103) Պաւղիկեանք այս երկու քաղաքները չինելէ ետք՝ 885-ին չինած են երրորդ քաղաք մը՝ Տիփրիկէն (Տիւրիկ), (Կարապետ Եպս. Տէր Մկրտչեան, էջ 53) Կողոնիոյ թեմին սահմաններուն մօտ, Եփրատի միջին ընթացքի վրայ՝ աջ եզերքէն քիչ մը արեւմուտք, շատ ամուր դիրքի մը վրայ: Ոմանք կ'ըսեն թէ Պաւղիկեանք հիմնած են նաեւ Արաբկիրը (որ կրնայ շփոթուած ըլլալ Ամարայի հետ) եւ Կիւրինը (որ նոյնպէս անհաւանական չէ որ շփոթուած ըլլայ Արկաւունի ամրոցին հետ):

Պաւղիկեանք իրենց հիմնարկած այս քաղաքներէն դուրս հաւանօրէն մեծ թիւով կ'ապրէին նաեւ Մելիտինէ, որ Պաւղիկեանց գլխաւոր բնակավայրերուն մօտ՝ Արաբներու կողմէ կազմուած սահմանապահ էմիրութեան մը մայրաքաղաքն էր, ինչպէս տեսնուեցաւ, եւ Սալիֆան հրամայած էր Մելիտինէի Էմիրին՝ ամէն աջակցութիւն եւ օգնութիւն ընծայել Պաւղիկեաններուն:

Տարագրեալ հերձուածողներուն այս բաց եւ անպաշտպան ապաստանը չուտով անբաւական եղաւ:

Պաւղիկեանք միացան Արաբներուն, սարսափ սփռեցին Բիւզանդիոնի ասիական բոլոր նահանգներուն մէջ, իրենց հալածիչները սպաննելով եւ հրո-

(1) Ամարա կամ Սւորա ըստ A. A. Vasilief-ի (BYZANCE ET LES ARABES, Բ. 31) կը գտնուէր Արկաւունի հիւսիսը, իսկ ըստ V. Guinet-ի՝ արդի Էմիրքէօյի տեղը: Պաւղիկեաններէն բնակուած գլխաւոր քաղաքներէն մէկն էր (Laurent, L'Arménie entre Byzance et l'Islam, էջ 251, ԿԵՆԴՐԻՆՈՍ Բ. 154, ԹԷՈՓԱՆԷՍ, ՀԱՅ-ԿԵՍԱՐԻԱ, էջ 432), Թոքմա Սուրի մէջ Թափող Պաւղկը-Սուրի հետ միացման տեղւոյն վրայ՝ Կիւրինի եւ Մանճըլըգի մօտերը:



սակային արչաւանքներ կատարելով :

Օմար ալ Աղթա, Մելիտինէի էմիրը, որ պաշտօն ունէր ամէն կերպով օգնելու այս աղանդաւորներուն, անոնց օգնութեամբ աւերեց Կապադովկիան եւ Պոնտոսը եւ առաջացաւ մինչեւ Բիւթանիա (Le Beau, L'Histoire du Bas Empire, հտ. ԺԳ., էջ 180) եւ առաւ հաղարաւոր գերիներ (M. Ph. le Bas, Asie Mineure, էջ 506—507) :

Պաւղիկեանք այդ սահմանադիւլիսէն, ուր հաստատուած էին, արձա- կազէնի յաջող կռիւներով նշանաւոր հանդիսացան : Անոնք Տիւրիկը կայան մը դարձուցին ասպատակութեան եւ սկսան աւազակային արչաւանքներու, ի- րենց գլուխը ունենալով Կարբէասը, որ յաջող յարձակողականները գործա- դրեց (Գելցեր, նոյն, 183) :

Պաւղիկեանք՝ այսպէս բռնութեան եւ հալածանքի հետեւանօք նետուած դրացի մահմետական պետութեան գիրկը, դադրեցան բնական պատուար ըլ- լալէ Արաբներուն դէմ եւ դարձան անոնց դաշնակից եւ մեծ հարուածներ տուին բիւզանդական կայսրութեան :

855-ին Կարբէաս Տարօնի Արաբ էմիր Ալի Էսլն Եահիա էլ Արմանիի հետ յարձակեցաւ բիւզանդական երկիրներուն վրայ :

Յաջորդ տարին, 856-ին, Բիւզանդիոն Պաւղիկեաններու դէմ կանոնա-ւոր բանակ մը ղրկեց Պետրոնասի հրամանատարութեամբ : Արաբները եւ Պաւ-ղիկեանք տեսնելով թշնամիին գերակշիռ ոյժը, ետ քաշուեցան եւ Բիւզանդա-ցիք 857-ին գարնան գրեթէ անարգել մտան Սամոսատի եւ Ամիթի շրջանները եւ յետոյ գացին Տիւրիկի վրայ, զոր չկրցան գրաւել եւ ետ դարձան : Այս ա-տեն Պաւղիկեանները եւ Արաբները սկսան հետապնդել բիւզանդական բանա-կը, որուն սակայն չհասան (Էթ-Թապարի) :

856—857-ի բիւզանդական արչաւանքը, ինչպէս կը տեսնուի, ունէր ա-ւազակային բնոյթ եւ նպատակ՝ թալանելու եւ աւերելու Փոքր-Հայքի եւ հիւսիսային Միջագետքի շրջանները եւ ահաբեկել բնակիչները :

Բայց Պաւղիկեանք կը մնային եւ կ'աւերէին անընդհատ, կը նեղէին բիւզանդական կայսրութիւնը՝ անվհատ եւ շարունակ կռիւ մղելով :

Միքայէլ Գ. կայսրը (859—867) որոշեց միանգամ ընդ միշտ վերջ տալ Արեւելքի մէջ տիրող այս անհանդարտ վիճակին եւ 859-ին, Արաբներու եւ Պաւղիկեաններու հետ գերիներու փոխանակութեան համար բանակցած պա-հուն իսկ, նենգութեամբ յարձակեցաւ անոնց վրայ :

Միքայէլ կայսրը ինք անձամբ կը վարէր այս արչաւանքը : Կայսերա-կան զօրքերը յառաջացան մինչեւ Եփրատ եւ պաշարեցին Սամոսատ քաղաքը (859) (Ն. Ադոնց, ՊԱՏՄԱԿԱՆ ՈՒՍՈՒՄՆԱՍԻՐՈՒԹԻՒՆՆԵՐ, 1948, Պարիս, էջ 321) : Արաբները երեք օր ետք դէպի դուրս անակնկալ յարձակումով մը պարտութեան մատնեցին բիւզանդական զօրքը եւ Միքայէլ կայսրը հազիւ կրցաւ ճողոպրիլ, իր վրանը եւ ինչքը յաղթական թշնամիին աւար ձգելով (ԿԵՆԴՐԻՆՈՍ, էջ 91, ԹԵՈՓԱՆԷՍ Շար., էջ 176, Ն. Ադոնց, նոյն, 321) :



Երկու տարի ետք, 861-ին, Օմար դարձեալ ասպատակեց 30,000 զօրքով: Վարդ, որ ամենայն ինչ էր Միքայէլ կայսեր իշխանութեան ատեն կիւրապաղատի աստիճանով, հաւաքեց Թրակիայէն, Մակեդոնիայէն եւ ասիական թեմերէն 40,000 զօրք եւ կազմեց բանակ մը եւ գնաց Թշնամիին դէմ:

Մելիտինէի էմիրը Սերաստիոյ գիծով կ'երթար դէպի ծովեզերք Ամիսոսի (Սամսոն) շրջանը: Վարդ, անոր ընթացքը կասեցնելու համար, բանակեցաւ Դադիմոնի (Թոգատ) մօտ, Կելլարիոն կոչուած դաշտը: Շուտով հասաւ նաեւ Օմարի բանակը եւ դիրք բռնեց Դադիմոնէն դէպի արեւմուտք Զիլա քաղաքին մօտ, Խոնարիոն ըսուած վայրը: Ճակատամարտին մէջ կայսրը պարտուեցաւ եւ մազ մնաց որ Արաբներուն ձեռքը գերի իյնար, եթէ Վարդ Մամիկոնեան դիւցազնաբար զայն չփրկէր<sup>1</sup>:

Երկու տարի ետք (863) Բիւզանդիոնի յամառ Թշնամի Օմար, իր հետը ունենալով կայսրութեան անհաշտ Թշնամի Պաւղիկեանները, 40,000 զինուորով մտաւ Արմենեակ թեմը եւ հասաւ մինչեւ Ամիսոսի (Սամսոն) ծովեզերքը, ուր իբր նոր Քսերքսէս հրամայեց ծեծել ջուրը, որ յանդգնած էր կասեցնել իր արշաւը, որ շատ սուղ արժեց Կապադովկիոյ, Պոնտոսի եւ Կիլիկիոյ, որոնք ամայի անապատի վերածուեցան. Փոքր Ասիան, աւերուեցաւ: Օմար իր այս աղիտաբեր արշաւին ատեն առաւ 60,000 գերիներ, զորս հետը տարաւ: Օմար նաեւ մեծ աւար ձեռք բերաւ:

Այսպէս քանի մը տարի տեւեց կռիւը, մերթ յաղթութեամբ եւ մերթ պարտութեամբ (Weil, նոյն, Բ., էջ 362—65 եւ E. I. Գ., էջ 209):

Վերջապէս Արաբները պարտուեցան Պոսոն կամ Պոսոնտա<sup>2</sup> քաղաքին մօտ՝ Պետրոնասէն, որ Թէոդորա կայսրուհիին կրտսեր եղբայրը եւ «սքոլարներու դոմեստիկ» էր (պալատական կանոնաւոր եւ հեծեալ զուգերու զօրապետ): Օմար սպաննուեցաւ եւ իր որդին գերի ինկաւ Բիւզանդացւոյ ձեռքը (863 Սեպտ. 3) (տես Ն. Ադոնց, ՊԱՏ. ՈՒՍՈՒՄՆԱՍԻՐՈՒԹԻԻՆՆԵՐ, էջ 324)<sup>3</sup>: Պետրոնաս ճարտար ռազմավարութեամբ մը Արաբները պաշարեց եւ

(1) Բիւզանդացի պատմիչներ կայսրը փրկելու պատիւը Մանուէլ Մամիկոնեանի կու տան, սակայն Ն. Ադոնց կը փաստէ թէ Վարդն է կայսեր ազատարարը (ՊԱՏՄ. ՈՒՍՈՒՄՆԱՍԻՐՈՒԹԻԻՆՆԵՐ, էջ 325-8):

(2) Այս քաղաքին տեղը ճշգրտած չէ (ՀԱՅ ԿԵՍԱՐԻԱ, էջ 208): Ըստ Ադոնցի՝ կը գտնուէր Արմենեակ թեմի եւ Պափլագոնիոյ սահմանին վրայ (ՊԱՏՄ. ՈՒՍՈՒՄ., էջ 323) Ալիսի ձախ եզերքը (նոյն):

(3) E. I. (էջ 209) տարբեր կերպով կը պատմէ: Ըստ այդ պատմութեան՝ Օմար աւ-Ագթայի բանակը Փոքր Ասիոյ մէջ արշաւանքի մը ատեն 865-ին Բաճապ ամսուն ամբողջովին փճացաւ Մարճ աւ Ուսգուֆի մէջ (Մարճ աւ Ուսգուֆ կը նշանակէ «եպիսկոպոսին դաշտը» եւ Podandos = Պոզանթիի արեւմտեան կողմը կը գտնուէր [Le Strange, Eastern Caliphate, էջ 138]) քաջասիրտ Պետրոնասի կողմէ, որ Միքայէլ Գ. կայսեր սպարապետն էր (Weil, Բ. 380, Thannercheck, Saoun, էջ 23):



Օմարը երկաթէ օղակի մէջ առաւ : Օմար, զառագեղի մէջ փակուած գազանի մը պէս, ուրիշ ճար չգտաւ եթէ ոչ չափուիլ իր ոյժերով անոր հետ : Փորձեց, եւ շուտով համոզուեցաւ որ անհնար էր խզել իր բանակը շրջապատող շղթան եւ սուրը ձեռքը իյնալ նախընտրեց :

Այդ ճակատամարտին մէջ ինկան նաեւ Պաւղիկեան պետ՝ Կարբէաս եւ Տարօնի էմիր (կամ Կիլիկիոյ կուսակալ) Ալի Իպն Եահիա էլ-Արմէնի — հայ ջորավարը արաբական բանակին (նոյն եւ J. Laurent, *L'Arménie entre Byzance et l'Islam*, էջ 363 եւ ՊՀԳ. Ա. 278)<sup>1</sup> : Ան դաշնակցելով Մելիտինէի էմիր՝ Օմար Իպն Ապտ Ալլահ ալ-Ազթայի հետ, օգնած էր Պաւղիկեանց պետին՝ Կարբէասի (Ն. Ադոնց. *Les fonds historiques de l'épopée Byzantine Degenis Akritas*, Byzantinische Zeitschrift XXIX 209) :

863 Սեպտ. 3-ի յաղթութենէն ետք բիւզանդական բանակը յառաջացաւ եւ մտաւ արաբական հողերը (863 Հոկտ. 18 — Նոյեմ. 16 Ռամազան ամսուան միջոցին, Պրոֆ. Ն. Ադոնց, նոյն, էջ 330) :

Պոսոնի յաղթանակը պատմական մեծ դէպք մըն էր, քանզի զինուորական երկարատեւ եւ փոփոխական մրցութենէ մը ետք, առաջին անգամ էր որ բիւզանդական զէնքը կը փայլէր գերիվերոյ ռազմական ոյժի եւ մանաւանդ արուեստի առաւելութեամբ :

Պետրոնաս կրցաւ ահեղ հարուած մը տալ արաբ բանակին եւ զայն սաստիկ ջարդել :

Այս յաղթութեամբ երկար ատեն ապահովուեցաւ արեւելքի խաղաղութիւնը (Գէորգ Մոնախօս Միայնակեաց, 825) :

Օմարի մահէն ետք Մալաթիոյ նոր էմիրին զինակցեցաւ Պաւղիկեանց նոր պետը՝ Քրիսակիւրոս (Կիւրչահր կամ ըստ Յունաց Կրիսոչեր), Կարբէասի որդին, որ անոր յաջորդած էր : Անիկա մեծ չարիք հասցուց Բիւզանդացւոց եւ նոյնիսկ խրոխտաբար մերժեց Միքայէլ Գ.ի (842—867) խաղաղութեան բանադնացները, կրօնական եւ քաղաքական ազատութիւն պահանջելով (ԱԶԳ., 978) :

Պաւղիկեանները եւ Մալաթիոյ էմիրին զօրքերը մտան Փոքր Ասիա եւ ասպատակութեամբ արշաւեցին մինչեւ Նիկիոյ եւ Նիկոմիդիոյ դուռները եւ մաս մըն ալ Եփեսոսի կողմերը :

Վասիլ Ա. (867—886) դահ բարձրանալէ ետք ներքին շփոթութիւններուն պատճառով, ուղեց հաշտարար ուղղութիւն բռնել եւ բանակցութեան համար Պետրոս Սիկիլիացին ղրկեց Պաւղիկեաններու պետին մօտ : Պետրոս Սիկիլիացի երկու տարի մնաց Տիվրիկ, սակայն չկրցաւ սիրաշահիլ զանոնք, այլ միայն գերիները փրկեց : Քրիսակիւրոս կը պահանջէր որ Վասիլ հրաժարի

(1) Պրոֆ. Ն. Ադոնց Ալի Իպն Եահիա ղօրավարին մահը կը յետաձգէ մէկ ամիս, զայն սպաննուած ցոյց տալով Նիքիերտի (=Մուֆարդին) մէջ, 863 Հոկտ. 18-էն Նոյեմ. 16-ի միջոցին տեղի ունեցած ճակատամարտին ատեն, ուր խառնուած էր կալսերական զօրքերուն (ՊԱՏՄ. ՈՒՍՈՒՄՆԱՍԻՐՈՒԹԻՒՆՆԵՐ, էջ 330) :



Փոքր Ասիայէն եւ գոհանայ միայն կայսրութեան եւրոպական բաժինով:

Վասիլ Ա. 871-ին անձամբ գնաց Պաւլիկեանց դէմ. ուստի արշաւեց դէպի Տիւրիկէ (Տիւրիկ) եւ Տարենթոն (=Տարենտէ), կողոպտելով Չապետրան<sup>1</sup> կամ Չուպատրան եւ Սամոսատը եւ բանակ դնելով Նահր ալ Չարսուքի (այժմ Զիրմիքլի Սու) վրայ (Թէոփֆանէս ՇԱՐԱՅԱՐԵԱԼ, էջ 210):

Վասիլ գրաւեց նաեւ Մելիտինէն եւ կցեց բիւզանդական կայսրութեան:

Յաջորդ տարին (872-ին) կայսրը առաջացաւ մինչեւ Պաւլիկեաններու կեդրոնը, այս անգամ անցնելով Եփրատի հովիտին հին ռազմական ուղիով՝ Դորիլայոն-Սեբաստիա ճանապարհով: Յաղթեց Պաւլիկեաններուն եւ անսահման աւարի տիրացաւ, բայց չկրցաւ գրաւել Տիւրիկը՝ անոնց անառիկ ամրոցը, եւ գոհացաւ քաղաքին շրջակայքը աւերելով եւ թալանելով:

Վասիլ Ա. ապա անցաւ Եփրատը ու շարունակեց իր արշաւը Մելիտինէ-Տարենտէ-Գուրան-Ազիդէ ուղղութեամբ եւ գրաւեց Տարենտէ քաղաքը, որուն անկումէն ետք, Վասիլի հպատակութիւն յայտնեցին նաեւ ուրիշ քաղաքներ ու ամրոցներ, ինչպէս Լոքանա, որուն տէրն էր Քուրտիկ կամ Քուրտիկոս Փոքր Հայքի հայազգի իշխանը որ Միքայէլ Բ. կայսեր ատեն ապստամբած եւ 872-էն սկսեալ կը տիրէր Թոխմա Սուի վերին հովիտին (ՀԱՅ ԿԵՍԱՐԻԱ, էջ 310) եւ յաճախ բիւզանդական հող կ'ասպատակէր (Թէոփֆանէս ՇԱՐԱՅԱՐԵԱԼ, էջ 268. ԿԵՆԴՐՈՆՈՍ, Բ. 207, ՎԱՍԻԼԻԵՒ Բ. 31):

Բիւզանդական զօրաբաժին մը գրաւեց նաեւ Չապետրա ամրոցը, որ կը գտնուէր Մելիտինէ-Սամոսատ ճամբուն վրայ, եւ Սամոսատ քաղաքը:

Այս բոլորէն ետք Վասիլ յարձակեցաւ Մելիտինէի վրայ եւ ստիպեց անոր էմիրը փակուիլ քաղաքին բերդէն ներս: Կայսրը չկարենալով գրաւել ամրացած Մելիտինէն, դարձաւ եւ իր բոլոր զայրոյթը թափեց Պաւլիկեաններուն վրայ, աւերելով քաղաքը եւ ջարդելով բնակիչները:

Ան յաջորդաբար գրաւեց Արկաւուն քաղաքը եւ 5—6 բերդեր: Ասկէ յետոյ է որ կայսրը դարձաւ մայրաքաղաք՝ Սեբաստիա — Դորիլայոն ճամբով (Ստ. Տ. Մելիք Բախշեան, նոյն, էջ 190):

Ուրեմն 872-ին արշաւանքը եւս չտուաւ Վասիլ Ա. ի գոհացում, վասնզի Պաւլիկեանութիւնը ջնջելու չյաջողեցաւ:

873-ին Պաւլիկեանք նորէն ասպատակային արշաւանքներու ձեռնարկեցին եւ առաջացան մինչեւ Սամոսատ եւ նախկին Դ. Հայք, բայց չկրցան գրաւել Մելիտինէն, Եփրատի այդ անցքը, որ պէտք եղածին չափ ամրացուած էր (Գելցեր, նոյն, էջ 199 եւ Weil, Բ., էջ 471): Կայսեր բանակը Մալաթիոյ պաշարման ընթացքին ծանր կորուստներ կրեց եւ նոյնիսկ քիչ մնաց որ դերի իյնար ինքը, եթէ հայ զինուոր մը՝ Թէոփիլակտոս (հայրը՝ Ռոմանոս Լեկաբանոս կայսեր) զայն չփրկէր:

Սակայն Տիւրիկի շրջակայքը գտնուող եւ Արաբներէն բնակուած ու

(1) Կը գտնուի Մելիտինէի հարաւ-արեւմտեան կողմը ըստ Լոլանի: Ե. Քասունի Վերանշնչիւրի համապատասխան կը նկատէ եւ բեւեռագիրներու ԲԻԷ քաղաքը կը համարէ:



Մալաթիոյ էմիրին հնազանդող եւ Պաւղիկեանց հետ գործակից շատ մը քաղաքներ՝ սարսափած Վասիլի խստութենէն՝ անցան անոր կողմը եւ հպատակիլ խոստացան:

Քրիստոս, Մալաթիոյ մօտ կրած իր մեծ սպարապետներէն ետքն ալ, դիւրաւ նոր զօրք հաւաքեց եւ աւելի մեծ ոյժով Կապադովկիա մտաւ եւ աւերեց:

Վասիլ անոր դէմ ղրկեց Քրիստափոր հայ զօրավարը, որ իր ազգականն էր: Պաւղիկեան պետը առանց բիւզանդական բանակին դէմ ճակատելու՝ իր աւարովը Տիւրիկ քաշուեցաւ:

Քրիստափոր հսկել որոշեց հեռուէն Քրիստոսի շարժումներուն վերայ (ԿՈՍՏԱՆԴԻՆ ԾԻՐԱՆԱԾԻՆ Ե., 41.73) եւ ի վերջոյ յաջողեցաւ կռիւի մը ընթացքին սպաննել Պաւղիկեանց պետը<sup>1</sup> եւ ապա զնաց Տիւրիկի վրայ, ուր մտաւ առանց ոեւէ ընդդիմութեան, որովհետեւ սաստիկ երկրաշարժ մը, որ նոյն տարին պատահած էր, քաղաքին բնակչութեան հեռանալուն եւ անոր պարիսպներուն փլուզումին պատճառ եղած էր:

Բիւզանդացիք քաղաքը գտան աւերակներու կոյտ մը (873)<sup>2</sup>: Պաւղիկեանք ընկճուեցան եւ ջնջուեցաւ անոնց կրօնական հանրապետութիւնը<sup>3</sup>:

Վասիլ՝ Պաւղիկեանց կատարեալ սպարապետներէն ետք իր Կոստանդին որդիին հետ անձամբ եկաւ Եփրատի հովիտը, եւ հպատակեցուց կամ վանեց կարգ մը արաբ էմիրներ, որ այդ կողմերը կը բռնանային:

Վասիլ Ա.ի հաստատած այս կարգը տեւական չեղաւ եւ իր մահէն (886) ետք վերստին խռովութեան մատնուեցաւ Եփրատի շրջակայքը եւ պատերազմը շարունակուեցաւ երկու կայսրութիւններու միջեւ փոփոխակի յաջողութիւններով, մինչեւ որ Կոստանդին Ծիրանածին կայսեր (913—959) անուանական իշխանութեան ժամանակամիջոցին հայ զինուորականներ պետութեան դեկը ձեռք առին եւ Արաբներու դէմ ոգեւորութեամբ յաղթական պատերազմներ մղեցին:

916-7ին (Հիճրէթի 304) Մուսիս արաբ զօրավարը, մեկնելով Մալաթիայէն աւարառութեան արշաւանքի մը ձեռնարկեց Կապադովկիոյ մէջ (Weil, Բ., էջ 625): Նման արշաւանքներ տեղի ունեցան նաեւ 922-ին եւ յաջորդ տարիներու ընթացքին, երբ Ռոմանոս Լեկաթենոս կայսրը (920—944) կը դահակալէր: Իր իշխանութեան ատեն բիւզանդական կայսրութեան սահմանը, որ մինչեւ Ալիս գետ քաշուած էր, մինչեւ Եփրատ տարածուեցաւ նորէն, շնորհիւ Յովհաննէս եւ Թէոփիլէ Գուրգէն (Գուրգուաս) հայ երկու եղբայրներուն, որոնք 22 տարի (920—942) բիւզանդական բանակին հրամայեցին Ասիոյ

(1) Հ. Գեւցեր (էջ 198-9) զայն սպաննուած ցոյց կու տայ 874-ին՝ խարդախ եւ ստոր եղանակով մը, Յոյնի մը ձեռքով, որ իրմէ բարերարուած մըն էր:

(2) Գեւցեր կ'ըսէ թէ Բիւզանդացիք զայն հիմնադատակ ըրին:

(3) E. I., էջ 209 հիմնուելով Weil-ի (Բ. հտ., էջ 475) վրայ, կը գրէ թէ 881-2-ին յայտնի չէ թէ Վասիլ Ա. երկրորդ պատերազմի մը ձեռնարկած է Մալաթիոյ դէմ:



մէջ եւ նշանաւոր յաղթանակներ շահեցան Արաբներու վրայ՝ հազարի չափ քաղաքներ եւ բերդեր առնելով անոնց ձեռքէն ( M. Ph. le Bas, *Asie Mineure*, էջ 500) եւ մինչեւ Վասպուրական յառաջանալով (Ալպոյ. ՊԱՏՄՈՒԹԻԻՆ ՀԱՅ ԳԱՂԹԱԿԱՆՈՒԹԵԱՆ, Ա., էջ 290) :

Նախ ընկճուեցաւ եւ ապա նուաճուեցաւ Մելիտինէի էմիրը, եւ Մելիտինէն, այդ կարեւոր ռազմական դիրքը, որ անհաւատներու յարձակման գըլխաւոր կեդրոնավայրը դարձած էր, բիւզանդական կայսրութեան պաշտպանութեան հզօր յենարանը դարձաւ եւ Կուրատոր (= Հոգաբարձու) մը հրամանատար կարգուեցաւ այդ տեղերուն վրայ, որոնք երկար ատեն իսլամ տիրապետութեան ենթարկուած էին (Գելցեր, նոյն, էջ 213—214) :

Ընդդէմ Արաբներու մղուած այս երկարատեւ կռիւներուն գլխաւոր հերոսն էր Յովհաննէս Գուրգէն կամ Գուրգուսս հայ զօրապետը եւ քաջասիրտ Դոմեստիկոսը, որուն հրամանատարութեան տակ բիւզանդական բանակը մտաւ Մալաթիոյ սահմանները եւ յառաջացաւ մինչեւ քաղաքին արուարձանները, աւերեց անոր շրջակայքը եւ յառաջացաւ մինչեւ Սամոսատ (= Սրչամուշատ կամ Արաբներու Շիմշաթը) :

Յովհաննէս Գուրգէն, այս ռազմական կարեւոր դիրքին տիրանալէ ետք է որ անընդհատ եւ ծանր պատերազմներով, տէրութեան սահմանները Ալիսէն Եփրատ եւ Տիգրիս փոխադրեց՝ ընդարձակ երկրամասեր գրաւելով : Այս կռիւներու միջոցին երկու անգամ պաշարեց Մալաթիան, որուն արաբ էմիրը Բիւզանդիոնի գերիշխանութիւնը ճանչնալ ստիպուեցաւ (Գելցեր, էջ 213) :

Յովհաննէս Գուրգէն պահանջեց Մալաթիոյ էմիրէն իրեն ղրկել իր որդին Ապու Հաֆսը եւ զօրավար Abu'l—Ash'ath -ը (հաւանօրէն մեր պատմագիրներուն Ապուլասարը) եւ ճանչնալ կայսեր գերիշխանութիւնը, ինչպէս կը յիշատակեն բազմաթիւ բիւզանդական պատմագիրներ (տես E. I. Գ., էջ 209) :

Այսպէս 928-ին Մելիտինէի էմիրը՝ Ապու Հաֆս (Ապսխատս կամ Ապու-Խաֆս ալ գրուած է) Բիւզանդիոնի հետ դաշնակցեցաւ (Գելցեր, նոյն, էջ 213)՝ Ռոմանոսի ոյժին առջեւ խոնարհելով : Այսպէս, այդ կամրջագլուխը, որ մինչեւ այն ատեն «անհաւատ»ներու գլխաւոր յարձակման տեղն էր, բիւզանդական պետութեան զօրեղ պաշտպանութեան վայրը դարձաւ : Էմիրին գունդերը բիւզանդական զօրքերու հետ կողք կողքի կը կռուէին իրենց կրօնակիցներուն դէմ :

Յաղթութենէն ետք, անոնք բիւզանդական զօրքերու հետ յաղթանակով կը մտնէին մայրաքաղաք, իրենց հետ բերելով գերի բռնուած Արաբները (Գելցեր, նոյն) :

Այսպէս բիւզանդական կայսրութեան արեւելեան սահմանագլուխը «անհաւատ թշնամիներէ գրաւուելու վտանգին տակ ըլլալու սարսափէն ազատեցաւ», եւ Մալաթիա, թէեւ արաբ էմիրներու իշխանութեան տակ, բիւզանդական կայսրութեան ենթարկուեցաւ, իբրեւ հովանաւորեալ իշխա-



նույն թիւն :

Արաբ էմիրները կը դողային Յովհաննէս Գուրգէնէն :

934-ին Ռոմանոս գրաւեց ծաղկեալ Մելիտինէն եւ անոր հարեւան քաղաքները (Հ. Յակոբոս Վրդ. Տաշեան, ՀԻՆ ՀԱՅԱՍՏԱՆԻ ԱՐԵՒՄՏԵԱՆ ՍԱՀ-ՄԱՆԸ՝ ՓՈՔՐ ՀԱՅՔ ԵՒ ԿՈՂՈՓԵՆԷ (Սեբաստիա), Հանդէս Ամսօրեայ, 1945, էջ 13) : Յովհաննէս Գուրգէն կ'ըսուի թէ շնորհուկ մը ըրած է Պուլկարական պատերազմին մէջ նշանաւոր հանդիսացող հայազգի Գէորգ Մլեհին (ըստ Արաբներու Malikh, բիւղ. Mgdiar) եւ տուած է իբր կալուած կամ աւատ Ամանոս լեռան եւ Եփրատ գետի միջեւ գտնուող երկրամասը, այսինքն Մալաթիոյ եւ Սամոսատի շրջանները, որոնք դեռ նոր ազատագրուած էին Արաբներէն (Finlay, *History of the Byzantine Empire*, էջ 247—8, 286) :

«Այս Մլեհը նախապէս Տաւրոսի հիւսիսային կողմը կալուած մը ունէր, դղեակով մը միասին, զոր Տարսոնի արաբ ամիրան Ռուստամ, 911 թուականին յարձակմամբ առաւ ու այրեացաւ ըրաւ» (Barhebraeus *Chronography*, էջ 155) : Լեւոն Զ. կայսրը, 920 թուականի ատենները, Լիւկանդոն անուն նոր բանակաթեմ մը ստեղծեց, որ կը բովանդակէր Արեւելեան Տաւրոսի կիրճերուն երկիրը Հաճնոյ մօտ Կոմանայէն մինչեւ Մելիտինէ ու Եփրատ, եւ այս բանակաթեմին, որուն կեդրոնական քաղաքը Լառիս էր, կառավարիչ-հրամանատար կարգեց յիշեալ Մլեհը՝ պատրիկի աստիճանով (Murray's *Handbook of Asia Minor Introduction*, էջ 45. հմմտ. Մատթ. Ուռհայեցի, էջ 518—9) :

Լիւկանդոսի բանակաթեմը, զոնէ ի սկզբան, կը ներառնէր նաեւ Կոմմագինէի կամ Եփրատացւոց երկիրը : Հայերը որ Մլեհի առաջնորդութեամբ այս տեղ եկած էին, մեծ յառաջդիմութիւն ունեցան եւ իրենց նուաճումները ընդարձակեցին Կիլիկիոյ վրայ ալ՝ գրաւելով Անարզաբա եւ Մամեստիա քաղաքները (Եղիա Քասունի, ՊԱՏՄՈՒԹԻՒՆ ԱՆԹԷՊԻ ՀԱՅՈՅ, էջ 190) :

Բայց Մլեհ 932-ին վտարուեցաւ Մալաթիայէն եւ Սամոսատէն Սայիտ էտ Տէօվլէի կողմէ, որ մօրեղբայրն էր Մուսուլի Նասր էտ Տէօվլէի (E. I. 209) :

Սակայն 934-ին Բիւզանդացւոց երկու բարեկամներուն՝ Ապու Հաֆսի եւ Ապուլասարի մահերէն ետք, Գուրգէն եւ Մլեհ նորէն երեւցան քաղաքին առջեւ, որ այն ատեն պաշտպանուած էր կրկնակ պարիսպներով եւ ջրալից խրամատով մը : Բնակիչները, որոնց կը սպառնար սովը, ստիպուեցան անոնց հետ բանակցութեան ձեռնարկել քաղաքը յանձնելու համար :

Այս բանակցութեանց ընթացքին, Յոյները պատերազմական նենդութեամբ մը յաջողեցան քաղաք մտնել հիւսիսային դուռնէն եւ զայն գրաւեցին 19 Մայիս 934-ին :

Տրուած խոստումներուն համաձայն բնակիչները կրցան մեկնիլ առանց արգելքի հանդիպելու : Յետոյ պարիսպները հիմնայատակ քանդուեցան. այնպէս որ քաղաքը անպաշտպան մնաց յարձակումներու դէմ (Michel le Syrien,



Գ. 122 եւ յաջորդ, Իսկն էլ-Աթիր Ը. 221, Rambend, l'Empire grec au Xme siècle, Paris, 1870, էջ 423 եւ այլն. հմմտ. E. I. էջ 210) :

Այսպէս է որ, յաջորդ տարիներուն Մալաթիոյ շրջակայքը ենթարկուեցաւ արաբական յարձակումներու, որոնք կատարուեցան Համտանեան ցեղէն Սէյֆ Էտ Տէօվլէի կողմէ, որ օգտուելով Ռոմանոսի դահլնկէցութենէն (944 Դեկտ. 16) եւ Յովհաննէս Գուրգէնի պաշտօնակութենէն, զօրացած էր :

Սէյֆ Էտ Տէօվլէ Ալի Իսկն Հէմտուն (կամ Ապուլ Հասան Ալի Սէյֆ Էտ Տէօվլէ, 944—967), Յոյներու կողմէ Քափտան կամ Խաբտան կոչուած, Ժ. դարուն սկիզբը Միջագետքի եւ Տիարպեքիւրի շուրջը ունէր իշխանութիւն մը, զոր ընդարձակեց դէպի արեւմուտք՝ բիւզանդական կայսրութենէն հողեր գրաւելով, եւ ընդարձակ պետութիւն մը կազմեց, որուն մայրաքաղաքն էր Հալէպ : Այս պետութեան մաս կը կազմէին Կիլիկիա, Մալաթիոյ եւ Տիարպեքիւրի նահանգները՝ մինչեւ Խլաթ, Վանի լիճին վրայ, ինչպէս նաեւ Աղազ, Այնթապ, Հռոմկլայ, Հիւսնի-Մանսուր, Սամոսատ, Մարաշ եւ այլն (հմմտ. Արտաւազդ Արքեպ. Սիւրմէեան, ՀԱԼԷՊ, էջ 912—3) :

Հալէպի այս կորովի ամիրան ուխտած էր իսլամական Ա. դարու նուաճումները նորոգել. ուստի զօրաւոր բանակներով յարձակումներ կ'ընէր բիւզանդական երկիրներու վրայ (Եղիա Քասունի, նոյն, 190) : Սէյֆ Էտ Տէօվլէ նոր պատուհաս մը եղաւ Բիւզանդական կայսրութեան համար, վասնզի ծանր կորուստներ պատճառեց անոր՝ քանի՜-քանի անգամ կռուելով անոր դէմ, ինչպէս նկարագրած է Բարսբերէոս (տես մանրամասնութիւնները Եղիա Քասունի, ՊԱՏՄՈՒԹԻԻՆ ԱՆԹՅՊԻ ՀԱՅՈՑ, 191—3, Արտաւազդ Արքեպ. Սիւրմէեան, ՀԱԼԷՊ, էջ 916, եւ այլն) :

Եղաւ պահ մը որ Սէյֆ Էտ Տէօվլէ այնքան զօրացաւ որ երկու ամիս կայսրութեան սահմանները ասպատակելէ եւ աւերելէ ետք, մտաւ Կապադովկիա հզօր բանակով մը եւ բազմաթիւ բանաստեղծներով, որոնք կու գային տեսնելու իր քաջութիւնները եւ զանոնք յաւերժացնելու :

Սակայն Սէյֆ Էտ Տէօվլէի առաջին արշաւանքը, որ այնքան յաջող սկիզբ ունեցած էր եւ այնքան մեծ ուրախութիւն պատճառած՝ արաբ շանաստեղծներու, վաղանցուկ եղաւ, վասնզի բիւզանդական բանակին հրամանատարը՝ Վարդ Փոկաս անոնց ծանր հարուած մը տուաւ :

Երբ անոնք կ'անցնէին Տաւրոս լեռներէն, Կիլերոնեան կիրճէն յանկարծ ժայռերու ծոցէն դուրս ժայթքեց փողերու զոչիւն մը, ռազմի աղաղակ մը եւ Վարդի դարանակալ բանակը, որ այդ պահուն համար պատրաստ կը սպասէր, յանկարծական գրոհ մը տուաւ : Դիակներ ծածկեցին ժայռերու կատարները եւ հոն կեր եղան արծիւներու : Անթիւ էին աւարը եւ դերին :

Վարդ Փոկաս առանց ժամանակ տալու թշնամիին որ իր ոյժերը հաւաքէ, հասաւ Ասորիք, ուր 5000 հոգի ջարդեց եւ 3000 հոգի շղթայի դարկաւ,



950-ին (Հմմտ. Հ. Կ. Տէր Սահակեան, ՀԱՅ ԿԱՅՍԵՐՔ ԲԻԻԶԱՆԴԻՈՆԻ, Վեներիկ, 1903, Բ. Հտ., էջ 133—4) :

Երկու տարի յետոյ, 952-ին, Արաբները նոր ոյժով կրկին յարձակեցան եւ Հալէպի ու Տարօնի էմիրները տարբեր ճամբաներով մտան Կապադովկիա եւ տակնուվրայ ըրին բիւզանդական կայսրութեան ասիական հողերը : Այսպէս փոփոխակի յաջողութիւններով պատերազմը շարունակուեցաւ :

Գարնան Փոքր Ասիան Բիւզանդացիներու կը պատկանէր, ձմեռը՝ Արաբներուն :

Վարդ Փոկասի յաջորդեց իբրեւ բիւզանդական բանակներու վերին հրամանատար կամ մեծ Դոմեստիկոս իր որդին՝ Նեկիփոր Փոկաս, որ յաջողութեամբ առաջ տարաւ պայքարը եւ յաջողեցաւ մինչեւ Եփրատ՝ կարգ մը յաղթանակներով :

Քափտան սակայն անընկճելի մնաց եւ այն պահուն որ Նիկեփոր զբաղած էր Կրետէն նուաճելու, կազմեց երկու բանակ, մէկը իր ազգականին՝ Ապուլասարի եւ միւսը՝ իր հրամանին տակ :

Ապուլասար առաջացաւ մինչեւ Գաղատիա, ուր անակնկալ յարձակումի մը ենթարկուելով՝ իր բանակը ջարդուփշուր եղաւ (960) եւ ինքն ալ գերի ինկաւ : Իսկ Քափտան յաղթական էր :

Սէյֆ էտ Տէօվլէի Մամլուքը՝ Նաճա, 961-ին Հանձիթի դէմ իր արշաւանքին ատեն հանդիպեցաւ Մալաթիոյ Ապտալլահին եւ զայն փախուստի մատնեց իր Յոյներուն հետ (Freytag, ZDMB XI, էջ 197, Rosen, անդ, էջ 88) : Յաջորդ տարին (962) 18 օր աւերեց Մալաթիոյ սահմանները հուրով եւ սուրով (Freytag. նոյն, էջ 204—206) :

Սէյֆ էտ Տէօվլէ իր այս յաջողութիւնները կը պարտէր սա իրողութեան որ Նիկեփոր Փոկաս զբաղած էր Կրետէի նուաճումով, զոր դիմադրող հանելէ ետք, ահեղ բանակով մը արշաւեց Սէյֆ էտ Տէօվլէի երկիրները եւ ջախջախելով անոր բանակը գրաւեց 55 բերդեր եւ Դուլիենէ, Հերապոլիս եւ Անարզաբա քաղաքները եւ առաջացաւ մինչեւ Հալէպ (962), սակայն իմանալով որ Դամասկոսի Ալի էմիրը օգնութեան կու գայ, ետ քաշուեցաւ հարուստ աւարով (962 Դեկտ.) :

Նիկեփոր Փոկաս, 963 Օգոստ. 16-ին կայսերական դահ բարձրանալէ ետք, երեք տարի անընդհատ Կիլիկիա, Սիւրիա եւ Անդրեփրատեան երկիրները արշաւեց :

Պատերազմը շարունակուեցաւ երեք տարի, մինչեւ որ Սէյֆ էտ Տէօվլէ մեռաւ Սամարայի մէջ 967 Յունուար 25-ին : Որդին՝ Սաատ էտ Տէօվլէ չկրցաւ շարունակել պայքարը եւ խոյս տուաւ, Հալէպի պաշտպանութիւնը ձգելով Սէյֆ էտ Տէօվլէի հաւատարիմ քարտուղարին՝ Քարկուլայի որ կը մաքառէր ապստամբ Նաճայի դէմ, որ Հալէպ մտած էր, սակայն Քարկուլայ, որ միջնաբերդ ապստամբած էր, յաջողած էր վտարել ապստամբ Նաճա զօրավարը :



Քարկույա չկրցաւ պաշտպանել եւ 969-ին անձնատուր եղաւ Բիւզանդացիներուն եւ անոնց թողուց Կիլիկիան, Եփրատացիքը կամ Կոմմագինէն, Մելիտինէն եւ այլ հիւսիսային գաւառներ: Իրեն կը մնար Հալէպի էմիրութիւնը, որուն համար հարկ պիտի վճարէր:

Եփրատի շուրջը մղուած այս երկարատեւ պատերազմներուն հետեւանքով՝ Մալաթիան եւ իր շրջակայքը չարաչար վնասուեցան եւ գրեթէ աւերակ դարձան:

Նիկեփոր, որ որոշած էր իր գրաւած հողերէն իսլամ բնակիչները վանել կամ ջնջել, երբ 964-ին Մելիտինէն գրաւեց, զայն դատարկեցուց իր իսլամ բնակիչներէն:

Նիկեփոր, Եփրատի սահմանադրուիսին ամրապէս տիրակալելէ ետք, ուղեց վերստին բնակիչներ հաստատել աւերեալ եւ ոչ-ամրացեալ քաղաքին մէջ: Բայց Բիւզանդացիները մերժեցին հոն բնակիլ՝ վախճալով արաբական ասպատակութիւններէն: Իր խորհրդականները այն ատեն առաջարկեցին հոն տանիլ Միաբնակ Ասորի Յակոբիկեանները, եւ Նիկեփոր գործադրեց անոնց խորհուրդը, խոստանալով ասորի պատրիարքին՝ Մար Յովաննա Սարիկթայի կամ Սրիգատի (965—985) որ եթէ Մալաթիան, Հանձիթը եւ Կապանաբերդերը<sup>1</sup> բնակավայրերու վերածէր, Յակոբեանները հալածանքէ զերծ պիտի մնային կայսրութեան մէջ (Michel le Syrien, Գ. 130 յաջ., Barhebraeus, Chron. Ա. 411 եւ յաջ., Margwart, ՄԵԼԻՏ, ՄԵԼԻՏԻՆԷ, ՄԱԼԱԹԻԱ, Հ. Սահակ Կոզեան, էջ 6):

969-ին կայսեր խոստումին վստահելով եւ պատրիարքին յորդորներուն անսալով մեծ թիւով Ասորիներ հաստատուեցան այդ տեղերը. Մար Յովաննա պատրիարքը իր աթոռը հաստատեց Բարիդկեոնորիում կոչուած վայրը: 28 ասորի եկեղեցիներ զարդարեցին քաղաքը: Բաղմաթիւ վանքեր հիմնուեցան քաղաքին մէջ եւ շուրջը (Գելցեր, նոյն, էջ 228):

Այսպէս կարճ ժամանակի մէջ Մելիտինէ իր աւերակներուն վրայ շատ աւելի փառաւոր կերպով վերստին կանգնեցաւ եւ Մալաթիա եղաւ ասորական կեդրոն մը: Ասորիները հոն մեծապէս աճեցան եւ զարգացան:

Իգնատիոս Եպս. Ս. Կոյսին անունով մեծ եկեղեցի մը եւ վանք մը կառուց<sup>2</sup>: Քաղաքը շէնցաւ ու ընդարձակուեցաւ եւ իր շուրջը գիւղեր կազմուեցան:

Մօտաւորապէս 150 տարի ետք, այսինքն 1100-ին ատենները Մալա-

(1) Կապանաբերդերը (Kleisoure = Clisure) սահմանադրուիսի մերձակայ կիրճերու վրայ շինուած բերդեր էին, որոնց պաշտպանութիւնը կը վստահուէր նախկին զինուորականներու՝ կապաններու հսկելու պարտականութեամբ: Այդ կապանապետները (կլեսուրարիները) ունէին բաւական անկախ դիրք, իրենց հաստատուած բերդերուն մէջ:

(2) Այս վանքը կը կարծուի ըլլալ Տէր Մեսիհի գլուխը գտնուած շէնքը, որովհետեւ ասորերէն «Տիյէր-իււ-Մեսիհ» Մեսիայի վանք ըսել է (Մ. Որբերեան, Բիւրակն, 1900, էջ 119):



Թիոյ մէջ եւ շրջակայքը 53 եկեղեցի եւ 60·000 զէնք կրելու կարող քրիստոնեաներ կային, որոնց մէջ նաեւ բազմաթիւ Մելքիտներ (Michel de Tinis Renardo-ի, *Histoire Patriarch. Alexander-ի* մէջ, Paris, 1713, էջ 403, Barhebraeus, նոյն, I, 4243):

Այս քրիստոնեայ զանգուածը, որ հոն կը հաստատուէր, քաղաքական մեծ նշանակութիւն ունէր, վասնզի ասով բիւզանդական պետութիւնը թէ պաշտպանի դեր կը ստանձնէր արեւելեան քրիստոնեայ ժողովուրդներու նըկատմամբ եւ թէ՛ կ'ապահովէր արեւելեան սահմաններու պաշտպանութիւնը, զոր անձնուիրութեամբ պիտի կատարէին այդ փոքր, սակայն արիասիրտ ժողովուրդները:

Սակայն Մելիտինէի յոյն արքեպիսկոպոսը ստոր նախանձէն մղուած, Կ. Պոլսոյ պատրիարքին աջակցութեամբ, յաջողեցաւ յայտնապէս խոստումնադրուի ընել կայսրը, որ սկսաւ ասորի եպիսկոպոսները բանտարկել, Կ. Պոլիս կանչել եւ զանազան միջոցներով հաւատոյ միութիւն հարկադրել: Գելցեր (էջ 229) կ'ըսէ թէ այս բոլոր մանր-մունր հալածանքները, որոնց համար կը զանգատէին հռոմէական իշխանութեան ժամանակ, հիմա Յոյները իբրեւ իշխողներ դործադրեցին իրենց ասորի հաւատակիցներուն դէմ եւ ասով իրենց անհեռատեսութիւնը ցոյց տուին:

Նիկեփորի պէս կորովի զինուորական մը, որ կրնար կղերը սանձել, չկրցաւ իր կամքը հարկադրել անոր եւ չյարգեց տուած խոստումը, յունադաւան կարճամիտ կղերին ազդեցութեամբ եւ հալածեց միադաւան արեւելքի ժողովուրդները, որոնց մէջ մեծ թիւ ունէին Ասորիները՝ Մալաթիոյ կողմերը:

Այս պատճառով Յակոբիկեան Ասորիները հետզհետէ աւելի մօտեցան Արաբներուն եւ անոնց իշխանութիւնը նախընտրեցին քան Յունացը (Michel le Syrien Գ. 131, 136, 147):

Զմշկիկ (969—976) իր դարուն մեծագոյն զինուորական տաղանդը, յաջորդելով Նիկեփորի, «անհաւատ»ներու դէմ պատերազմը շարունակեց յաղթական եւ մեծ յաջողութիւններ ունեցաւ, այնպէս որ նոյնիսկ Երուսաղէմը մահմետականներու ձեռքէն ազատելու գաղափարը մշակեց, սակայն ժամանակ չունեցաւ իրագործելու, վասնզի մահը շուտով վրայ հասաւ (10 Փետր., 976):

Յովհաննէս Զմշկիկ ինքն ալ իր նախորդին պէս, իր գրաւած հողերուն մէջ բնակող Իսլամները բնաջնջեց: Մասնաւորապէս հիւսիսային Սիւրիոյ մէջ, ուր անընդհատ կռիւներ մղեց, ահարկու կոտորածներ ըրաւ Արաբներուն եւ ահարեկեց զանոնք եւ յաջողեցաւ բիւզանդական տիրապետութեան ենթարկել վերստին Միջագետքը եւ Սիւրիան եւ նոյնիսկ Պաղտատի խալիֆան հարկատու դարձուց: Այս չորս տարի (972—976) տեւող շարունակական կռիւին մէջ



Անատոլեան բանակին հրամանատար Մլեհ Դեմեստրիկոս<sup>1</sup> Հայ զօրավարը, 973-ին կը մտնէ հիւսիսային Միջագետք եւ կ'աւերէ Նիզիպիսի, Մուֆարղինի եւ Եդեսիոյ շրջակայքը եւ կը դրաւ Մալաթիան: Բայց Ամիրի մէջ ծանր պարտութիւն մը կը կրէ եւ կը մեռնի գերութեան մէջ (G. Schlumberger, *L'Épopée Byzantine à la fin du dixième siècle*, Ա. 228 եւայլն եւ Աւսոյ, ՊԱՏՄՈՒԹԻԻՆ ՀԱՅ ԳԱՂԹԱԿԱՆՈՒԹԵԱՆ, Ա. 301):

Ըստ Իպն ալ Աթիրի (Al-Kamil Գ. 65) այդ շրջանին Մալաթիան կը գտնուէր Հայկական Թեմին (Թեմա Արմենիակոս) մէջ, որ կը տարածուէր մինչեւ Վոսիոր (Խալիճ ալ Քոնսթանթին): Այս պատերազմներուն մէջ ալ Մալաթիա կատարեց՝ իբր ռազմական կարեւոր դեր՝ դեր մը:

Այսպէս կը յիշուի թէ Յովհաննէս Չմշկիկ Մծբինի դէմ իր արշաւանքին ատեն Եփրատը անցաւ Մալաթիոյ մօտէն 972-ին (Հիճրէթի 361) (Gahya al-Antaki, Rosen.-ի յիշուած գիրքին մէջ, էջ 183, Schlumberger, *L'Épopée Byzantine*, Paris, 1896, Ա. էջ 255):

Առանց այս պատերազմական ընդարձակ գործողութիւններու մանրամասնութիւններուն մէջ մտնելու, կրնանք ապահովութեամբ ըսել թէ, ինչպէս հիւսիսային Սիւրիոյ մէջ Մահմետականները անխնայ ջարդած է, նոյնպէս Մալաթիոյ մէջ եթէ Իսլամները ուէէ կերպով չէին կրցած խոյս տալ եւ հոն մնացած էին, բնաջնջած է:

Մահմետականներէն զատ այդ օրերուն Մալաթիոյ մէջ եւ շուրջը կային նաեւ Պաղիկեանները, Ասորիները եւ Հայերը, զորս կ'ատէր յունադաւան կղերը, թերեւս Իսլամներուն չափ եւ գուցէ աւելի՝ մոլեռանդական կիրքով ատելավառ:

Չմշկիկ հայ էր եւ կը թուի թէ շատ համաձայն չէր հալածանքին, զոր կղերը կ'ուզէր որ գործադրուէր ոչ-յունադաւան այս տարրերուն դէմ: Պաղիկեանները, զորս Չմշկիկի նախորդները չարաչար հալածած էին եւ ջարդած, այս կայսրը տեղահան ընելով բաւականացաւ եւ անոնց մնացորդները փոխադրեց Պալքանեան թերակղզի, վասնզի իրենց տեղւոյն վրայ միանալով Արաբներուն, կրնային վտանգել կայսրութիւնը (ՊԱՏՄՈՒԹԻԻՆ ՀԱՅ ԳԱՂԹԱԿԱՆՈՒԹԵԱՆ, Ա., էջ 297 եւ 365):

Չմշկիկ Մալաթիոյ Հայերն ալ իբրեւ Պաղիկեաններ, հալածած եւ զանոնք ալ Եւրոպա փոխադրած է:

Չմշկիկի յաջորդեց Վասիլ Բ. (976—1025), որուն դահակալութեան տարին իսկ, Վարդ Սքլերոս ապստամբեցաւ: Ամէն բան Սքլերոսի ի նպաստէր, վասնզի բանակը իր հետն էր: Անիկա լիովին յաջողելու համար պէտք ունէր երկու բանի՝ զինուորի եւ դրամի:

(1) Հաւանորէն վերոյիշեալ Գէորգ Մլեհ Լեկանդոնի կառավարիչ-հրամանատարին թուը:



Զինուորը առատօրէն տուին իրեն Արաբները եւ մանաւանդ Հայերը, որոնք փութացին զայն կայսր ճանչնալու:

Ջահանի եւ Մելիտինէի կողմերէն մինչեւ Տարօն հաստատուած կէսանկախ (գլխաւորաբար Տիարպեքիւրի եւ Մուֆարզինի էմիրները) ճորտ իսլամ իշխանութիւնները իր կողմը անցան:

Իսկ դրամ հայթայթելու համար Սքլերոս դիմած էր խիստ միջոցի մը: Հարուստները կ'առեւանգէր եւ մեծ գումարներ իբր փրկանք առնելով կ'արձակէր:

Սքլերոս գրաւեց Մալաթիա քաղաքը եւ գերի բռնեց յանուն կայսեր քաղաքը կառավարող զօրավարը եւ ինքզինքն կայսր հռչակեց: Երբ Սքլերոս կռուեցաւ Միքայէլ Պուրքէս (Ալ-Պուրճ) բիւզանդական կայսեր զօրավարին դէմ, իրեն հետ ունէր մկրտուած Շէյխ մը, Մալաթիոյ Ուսպիտ կամ Ուսպայտ Ալլահ ալ Մութանասեր պատրիկը, որ հաւանաբար 961-ին յիշատակուած Ապտալլահն է:

Սքլերոս Ուսպիտ Ալլահին Մագիստրոսի աստիճան տուաւ եւ իր ըստըրուկներէն մէկուն Քաաթաթիշ ներքինին հետ, որուն բդեշխի աստիճանը տուած էր, Անտիօք ղրկեց Քուլայպ պասիլիկոսին դէմ, որ այդ քաղաքին կայսերական կառավարիչն էր: Քուլայպ անոնց յանձնեց Անտիօքը, Թուղարը եւ ամբողջ «Արեւելքը»: Ինքը, ինչպէս նաեւ բոլոր նշանաւոր Անտիօքցիները, գերի տարուեցան եւ ամէնքն ալ ղրկուեցան Ալ-Կապատուկ (al Kabadhuk = Կապադովկիա) (Rosen, նոյն, էջ 9 եւ յաջ., եւ ծանօթ., էջ 81—90. G. Schlumberger, *L'Épopée Byzantine*, I, էջ 359, 362, 376 եւ յաջ.), բայց Սքլերոս Անտիօքի երեւելիները անմիջապէս իրենց տեղը դարձուց եւ Քուլայպը Մալաթիոյ բդեշխ ըրաւ եւ Ուսպայտ Ալլահ շուտով անցաւ Վասիլ կայսեր կողմը (977—8-ին): Երբ աւելի ետք Բարթաս (= Վարդան) Սքլերոս եօթը տարի Տիգրիսի Մատիտա կղզիին մէջ (Պաղտատի մօտ) մնալէ ետք յաջողեցաւ փախչիլ եւ Մալաթիա երթալ Պետեւիներու օգնութեամբ, եւ հոն 987 Մարտին անմիջապէս գերի վարեց Քուլայպ բդեշխը, որ կայսեր կողմը անցած էր, եւ կրկին ինքզինքը կայսր հռչակեց (Եահիա Թրգ., (Rosen, էջ 22 եւ G. Schlumberger նոյն Ա. 678):

Սքլերոսի, ինչպէս նաեւ անոր յաջորդող Վարդ Փոկասի ապստամբութիւնները ընկճուեցան եւ զսպուեցան երկարատեւ կռիւներով (տես ՀԱՅ ԿԵՍԱՐԻԱ, 317—21), որոնց թատերավայրերէն մէկն ալ Եփրատի հովիտը եւ Մալաթիոյ շրջակայքն էր, որ անշուշտ չարաչար տուժած է այդ խառնակութիւններէն:

Վարդ Սքլերոս, որ 979-ին ապաստանած էր Պաղտատի Խալիֆային քով, Վարդ Փոկասի ապստամբութեան ատեն ինքն ալ եօթնամեայ աքսորէ մը ետք բիւզանդական երկիր մտաւ Մալաթիայէն, ուրկէ 11 տարի առաջ ալ



սկսած էր իր չորս տարի տեւող պայքարը Վասիլ Բ.ի դէմ: Հազիւ Մալաթիա մուտք գործած, իր դրօշին տակ հաւաքուեցան, ինչպէս 11 տարի առաջ, խումբ մը յամառ կուսակիցներ ամէն ցեղէ եւ ամէն հաւատքէ, անապատի հրոսներ, Տաւրոսի եւ Եփրատի մարզերու բախտախնդիրները եւ բազմաթիւ պետեւիներ: Հմայուած այս մարդուն փայլուն արժանիքներէն եւ այն գերազանց կարողութենէն, որով դիտէր ինքզինք այնքան սիրցնել զինուորներուն, անապատի այս ազատ զաւակները ընդգրկեցին խանդավառութեամբ իր դատը, իր հրամանին տակ վազելով կռիւի փառքի եւ աւարին:

Նոյնպէս, բազմաթիւ մարտիկներ հայ ցեղէն, միացան Սքլերոսի, որ դարձեալ դիմեց օգնութեանը դրացի Սարակինոս իշխանական տուններուն, մասնաւորապէս Ամիթի զօրեղ էմիրին (տես G. Schlumberger, l'Épopée Byzantine, I էջ 674—9 եւ ԱՍՈՂԻԿ, էջ 238):

Սքլերոսի Մալաթիա հասնելէն ետք Վարդ Փոկաս, որուն ապաւինած է Վասիլ Բ. անոր խոստումներ շռայլելով, անվստահ կայսեր խոստումներուն, կը դաւէ անոր դէմ եւ ինքն ալ ինքզինք կայսր կը հռչակէ, աջակցութեամբ Կապադովկիոյ ազնուականութեան:

Վարդ Փոկաս եւ Սքլերոս իրարու հետ եթէ անկեղծօրէն գործակցէին, Վասիլ Բ. կրնար տապալիլ, սակայն Փոկաս դաւեց Սքլերոսի (14 Սեպտ. 987)՝ զայն ձերբակալելով եւ բանտարկելով. սակայն չկրցաւ վերջնական յաջողութիւն մը ունենալ, վասնզի հակառակ իր մինչեւ Պոլիս առաջացած ըլլալուն, 989 Ապրիլ 13-ին սպաննուեցաւ պատերազմին մէջ: Վարդ Սքլերոս 989-ի ամառը պղտիկ պայքարէ մը ետք հաշտուեցաւ Վասիլ Բ.ի հետ (989 Տոկտ. 1) եւ այսպէս բիւզանդական կայսրութիւնը փրկուեցաւ իր ճգնաժամային մէկ մեծ տազնապէն, եւ տակաւին հարիւր տարի կրցաւ դիմակալել արեւելեան բարբարոս ցեղերու գրոհը, մինչեւ որ տեղի տուաւ եւ Փոքր Ասիայէն ջնջուեցաւ քրիստոնեայ քաղաքակրթութիւնը:

Այս մէկ դարու յապաղումին նպաստած են Վասիլ Բ.ի բարենորոգչական ձեռնարկները եւ մանաւանդ իր հաստատած հողային օրէնքը, որ կը ձգտէր ընկճելու Փոքր Ասիոյ ազդեցիկ հողատիրութիւնը, որ վտանգ կը սպառնար կայսրութեան միութեան:

Իրաւամբ կ'ըսէ Յինէյ. «Վասիլ Բ.ի կառավարութիւնը ցոյց կու տայ բիւզանդական գորութեան գեմիքը: Կ. Պոլսոյ արծիւները անոր կենդանութեան ժամանակ կը թռչէին երկար յաղթական ճանապարհով Դանուբի եզերքներէն մինչեւ Եփրատի ափերը եւ հայկական լեռներէն մինչեւ Իտալիոյ ծովեզերքը: Վասիլի անընկեղի քաջութիւնը, անոր սուկալի խստասրտութիւնը, անոր անտարբերութիւնը դէպի գեղարուեստը եւ դէպի գրականութիւնը եւ անոր կրօնական թերահաւատութիւնը բոլորը կը միանային, որպէսզի ասոնցմով ստեղծեն իր տէրութեան եւ իր ժամանակի տիպ մը»:

Բայց Վասիլ Բ.ի պետութիւնը եթէ ընդարձակուած էր մասնաւորապէս Պուլկարները ընկճելով մեծ խստութեամբ եւ արտաքին շուքով պատ-



կառելի դարձած, ներքնապէս տկարացած էր կայսրութիւնը յարատեւ պատերազմներով:

Վասիլ Բ. արեւմուտքի մէջ զբաղած միջոցին 994-ին Նիկեզարոս Ուրանոս զօրավարը Արաբներէն պարտուեցաւ: Վասիլ 995-ին ինքն անձամբ գնաց Արեւելք եւ գրաւեց Հալէպը, Հոմսն ու Սիւրիական Կեսարիան, բայց չկրցաւ գրաւել Տրիպոլիսը:

Իր Կ. Պոլիս դառնալէն ետք Ֆաթիմեանք վերստին գրաւեցին Հալէպը: 1008-ին Համտանեան Ապուլ Ջաիճա Մալաթիա ապաստանեցաւ, ազատելու համար Միրտասեան Մահսուտ Իպն Լուլուի հետապնդումէն եւ հոն Մազիստրոս անուանուեցաւ կայսեր կողմէն (Rosen, նոյն, էջ 51, Schlumberger, նոյն, Բ. 442):

Վասիլ Բ. միջամտեց նաեւ Հայաստանի մէջ իշխող Բագրատունի թագաւորութիւններու գործերուն եւ զանոնք իր ազդեցութեան ենթարկելու աշխատեցաւ: Տայքի Դաւիթ իշխանը իր դրացիներու օգնութեամբ փառաւոր ջարդ մը տուած էր Մամլուն ամիրայի անհամեմատ ստուար զօրքին:

Վասիլ զայն պատուեց Կիւրապաղատ տիտղոսով: Դաւիթ, որ իր երկիրը կտակած էր Վասիլ Բ.-ի, երբ մեռաւ կայսրը փութաց Մալաթիոյ եւ Բալուի ճամբով երթալու Երզնկա եւ գրաւելու Դաւիթի հողերը, որոնք գլխաւորաբար Տայքի մէջ էին (Յ. Մանանդեան, ՔՆՆԱԿԱՆ ՏԵՍՈՒԹԻՒՆ ՀԱՅ ԺՈՂՈՎՐԴԻ ՊԱՏՄՈՒԹԵԱՆ, Գ., էջ 16): Վասիլ աշխատեցաւ Հայաստանն ալ գրաւել եւ կայսրութեան կցել, սակայն չյաջողեցաւ:

1021-ին առաջին անգամ Սելճուկները մտան Հայաստան: Վասիլ փոխանակ պաշտպանելու Հայաստանը այս հրոսներուն դէմ, զայն մատնեց բարբարոսներուն, Հայերը Հայաստանէն հեռացնելու սխալ քաղաքականութեան հետեւելով:

Վասպուրականի Սենեքերիմ թագաւորը երբ սարսափած Սելճուկներէն իր երկիրը Վասիլի ձգել ուզեց, Վասիլ ընդունեցաւ եւ անոր տուաւ արդէն կիսահայ Սեբաստիան իբր ճորտական իշխանութիւն:

Վանի շրջակայ քաղաքներու, ինչպէս Բերկրիի, Մանազկերտի, Խլաթի, Արճէշի մահմետական էմիրները Բիւզանդիոնի կայսեր գերիշխանութիւնը ճանչցան, պաշտպանութիւն գտնելու ակնկալութեամբ:

Յովհաննէս Սմբատ թուլամորթ թագաւորը՝ Անիի մէջ նոյնպէս բիւզանդական ճորտ դարձաւ:

Վասիլ Բ. ջանաց կայսրութեան արեւելեան սահմանները ամրացնել բերդերով, որոնք յետոյ օգտակար եղան երբ իր մահէն ետք Կոստանդին Թ. ի ատեն Սելճուկները խուժեցին:

Բայց Վասիլ Բ. չկրցաւ շահիլ Հայերը անոնց քաղաքական եւ կրօնական իշխանութիւններուն գոյութեան սպառնալով: Անիկա չկրցաւ հասկնալ թէ Հայաստանի մէջ միաբնակութեան դաւանութիւնը դեռ իրական ոյժ մը կը ներկայացնէր, զոր պէտք էր հաշիւի առնել: Ասոր համար չկրցաւ տոկալ



կայսրութիւնը Արեւելքի մէջ եւ Վասիլ Բ.ի տարապայման ընդարձակ կայսրութիւնը շուտով փլաւ:

Բայց մինչեւ այդ աղէտին իրականացումը, մօտաւորապէս կէս դար, Եփրատի հովիտը, Կոմմագինէն կամ Եփրատացիք, հեռու մնացին բիւզանդական կայսրութեան սահմանագլուխէն եւ ազատ այն աւերումներէն, որոնց ենթարկուած էին բիւզանդ-արաբական երկարատեւ կռիւներու միջոցին:

Այդ շրջանին բովանդակ Փոքր Հայք, ինչպէս նաեւ Կապադովկիոյ, Կոմմագինէի կամ Եփրատացւոց երկիրին եւ մանաւանդ Դ. Հայքի մէջ հայաբնակութիւնը մեծապէս բաղմացաւ՝ անշուշտ իբր հետեւանք բիւզանդական տիրապետութեան հոն ամրացած ըլլալուն:

Մելիտինէ, որ արդէն չատոնց Հայերով լեցուն քաղաք մըն էր, այդ շրջանին բոլորովին հայաբնակ եղաւ, բայց հոն գտնուած Հայերը զերծ չմնացին կրօնական հալածանքներէ եւ դառնացած մնացին Բիւզանդիոնի դէմ, ուր կղերը աղիտալի դեր կը կատարէր կայսրութեան բաղկացուցիչ տարրերուն հետ վարուելու եղանակին համար սխալ առաջնորդ մը ըլլալով:

Մալաթիոյ Հայերն ալ այս սխալ քաղաքականութեան հետեւանքները կրեցին:

Ռոմանոս Արկիւրոպուլոս կայսրը (1028—1034), Զոէին ամուսինը, երբ դահ բարձրացաւ կղերին ի նպաստ շատ մը որոշումներ տրուեցան, ինչպէս նաեւ ամենէն առաջ Մալաթիա պաշտօնավարող «հետեալ եպիսկոպոսները եւ ականաւոր աստուածաբանները բոնի Կ. Պոլիս կանչուեցան: Թոյլ չտուին որ վիճաբանութիւն կատարուի աւելի ընդարձակ՝ Արեւելիցիներու հետ խօսուած ատեն, այլ երկու բնութեան մասին անոնց դէմ հաւատաւնութեան դատավարութիւն կատարեցին: Բայց որովհետեւ անոնք գրեթէ առանց բացառութեան հաստատակամ կը մնային, իրենց բաժինը եղաւ ւստի եւ բանտ:

Այսպիսով բարեբարոյ կայսրը այս պարագային աւելի մղուողն էր քան մղողը: Ինչպէս կը պատմուի, այդ մասամբ իսկապէս զգուելի արարքներուն ժամանակ յայտնի արքունական պաշտօնեաներ դառն արցունքներ կը քափէին: Միայն Օրթոտոքս եկեղեցական պետերն էին որ կը մնային ժայռի պէս անկարեկիր: Բայց կառավարութիւնը ծանր պատասխանատուութեան տակ ինկաւ: Դժբախտ Ասորիները ամբողջ խումբերով գաղթեցին մահմետական երկիրներ: Տէրութիւնը յաջողած էր բոլոր հետեալներու տաժած համակրանքը ոչնչացնել: Սխալ մը, որ ծանր պիտի կշռէր յետոյ» (Գեղեք, նոյն, 270):

Ինչպէս Հ. Գեղեք (էջ 286) շատ յատկանշական կերպով կը մատնանշէ, է. դարու բոլոր խիստ փորձերը խրատ չէին եղած յոյն եպիսկոպոսներուն, որոնք ոչինչ չէին սորվեր եւ ոչինչ չէին ներեր:

Եւ կամազուրկ եւ մոլեռանդ կայսրեր, ինչպէս Ռոմանոս Դ. Դիոգինէս տարաբախտ կայսրը, չէին դադրեր սպառնալէ բնաջնջելու կայսրութեան ոչ-



յունադաւան քրիստոնեաները, եւ այս վերալով կը գրգռէին զանոնք պետութեան դէմ :

Ահա այս հոգեբանական տրամադրութեամբն է որ կրնայ լուծուիլ ասիական բարբարոսներու յաջողութեան դադտնիքը բիւզանդական երկիրներու նուաճման ատեն (հմմտ. Գելցեր, էջ 286) :

### Ժ.

## ԱՐԱԲՆԵՐՈՒ ԵՒ ԲԻԻԶԱՆԴԱՑԻՆԵՐՈՒ ՀԱՄԱՐ ՄԵԼԻՏԻՆԷՒ ՄԱՍՆԱԽԱՐ ԿԱՐԵՒՈՐՈՒԹԻՒՆԸ

Է. դարէն մինչեւ Ժ. դարուն սկիզբը Արաբները եւ Բիւզանդացիք մաքառեցան իրարու հետ, — ինչպէս տեսնուեցաւ — Տայքէն մինչեւ Կիլիկիա, կամ Սեւ Ծովու հարաւ-արեւելեան ծայրէն՝ Պաթումէն մինչեւ Իսկենտերունի ծոց երկարող ոչ-հաստատուն սահմանագիծի մը վրայ, փոփոխական յաջողութիւններով :

Արաբ խալիֆայութիւնը եւ բիւզանդական կայսրութիւնը այս գիծին վրայ իրենց մղած խիստ երկարատեւ պայքարին մէջ ամենէն աւելի իրարու դէմ մաքառած են Եփրատի հովիտին այն մասին մէջ, որ Ակն եւ Արաբկիր քաղաքներէն կը սկսի եւ կ'իջնէ Սիւրիոյ սահմանները, կեդրոն ունենալով Մալաթիան, որմէ անցնելով էր որ արաբ բանակները կրնային մտնել Փոքր Ասիա, անկէ Կ. Պոլիս առաջանալու նպատակով :

Հետեւաբար Մելիտինէ իբրեւ թատերավայր մշտնջենական պատերազմի մը չարաչար տուժած է եւ տեսանք թէ հակառակ անոր որ ինչպէս բոլոր եփրատամերձ վայրերը ամենահին ժամանակներէ սկսեալ հայ բնակչութիւն ունեցած են, Մալաթիա ալ ունեցած էր ստուար Հայութիւն մը, սակայն արաբ-բիւզանդական մաքառումի այս չորս դարերուն, Մելիտինէ իր հայ բնակիչներէն պարպուած եւ ետքը նորէն լեցուած է, պարագաներու բերմամբ, երբեմն Արաբներուն քաջալերութեամբ եւ երբեմն Բիւզանդացիներու խրախոյսով, սահմանագլուխի պաշտպանութեան համար Հայերու հոն բնակութիւնը երբ նպաստաւոր նկատուած է այս պետութիւններէն :

Յայտնի է որ բիւզանդական բանակները մեծ մասամբ վարձկաններէ կը բաղկանային : Պարտաւորիչ զինուորադրութիւն եւ վիճարկութիւն չկար : Կայսրերը կը հաստատէին նահանգներու մէջ զինուորական դադութներ մասնաւորապէս սահմանագլուխներու մօտ : Զինուորները երբեմն թոշակի տեղ



կը ստանային հող, զոր իբր ժառանգութիւն կը փոխանցէին իրենց զաւակներուն, բայց այդ ժառանգորդները պարտաւոր էին արեան տուրք վճարել սահմանադրութիւնները պաշտպանելով:

Հիւսիսային Սիւրիան գօտեմարտի գլխաւոր վայրն էր բիւզանդական եւ արաբ կայսրութիւններու համար, որոնք միշտ իրարու ընդհարած են, մանաւանդ Ը. դարէն ետք, երբ Աբբասեան խալիֆայութեան մայրաքաղաքը Պաղտատ փոխադրուեցաւ եւ Սիւրիան ծայրագաւառ մը դարձաւ, մինչ մինչեւ այն ատեն իւմմեանք, որոնք Դամասկոսը ունէին իրենց մայրաքաղաքը, ամուր ձեռքով մը կը պաշտպանէին այդ սահմանադրութիւնը:

Թ. դարէն ետք, երբ խալիֆայութիւնը պառակտեցաւ, Սիւրիա դարձեալ կռուախնձոր եղաւ, այս անգամ թէ՛ իսլամ պետութիւններու եւ թէ՛ Բիւզանդիոնի միջեւ: Այսպէս, երբ 868-ին Ահմէտ Իպն Թուլուն ապստամբեցաւ Եգիպտոսի մէջ եւ ինքզինքն անկախ սուլթան հռչակեց, ցոյց տուաւ ճշդ-տումներ, զոր հին ատեն Եգիպտոսի Փարաւոնները ունեցած էին եւ փորձեց տարածուիլ Ասիոյ մէջ եւ գրաւեց Պաղեստինը եւ Սիւրիան եւ հասաւ մինչեւ Եփրատ (868—888) (հմտ. ՊԱՏՄՈՒԹԻՒՆ ՀԱՅ ԳԱՂԹԱԿԱՆՈՒԹԵԱՆ, Ա., էջ 375—6):

Թուլունի մահէն ետք, իր թոռներուն մէջ երկպառակութիւն իյնալով, Սիւրիա եւ նոյնիսկ Եգիպտոս կրկին Աբբասեաններու տիրապետութեան ենթարկուեցան (905): Սակայն կարճ տեւեց այս նուաճումը, վասնզի Ֆաթիմեանք, 925-ին, Եգիպտոսի մէջ ապստամբեցան եւ քանի մը յաջորդական նուաճումներէ եւ ապստամբութիւններէ ետք, 968-ին, վերջնականապէս վաճեցին Եգիպտոսէն Աբբասեանները եւ առանձին խալիֆայութիւն մը կազմեցին:

Արաբներու այս ներքին պառակտումներէն օգտուելով մասնաւորապէս Նիկեիոր Փոկաս (963—969) եւ Չմշկիկ (969—976) նուաճեցին Կիլիկիան եւ Սիւրիան եւ յառաջացան մինչեւ Պաղեստին, սուրէ անցընելով, դերելով եւ վտարելով իսլամ բնակիչները (հմտ. անդ, Ա., էջ 239—241) եւ անոնց տեղը քրիստոնեաներ բնակեցնելով (հմտ. անդ, Ա., էջ 376):

Այս պատերազմներուն թատերավայրերը մասնաւորապէս հիւսիսային Սիւրիան եւ Եփրատացիք կամ Կոմմազինէ էին, եւ Մելիտինէ կը ներկայացնէր գլխաւոր ուղին, ուրկէ արաբական բանակները կը մտնէին Փոքր Ասիա:

Ան իրապէս կը ներկայացնէր բիւզանդական կայսրութեան թերեւս ամենէն աւելի վտանգուած սահմանադրութիւնը: Հետեւաբար հոն ապահովաբար կային այդ զինուորական դադութներէն, որոնք հաւանօրէն կը բաղկանային մեծամասնաբար Հայերէ, վասնզի Նիկեիոր Փոկաս կայսրը (963—969) Հայերու նկատմամբ բացառիկ բարեացակամութիւն մը ցոյց տուած է եւ շատ շփացուցած իր հայ զինուորները, հակառակ անոնց անկարգապահութեան համար իր դժգոհութեան: Այս արաբական ոյժին դէմ արժանաւորապէս կը-



ռուող կայսեր այս ընթացքին շարժառիթը ուրիշ բան մը չէր, այլ՝ հայ զինուորներու քաջութիւնը եւ ճարպիկութիւնը (տես ՀԱՅ ԿԵՍԱՐԻԱ, էջ 406—7) :

Այսպէս «Հայկական քեմին ու ուրիշ հեռաւոր փոքր քեմերու հայ զօրքերը, նորտ կամ նիզակակից հայ իշխաններու առաջնորդութեամբ, նշանաւոր հանդիսացան Արաբներու դէմ մղուած կռիւներուն մէջ» (Շլումպերժէ, ՆԻԿԵՓՈՐ ՓՈԿԱՍ, էջ 83) :

Հետեւաբար Նիկեփոր Փոկաս հաստատած էր Եփրատի եւ Տաւրոսի անցքերուն — այդ կենսական ու կարեւոր վայրերուն — մօտ, զանոնք պաշտպանելու համար, մեծ մասամբ Հայերէ բաղկացեալ զինուորական դաշուծներ, որոնք թէ՛ զինուոր եւ թէ հողատէր էին :

Ուստի Նիկեփոր զանոնք սիրաշահելու եւ առաւելագոյն չափով օգտագործելու համար, իր անձնական փորձառութեամբը նոր օրէնք մը դրաւ հայկական fundi-ներու, այսինքն այն հողերուն համար, զորս ծառայութեան մէջ գտնուող հայ վարձկան զինուորներ ստացած էին իրենց թոշակներուն տեղ, որոշ յանձնառութիւններով, զորս սակայն միշտ չկատարեցին (հմտ. Abbé Albert Vogt. Cambridge Med. Hist. Դ. հտ. էջ 76 եւ ՀԱՅ ԿԵՍԱՐԻԱ, էջ 408) :

Նոյնպէս Նիկեփորի յաջորդը Յովհաննէս Չմշկիկ (969—976) իր բանակին մեծամասնութեան կազմող Հայերը, որոնք բոլոր ճակատներուն վրայ իրենց քաջութեամբ հրաշքներ կը կատարէին, սիրաշահելու համար պարգեւատրութիւններով կը վարձատրէր, այդ զօրականներուն բնակութեան տեղեր եւ հողեր տալով այն երկիրներուն մէջ, զորս Իսլամներէն ետ կ'առնէր զէնքով անոնց շնորհիւ, եւ կը դատարկացնէր իսլամ բնակիչներէն եւ անոնց տեղերը կու տար իր զինուորներուն :

Չմշկիկ կայսրութեան սահմանները հասցուց Տաւրոս, ուր իրեն նեցուկ եւ օգնական հանդիսացան Բիւզանդացիներու սահմանապահ իշխանները, որոնք Ակրիտ կը կոչուէին եւ կիսանկախ երկիրները, որոնց ժառանգական իշխանները պատիւներ կը ստանային կայսրէն, անոր ճորտերը կը համարուէին :

Բիւզանդիոնի արեւելեան սահմանադրութիւն վրայ, այսպէս հաստատուեցան ճորտական հայ իշխանութիւններ եւս, որոնց վրայ յոյս կը դնէր կայսրութիւնը իր սահմանները պաշտպանելու համար :

Բիւզանդացիներու պէս Արաբներն ալ պարտաւորուած էին մասնաւոր ուշադրութեան առարկայ ընել Եփրատի եւ Տաւրոսի սահմանադրութիւնը, որուն համար անոնք ալ նոյնպէս յատուկ եւ առանձնաշնորհեալ վիճակ մը ըստեղծած էին հոն, ուր անոնք ալ կազմած էին Բիւզանդացոց Ակրիտներուն պէս իսլամ էմիրութիւններ՝ իրենց սահմանադրութիւն պաշտպանութեան համար :

Եադութ (1179—1229), հռչակաւոր արաբ աշխարհագիրը, իր նշանա-



ւոր գործին՝ ՄՈՒՃԱՄ ԷԼ ՊԻԻԼՏԱՆԻ մէջ այս սահմանադրութիւնը կը կոչէ Էր-  
րում, Սադր-էրրում, Սադր Էլ Շամ կամ Կիլիկիա: «Սադր» բառը արաբերէնի  
մէջ կը նշանակէ թշնամի երկիրին սահմանակից վայր:

Եագութ կը գրէ թէ «Սադր Էլ Շամ, որ այժմ (այսինքն ԺԳ. դարուն) Իպն Լաունի երկիր<sup>1</sup> կը կոչուի, կեդրոնական ֆաղաֆ (Գասապա) չունէր, ու  
րովհետեւ այս երկրամասին մէջ ֆաղաֆներէն շատեր իրարու հաւասար են եւ  
անոնց իւրաքանչիւրը կեդրոնական ֆաղաֆ նկատուելու արժանի է ըստ ժողո-  
վուրդին հայեցողութեան:»

Նոյնպէս Եագութ կը գրէ թէ «Ահմէտ Իպն Եահիա Իպն Ճապիր կը վը-  
կայէ թէ Օմար եւ Օսման հալիֆաներու օրով Սադր Էլ Շամի շրջանը եւ ապա  
Անտիոք եւ ուրիշ վայրեր Աւասըմ կոչուեցան, որմէ անդին կ'արշաւէին Մահ-  
մետականները:»

«Ալեքսանտրէթի եւ Տարսուսի մէջտեղ բերդեր եւ գինարաններ ունէին  
Յոյները: Հերակլ կայսրը տարաւ եւ ցրուեց այդ բերդերուն բնակչութիւնը:  
Արշաւող Մահմետականները մարդ չէին գտներ յիշեալ բերդերուն մէջ, բայց  
դարանակալ Յոյները անոնց մօտերը յանկարծակիի կը բերէին բանակէն հե-  
ռացող Մահմետականները: Ձմեռանոցներու (Էլ Շաւաթի) եւ ամառանոցնե-  
րու (Էս Սաւայէֆ) վալիները (Կուսակալ), երբ Պիլատ Էր Րում (յունական  
երկիր) կը մտնէին, պահակագործեր կը դնէին իրենց ետին մինչեւ վերադարձ  
(տես Իպն հալիֆան ՎէֆԱՅԱԹ ԷԼ Ա՛ԱԵԱՆ, Թրգ. Գէորգ Մըսրիեան, էջ  
236—238):

Գալգաշանտի, իր ՍՈՐՆ ԷԼ Ա՛աշայ գործին մէջ (գրուած Քս.ի 1412-  
ին) Աւասըմ եւ Էս Սուդուր (=Սադր) կոչուած վայրերը կը լուսարանէ: Ան-  
կէ կը հասկցուի թէ անոնք սահմանապահ վայրեր էին:

Գալգաշանտի Հալէպի հիւսիսային կողմը գտնուող երկիրները «հայ-  
կական երկիրներ» կը կոչէ, եւ կը գրէ թէ «Սիսի Միւթէ Մելլիֆին»<sup>2</sup> յատուկ  
թղթակցութեան բաժնին մէջ «Էթ Թաարիֆ» հետեւեալը կը գրէ.—

«Այս երկիրներէն մէկ մասը Էլ Աւասըմ կը կոչուի, իսկ մաս մըն ալ ա-  
տենօք սահմանապահ վայրեր Էս Սուդուր կը կոչուէին: Րումի երկրին սահմա-  
նակից ըլլալուն համար այսպէս կոչուեցաւ:»

Նոյնիմաստ ակնարկութիւն կայ նաեւ «Թագվիմ Էլ Պիլատան»ի մէջ:

Իպն Հուգալ հետեւեալը կը գրէ. «Էլ Աւասըմ շրջանին անունն է եւ ո՛չ  
թէ մասնաւոր վայրի մը: Կեդրոնական ֆաղաֆն է Անտիոք: Էլ Աւասըմի Թը-  
ւումը ընելով, Իպն հուրտաղապան կը ստուարացնէ գայն եւ անոր բաղկա-  
ցուցիչ մասը կը նկատէ Մենպենի շրջանը: Թիզինի, Պուլիսի եւ Ռուսաֆէթ  
Հեշամի շրջանը, Ճոււմայի, ինչպէս նաեւ Շայգարի եւ Աֆամիայի շրջանը,

(1) Լեւոնի երկիրը Կիլիկիան է:

(2) Այս բառը կը նշանակէ արքայի պաշտօն վարող. ըստ Գէորգ Մըսրիեանի՝  
արաբ մատենագիրներ սովորաբար այս տիտղոսը կու տային Կիլիկիայ հայ թագաւորնե-  
րուն:



Մաարէթ էն Նոումանի քեմը (*Իգլիմ*), Սուրանի քեմը, Թէլլ Պաշիբի եւ Քաֆր Թապի քեմը, Սելեմիյիէի քեմը, Ճուսիյէի քեմը, Լիքանանի քեմը, մինչեւ որ կը հասնի Գաւթալի քեմին՝ Հոմսի եւ Դամասկոսի մէջտեղ» :

Ըստ Գալզաշանտիի այս շրջանին առաջին անգամ Հարուն էլ Րաշիտ տուած է այս անունը, երբ Հիճրէթի 170-ին (Քս.ի 786-7) շինեց հոն Տարսոն քաղաքը : «Կ'երեւի թէ այս շրջանը «էլ Աւասըմ» (պահպանողներ) կոչուեցաւ, որովհետեւ իրմէ ասդին գտնուող իսլամական երկիրները թշնամիէն կը պահպանէր, տրուած ըլլալով որ ան սահմանակից էր անհաւատներու երկիրին, կ'իյնար թշնամիին ճիշդ դիմացը, եւ կը պահպանուէր մահմետական բանակներով» :

Գալզաշանտի շարունակելով կը գրէ թէ «իսկ «էս Սուդուր» (սահմանապահ վայրեր) յոգնակին է Սադր բառին : «էլ Միւշթէրէֆ» հետեւեալը կը գրէ . «Թշնամիին հանդիպակաց ամէն վայր այս անունը կը կրէ : Սիւրիոյ սահմանապահ վայրերն էին Ազվան, Տարսոն եւայլն, որոնք գրաւուեցան Հայերու կողմէ» :

Համայի տէրը Սուլթան Իմամետտին իր պատմութեան մէջ կը յիշէ, թէ Հիճ.ի 170 թուականին Հարուն էլ Րաշիտ սահմանապահ վայրերը ամբողջութեամբ անջատեց Միջագետքէ ու Գըննասըինէ եւ մէկ շրջանակի վերածելով «էլ Աւասըմ» անուանեց զայն» :

Գալզաշանտիի տեսութեամբ «պէտք է, ուրեմն, որ էս Սուդուր եւ էլ Աւասըմ բառերը հոմանիշ անուններ եղած ըլլան : Այս տեսութեան կը համապատասխանէ էլ Մագարր էշ Շինապի պին Փատլալլահի խօսքը, էթ Թաարիֆի մէջ : Այս երկիրները ամբողջութեամբ հետեւեալ կերպով սահմանագրծուած են «էթ Թաարիֆ»ի մէջ . — Հարաւէն եւ դէպի Միջօրէական հակող կողմէն՝ Պադրաս եւ անոր յարակից երկիրներ, Արեւելէն՝ Տերպենտաթի լեռներ, հիւսիսէն իպն Գարամանի երկիրներ եւ արեւմուտէն մինչեւ էլ Ալաշա եւ Անթալիա հասնող յունական եզերքները» :

Այս բացատրութիւններէն որոշ կ'երեւի թէ Արաբները ինչպիսի՜ տարապայման ընդարձակութիւն մը կու տային գրեթէ իրարու հոմանիշ «էս Սուդուր» եւ «էլ Աւասըմ» բառերով սահմանուած երկիրին, զոր բիւզանդական պետութեան դէմ իրենք պատուար մը դարձուցած էին :

Գալզաշանտի կ'ըսէ թէ «այս երկիրները կը պարունակեն քանի մը նահանգապետութիւններ, որոնց մէկ մասը յիշատակուած է «էթ Թաարիֆ»ի մէջ, իսկ մէկ մասը ետքէն կազմուած է : Կը բաժնուին երկու կարգի : Առաջին կարգը կը կազմեն մեծ վիճակներ, որոնք նոյնպէս երկու տեսակի կը բաժնուին» :

Լեռնայիներ կը բաղկանար երեք վիճակներէ, որոնք էին ըստ Գալզաշանտիի .

1. — ՄԱԼԱԹԻԱ, որուն համար կը գրէ թէ Համայի տէրը գրած է թէ «աւելի յարմար է Պիլատ էլ Րումի (Հոռոմ երկիր) նկատել, թէեւ ոմանք Մի-



ջազետեան սահմանապահ վայրերու մաս կը նկատեն» :

2.— ՏԱՐԱՆՏԱՅԻ ՎԻՃԱԿ (Տարեանէ) :

3.— ՏԱՊՐԱՔ ԿԱՄ ՏԱՎՐԱՔԻ ՎԻՃԱԿ, որ ըստ Գալղաշանտիի «մեծ քաղաք մըն է Հալէպի հիւսիս-արեւմտեան կողմը՝ մօտաւորապէս 10 իջեւան հեռաւորութեան վրայ: Ունի այգեստաններ եւ ծառեր: Գրեթէ 12 օրուան հեռաւորութիւն ունի Հալէպէն» : Յայտնի չէ թէ արդի ո՞ր վայրին կը համապատասխանէ :

Քիչ մը աւելի ծանրացայ արաբ աշխարհագիրներու եւ պատմագիրներու տեղեկութեանց վրայ, վասնզի անոնք կը պարզեն կարգ մը իրողութիւններ, որոնք Մալաթիոյ համար յատուկ կարեւորութիւն ունին :

Ինչպէս տեսնուեցաւ, Մալաթիա մաս կը համարուէր սահմանապահ երկիրներու, սակայն բիւզանդական հող էր եւ Արաբները զայն գրաւելով կը ցած էին իրենց հողերուն : Եւ ինչպէս որ Բիւզանդացիք իրենց արեւմտեան սահմանին վրայ հաստատած էին զինուորական գաղութներ, սահմանապահ իշխաններ (Ակրիտ) եւ ճորտական իշխանութիւններ, նոյնպէս ալ Արաբները իրենց «էս Սուղուր» եւ «էլ Աւասըմ» կոչած երկիրներու մէջ հաստատած էին աւատապետական կարգերով ճորտ իշխանութիւններ :

Ասոնցմէ մէկն էր Մալաթիոյ էմիրութիւնը, որ ինչպէս տեսանք երկերեսանի դեր մը կատարեց, երբեմն բիւզանդական կայսրերու զօրութեան առջեւ խոնարհելով եւ անոնց գերիշխանութիւնը ընդունելով եւ երբեմն ալ կայսրութեան թշնամիներու հետ միանալով եւ անոր դէմ կռուելով :

## ԺԱ.

# ԱՍԻԱԿԱՆ ԲԱՐԲԱՐՈՍՆԵՐԸ ՄԵԼԻՏԻՆԷԻ ՇՈՒՐՋ

Բարբարոսներու տեղաշարժը<sup>1</sup> դէպի արեւմուտք Մերձաւոր Արեւելքի պատմութեան համար եղաւ անկիւնադարձ մը, վասնզի սկսաւ նոր շրջան մը, ուր փոփոխութեան ենթարկուեցան շատ բաներ, ինչպէս բնակչութեան ցեղային նկարագիրը, զանազան կրօնքներու հետեւողներու համեմատութիւնը, պետական կազմակերպութիւնները, քաղաքակրթական եւ մշակութային

(1) Այս մասին ընդարձակ տեղեկութիւններ ուղղողներուն կը յանձնարարուի կարգաւ ուրիշ շատ մը հեղինակներու երկասիրութեանց կարգին, այս տողերը գրողին մասնաւորապէս Պատմութիւն Հայ Կեսարիոյ գործին (տպ. 1936) 480—560 էջերը, Պատմութիւն Եւդոկիոյ Հայոց (տպ. 1952) 188—240 էջերը, Պատմական Հայաստանի Գարտաքին եւ ներքին սահմանները (տպ. 1950) էջ 257—324 եւ Պատմութիւն Հայ Գաղթականութեան (Բ. հատոր, տպ. 1955) էջ 45—67, 230—244:



կեանքը եւայլն :

Ժողովուրդներ կը տեղափոխուին մէկ տեղէն միւսը եւ մինչեւ այն ատեն անյայտ, թափառիկ եւ ուռի քաղաքակրթութիւն չունեցող ցեղախումբեր, հեռաւոր վայրերէ, ինչպէս Ծայրագոյն Արեւելքէն եւ Կեդրոնական Ասիոյ տափաստաններէն կու գան Մերձաւոր Արեւելք եւ հոն հաստատուելով նոր պատմութիւն մը կը կերտեն, քանդելով Մերձաւոր Ասիոյ ազգերուն վաղեմի քաղաքակրթութիւնը, որ դարերու փառաւոր անցեալ մը ունէր իր ետին :

Հայերը — Մերձաւոր Ասիոյ ազգերէն մէկը — չէին կրնար այս բարբարոս ժողովուրդներու աղիտաբեր տեղափոխութիւններուն եւ աւերիչ ու քանդող արշաւանքներուն հետեւանքները չզգալ, քանի որ Հայաստան կը գտնուէր այդ վաչկատուն եւ վայրենի ժողովուրդներուն դէպի Միջերկրական ծով դիմող արշաւուղիին վրայ :

Ասպատակող հրոսներու այս արշաւանքներուն հետեւանքներէն գլխաւորներէն մէկը եղաւ այն, որ Հայերը, որոնք արդէն Արշակունեաց կործանումէն ետք, շարունակ դէպի արեւմուտք բիւզանդական երկիրներ ապաստանած էին, աւելի խոշոր թիւերով անցան Եփրատը եւ ստուար խումբերով հաստատուեցան Փոքր Հայք, Կոմմազինէ կամ Եփրատացիք, հիւսիսային Սիւրիա, Կիլիկիա եւ Փոքր Ասիոյ ամէն կողմերը, մինչեւ Եգէական եւ Մարմարա<sup>1</sup> :

Մալաթիոյ գաւառը, որ Եփրատի արեւմուտքը կը գտնուէր, ասիական բարբարոսներու Հայաստանի սահմաններուն վրայ երեւնալէն հազիւ 25—30 տարի վերջը, ենթարկուեցաւ այդ արշաւանքներուն, երբ Հայաստանէն փախչող Հայերէն հոն ապաստանողներով հոծ Հայութիւն մը ունէր եւ մաս կը կազմէր Փոքր Հայքի Գ. Հայք կոչուած նահանգին :

Այս շրջանակը ոտնակոխ ըրաւ նոյնիսկ Տուղրիլ Բէկ, 1054—1060-ին, երբ Շիրակ, Բասեն, Տայք, Հաչտեանք, Խաղտիք, Բարձր Հայք, Դ. Հայք գաւառները ընդարձակագոյն տարածութեան վրայ իր յարձակման առարկայ ըրաւ (Ա. Ալպոյաճեան, ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 67 եւ նոյնին՝ ՊԱՏՄՈՒԹԻՒՆ ՀԱՅ ԳԱՂԹԱԿԱՆՈՒԹԵԱՆ, Բ., էջ 33—43) :

Սելճուկները 1057-ին, Իսահակ Ա. Կալսեր ատեն (1057—1059) հասան Եփրատի եզերքը, Մելիտինէի արեւելեան կողմը, շնորհիւ Բիւզանդացիներու ապիկարութեան եւ անհեռատես քաղաքականութեան :

Յաջորդ տարին (1058), Ապու Դինար անուն էմիրին հրամանատարութեան տակ 3000 հոգիէ բաղկացեալ թրքական բանակ մը, առաջնորդուած Լիսպարիտի որդի Իւանէ Ուռպելեանէ, որ Բիւզանդիոնի կողմէ Հաչտենից եւ

(1) Այս եւ յաջորդ Մոնկու եւ Էօղլէք-թաթար արշաւանքներու հետեւանք հայ գաղութներու վրայ ամբողջական գաղափար մը կու տայ Արշակ Ալպոյաճեանի Պատմութիւն Հայ Գաղթականութեան Բ. հատորը :



Արշամունեաց գաւառներուն իշխան կարգուած էր (ԼԱՍՏ., էջ 82—4, ՈՒՌ. էջ 155, ՍԱՄՈՒԷԼ ԱՆԵՅԻ, էջ 112. հմմտ. ՊԱՏ. ՀԱՅԱՍՏԱՆԻ ՍԱՀՄԱՆՆԵՐԸ, էջ 254—5, ՊԱՏՄՈՒԹԻԻՆ ՀԱՅ ԳԱՂԹԱԿԱՆՈՒԹԵԱՆ, Բ., էջ 43), առաջին անգամ անցաւ Եփրատը եւ Հանձիթի մէջ ձմեռեց իր զինուորներով (ՈՒՌ., էջ 155 եւ ՍՄԲԱՏ, էջ 72)՝ անլուր չարիքներ գործելով իր 5—6 ամսուան բնակութեան միջոցին, ինչպէս կը նկարագրէ ժամանակակից հայ պատմագիրը Արիստակէս Լաստիվերտցի (էջ 89—95) :

Այս արշաւի միջոցին է որ Մալաթիա գրաւուեցաւ բարբարոսներէն : Քաղաքին բնակիչներէն մէկ կարեւոր մասը խոյս կու տայ եւ կ'ապաստանի շրջակայ լեռները, ուր անօթութենէ եւ ցուրտէն կը մեռնին (E. I., էջ 210) :

Մելճուկները տասը օր Մալաթիան կը կողոպտեն եւ ապա կը հրկիզեն եւ շրջակայքը մինչեւ մէկ օրուան ճամբայ հեռաւորութիւն, շրջանակի կ'աւերեն (նոյն) :

Արիստակէս Լաստիվերտցի, մեր ողբերգու պատմիչը, Մելիտինէի գրաւումը բարբարոսներէն նկարագրած է իր պատմութեան մէջ (էջ 92—3) .

«Հասին, կ'ըսէ, ի վերայ նորա գիշերաւ եւ ֆանգի գունդ մի հեծելագոր ի Հոռոմաց կայր պահապան ֆաղափին, ի հասանել հինին, յանկարծակի գրոհ տուեալ արտաֆսելին, եւ ի պատահելն իւրեանց բազում կոտորածս առնէին յերկոցունց կողմանց եւ ի լենել պատերազմին, ֆաղափն որքան ելանել կարաց, նա գերծաւ եւ մարտիկ արֆն, որ մնացին, այն զհետ փախստականին չոգան. իսկ գոր ի ֆաղափին ըմբոնեցին, զամենեսեան սրակոտոր արարին, կացեալք ի ֆաղափին աւուրս երկոտասան, եւ ի հիմանէ բրեալ ապականեցին զնա եւ զդաստակերտս նորա շուրջանակի» :

Այսպէս, «կործանում»ի կը մատնուի, ինչպէս կ'ըսէ Լաստիվերտցի (էջ 89), Մելիտինէ «չահաստան քաղաքը», ինչպէս կը կոչէ զայն պատմագիրը (նոյն, էջ 89) :

Արդարեւ Մելիտինէ, հակառակ իր վտանգաւոր դիրքին եւ այն դժբախտութեան, որ իր դիրքին պատճառով կռուախնձոր եղած էր Բիւզանդացիներու եւ Արաբներու միջեւ, ինչպէս կ'երեւի, շատ բարդաւաճ վիճակ մը ունեցած է, վասնզի Մատթէոս Ուռհայեցի (էջ 153) զայն կը կոչէ «հռչակաւոր քաղաք» եւ կը հաւաստէ թէ «անչափ է հարստութիւն ոսկւոյ եւ արծաթոյ՝ ականց եւ մարգարտաց եւ դիպակաց» :

Մեր շատ հաւատացեալ պատմագիրը Արիստակէս Լաստիվերտցի այս առթիւ կարծես թէ քաղաքի այս հարստութիւնը եւ գուցէ անոր հետեւանք առաւել կեանքը դատապարտելով, «գաւազան տանջանաց եւ ոչ խրատու առ ի ձեռն Աստուած զթուրֆաստան եւ գտունն Պարսից եւ նոֆօֆ դատեաց զմեզ ըստ իրաւի իւրոց դատաստանացն, զի խրատու գաւազանն՝ հայրական է, իսկ տանջանացն՝ դատաւորի», կ'ըսէ եւ երկար բացատրութիւններ կու տայ Ս. Գրոց զանազան դրուագներով :



Եւ Մալաթիոյ աղէտին նկարագրութիւնը տալէն ետք սա տողերով կը փակէ անոր պատմութիւնը. «Եւ այս եղել ամբարտաւանութեան նոցա հատուցումն յանկաշառ եւ յարդարադատ Տեառնէ, որ հատուցանէ իւրաքանչիւր զարժանն ըստ գործոց իւրեանց» (էջ 93) :

Այսպէս եղածը կը նկատէ աստուածային պատիժ մը Մալաթիոյ բնակչութեան ամբարտաւանութեան :

Այս պատուհասէն ետք Տուղրիլ կը դառնայ 1058 Հոկտեմբերին Պարսկաստան, հարաւային Հայաստանի եւ Վասպուրականի ճամբով, իրեն հետ ունենալով Մելիտինէ քաղաքէն վերցուած աւարը եւ գերիները :

Անոնք կ'անցնին Տարօնէն եւ կ'առաջանան Սասուն (ԼԱՍՏ., էջ 96 եւ ՈՒՌՀ., էջ 155—6) : Այս ճամբուն վրայ ցուրտէն կը մեռնին 3000 հոգի Սելճուկներէն, իսկ մնացեալները կը ջարդուին Հայերէն, որոնք բաւական զօրաւոր ոյժ մը կը ներկայացնէին եւ կը պահէին իրենց անկախ իշխանութիւնը : Իրենց իշխանը Թոռնիկ, որդի Մուշեղի, իր լեռնականներուն գլուխը անցած անակնկալ յարձակումով մը կը կոտորէ ասպատակները եւ կ'ազատէ Մելիտինէն Սելճուկներու վերցուցած գերիները (ԼԱՍՏ., էջ 24, ՈՒՌՀ., էջ 155—6, ՍՄԲԱՏ, էջ 72, ՍԱՄՈՒԷԼ, էջ 114, ՄԻՔԱՅԷԼ ԱՍՈՐԻ, էջ 395, Տոմաշէկ, ՍԱՍՈՒՆ, էջ 29, Յ. Մանանդեան, ՔՆՆԱԿԱՆ ՏԵՍՈՒԹԻՒՆ ՀԱՅ ԺՈՂՈՎՐԴԻ ՊԱՏՄՈՒԹԵԱՆ, Գ., էջ 51—2, Laurent, Byzance et les Turcs, էջ 40) եւ անոնց ձեռքէն կը խլէ աւարը :

Այս յարձակման ատեն Սասունցի Հայերուն կ'օգնեն Մալաթիոյ բնակիչներէն անոնք որոնք գերի կը տարուէին, ինչպէս նաեւ փախստականները<sup>1</sup> (Michel le Syrien, Գ., 158), որոնք ցուրտին վարժ ըլլալով կրցած էին տոկալ եւ ապրիլ (հմմտ. Տոմաշէկ, ՍԱՍՈՒՆ, էջ 41—2) :

Կոստանդին Ժ. Տուկաս (1059—1067) վերաշինել կու տայ հաւանաբար 1060—1061-ին, Մելիտինէի զոյգ պարիսպները եւ խրամը, զորս բարբարոսները քանդած էին (ՄԻՔԱՅԷԼ ԱՍՈՐԻ, էջ 396) :

Երբ այս վերաշինութեան վերաբերեալ հրովարտակը հրատարակուեցաւ, Պոլիս գտնուող Մալաթիացիներէն ոմանք իրենց ծննդավայրը դարձան եւ շնորհիւ անոնց բազմաթիւ գործաւորներ եւ ճարտարապետներ Փոքր Ասիայէն եւ Անտիոքէն Մալաթիա հրաւիրուեցան : Կարճ ատենուան մէջ — որովհետեւ քաղաքը միշտ յարձակման սպառնալիքին ենթակայ էր — ամրութիւնները վերանորոգուեցան (Michel le Syrien Գ. 165) : Այդ ատեն բիւզանդացի Քաթարան Քրինոտիս կնոջը եւ զաւակներուն հետ սպաննուեցաւ, եւ քաղաքը

(1) Michel le Syrien-ի սխալ ժամանակագրութեան համաձայն Թոռնիկի այս դիւցազնական արարքը կատարուած է Կոստանդին Թ. կայսեր ատեն կամ անոր մահուան տարին, այսինքն 1050—1051ին կամ 1054—1055ին, ինչ որ սխալ է :

Վերապրող գերիներէն մէկը՝ Ասորի Յովսէփ աբեղայ երեք ողբ գրած է այս դէպքերուն վրայ : Նոյնպէս Յովհաննա Ժ. պար Շուշան Պատրիարք չորս ողբ յօրինած է Մալաթիոյ աւերման վրայ (Է. Լ., Գ. հտ., էջ 210) :



«այլեւս խաղաղութիւն չվայելեց» (Michel le Syrien, նոյն) :

Տուղրիլի յաջորդը ահարկու Ալփասլան (1063—1073) Հայաստանի տիրելէ ետք մտաւ Միջագետք, եւ գրաւեց Սեւերեկը, Նիզիպը, Եդեսիան, Հալէպը, Այնթապը եւ առաջացաւ մինչեւ Քեսուն՝ Մալաթիոյ մօտ (նոյն, 168 հմմտ. ՊԱՏՄՈՒԹԻՒՆ ՀԱՅ ԳԱՂԹԱԿԱՆՈՒԹԵԱՆ, Բ., էջ 48—9) :

Ալփասլան 1065 Օգոստոս 15-ին Անին՝ Բագրատունիներու փառաւոր մայրաքաղաքը գրաւելէ ետք, Հայաստանի եւ անոր արեւմտեան սահմանադրութիւնն վրայ եփրատամերձ գաւառներու մէջ կը հաստատէ իր հրոսներէն անոնց ընտանիքները, որոնք կը հետեւէին իրեն բանակին իրենց կառք-բնակարաններուն մէջ տեղաւորուած եւ իրենց բովանդակ ստացուածքը կազմող շատ նախնական տնական գոյքերը իրենց հետ ունենալով (ՊԱՏՄՈՒԹԻՒՆ ՀԱՅ ԳԱՂԹԱԿԱՆՈՒԹԵԱՆ, Բ., 49) :

Այսպէս Հայաստանի բնակչութեան ցեղագրական նկարագիրը փոխուեցաւ եւ Սելճուկները՝ այդ ռազմական դիրքէն շարունակեցին Արաբներու սլաքարը՝ անոնց պէս Եփրատէն անդին արշաւելով կողոպուտի եւ աւարի համար :

Թրքական այս տեւական արշաւանքները, որոնք տեղի կ'ունենային մասնաւորապէս Մալաթիոյ շուրջը (ՅՈՎՀ. ԱԿԻԻԼԻՅԷՍ ԿԻԻՐԱՊԱՂԱՏ, 660) բնաւ դիմադրութեան չհանդիպեցան, որովհետեւ բիւզանդական զինուորները, որոնք բանակած էին Մալաթիոյ շրջակայքը, զրկուած էին թոշակէ եւ պարէնէ եւ ասոր համար իբրեւ դժգոհութեան ցոյց, մերժեցին պահակազօրքին հետ Եփրատը անցնիլ թշնամիին դէմ քալելու : Անօգնական մնացած պահակազօրքը յաղթուեցաւ ու փախաւ եւ բարբարոսները Եփրատը անցան, որպէսզի Մալաթիա մտնեն :

Թուրքերը չուղեցին քաղաքը պաշարելով ժամանակ կորսնցնել եւ ուղղակի առաջացան դէպի Կապադովկիա՝ Մելիտինէի բիւզանդական բանակը ջարդելէ ետք, աւերելով, այրելով եւ յափշտակելով իրենց ճամբուն վրայ գտնուած վայրերը եւ «բազում գաւառաց տիրեալ» (ԼԱՍՏԻՎԵՐՏՅԻ, էջ 167) հասան Կեսարիա, ուր կամ անոր շրջակայքը հաւանօրէն այդ միջոցին իբր բիւզանդական ճորտ կ'իշխէր Գադիկ Բագրատունի :

Ալփասլան քաղաքը կը գրաւէ 1067-ին յարձակմամբ եւ կ'աւերէ (ԱՏՏԱԼԻԱՏԷՍ, 94, ԱԿԻԻԼԻՅԷՍ, 661, Lebeau ԺԴ., 460, Gibbon, գլ. ԾԷ., Ալպոյաճեան ՊԱՏՄ. ՀԱՅ ԿԵՍԱՐԻՈՅ, էջ 448—9) :

Բիւզանդական բանակները հաւանօրէն ոչ մէկ օգնութիւն կ'ընծայեն հայ թագաւորին, պաշտպանելու համար պատմական այդ մեծ քաղաքը, որուն համար կ'ըսուի թէ առանց դիմադրութեան յանձնուած է Ալփասլանի (ՀԱՅ ԿԵՍԱՐԻԱ, էջ 440) :

Մալաթիոյ եւ Կեսարիոյ տիրապետութենէն ետք Թրքական պզտիկ հրոսակախումբեր թափանցեցին մինչեւ Կիլիկիա եւ Տաւրոս եւ աւերումի մատնել սկսան այս շրջանակները եւս (ԱՏՏԱԼԻԱՏԷՍ, էջ 135) :



Այսպէս իրարու կը յաջորդէին սելճուկ արչաւանքներ, որոնք տակնու-վըրայ կ'ընէին Փոքր Ասիան եւ առիթ կու տային որ երեւան գան կարգ մը իշխանութիւններ, որոնց գլուխ կը կանգնէին յաճախ Սելճուկներու գործա-կից յելուզակներ եւ հրոսապետներ:

Ասոնցմէ մէկն էր Ահմէտ Տայլու, զոր իսլամ պատմագիրներ Մելիտի-նէի Օմար էմիրէն (Թ. դար) սերած կը նկատեն:

Այս հրոսապետը, որ հաւանօրէն հայ ծագում ունէր, 1058-ին Աբբա-սեան ամիրապետէն թոյլտուութիւն ստացած էր Ռումի երկիրներուն մէջ, այսինքն Անատոլուի կողմերը «Աբբազան պատերազմ» մղելու եւ իր նուաճած հողերուն իշխանութիւնը իրեն սեպհականելու:

Տայլու նոյն տարին (1058) Ապու Դինարի հետ կը թուի մասնակցած ըլլալ Տուղրիլի արչաւանքին եւ Մալաթիոյ պաշարման ու կործանման (տես ՊԱՏՄ. ԵՒԴՈԿԻՈՅ ՀԱՅՈՅ, էջ 190 եւ վերջը): Տայլու նաեւ գործօն մասնակ-ցութիւն ունեցած է Սելճուկեանց դէպի Փոքր Ասիա կատարած արչաւանքնե-րու մէջ եւ ծանօթացած էր երկիրին վիճակին եւ ճամբաներուն: Յետոյ եղած Ալփասլանի հեճալը (սենեկապետ) եւ մեծապէս օգտակար եղած էր իր ունե-ցած ծանօթութիւններով եւ տուած խորհուրդներով: Ասոր համար Ալփասլան ինքն ալ հաստատած է Աբբասեան ամիրապետին շնորհքը եւ տուած՝ Երզն-կայէն դէպի արեւմուտք մինչեւ Ալիսի բերանը տարածուած հողերը, որոնք տակաւին գրաւուած չէին, բայց ծրագրուած էր գրաւել:

Արդարեւ, այդ հրամանը ստացած տարին (1071) Տայլու գրաւեց Նիք-սարը, զոր իրեն նստոց ըրաւ, եւ ապա գրաւեց յաջորդաբար Ամասիան, Թո-գատը, Մարզուանը եւ Չորումը եւ 1073—4-ին Սեբաստիան ու Կեսարիան (Ալպոյաճեան, ՊԱՏՄ. ԵՒԴՈԿԻՈՅ ՀԱՅՈՅ, էջ 191):

Տայլու միակը չէր Անատոլուի մէջ այս տեսակ իշխանութեան մը տի-րացողներուն:

Իրեն հետ ժամանակակից եւ թերեւս զինակից՝ ուրիշ բախտախնդիր-ներ ալ կային իր հողերուն շուրջը, ինչպէս Աւչէն անուն Ամիրան, որ Սել լե-րան կողմերը յարձակում, կոտորած եւ աւարառութիւն կը կատարէր, եւ Կիւմիւշթէքին ամիրան, որ աւերած էր Հիւսնի Մանսուրի երկիրը եւ տեղւոյն իշխանները սպաննած (Գերպ. Անդրէաս Ալեքսանեան, ՊԱՏՄՈՒԹԻՒՆ ՍԵ-ԲԱՍՏԻՈՅ, էջ 170):

Հաւանօրէն ուրիշ էմիրներ ալ գտնուած են, որոնք առիթէ օգտուելով մեծ ու պզտիկ տարածութեամբ հողերու վրայ բռնակալած էին եւ բիւզան-դական կայսրութեան սահմանները կը կողոպտէին:

Ալփասլանի բանակներուն եւ անոր յառաջապահ, օգնական ու դործա-կից այս էմիրներու դէմ կանգնելու եւ անոնց յառաջխաղացութիւնները կա-սեցնելու համար Ռոմանոս Դ. Դիոգինէս (Տիոթէն) կայսրը (1067—1071) 1068-ին գնաց Թուրքերուն դէմ, որոնք տարածուած էին Փոքր Ասիոյ բոլոր կողմերը, վասնզի Ալփասլան մինչեւ Փոխիդիա առաջանալէ ետք, պատերազ-



մի շարունակութիւնը յանձնած էր ամիրաներու, որոնց զօրքերը կողոպուտով յղիացած եւ անկարգապահութեամբ քայքայուած, տկարացան Ռոմանոսի բանակին առջեւ եւ Եփրատէն անդին վանուեցան (Կոմմագինացի, ՓԻԼԱՐՏՈՍ ՀԱՅԸ, էջ 6 եւ հմմտ. Gibbon, VI, էջ 247) :

Ռոմանոս իր այս առաջին արշաւին մէջ իր ձեռք բերած յաջողութիւններու կարգին, կը յիշուի թէ Կոկիսոնէն (այսօր Կէօքսիւ) Մալաթիա ղրկած է զօրավար մը<sup>1</sup>՝ պաշտպանելու համար սահմանադրուիւր Աւշէն (Atwaihios) թուրքին դէմ, զոր «ամիրայն Պարսից» կը կոչէ Ուռհայեցի (223) եւ կը պատմէ թէ ան «գօրաժողով արար... եւ յապականութիւն դարձոյց գրագում գաւառս»։ Նոյն պատմագիրը կ'ըսէ թէ «բազում սուգ եւ խաւար տարածեցաւ ի վերայ երկրի ի ձեռաց անօրինիս այսմիկ» :

Աւշէնի դէմ Ռոմանոս Դ. Տիոթէն կայսեր ղրկած զօրավարը չհամարձակեցաւ Մալաթիայէն դուրս ելլել։ այնպէս որ Աւշէն կրցաւ հանդարտօրէն յառաջանալ բիւզանդական հողերու մէջ (ԱԿԻԻԼԻՑԻՍ, Բ., 671, Weil Գ. 112) եւ ըստ Ուռհայեցիի (223) մինչեւ Սեւ լեռ կամ Ամանոս, այսինքն մինչեւ Միջերկրական հասնիլ :

Աւշէնի ասպատակութեան ժամանակակից «ամիրա մի մեծ եւ հզօր ի դրանէն Ալփասլան Սուլթանայ, որ էր հենպ մորա եւ անուն մորա Գումէշ տիկին (= Գամշտիկան կամ Կիւմիւշթէքին) եւ յարուցեալ գայր մեծաւ ահարկութեամբ եւ ախոյեան գօրօք հասանէր ի վերայ քրիստոնէից եւ վտակս արեան յարուցանէր ի յազգէ հաւատացելոց եւ բազում խոցուածով գայրացեալ... արար սաստիկ կոտորածս...» (ՈՒՌՀ., էջ 224—5) Դ. Հայքի մէջ, ինչպէս Եդեսիոյ եւ Նիսիպի շրջակայքը, եւ անցաւ Եփրատը ու յարձակեցաւ Հիւսնի Մանսուրի (կամ Ատըեամանի) վրայ՝ մեծ չարիքներ գործելով (ՈՒՌՀԱՅԵՑԻ, էջ 225) :

Կիւմիւշթէքին «մեծ յաղթութեամբ եւ բազում գերութեամբ եւ անհամար աւարաւ խաղաց եւ գնաց յաշխարհն Պարսից» (ՈՒՌՀԱՅԵՑԻ, էջ 227) :

Այսպէս, Մելիտինէ եւ անոր մօտաւոր գաւառները կ'ենթարկուէին սելձուկ հրոսներու աւերին :

Ռոմանոս Դ. կայսրը, այս տագնապալի վիճակին հանդէպ կայսրութեան պաշտպանութեան համար միջոցներ ձեռք կ'առնէ եւ զինուորական վարչութիւնը կը վերակազմէ :

Ի մէջ այլոց այն ատեն է որ Փիլարտոս յունադաւան հայ զօրավարին պաշտօն կու տայ պաշտպանելու Ռոմանուպոլիսէն (= Բալու) մինչեւ Մելիտինէ եւ Անտիոք երկարող ռազմական կարեւոր գիծը։ Դժբախտաբար պաշտօնակալներու երկարատեւ յոռի վարչութիւնը քայքայած էր բանակներու

(1) Ըստ Gfrörer-ի այս զօրավարը պոլլկար Ալիսիանոսն է (E. I. Գ. էջ 211), որ չեմ գիտեր թէ կապ մը ունի՞ Սամուէլ Չարի եղբօր Ահարոնի որդիին հետ, որ 1040-ին միացաւ պոլլկար ապստամբներուն եւ սկզբնական յաջողութենէ մը ետք ընկճուեցաւ (տես Պատմութիւն Հայ Գաղթականութեան, Բ. հատոր, էջ 562)։



կարգապահութիւնը, գէշ մատակարարութիւնը դատարկացուցած էր պետութեան գանձարանը, եւ դժուար եւ անապահով դարձուցած էր երկիրին պաշտպանութիւնը:

Հակառակ այս յոռի պայմաններուն Ռոմանոս 1068-ին յաջողեցաւ լաւ պատժել թէ՛ Հալէպի միւսիւլմանները (ՈՒՌ., էջ 231) եւ թէ՛ խիստ հարուած մը տալ եւ ետ մղել սելճուկ աւաղակային գունդերը, որոնք կը կողոպտէին Պոնտոսի շրջակայքը (Գելցեր, էջ 301. ԱԶԳԱՊԱՏՈՒՄ, էջ 1291):

Թուրք դիւրաշարժ ձիաւորներուն հանդէպ կ'անճրկէին ծանր սպառազինութեամբ զրահուած դանդաղաշարժ բիւզանդական զօրքերը: Ասով հանդերձ կայսրը վերջապէս կրցաւ բարբարոս հրոսակները Եփրատէն հեռու քշել, սակայն երբ ուզեց յանդուգն արշաւանքով մը եւ նախկին Դ. Հայքի ճամբով անակնկալօրէն գրաւել Նլաթը — Վանի լիճին ամրոցը — լսեց որ իր զօրապետը՝ Փիլարտոս Կապադովկիոյ մէջ ջարդ կրած էր (Գելցեր, նոյն, էջ 301):

1069-ին վայրենի հրոսակները խուժեցին Եփրատի արեւմուտքը եւ մինչեւ Իկոնիա առաջացան (նոյն, էջ 301 եւ ՈՒՌ.Շ., էջ 232) եւ մեծ կողոպուտով ետ դարձան:

Ռոմանոս Դ., որ յաջող սկզբնաւորութիւն մը ըրած էր՝ բարբարոսներու դէմ յաղթանակներ տանելով, թերեւս անձամբ կռիւր շարունակելով պիտի կարենար աւելի մեծ արդիւնքներ ձեռք բերել, 1069-ին ստիպուեցաւ դառնալ մայրաքաղաք, վասնզի իր կիներ Եւդոքսիա, որուն կը պարտէր իր գահը, զինքը իր մօտը ունենալու համար Պոլիս կանչած էր (ԱԶԳ., էջ 1291, ՈՒՌ. էջ 231—2):

Իր բացակայութեան ասիական բանակին ընդհանուր հրամանատար նշանակուեցաւ Մանուէլ Կոմնէն — Իսահակ կայսեր (1057—1059) եղբօրորդին — որ Սելճուկներէն մեծ ջարդ մը կրեց եւ գերի ինկաւ (Գելցեր, էջ 302):

Թերեւս այս պարագային է որ 1069-ին Փիլարտոս կոչուած է ասիական բանակի հրամանատարութեան եւ ինչպէս Ակիւլիցէս (681), Աննա Կոմնէն (205), Զոնարաս (Դ. 209) կը վկայեն, Մեծ Դոմեստիկոսի աստիճանը ստացած է Ռոմանոս Դ.էն (Տոմաշէկ, ՍԱՍՈՒՆ, էջ 30):

Ալփասլան Հայաստանի եւ Միջագետքի մէջ կը շարունակէ իր դրաւումները (Մանազկերտ, Ամիթ եւ այլն) եւ միշտ յարձակումներ կը գործէ բիւզանդական կայսրութեան վրայ: Ասոնք Ռոմանոսը կը պարտաւորեն որ հաւաքէ իր ոյժերը եւ պատերազմի պատրաստուի (ԼԱՍՏ., էջ 112—3, ՈՒՌ., էջ 237): Ռոմանոս կը հաւաքէ 100.000 զինուոր (Գելցեր, էջ 301) եւ անձամբ կ'երթայ թշնամիին դէմ:

Դժբախտաբար 1071 Օգոստոս 19-ին Մանազկերտի մէջ Ռոմանոս ոչ միայն կը պարտուի, այլ նաեւ գերի կ'իյնայ Ալփասլանի ձեռքը:

Ալփասլան վեհանձնութեամբ կը վարուի եւ Ռոմանոսը կ'արձակէ, զայն իրեն զինակից դարձնելու համար:



Ամբարտաւան Բիւզանդացիք սակայն կը մերժեն Ռոմանոսը ընդունիլ եւ իրենց կայսրութեան կործանումը կը պատրաստեն :

Բիւզանդական յոխորտութեան դէմ Ալիասլան նոր յաղթանակներով կայսրութիւնը ընկճել կը փորձէ, ընելով կարգ մը կարգադրութիւններ, որոնք նպատակակէտ ունէին ապագային ընդարձակել սելճուկ պետութիւնը :

Ան Հայաստանի փոխարքայ կը նշանակէ Սիւլէյման Իպն Գութուլմիշ՝ իր քեռորդին, Կարինը կու տայ Սալթակ անունով թուրքման ամիրայի մը եւ Երզնկան՝ Մանկուճակի, իսկ Երզնկայէն մինչեւ Ալիսի բերանը տարածուող հողերն ալ — որոնք դեռ նուաճուած չէին — կը շնորհէ, ինչպէս յիշեցինք, Ահմէտ Տալուի՝ Դանիշմենտ (= ուսուցիչ) մականուանեալին, արտօնելով զանոնք որ իրենց տիրապետած երկիրներուն ապահարկ իշխեն, պայմանով որ միաբան դործեն եւ ջանան տկարացնել քրիստոնեայ իշխանութիւնները եւ ժողովուրդը ընտելացնել Իսլամներու տիրապետութեան :

Դանիշմենտ 1071-ին դործի ձեռնարկեց, առաջին առթիւ գրաւելով Նիւհիսարը եւ ապա առաւ Ամասիան, Թոգատը, Մարզուանը եւ Չորումը, ինչպէս նաեւ շրջակայ հողերը, մանաւանդ Սեբաստիան, Կեսարիան եւայլն :

Դանիշմենտ այսպէս կը գրաւէր Հայաստանէն տեղափոխուած հայ փոքր թագաւորութիւններու հողերը, որոնք կը գտնուէին Փոքր Ասիոյ մուտքին վրայ :

1079-1080-ին կատարուած ընդհանուր յարձակողականով «ազգն թուրքաց տարածեցաւ ընդ ամենայն երկիր» (ՈՒՌՀԱՅԵՑԻ, էջ 261) : Նախաձեռնարկը Դանիշմենտն էր, որ մինչեւ Ալիս իրեն սահմանուած հողերը գրաւեց՝ աջակցութեամբ դրացի մահմետական ամիրաներուն, մասնաւորապէս Երզնկայի, Կամախի եւ Կողոնիայի (Շապին-Գարա-Հիսար) տէր Մանկուճակի :

Այսպէս, Փոքր Ասիոյ բերանը Բիւզանդացիներէն կերտուած նոր ամբարտաւոր կամ պաշտպանութեան Բ. գիծը Սելճուկներէն ձեղքուեցաւ՝ 1071-ին Մանազկերտի մէջ առաջին գիծը խորտակուելէն հազիւ 10 տարի ետք : Բարբարոսները այս նոր յաջողութեամբ կը գրաւեն Փոքր Ասիան, վասնզի Բիւզանդացիք, ինչպէս Հայաստանը, նոյնպէս Սել ծովէն մինչեւ Տաւրոսի շղթան տարածուող երկիրները պաշտպանելու անհոգ գտնուած էին եւ թողած որ անկէ ներս խուժեն սելճուկ բարբարոսները :

Դանիշմենտ կը յաջողէր աւելի ընդարձակել իր երկիրը Չանկըրն եւ Գասթեմունին ալ գրաւելով եւ մինչեւ Սել ծով տարածելով իր իշխանութիւնը :

Կը թուի թէ դարուն սովորութեան համաձայն Տալուի տէրութիւնն ալ աւատապետական կազմ ունէր եւ շրջակայ հողերուն վրայ հաստատուած էին իր գերիշխանութեան տակ ուրիշ ճորտ իշխանութիւններ :

Այսպէս, 1094-ին Սամոսատի մէջ Դանիշմենտ մը կ'իշխէր եւ Եփրատա-ցւոց երկիրին մէջ ԺԲ. դարուն սկիզբը կը տոկար տակաւին Մելիտինէի քրիստոնեայ իշխանը՝ Գաբրիէլ եւ Միջագետքի մէջ՝ անոր փեսան, Եղեսիոյ



իշխանը՝ Թորոս, որոնք կը հովանաւորուէին եւ կը պաշտպանուէին Դանիշ-մենտեաններէն, որոնց պետը Տայլու համակիր էր բնիկ քրիստոնեաներուն, որոնք փոխանակ այս բարեկամութենէն օգտուելու, խաչակիրներուն յարեցան եւ անոնց նպաստեցին, այնպէս որ Դանիշմենտեանք պայքարիլ սկսան այս քրիստոնեայ իշխանութիւններուն հետ:

Տայլուի մահուան տարին (1084) գրաւուեցաւ Սերաստիան, Կեսաւրիան եւ Պոնտոսը, որոնց վրայ Աբուլ Ֆետա (ՏԱՐԵԳՐ. Գ., էջ 724) կ'աւելցընէ Մալաթիան, որուն գրաւումը Ալպիսթանի հետ 1086-ին կը յետաձգեն ուրիշ պատմագիրներ, սակայն այս գրաւումը վերջնական չէր գոնէ Մալաթիոյ համար, որ մինչեւ 1102 հայկական իշխանութեան մը տակ էր, ինչպէս պիտի տեսնուի (ՀեղարՖիննի, ԹԱԶՔԵՇ էՏ ԹԱԻԱՐԻԽ եւ Հաճի խալիֆա, ՃԻՀԱՆՆԻԻՄԱ, էջ 629):

Մելիքշահի իշխանութեան (1072—1092) փառաւոր շրջանէն ետք երբ սելճուկ պետութիւնը սկսաւ բաժան-բաժան ըլլալ, Բիւզանդացիք կարծեցին թէ պիտի կարենան ընկճել Սելճուկները եւ անոնց հետ մաքառիլ սկսան:

Մելիք Շահի որդին Պարկիարուի (1092—1104) անցաւ Եփրատը եւ առաջացաւ մինչեւ Անարզաբա եւ Հիւսնի Մանսուր (ՊԱՏ. ՀԱՅ. ՍԱՀՄԱՆՆԵՐԸ, էջ 69), այնքան մօտը Մալաթիոյ: Այսպէս Մալաթիոյ շրջանակը կրեց ասիական բարբարոսներու դէպի արեւմուտք արշաւին բոլոր հետեւանքները, եւ բազմաթիւ հարուածներ ստացաւ սելճուկ եւ բիւզանդական կայսրութեան միջեւ սահմանազլուխի վրայ գտնուելուն, առնուելով ու տրուելով քանի մը անգամներ, ինչպէս պատահած էր արաբական շրջանին:

## ԺԲ.

## ՄԵԼԻՏԻՆԷ՝ ՓԻԼԱՐՏՈՍԻ ԻՇԽԱՆԱՊԵՏՈՒԹԵԱՆ ՄԱՍ

Ինչպէս շատ մը տարապայմանօրէն ընդարձակուած պետութիւններու ճակատագիրը եղած է, սելճուկ մեծ տէրութիւնն ալ չկրցաւ իբրեւ միաձոյլ ու միակ պետութիւն մը զօրաւոր կեդրոնական իշխանութեամբ մը շարունակել իր գոյութիւնը եւ ստացաւ աւատապետական կազմ. երեւան եկան մեծ թիւով տանուտէրութիւններ կամ հողատէրութիւններ, որոնք առաւել կամ նըւազ իրական հնազանդութեամբ մը ենթարկուած էին Մեծ Սելճուկին իշխանութեան: Անոնք իրենց պարբերական ըմբոստութիւններով ոչ միայն կը տըկարացնէին կեդրոնական իշխանութիւնը, այլեւ իրենց իրարու դէմ մղած պատերազմներով նաեւ բովանդակ կայսրութիւնը (Loewe, The Seljuqs, ի CMH, Դ., էջ 299—318 եւ ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 69):



Մանազկերտի ճակատամարտը բիւզանդական կայսրութեան համար ճակատագրական նշանակութիւն ունեցաւ վասնզի անոր ոյժը խորտակուեցաւ անկանգնելի կերպով:

Այս քայքայումէն ու կազմալուծումէն օգտուելով Փիլարտոս Հայր<sup>1</sup> յղացաւ Փոքր Ասիոյ արեւմուտքը եւ հիւսիսային Ասորիքի մէջ կազմել անկախ իշխանութիւն մը՝ այդ կողմեր հաստատուած Հայերուն վրայ կրթնելով<sup>2</sup>:

Փիլարտոս, թէեւ յունադաւան, գիտնալով Հայերու ժխտական կեցուածքը հանդէպ Բիւզանդիոնի ընդգրկած կրօնական քաղաքականութեան, Մանազկերտի պարտութենէն ետք ծրագրեց Կապադովկիոյ, Կիլիկիոյ եւ հիւսիսային Սիւրիոյ եւ Միջագետքի մէջ հաստատուած եւ Հայաստանէն տեղափոխուած հայ թագաւորներն ու իշխանները իր գլխաւորութեան եւ Բիւզանդիոնի հեռաւոր հովանաւորութեան տակ միացնել եւ զօրաւոր ու ընդարձակ դաշնակցային պետութիւն մը կազմել, ներքին միութեամբ ամրացած եւ կազմակերպուած, որ մէկ կողմէն սելճուկեան յարձակումներուն դէմ կայսրութեան արեւելեան սահմանազլուխին վրայ՝ իբրեւ պատուար պիտի ծառայէր, իսկ միւս կողմէն ալ ջախջախուած եւ հալածուած հայ ժողովուրդին նոր օժախ մը պիտի դառնար, իբրեւ նոր հաւաքավայր մը եւ հայրենիք մը:

Ռոմանոս երբ պարտուեցաւ Մանազկերտի մէջ (1071 Օգոստ. 19) Փիլարտոս Պարբերդ կը գտնուէր իբրեւ պահեստի զօրքերու հրամանատար: Ան քայքայուած բիւզանդական բանակին մէկ կարեւոր մասը յաջողեցաւ կասեցընել իր անկանոն նահանջէն եւ զանոնք սրտապնդելով թումբ կանգնեցաւ դէպի արեւմուտք խուժող սելճուկ հեղեղին եւ արգելք եղաւ բարբարոսներու աւելի առաջ գալուն:

(1) Ինչպէս տեսնուեցաւ, Փիլարտոս Փոքր Ասիոյ մուտքին վրայ կարեւոր բանակի մը հրամանատար կարգուած էր: Աննա Կոմնէն Փիլարտոսը կը ներկայացնէ «աքանչելի՝ դիտողներու աչքին առջեւ, առնենի կազմուածքով եւ իմաստուն ու խոհեմ»: Ն. Ադոնց (տես Byzantion, 1934, հտ. IX պրակ I, «Փիլարէտ իշխանի ընտանեկան ծագումը» յօդուածը, թրգ. Հայրենիք ամսաթերթ, ԺԵ. տարի, թ. 8, էջ 167-171) կ'ըսէ թէ ան «կրպականէր իշխանական տան ու սերունդի, որուն անդամները յայանի էին րիւսնդական պատմիչներուն Բրաքամիոս = Բրախամիոս կամ Բաքիամէս = Բախտամէս անունով: Այս տան անդամներէն շատերը կայսեր ծառայութեան մէջ էին, ինչպէս կր տեսնուի (Schlumberger, Sigellographie): Այս ընտանիքը իսառնուած է Բարտաս Սքլերոսի ապստամբութեան շարժումին (տես E. W. Bussel, Բ. հտ, 238-248): Կենտրենոս (Բ. 422) կր պատմէ թէ ինչպէս զօրավար մը դառնց կայսեր բանակին եւ փրկեց Սքլերոսը, 976ի ապստամբութեան տուն»: Հայ պատմիչներ կը կարծեն թէ Փիլարտոս կը պատկանէր Վարաթնունի տոհմին:

(2) Իսլամ. Համայն. (Գ. էջ 211) կը գրէ թէ Փիլարտոս իր հայ տապաւնաւորութեան համար ստեղծեց վաղանցուկ թագաւորութիւն մը Սիւրիոյ սահմանագլուխին վրայ: Իրականին մէջ Փիլարտոսի հիմնած տէրութիւնը աւատապետական կարգերով իշխանապետութիւն մը կամ շատ մը փոքր իշխանութիւններու համագաշտակցութիւն մըն էր:



Այսպէս պատեհութիւնը օգտագործելով հիմնեց ինքնիշխան կառավարութիւն մը Գերմանիկէն (Մարաշը) կեդրոն ունենալով եւ հետզհետէ ընդարձակեց իր սահմանները :

Բիւզանդական զօրավարին այս արարքը պատժելու անկարող էր Պոլսոյ կառավարութիւնը . ուստի անոր անուանական կերպով ինքզինք բիւզանդական պաշտօնատար մը նկատելը իրեն համար բաւական զոհացում մը նկատեց եւ թոյլ տուաւ որ անիկա ազատ գործէր , եւ Սելճուկեանց ճամբան փակելով Կիլիկիան եւ Կապադովկիան փրկէր : Միքայէլ Ասորի (Michel le Syrien, Դ . հտ . , էջ 187—8) այնպէս կը ներկայացնէ թէ «Հոռոմները իշխան կարգեցին Փիլարտոսը Կիլիկիոյ վրայ , որպէսզի դիմադրէ Թուրքերուն , որովհետեւ Փիլարտոս ռազմիկի համբաւ ունէր» :

Մանազկերտի պարտութենէն ետք՝ Փիլարտոսի հետ միեւնոյն ատեն ինքզինքնին բիւզանդական կայսրութենէ անկախ նկատած են նաեւ Սերաստիոյ , Ծամնդաւի եւ Պիղուի մէջ հաստատուած հայ թագաւորները , որոնք եթէ Փիլարտոսի պէս կարեւոր դեր մը չեն կատարած եւ այս պատճառով եթէ իրենց գործերը չեն յիշուած , սակայն դէթ սա որոշ է՝ թէ Բիւզանդիոնէն կախում չեն ունեցած եւ աւելի Փիլարտոսի միացած եւ անոր գլխաւորութիւնը ճանչցած են , ինչպէս կը հաստատուի ինչինչ դէպքերով (տես Ալպոյաճեան , ՊԱՏՄ . ՀԱՅ ԿԵՍԱՐԻՈՅ , էջ 457—460) :

Այսպէս , հայ թագաւորները իրարու մէջ եւ ամէնը միասին Փիլարտոս իշխանապետին հետ կատարեալ հասկացողութեամբ , համաձայն էին եւ յոյժ հաւանօրէն ամէնքն ալ կը փափաքէին Փոքր Ասիոյ մուտքին վրայ կազմելու հայ պետութիւն մը աւատապետական կարգերով , ամէն մէկը իր սահմանին մէջ ինքնավար , սակայն իրարու միացած :

Փիլարտոս իշխանապետը այսպէս իր վերին հեղինակութեան ենթարկեց Փոքր Ասիոյ արեւելեան կողմը գոյութիւն ունեցող կարգ մը իշխանները , անոնցմէ իրեն չհնազանդողները եւ իր վերին հեղինակութեան չենթարկուողները փոխեց եւ կարգ մըն ալ իրեն ճորտ նոր իշխաններ նշանակեց :

Մալաթիա մէկն էր այն քաղաքներուն , որ կեդրոնը եղաւ Փիլարտոսի հեղինակութեան ենթարկուած այս իշխանութիւններուն , եւ ունեցաւ իր սեպհական կառավարութիւնը :

Եւ եթէ թոյլ տրուէր որ ամրապնդուէր Փիլարտոսի կազմած այս համադաշնակցութիւնը , որուն բնակչութեան գլխաւոր տարրերը կը կազմէին Հայերը եւ դաւանակից Ասորիները , ապահովարար կրնար քրիստոնեայ քաղաքակրթութեան համար փրկարար մեծ դեր մը կատարել եւ բիւզանդական կայսրութեան կեանքը երկարաձգել եւ թերեւս կործանումէ փրկել : Դժբախտաբար ամրապնդելու ժամանակ չտրուեցաւ :

Ինչպէս ըսի , 1079—1080-ին Դանիշմենտի նախաձեռնութեամբ Ալփաւլանի հիմնած իսլամ իշխանութիւնները , որ ՄեծՍելճուկին հովանաւորութեան տակ կը գտնուէին , ընդհանուր գրոհ մը տուին շատ աղիտալի հետեւանքնե-



քով, վասնզի Հայաստանէն Փոքր Ասիա տեղափոխուած հայ թագաւորութիւնները ջնջուեցան եւ Բիւզանդացիներու պաշտպանութեան երկրորդ գիծը ճեղքուեցաւ:

Փիլարտոս կորսնցուց իր դաշնակիցներէն կամ ճորտերէն մէկ կարեւոր մասը:

Փիլարտոս զբաղած յարձակող Սելճուկներուն դէմ պաշտպանելու Անտիոքը, Կոմմադիէնէն եւ Կիլիկիան, չկրցաւ Փոքր Ասիոյ արեւմուտքը հաստատուած հայ թագաւորներուն օգնութեան հասնիլ:

Սերաստիոյ, Պիղուի եւ Ծամնդաւի հայ արքունիքներու վերջին մնացորդները իսկոյն ապաստանեցան սելճուկ հարուածներու յաջողութեամբ տոկացող Փիլարտոսի քով, որ կրցած էր կազմել Կապադովկիոյ, Կիլիկիոյ եւ հիւսիսային Սիւրիոյ եւ Միջագետքի մէջ հաստատուած հայ իշխանութիւններէն դաշնակցային պետութիւն մը: Ուստի Փիլարտոս նախապէս այդ շրջանակին մէջ դառնուող հայազգի կամ օտար ծագումով բիւզանդական պաշտօնակալները, երբ կամովին հպատակեցան ու գործակցեցան իրեն, հաստատեց եւ պաշտպանեց զանոնք իրենց իշխանութիւններուն մէջ:

Նոյնպէս Արեւելեան Հայաստանէն արտագաղթող հայ իշխանները, որոնք իրենց զօրքերով կու դային Եփրատի արեւմտեան կողմը, Փիլարտոս հովանաւորեց եւ զանոնք տեղաւորեց զանազան վայրեր: Անիկա ոչ մէկ ոյժ արհամարհեց, եւ աշխատեցաւ իր կազմած իշխանապետութիւնը ամրապնդել: Անիկա գիտցաւ նոյնիսկ քաղաքականութիւնը եւ կրօնքը իրարու չխառնել, եւ աշխատեցաւ դրացի արաբ իսլամ էմիրներն ալ գործակից ունենալ, քանի որ անոնք ալ իբրեւ հակառակորդներ Սելճուկներուն իրեն բնական դիմակիցներն էին:

Ուստի հասկացողութեան եկաւ բոլոր հայ եւ իսլամ մանր իշխանութեանց հետ, որոնք արդէն գոյութիւն ունէին:

Այս քաղաքագիտութեամբ Փիլարտոս՝ ինչպէս կը թուի՝ կ'ուզէր բոլոր սելճուկ եւ բիւզանդական տիրակալութեան հակառակորդ իշխանութեանց դաշնակցային միութիւն մը ստեղծել:

Իր գնահատելի ծրագիրը իրագործելու համար երբեք խտիր չդրաւ միջոցներուն մէջ, ինչպէս Սասունի Թոռնիկ Մուշեղեան իշխանը դաւով սպաննել տուաւ 1073-ին, վասնզի անիկա չէր համակերպած իր ծրագիրներուն:

Փիլարտոսի իշխանապետութիւնը, որ սլզտիկ տէրութիւններու համադաշնակցութիւն մըն էր, եւ շրջապատուած՝ հիւսիս-արեւելքէն եւ հարաւ-արեւելքէն Մեծ Սելճուկին եւ հիւսիս-արեւմուտքէն՝ Դանիշմենտի երկիրներէն, ունէր իր մէջ կարեւոր եւ բազմամարդ քաղաքներ, ինչպէս Մալաթիան, Պարբերդը, Մարաշը, Ուռհան եւ Անտիոքը:

Այս շրջանակը մեծ մասամբ հայաբնակ դարձած էր Յոյներու եւ Ասորիներու չափաւոր խառնուրդով մը, իսկ Իսլամները շատ քիչ էին:

Երբ Փիլարտոս, իր մայրաքաղաքը եւ անոր անմիջական շրջակայքը



պաշտպանելու հարկադրանքին տակ չկրցաւ պաշտպանել հայ թագաւորութիւնները՝ Դանիշմենտի տան յարձակումներուն դէմ, անոնց սահմաններուն մէջ հաստատուած հայ իշխանական տուներէն անոնք, որ իրեն ղիմեցին, ընդունեցաւ եւ իւրաքանչիւրին առանձին կալուածներ յատկացուց, որոնց վըրայ պիտի իշխէին իբր ճորտեր, միեւնոյն ատեն զօրացնելով իր պետութիւնը, որպէսզի տոկար հարաւէն եւ արեւմուտքէն իր վրայ գործադրուած ճնշումին:

Ըստ Միքայէլ Ասորիի՝ Բիւզանդիոն երբ լսեց որ Փիլարտոս եւ իր ճորտերը յաջողած էին առնել շուրջանակի Կիլիկիոյ շատ մը մասերը, Մարաշը, Քեսունը, Ալպիսթանը եւ Մելիտինէն, նաեւ Ուռհան՝ Եփրատի միւս կողմը եւ ուրիշ տեղեր, տուաւ Փիլարտոսի պարգեւներ եւ զայն Սելաւտոս տիտղոսով պատուեց: Այսպէս, Ալեքս Կոմնէն կայսրը իմաստութիւնը ունեցաւ Փիլարտոսը ճանչնալու Բիւզանդական Կայսրութեան ներկայացուցիչ եւ ընդունելու իբրեւ օրինաւոր տէր եւ իշխող Ծոփաց, Մելիտինէի, Կոմմազինէի, Կատաւոնիոյ եւ Լեոնային Կիլիկիոյ նահանգներուն:

Այս կերպով, Փիլարտոս չահեցաւ բիւզանդական կայսրութեան բարեկամութիւնը, սակայն Բիւզանդացիք չկրցան ըմբռնել հայ եւ յոյն գործակցութեան մեծ կարեւորութիւնը եւ չօգնեցին 1079—1080-ին Կապադովկիոյ Հայ Արծրունի եւ Բագրատունի թագաւորներուն, ինչպէս նաեւ առանձին ձգեցին Սելճուկներու դէմ Փիլարտոսը:

Եթէ Յոյները կարենային ըմբռնել վտանգին մեծութիւնը եւ ունենային զայն հեռացնելու համար պարագային պահանջած արթնամտութիւնը, Փիլարտոսը պիտի չձգէին առանձին երբ Սիւլէյման եւ Դանիշմենտ ղինակցաբար կու գային Փիլարտոսի երկիրներուն վրայ: Այսպէս 1084-ին Սիւլէյման Իպն Գութուլմիշ անակնկալ կերպով կը գրաւէր Անտիոքը եւ կը տիրէր Կիլիկիոյ, Փիլարտոսի դաւաճանած որդին՝ Եղեսիոյ դուքս՝ Վարսամի կամ Պարսամի մեղսակցութեամբ, եւ Դանիշմենտի զօրավարներէն Պոլտաճի Ամիրան կը տիրէր Զահան գաւառին (Ալպիսթան եւ Կէօքսիւ): Այս յափշտակութիւններով անոր իշխանապետութեան կէսը կը կորդուէր իրմէ եւ թերեւս միւս կէսն ալ պիտի գրաւէին, եթէ Սելճուկները չպառակտուէին եւ Դուռչ՝ Ալփասլանի որդին եւ Մելիք Շահի եղբայրը եւ Սիւլէյման իրարու հետ պատերազմի չբռնուէին Անտիոքի եւ Հալէպի համար, եւ Սիւլէյման Իպն Գութուլմիշ, Իկոնիոյ առաջին Սուլթանը (1075—1086) չսպաննուէր: Փիլարտոս, որ այս պառակտումէն եթէ չօգտուէր Սիւլէյմանի եւ Դանիշմենտի միացեալ յարձակումներէն պահ մը ազատ մնալով, բայց այս անգամ ալ իր դէմը կը գտնէր Դուռչը, երբ Յոյներէն լքուած էր եւ կորսնցուցած՝ իրեն ղինակից Մարտինի եւ Մուֆարղիւնի երկու իսլամ ամիրաները: Փիլարտոս յուսաց այս նեղ կացութենէն ազատիլ՝ հպատակիլ խոստանալով Մեծ Սելճուկին եւ կամ Պաղտատի ամիրապետին: Անիկա նոյնիսկ իսլամութիւնը ընդունելու չվարանեցաւ, իր պետութիւնը փրկելու համար, եւ արդարեւ յաջողեցաւ կերպով



մը, քանի որ Պաղտատի խալիֆայէն արտօնութիւն ստացաւ իր երկիրը ետ առնելու, սակայն մինչեւ որ դարձաւ տիրանալու համար իր երկրին, մնացեալ մասն ալ գրաւուած գտաւ, հաւանօրէն Դդուշէն:

Այսպէս վերջ գտաւ նաեւ Փիլարտոսի իշխանապետութիւնը 1086-ին, Կապադովկիոյ հայ ճորտ թագաւորութիւններէն վեց տարի ետք միայն:

ԺԳ.

## ՄԱԼԱԹԻՈՅ ՃՈՐՏ ԻՇԽԱՆՆԵՐԸ

Ե Ի

### ԳԱԲՐԻԷԼ «ՅՈՅՆ»Ը

Ինչպէս տեսնուեցաւ, Փիլարտոս իր կառավարութեան տուած էր աւատապետական կազմ եւ իր տիրապետութեան շրջանակին մէջ հայ թագաւորական տուններէն իշխաններուն բնակութեան տեղեր յատկացուցած եւ իրեն հնթակայ ճորտ իշխանութիւններ հիմնած էր, կարեւոր ոյժ մը գոյացնելու համար Եփրատի հովիտին մէջ, Եփրատացւոց կամ Կոմմազինէի, հիւսիսային Սիւրիոյ եւ արեւելեան Կիլիկիոյ մէջ:

Նաեւ այն ատենները, Փոքր Ասիոյ արեւելեան մասերուն մէջ տիրող խառնակ վիճակէն օգտուելով երեւան եկած էին կարգ մը բախտախնդիրներու գլխաւորութեամբ իշխանութիւններ, զորս նաեւ հովանաւորած էր Փիլարտոս, եւ անոնց ալ գերիշխանութիւնը իրեն սեպհականած էր:

Հետաքրքրական է լուսանցադրութիւն մը, որ Միքայէլ Ասորիի ժամանակագրութեան ձեռագիրներէն մէկուն մէջ գտնուած է եւ որ շատ բան կը բացատրէ ցոյց տալով որ «Փիլարտոս Թուրքերէն առած չէր այդ ընդարձակ հողերը եւ փաղաֆները, այլ Յոյները անոնց վրայ իշխել տուած են անոր, որպէսզի իրենց համար պահպանէ: Սիւլէյման (Իսկն Գուլթուլմիշ) Անտիոք եկաւ եւ առաւ Փիլարտոսէն<sup>1</sup>: ... Թուրքերը Փիլարտոսէն առին Քայշումը (հաւանօրէն Քեսուն), Ռապատը, Ճիհունի փաղաֆները<sup>2</sup> եւ ուրիշ փաղաֆներ» (Michel le Syrien, Գ. հտ., էջ 173):

Ասիկա ցոյց կու տայ թէ Փիլարտոսի աւատապետութիւնը կազմուած էր մասնաւորապէս բիւզանդական ստացուածքներու վրայ, եւ առաւելապէս

(1) 1084-ին, ինչպէս տեսնուեցաւ վերը:

(2) Պուտաճի ամիրայի գրաւումը (տես վերը):



այն իշխանութիւններէն, որոնք Փոքր Ասիոյ արեւելեան կողմը կը գտնուէին, Բիւզանդացիներէ շնորհուած կամ յեւելակուլթեամբ անոնցմէ յափշտակուած հողերու վրայ:

Միքայէլ Ասորի Անտիոքի Պատրիարքը (1166—1199), որ գրեթէ ժամանակակից կը համարուի, քանի որ 1126-ին Անտիոք ծնած էր եւ ապրած մինչեւ 1199, իր Պատմութեան մէջ կ'ըսէ թէ «այն ատենները Հայեր կային, որոնք Փիլարտոսի օրերէն սկսեալ ինչինչ տեղեր կը գրաւէին: Ասոնցմէ մէկն էր Գոդ Վասիլ որ Քեսունի եւ Ռապատի կը տիրէր: ... Հայեր ալ կային որոնք գրաւած էին Կիլիկիոյ գանազան մասերը: Ասոնք կը կոչուէին Ռուբէնի որդիք:

Հայերը գաղթած էին Վասիլ կայսեր օրով<sup>1</sup> եւ երբ Թուրքերը արշաւեցին Միֆայէլ կայսեր<sup>2</sup> օրով, [Բիւզանդացիք] Փիլարտոսի իշխանութիւն տուին Կիլիկիոյ վրայ, որպէսզի դիմադրէ Թուրքերուն, որովհետեւ ռազմատենչ կ'երեւէր...

Այդ ատենէն ի վեր Հայերը տիրացան Կիլիկիոյ եւ Սիւրիոյ մէջ տեղերու: Հարիւր տարի ետք կաթողիկոսը Մեծ Հայաստանի մէջ ենթարկուած ըլլալով հոն տիրող Թուրքերու ճնշումներուն, Կիլիկիոյ հայ իշխանները իրենց քով բերել տուին իրենց կաթողիկոսը<sup>3</sup>» (Գ. հտ., էջ 18):

Ասորի պատմագիր պատրիարքին յիշատակած վայրերը, որոնց տիրացած էին Հայերը, ստորադասուած էին Փիլարտոսի, որուն աւատապետութեան շրջանակին մէջ արդէն գոյութիւն ունեցող եւ ապա իր կողմէ հիմնուած ճորտ իշխանութիւնները տասնեակի մը չափ էին:

Այսպէս ինքը հաստատած կամ հովանաւորած էր Հայաստանէն Փոքր Ասիա տեղափոխուող Արծրունի եւ Կարսի ու Անիի երկու Բագրատունի թագաւորները, Մալաթիոյ, Քեսունի, Մարաշի<sup>4</sup>, Եգեսիոյ, Անտրիունի, Ծովքի, Պիրի, Արեւըտնի, Կարկառի, Տարսոնի, Լամբրոնի եւ Պապեռոնի, Ռուբէնի իշխանութիւնները (տես ՊԱՏ. ՀԱՅԱՍՏԱՆԻ ՍԱՀՄԱՆՆԵՐԸ, էջ 103—6):

Ահա այս Փիլարտոսի ստորադասեալ բազմաթիւ մեծ ու պզտիկ իշխանութիւններուն մէջ կային մէկ քանիներ, որոնք մեր շահագրգռութեան առարկայ Մալաթիոյ շրջանակին մէջ կը գտնուէին:

Այսպէս Փիլարտոսի ամենէն կանուխ գրաւած վայրերէն մէկուն՝ Մալաթիայի, որ կը նկատուէր միակ բանալին Արածանիի հովիտէն դէպի Կա-

1 Վասիլ Բ.ին (976—1025) կ'ակնարկէր:

2 Հաւանօրէն Միքայէլ Դ. Պափլագոնացի (1034—1041) եւ Միքայէլ Ե. Կալոփատէ (1041—1042) կայսրերէն մէկուն կ'ակնարկէր:

3 Խաչիկ Բ. Անեցի (1054—1060) եւ Գրիգոր Բ. Վկայասէր (1065—1105) կաթողիկոսներուն համար է խօսքը:

4 Մարաշը Փիլարտոս իրեն վերապահած եւ իր համադաշնակցութեան մայրաքաղաք դարձուցած էր: Իր մահէն վերջ «Իշխանաց իշխան» տիտղոսով թաթուլ իշխան է Մարաշի մէջ, Փիլարտոսի պէս իբրեւ «զօրապետ հռոմոս» (Ուլ. 332 եւ 424):



պաղովկիա երկարող մեծ պողոտային (հմտ. Քասունի, ՓԻԼԱՐՏՈՍ ՀԱՅԸ, էջ 20), կառավարիչ նշանակած էր Թորոսը կամ Թէոդորոսը<sup>1</sup>, որ որդին էր «յունազգի»<sup>2</sup> Հեթումի մը (տես Michel le Syrien, Գ. 173—4), որուն ծագումը եւ նախընթացը ծանօթ չեն<sup>3</sup>:

Փիլարտոս զայն Մալաթիայէն Եդեսիա փոխադրած էր եւ նշանակած «Կիւրապաղատ Եդեսիոյ» (տես ՄԻՔԱՅԷԼ ԱՍՈՐԻ, տպ. 1871, Երուսաղէմ, էջ 403) ըստ Կոմմագենացիի (ՓԻԼԱՐՏՈՍ ՀԱՅԸ, էջ 86) 1089-ին կամ աւելի հաւանօրէն 1088-ին իբր յաջորդ իր դաւաճան որդւոյն Վարսամի, որ 1087-ին սպաննուած էր (ՉԱՄ., Գ. էջ 12, հմտ. ՊԱՏՄՈՒԹԻՒՆ ՀԱՅ ԳԱՂԹԱԿԱՆՈՒԹԵԱՆ, Բ., էջ 410):

Թորոս, որ փեսան էր Մալաթիոյ Գաբրիէլ իշխանին, երբ Սելճուկներէն պարտուեցաւ, ապաստանեցաւ Մալաթիա իր աներոջ քով: Դիւղալ ամիրան զայն վերահաստատեց Եդեսիոյ Կիւրապաղատութեան մէջ 1094-ին (ՈՒՌ., էջ 300):

Երբ Պարկիարուխի (1092—1104) դէմ մղուած պատերազմին մէջ Դիւղալ սպաննուեցաւ, Թորոս իբր երախտաւորեալ ապաստան տուաւ անոր որդւոյն Ռատուանին (ՈՒՌ., էջ 302) եւ օգնեց անոր, որպէսզի նստի սուլթան Հալէպի մէջ (ՎԱՐԴԱՆ, էջ 108):

Քիչ վերջ Դիւղալի ցեղէն ուրիշ մէկը՝ Ալփիլակ Բիւզանդացիներու օգնութեամբ սուլթան հռչակուեցաւ եւ Եդեսիա կամ Ուռհա գալով փորձեց տիրել քաղաքին: Թորոս Կիւրապաղատ 33 օր յետոյ յաջողեցաւ զայն թունաւորելով սպաննել (ՈՒՌ.Հ., էջ 305 եւ ՎԱՐԴԱՆ, էջ 108):

1095—6-ին Որթոքեան Սուլթան եւ Սամոսատի<sup>4</sup> կամ Շամշատի Պալտուխ Դանիշմենտեան ամիրան Ուռհայի վրայ յարձակեցան (1095), սակայն չարաչար յաղթուեցան: Թորոս սակայն վախնալով որ ի վերջոյ պիտի ընկճուի, ապաւինեցաւ Խաչակիրներուն, որոնք տակաւին Կիլիկիոյ սահմանները նոր հասած էին եւ զանոնք իր մօտ հրաւիրեց:

Պաղտին Կոմսը՝ յատուկ գունդով Եփրատացւոց կողմը արշաւեց եւ Թորոս Կիւրապաղատին օգնութեամբ թլպաչարը գրաւելէն ետք հիւր գնաց Ուռհա, ուր հակառակ իր երդումներուն սպաննեց Թորոս իշխանը եւ տիրեց

1 Միքայէլ Ասորի միայն Թէոդորոս անունով յիշած է, իսկ Միքայէլ Ասորի (տպ. Երուսաղէմ, 1871, էջ 306 եւ այլն) Խաւրիւ:

2 Michel le Syrien հաւանօրէն կը սխալի Հեթումը «յունազգի» կոչելով: Մատթէոս Ուռհայեցի (էջ 300) կը յիշէ «գիշխան Հոռոմոց զԹորոս որ ասէին Հեթմոյ որդի» առանց անոր հօրը ազգութեամբ զբաղելու: Հ. Աճառեան Անձնանունների Բառարանին (Բ. հտ., էջ 346) մէջ զայն հայ կը ներկայացնէ, եւ կարծեմ շատ իրաւունք ունի:

3 Կոմմագենացի (Եդիա Քասունի) իր փիլարտոս Հայր գիրքին մէջ (էջ 86) կ'ըսէ Թէ Թորոս «հաւանաբար նախապէս կառավարիչը եղած էր Խարբերդի», սակայն առ այս ոչ մէկ փաստ կայ: Մալաթիա շփոթուած պիտի ըլլայ Խարբերդի հետ:

(4) Այժմ Ալթուն թաշ Գալէ:



Եղեսիոյ, 1097-ին կամ 1099-ին (ՈՒՌ., էջ 319, Ալիշան ՇՆՈՐՀԱԼԻ Եւ ՊԱՐԱԳԱՅ ԻԻՐ, էջ 188, Օրմանեան ԱԶԳԱՊԱՏՈՒՄ, էջ 1321, Ալպոյաճեան, ՊԱՏ. ՀԱՅ ԿԵՍԱՐԻՈՅ, էջ 475) :

Թորոս Կիւրապաղատի, ըստ Միքայէլ Ասորի պատրիարքի (Գ. հտ. էջ 173—4) Եղեսիա փոխադրուելէն ետք՝ Մալաթիոյ կառավարիչ նշանակուած է Փիլարտոսէն «հայազգի» Հարէպ անուն մէկը, որուն յաջորդած է Balantinos (Վաղենտիանոս) (Michel le Syrien, Գ. հտ., էջ 173) :

Ո՛չ Հարէպ եւ ո՛չ Վաղենտիանոս մեր մատենագիրներէն եւ մեզի ծանօթ ուրիշ օտար պատմիչներէն չեն յիշուած :

Վերջապէս Մալաթիոյ իշխան կը նշանակուի Փիլարտոսէն Գաբրիէլ «յոյն», որուն Michel le Syrien (Գ., 173) «չարամանկ» ածականը կու տայ :

Կ'ըսուի թէ Գաբրիէլ յելուզակութենէ առաջ եկած էր եւ իր կեանքով շատ կը յիշեցնէր Փիլարտոսը, որ զայն «կաօնցեալ էր» Մալաթիոյ իշխան (ՄԻՔԱՅԷԼ ԱՍՈՐԻ, էջ 406 կամ Michel le Syrien Գ. 179) : Ուրեմն Փիլարտոս այս իշխանին վստահած էր Մալաթիոյ պէս ռազմական կայանի մը իշխանութիւնը, եւ զայն իր ճորտը (Vassal) կը նկատէր :

Այս Գաբրիէլը, որուն «Հոռոմ» մականունը տրուած է, յոյն չէր, այլ յունադաւան հայ մը (Zeitschrift für Armenische Philologie Marburk երկու հատոր, Ֆինզի տնօրէնութեամբ հրատարակուած. նաեւ Գուլիելմոս Տիւրացի [Guillaume de Tyr] եւ Աբուլ Ֆարաճ) : Գաբրիէլ 1079—1080-էն առաջ իշխել սկսած է Մելիտինէի, ինչպէս կը հասկցուի Միքայէլ Ասորի պատրիարքի սա վկայութենէն թէ այդ թուականներուն «Մելիտինէի մէջ կ'իշխէր Գաբրիէլ<sup>1</sup> անուն քուրճ մը» (Michel le Syrien, Գ. 180), որ ուրիշ մէկը չէր, այլ նոյն ինքն յունադաւան Գաբրիէլ հայը, որուն ինչո՞ւ «թուրք» ըսուած է, յայտնի չէ : Թերեւս իբր անարգական մակդիր տրուած է իրեն այս կոչումը, վասնզի Ասորիները սաստիկ կ'ատէին Գաբրիէլը իր Ասորիներուն դէմ գործադրած անիրաւութիւններուն եւ անգութ արարքներուն համար :

Գաբրիէլի իշխանութեան ատեն 1079—1080-ին պատահած է սաստիկ սով մը (տես ՄԱՏԹԷՈՍ ՈՒՌ-ՀԱՅԵՅԻ, էջ 261, ՊԱՏՄՈՒԹԻՒՆ ՀԱՅ ԳԱՂԹԱ-ԿԱՆՈՒԹԵԱՆ, Բ., էջ 483—4), որուն վրայ կը խօսի նաեւ Ասորի Միքայէլ Պատրիարքը եւ կ'ըսէ թէ երկու լեթրէ հացը ինչպէս նաեւ երկու լեթրէ դինին մէկ տինարի ծախուեցաւ (Michel le Syrien, Գ. 180) :

Իսկ Փիլարտոսի պատմութեան ասպարէզէն անհետանալէն (1086) ետք, իրեն ստորակարգ Մալաթիոյ այս իշխանը Փիլարտոսի ճորտ շատ մը ուրիշ հայ իշխաններու պէս, համակերպած է ստեղծուած կացութեան եւ առանձին կառավարած՝ իր երկիրը, դերիշխանութեանը տակ բարի վեհապետի համբաւով եւ քրիստոնէից պաշտպան ու բարեկամ մեծ Սելճուկին Մելիք Շահին

(1) Միքայէլ Ասորիի ասորերէն բնագրին մէջ հոս Գաբրիէլ անունին ալլափոխուած ձեւերը գործածուած են, ինչպէս Geraoul, Khouril եւայլն, բայց միեւնոյն անձին համար գործածուած են :



(1072—1092), որուն հարկատու դարձաւ եւ կրցաւ պահել իր իշխանութիւնը:

Գաբրիէլ ըմբռնելով թէ ի վերջոյ Բիւզանդացիները պիտի չկարենան դիմադրել թուրքերուն, Մալաթիոյ վրայ իր տիրապետութիւնը հաստատել տուաւ խալիֆային: Միքայէլ Ասորի պատրիարքը կը պատմէ թէ երբ Գաբրիէլ «տեսաւ որ Յոյները յաղթուած են, իր կիներ դրկեց Պաղտատ եւ խալիֆայէն հրովարտակ առաւ, որով իրեն կը շնորհուէր Մելիտինէն» (Michel le Syrien, Գ. 179):

Որչափ կը հասկցուի Ասորի պատրիարքին գրածներէն, Գաբրիէլ կըրցած է զանազան խորամանկութիւններով հեռացնել Մալաթիայէն թուրք ասպատակները, ինչպէս նաեւ պաշտպանել իր փեսան՝ Եղեսիոյ թորոս Կիւրապաղատը (հմմտ. ՄԱՏԹԻՈՍ ՈՒՌՀԱՅԵՅԻ, էջ 300):

Այսպէս, Միքայէլ Ասորի կը պատմէ թէ ինչպէս Գաբրիէլ խորամանկութեամբ յաջողած է էմիր Ալ-Ֆարիճը<sup>1</sup> (որ Մալաթիոյ վրայ եկած էր 1096-ին) խաբել եւ հետը առնելով զայն Եղեսիա երթալ ու հոն թունաւորելով ըսպաննել (Michel le Syrien, Գ., 179):

Ալ-Ֆարիճի մահէն ետք, Գաբրիէլ թուրքերը մինչեւ Մելիտինէ տարաւ եւ զանոնք խաբեց: Քաղաք մտաւ իբր թէ քաղաքը անոնց յանձնելու համար, եւ զանոնք դուրսը ձգելով դուռները փակեց:

Թուրքերը այն ատեն իրենցմէ մէկը պետ ընտրեցին<sup>2</sup> եւ երկիրը աւերեցին ու քաղաքը պաշարեցին: Գաբրիէլ, որ 1086-էն 1092 իր փեսին՝ Եղեսիոյ թորոս Կիւրապաղատին հետ իր իշխանութիւնը պահելու համար Դանիշմենտի հովանաւորութեան տակ մտած էր եւ այս կերպով եղած էր բոլորովին անկախ (Ա. Ալպոյաճեան, ՊԱՏՄ. ԵՒԴՈԿԻՈՅ ՀԱՅՈՑ, էջ 196—7), պաշտպանութեամբ Դանիշմենտէն:

Կիւմիւշթէքին Իպն Դանիշմենտ<sup>3</sup> (1084—1106) միջնորդեց թուրք աս-

(1) Michel le Syrien-ի թարգմանիչը այս Ալ-Ֆարիճը նոյնացուցած է Մատթէոս Ուռհայեցիէ (էջ 305) եւ Վարդան Պատմիչէն (էջ 108) յիշուած Ալփիլակ Սուլթանին հետ, որ Յունաց պաշտպանութեամբ Դուռլի Ռատուան որդիէն Հալէպի սուլթանութիւնը յափշտակած էր եւ Եղեսիոյ թորոս Կիւրապաղատը անոր հնազանդած էր, «որպէսզի առցէ վրէժ ի թշնամեաց իւրոց», բայց որովհետեւ ան չար խորհուրդը յղացած էր թորոսը սպաննելու եւ քաղաքը կողոպտելու, թորոս զայն թունաւորելով սպաննեց, անոր Ուրֆա գալէն 33 օր ետք եւ ինքը շարունակեց իր իշխանութիւնը (ՈՒՌ., 305, ՎԱՐԴԱՆ ԷՋ 108—9):

Միքայէլ Ասորիի ֆրանսերէն թարգմանիչը J. B. Chabot մի քանի պարագաներու նմանութենէն տարուելով՝ հաւանօրէն Ալ-Ֆարիճը Ալփիլակի հետ նոյնացուցած է, ինչ որ շատ հաւանական չի թուիր:

(2) Այս պետին անունը Tawil նշանակած է Ասորի պատրիարքը, իսկ իր գործին թարգմանիչ Chabot կը կարծէ թէ ասիկա Դաւիթ անունին հայկական ձեւն է, ինչ որ ճիշդ չէ. հետեւաբար շատ կասկածելի է այս մեկնաբանութիւնը: Նոյնպէս հաւանական չէ որ թուրքերը հայ պետ մը ընտրած ըլլան:

(3) Դանիշմենտ այս էմիրը նաեւ կոչուած է ալաղան անուններով, ինչպէս



պատականերու եւ Գաբրիէլի միջեւ եւ անոնց միջեւ խաղաղութիւնը հաստատեց (Michel le Syrien, Գ., 173) :

Գաբրիէլ իր իշխանութիւնը արտաքին ոյժերու դէմ կրցաւ ամրապնդել զանազան միջոցներով, բայց դժբախտաբար չկրցաւ ներքնապէս զօրացնել՝ իր իշխանութեան ենթարկուած բնակչութիւնը կապելով իրեն: Ընդհակառակը իր անողոք խստութեամբ եւ անգթութիւններով ու աւազակային արարքներով ժողովուրդը — մասնաւորաբար Ասորիները, որ մեծ թիւ ունէին — իրեն դէմ հանեց: Միքայէլ Ասորի Պատրիարք իր պատմութեան մէջ զայն կը ներկայացնէ չատ սեւ գիծերով, վասնզի ան չէ յարգած Ասորիներու կրօնական զգացումները: Միքայէլ Ասորի (Գ. 182) կը պատմէ թէ Ասորի եպիսկոպոսները 1089-ին<sup>1</sup> Ապուլ Ֆարաճը Պատրիարք կ'ընտրեն, որ միաբան էր Ս. Պարսամի վանքին եւ ուսուցիչ հոն:

Ապուլ Ֆարաճ չուզեց ընդունիլ այս պաշտօնը, վասնզի Ապտուն անուն մետրոպոլիտ մը<sup>2</sup> պառակտած էր Ասորի եկեղեցին: Եպիսկոպոսները Ապուլ Ֆարաճը կախակայեցին եւ 9 ամիս վերջ զայն բռնի բերել տալով Գաբրիէլի միջոցով, ձեռնադրեցին (1 Դեկտեմբեր 1090-ին) եւ կոչեցին Աթանասիոս անունով:

Ապտուն երբ իմացաւ ասիկա, Գաբրիէլի դիմեց եւ խոստացաւ երկու հազար դարեհական կամ դահեկան, եթէ չճանչնայ Աթանասիոսը, սակայն Գաբրիէլ մերժեց այս առաջարկը եւ վռնտեց զայն:

Գաբրիէլ կ'ակնկալէր որ Ապուլ Ֆարաճ ասիկա լսելով, պիտի դար ողջունելու զինք եւ շնորհակալութեան համար նուէրներ պիտի բերէր: Պատրիարքը անոր սպասածը չըրաւ եւ Գաբրիէլ դառնացաւ անոր դէմ եւ զայն Ս. Պարսամի վանքէն բերել տուաւ եւ երբ ան իր ապարանքին առջեւ հասաւ, զայն դիմաւորեց անձամբ եւ անոր օրհնութիւնը խնդրեց, ինչ որ Պատրիարքը զլացաւ ըսելով որ «դուն յոյն ես եւ մենք՝ ասորի»: Գաբրիէլ զայրացաւ եւ հրամայեց Պատրիարքը բանտարկել բոզի մը տունը զայն անարգելու համար:

Պատրիարքն ալ փոխադարձաբար հրամայեց եկեղեցիները գոցել եւ զանգակները չհնչեցնել, մինչեւ որ զինք բանտէն հանեն: Ասորիները իրենց միջեւ 400 տինար ոսկի հաւաքեցին եւ Գաբրիէլին տուին, որ արձակել տուաւ Պատրիարքը եւ թողուց որ դառնայ Ս. Պարսամի վանքը:

Գաբրիէլ ուրիշ ապաշնորհ քայլեր ալ առած է Ասորիներու դէմ եւ ատելի եղած է անոնց:

Մուհամմէտ Իսմայիլ Իպն Դանիշմենտ Կիւմիւշթէքին, Մուհամմէտ Իպն Կիւմիւշթէքին, Ահմէտ Իպն Դանիշմենտ, Ահմէտ Ղազի, Մելիք Ղազի Մուհամմէտ եւայլն: Յաջորդած էր Դանիշմենտեան իշխանութեան հիմնադիր Տայլուի:

(1) Հաւանօրէն 1099 պիտի ըլլայ, վասնզի մինչեւ 1099 պատրիարք էր Միքայէլ Ասորի:

(2) Ասիկա ետքը հակաթու պատրիարք եղած է ըստ Chabot-ի:



Այսպէս երբ Հոկտեմբեր 1095-ին կը մեռնի Մելիտինէի Մետրոպոլիտը՝ Իզնատիոսը, Ապուլ Փարաճ անոր տեղ կը ձեռնադրէ 22 Մայիս 1096-ին Սայիտ Պար Սաբունին, որ բազմահմուտ աստուածաբան մը եւ հռչակաւոր հեղինակ մըն էր ասորերէն ու յունարէն երկասիրութեանց (Michel le Syrien, Գ. 185) :

Իր ընտրութիւնը կատարուած ըլլալով Գաբրիէլի պահանջումով՝ Սայիտ Պար Սաբունին, որ Յովհաննէս վերակոչուած էր, Մելիտինէ եկաւ երբ քաղաքը Թուրքերու յարձակումին կ'ենթարկուէր: Իր քաղաք մտած օրն իսկ դռները դոցուեցան եւ Իկոնիոյ Գըլըճ Արսլան Ա. սելճուկ սուլթանը պաշարեց քաղաքը 1096-ին:

Գաբրիէլ եպիսկոպոսէն կը խնդրէ իրեն հետ հսկել պահապաններու վրայ եւ ան իր կարելին կ'ընէ այս ուղղութեամբ եւ կը քաջալերէ ժողովուրդը:

Գըլըճ Արսլան դեսպան մը կը ղրկէ, որ կը մօտենայ եւ եպիսկոպոսին կ'ըսէ որ լսէ իր խօսքերը:

Գաբրիէլի հրամանով եպիսկոպոսը պարիսպին վրայ կը բարձրանայ եւ Գաբրիէլ անոր ետին պահուըտած մօտիկ կ'ընէ դեսպանին խօսքերը: Դեսպանը կ'ըսէ թէ «Սուլթանը ձեզի կ'ըսէ որ քաղաքը յանձնէք: Այն ատեն ձեզի խաղաղութիւն եւ բարիք պիտի չնորհէ, ապա թէ ոչ, սուրով պիտի դրաւէ եւ Աստուած ձեզմէ հաշիւ պիտի պահանջէ թէ՛ ձեր եւ թէ ամբողջ ժողովուրդին արիւնին համար»: Մետրոպոլիտը դեսպանին պատասխանեց ըսելով թէ «մինչեւ հիմա ոչ ոք կրցած է այս քաղաքը պատերազմելով դրաւել եւ երբեք պիտի չկարենայ: Տասը տարուան եւ աւելի ատենուան համար հաց ունի» եւ դեսպանը ետ դարձուց այս պատասխանով: Մետրոպոլիտը Գաբրիէլի ըսաւ. «Հիմա լսեցիր, տէր, թէ ի՞նչ ըսուեցաւ. լաւ է որ մեր կամքով յանձնուինք»: Եւ երբ Գաբրիէլ այս խօսքը լսեց, սկսաւ ատել եպիսկոպոսը եւ Գաբրիէլի դաւանակից Յոյները շատ դէշ աչքով նայիլ սկսան եպիսկոպոսին, զոր Ֆրանքները, այսինքն Խաչակիրները, արդէն շարունակ կ'ամբաստանէին թէ քաղաքը Թուրքերուն յանձնել կ'ուզէր, վասնզի լսած էին թէ անիկա իրենց դաւանակիցները պզտիկ կը ձգէր իր կրօնադաւանական հմտութեամբ:

Միքայէլ Ասորիի պատմութենէն կը հասկցուի թէ Գաբրիէլ եւ Յոյները տեսնելով որ ժողովուրդը որքան կը սիրէ եպիսկոպոսը, կ'որոշեն զայն սպաննել: Երբ պարիսպէն վար կ'իջնէ, անոր կը պատմեն թէ Գաբրիէլ հաւատացեալ մը (այսինքն Ասորի մը) մահուան դատապարտած էր: Եպիսկոպոսը, ընկերակցութեամբ քահանաներու, կը փութայ Գաբրիէլի քով, խընդրելու համար որ մահուան պատիժը չգործադրուի: Գաբրիէլը, որ դուրս ելած էր, եպիսկոպոսը դտաւ երկու պարիսպին միջեւ, ձի հեծած եւ չրջապատուած հետեւորդներով: Եպիսկոպոսը սկսաւ աղաչել ըսելով «Գթա, ո՛վ օրհնեալ իշխան, գթա՛ դժբախտներուն: Դուրսը կը սպաննեն, ներսն ալ թող մարդ չսպաննուի»:



Գաբրիէլ, որ միտքը դրած էր եպիսկոպոսը սպաննել՝ ըսաւ. «Ուրեմն դուն ալ քաղաքը յանձնել կ'ուզես Թուրքերուն» եւ հրամայեց նիզակաւորներէն մէկուն, «ղա'րկ»։ Բայց երբ ան չհամարձակեցաւ, ինքն առաւ նիզակը, զարկաւ գլխուն եւ սպաննեց (4 Յուլիս 1096-ին), անոր ձեռնադրութենէն միայն 40 օր ետք (Michel le Syrien, Գ., 191)։ Հոն գտնուող քահանաները փախան եւ ցրուեցան։ Ամբողջ քաղաքը յուզման ենթարկուեցաւ եւ բազմութիւն հաւաքուեցաւ եպիսկոպոսին նահատակուած վայրը։ Գաբրիէլ վախցաւ, երբ տեսաւ որ ժողովուրդը կը հաւաքուէր։

Հրամայեց եպիսկոպոսին մարմինը պարտէզ տանիլ եւ եղէգներու մէջ ծածկել։ Երկու օր ետք յուղարկաւորութիւնը կատարուեցաւ եւ մարմինը ամփոփուեցաւ եկեղեցիի մը մէջ (տես Michel le Syrien, Գ. հտ., էջ 186—187)։

Գաբրիէլի արարքներէն Միքայէլ Պատրիարք (Michel le Syrien, Գ. 180) կը յիշէ նաեւ 1098-ին կատարած անոր մէկ շատ անգութ գործը։

1098-ին Գաբրիէլ քաղաքին ազդեցիկ անձերէն<sup>1</sup> շատերը սպաննած է եւ անոնց տուններէն ոսկի, արծաթ եւ ուրիշ առարկաներ առած է, ինչպէս նաեւ գրաւած է Ասորի եկեղեցիին խաչերը, բուրվառները եւ նոյնիսկ միւռոնի անօթը եւ ամբողջ գանձը։

Գաբրիէլ նաեւ քանդած է տունները եւ չինած քաղաքին միջնաբերդն ու պարիսպը (Michel le Syrien, Գ., էջ 180)։

Բոլոր այս արարքները կ'երեւի թէ ունեցան իրենց հակազդեցութիւնը եւ Գաբրիէլ բնաւ չսիրուեցաւ ժողովուրդէն։ Մալաթիոյ բնակիչները իրեն դէմ էին, այնպէս որ աւելի Թուրքերուն օգնեցին քան թէ իրեն։

Այս պայմաններուն մէջ անխուսափելի էր Մալաթիոյ Թուրքերու կողմէն գրաւումը։

Այն ատեն Սելճուկները Փոքր Ասիոյ մէջ ունէին երկու զօրաւոր իշխանութիւններ, այսինքն Սելճուկ Ռումի սուլթանութիւնը՝ Գոնիա մայրաքաղաքով, եւ Դանիշմենտեան էմիրութիւնը՝ Նիկսար մայրաքաղաքով, որոնք սպառնալիք մը կը կազմէին քրիստոնեայ — մասնաւորապէս հայ — տկար իշխանութիւններու, որոնք հաստատուած էին Եփրատի հովիտին մէջ եւ Տաւրոսեան լեռներուն վրայ։

Ամենէն աւելի վտանգուած իշխանութիւններն էին Մալաթիոյ եւ Եդեսիոյ իրարու բարեկամ կամ դաշնակից երկու հայ իշխանութիւնները, որոնք Ալփասլանի հիմնած երկու իսլամ իշխանութիւններուն գրաւել ծրագրած չըրջանակներուն մէջ կը գտնուէին։ Մալաթիա անմիջական դրացին էր թէ՛ Իկոնիոյ սուլթանութեան եւ թէ՛ Նիկսարի էմիրութեան հողերուն։

Այս երկու իշխանութիւններն ալ չէին կրնար անտեսել Մալաթիոյ ռազմական դիրքին կարեւորութիւնը եւ հետեւաբար երկուքն ալ անխուսափելի

(1) Պատմագիր պատրիարքը անոնց անունները ամբողջ մի առ մի կը յիշէ։



էր որ պիտի ուղէին Մալաթիան գրաւել: Եթէ միացեալ ոյժերով յարձակէին, Մալաթիա շուտով պիտի գրաւուէր. բարեբախտաբար անոնք իբրեւ մրցակիցներ իրարու հետ համաձայն չէին եւ Մելիք Շահի մահէն (1092) ետք իրարու դէմ կը մաքառէին (Ա. Ալպոյաճեան, ՊԱՏՄ. ԵՒԴՈԿԻՈՅ ՀԱՅՈՑ, էջ 196):

Դանիշմենտ էմիրները, որոնք ծագումով կ'երեւի թէ կը սերէին հայ կամ ուրիշ քրիստոնեայ ազգէ մը, աւելի քրիստոնեաներու օգնութեան վրայ յոյս դրած ըլլալ կը թուին, վասնզի, ինչպէս կը տեսնուի, իրենց դաշնակից կը նկատէին Տաւրոսի եւ հիւսիսային Սիւրիոյ քրիստոնեայ պզտիկ իշխանութիւնները, ինչպէս նաեւ իրենց դրացի Մելիտինէի Գաբրիէլ եւ Եդեսիոյ Թորոս իշխանները. ուրեմն կը կռթնէին այդ շրջանակներու մէջ ապրող Հայերուն եւ Ասորիներուն վրայ, զորս սիրաշահիլ կ'աշխատէին:

Դանիշմենտ Ահմէտ Կիւմիւշթէկին Խաչակիրներու այս կողմերը գալուստէն, այսինքն 1097-էն առաջ, իբրեւ իր ճորտերը կամ հովանաւորեալները՝ կը պաշտպանէր, ինչպէս յիշուեցաւ, Մալաթիոյ Գաբրիէլ եւ Եդեսիոյ Թորոս իշխանները, Իկոնիոյ Սելճուկեան Գլըճ Ասլան Սուլթանին պահանջներուն եւ ասպատակներուն դէմ:

Սակայն Գլըճ Ասլան իր ոսոխին այդ դաշնակիցները կը հարուածէր շարունակ: Այսպէս 1096-ին Մելիտինէի վրայ գնաց եւ քաղաքը պաշարեց ճիշդ այն օրերուն երբ Գաբրիէլ կը սպաննէր (+14 Յուլիս 1096) Յովհաննէս վերակոչեալ նոր եպիսկոպոս ձեռնադրուած ասորի գիտուն եկեղեցակաւնը՝ Սայիտ Պար Սաբունին, ինչպէս տեսանք քիչ վերը:

Գլըճ Ասլան (1092—1107) գուցէ յաջողէր քաղաքին տիրել, եթէ Խաչակիրները 1097-ին Նիկիա չհասնէին եւ անկէ չանցնէին Փոքր Ասիա, վասնզի երբ Սուլթանը իմացաւ որ անոնք կը յառաջանան, Մելիտինէի պաշարումը ձգեց՝ երթալ պաշտպանելու համար իր հողերը (հմմտ. Michel le Syrien, Գ., 187):

Դանիշմենտ ալ իր կարգին իր հողերը պաշտպանելու աշխատեցաւ:

Երկու հակառակորդները — Ռումի Սուլթանը եւ Դանիշմենտ էմիրը — առանձին-առանձին ճակատեցան եւ երկուքն ալ պարտուեցան Խաչակիրներէն: Գլըճ Ասլան կը պարտուէր Խաչակիրներէն Հերակլիայի (հիմա Գոնիա-էրէկլի) մօտերը եւ Դանիշմենտի զօրքերը ցիրուցան կ'ըլլային Դարիլէի մէջ (տես Ե. Քասունի, ԱԿՕՍ, Թիւ ԻԶ., էջ 111), վասնզի անոնք զատ-զատ փորձած էին դիմադրել:

Այս ճախողութիւնները իրարու միացուց Գլըճ Ասլան Ա.ը եւ Ահմէտ Ղազի Կիւմիւշթէկինը, որոնք իրարու սերտօրէն գործակցեցան ընդդէմ առաջին Խաչակիրներուն (1097)՝ անոնց Երուսաղէմ երթալու ճամբուն վրայ Փոքր Ասիոյ մէջ: Երկու զինակիցները մեծ չարիք հասցուցին Խաչակիրներուն, մինչեւ որ անոնք հասան Կիլիկիա, որուն հայ իշխանները անոնց օգնեցին ու զանոնք պարենաւորեցին:



Իսկ երբ Խաչակրութեան վերջապահներէն Պոլտուին ուղղակի խալիֆայութեան կեդրոնը Պաղտատի վրայ քաշելու նպատակով դէպի Կեսարիա արշաւեց, Ռումի Սուլթանը եւ Դանիշմենտ իրենց միացեալ ոյժերով ամէն ճիգ ըրին հասարակաց թշնամիին դէմ կանգնելու համար, Մեծ Սելճուկին Պարկիարուխի հետ, որ 1097-ին մեծ բանակով մը իր սպարապետը Պիրպողան զրկեց արեւմուտք, Ֆրանկներու դէմ: Ան գրաւեց Անտիոքը, ուր իբրեւ Ամիրա նստաւ Պիրպողայի որդին՝ Աղիւսիան<sup>1</sup>: Բայց Ֆրանկները, ութը-ինը ամիսներու պաշարումէ մը ետք, Անտիոքը վերագրաւեցին՝ քաղաքին քրիստոնեայ բնակիչներուն մատնութեամբ (Ա. Ալպոյաճեան, ՊԱՏՄ. ՀԱՅ ԳԱՂ-ԹԱԿԱՆՈՒԹԵԱՆ, Բ., էջ 415), եւ Աղիւսիան ամիրա «փախաւ ի ֆաղաֆէ եւ սպանաւ ի գեղացեացն մանկադաւ հատեալ զգլուխ նորա» (ՈՒՌ., էջ 321):

Գաբրիէլ, Մալաթիոյ իշխանը, տեսնելով իսլամ իշխանութիւններու գրգռութիւնը հանդէպ քրիստոնեայ փոքր տանուտէրներու, իբրեւ հետեւանք Խաչակրութիւններու, որոնք իսլամ-քրիստոնեայ դօտեմարտութիւն մը ըստեղծեցին Մերձաւոր Արեւելքի մէջ, յարեցաւ քրիստոնեաներու, նման Տաւրոսի եւ հիւսիսային Սիւրիոյ քրիստոնեայ փոքր իշխաններուն, եւ Խաչակիրներուն հետ սիրով վարուեցաւ (Guillaume de Tyr = Գուլիէլմոս Տիւրացի. Թ. 21) եւ աշխատեցաւ իր դիրքը ապահովել: Ասիկա պատճառ եղաւ որ երկու իսլամ զինակից պետութիւնները գրաւելու աշխատին Մալաթիան, որ իբրեւ կամրջագլուխ կարեւոր դիրք մըն էր:

Գլըճ Ասլան, որ երբ Խաչակիրներէն պարտուած էր, Դանիշմենտ Կիւմիւշթէկինի (1086—1106) քով ապաստանած էր, անոր թելադրութեամբ 1100-ին բանակով մը յառաջացաւ դէպի Մալաթիա:

«Ելից գօրօֆ առհասարակ զամենայն դաշտսն եւ յարուցանէր սաստիկ պատերազմ ի վերայ ֆաղաֆին Մելիտինոյ, եւ եդեալ բաբանս նեղէր զֆաղաֆրն»: Գաբրիէլ «զամենայն ֆաջութեամբ կացեալ... ամրացուցանէր զֆաղաֆրն». այնպէս որ «կացեալ անդ Սուլթանին զաւուրս բազումս եւ ոչինչ կարաց առնել, դարձաւ ամօթով եւ գնաց յաշխարհն իւր» (ՈՒՌ., էջ 306) կամ ինչպէս Վարդան (էջ 110) կը վկայէ, Գաբրիէլ Գլըճ Ասլանը «դարձոյց... անարգանօֆ» (հմմտ. F. Chalandon, Jean II. Comnène et Manuel Comnène, էջ 40): Գաբրիէլ ուրիշ ապաւէն չունենալով բոլորովին յարեցաւ Խաչակիրներուն եւ գրեթէ զինակցեցաւ անոնց, իր աղջիկը՝ Մարսիլը կամ Մորֆին կնութեան տալով Պոտուին Բ.ի (Bandour de Burg) (Ալիշան ՍԻՍՈՒԱՆ, էջ 47, ՎԱՐԴԱՆ, էջ 110), որ Եդեսիոյ կոմսն էր եւ լաւ յարաբերութիւններ պահեց իր աներոջ հետ:

Գաբրիէլ այս խնամութիւնը հաստատելով կը յուսար Խաչակիրներու օգնութեամբ ազատիլ սպառնացող վտանգէն, որ շատ վերահաս կը թուէր:

(1) Ըստ Լատինաց՝ Բագիսիոն կամ Ակսիէն, որ ըստ Միշոյի Խաչակիրներու Պատմութեան՝ 1097-էն մինչեւ 1098 Յունիս իշխած է Անտիոքի մէջ:



Գաբրիէլ, որ վարանող չէր խորամանկութիւններ եւ խաբէութիւններ գործադրելու, 1100-ին տազնապը անցընելու համար իբր հնարք հաւանօրէն առանց անկեղծութեան, ուրիշ ճար չգտաւ եթէ ոչ Մալաթիան Լատիններուն տալ խոստանալ եւ անոնցմէ օգնութիւն խնդրել (Michel le Syrien, Գ., էջ 182 եւ Guillaume de Tyr, Թ. 21 եւ ԺԲ. 4) :

Պոհեմունդ՝ Անտիօքի իշխանը որովհետեւ այդ օգնութիւնը տալու տրամադիրը կը թուէր, Գլըճ Ասլան խոհեմութիւն համարեց քաշուիլ Մալաթիայէն, սակայն Մուհամմէտ Իսմայիլ Իպն Դանիշմենտ Կիւմիւլէթէկին<sup>1</sup> (1084—1106)՝ Սերաստիոյ ամիրան՝ երբ սպառնալ սկսաւ, այն ատեն Պոհեմունդ, իր քեռորդիին ու զօրավարին՝ Ռիշարտի հետ հեծելագունդով մը «անմտաբար անպատրաստութեամբ» (ՈՒՌՀ., էջ 330) ելաւ Դանիշմենտի դէմ, չարաչար յաղթուեցաւ եւ Ռիշարտի հետ գերի ինկաւ, Մարաշի մօտ դարանի մը մէջ յինալով 1100 Յուլիսին (ՊԱՏՄ.ԵՒԴՈԿԻՈՅ ՀԱՅՈՅ, էջ 197) : Պոհեմունդ եւ Ռիշարտ երկաթէ կապանքներով Նիկսար կամ Սերաստիա տարուեցան :

Այս պատերազմին մէջ Դանիշմենտ մեծ կոտորած կու տայ քրիստոնեաներու բանակին : Ըստ Ուռհայեցիի (էջ 335) «եղեւ կոտորում ամենայն զօրաց Ֆրանկաց եւ Հայոց» :

Պոհեմունդ եւ Գաբրիէլ այն ատեն դիմեցին Եղեսիոյ Պոտուին կոմսին (Baudouin de Bouillon 1100—1101), որ օգնութեան հասաւ անոնց եւ վանեց Իսլամները, ու վերցնել տուաւ Մալաթիոյ պաշարումը եւ Կիւմիւլէթէկինը (1084—1106) հետապնդեց երեք օր առանց անոր ետեւէն կարենալ հասնելու :

Պոհեմունդ երեք տարի (Յունիս 1100-էն մինչեւ 1103 ամառը) Դանիշմենտի քով գերութեան մէջ բանտարկեալ մնաց, եւ Դանիշմենտ, որ արդէն գրաւած էր Սարբերդը, այդ երեք տարիներուն ամէն տարի Սերաստիայէն «եկն... ի Մելիտինէ եւ այրեաց ի մուտֆն եւ դարձաւ» (ՄԻՔԱՅԷԼ ԱՍՈՐԻ, էջ 406) :

Ամառը կու դար, կ'աւերէր երկիրը, հունձքերը կ'աւերէր եւ ձմեռը կը մեկնէր (Michel le Syrien, Գ., էջ 187) : Այս երեք տարիներու յարձակումներուն եւ պաշարումներուն հետեւանքով, անկարելի կ'ըլլար հունձք ստանալ եւ քաղաքը սովի կը մատնուէր (հմտ. (Michel le Syrien, էջ 189) :

Ալեքս կայսեր (1081—1118) միջամտութեամբ ի փոխարէն 100,000 տինար փրկագինի մը (որուն 20,000ը Քեսունի Գող Վասիլ իշխանը տուաւ), Կիւմիւլէթէկին 1103-ի ամառը ազատ արձակեց Պոհեմունդը, որ Քեսունի եւ Մալաթիոյ ճամբով դարձաւ Եղեսիա՝ իր քաղաքը (Michel le Syrien, Գ., 189) :

Գաբրիէլ, որ հաւանօրէն յուսահատական կը տեսնէր իր իշխանութեան վիճակը, Մալաթիան կը յանձնէ Պոհեմունդի՝ անոր ձգելով 50 ձիաւոր քա-

(1) Մելիք Ղազի Մուհամմէտ անունով ալ յիշուած է :



դաքը պաշտպանելու համար :

Այս կերպով Գաբրիէլ կը յուսար փրկել իր իշխանութիւնը Դանիշմենտի ճիրաններէն , բայց չյաջողեցաւ՝ ամենէն առաջ անոր համար որ Դանիշմենտի դէմ մղուած երեք տարուան պատերազմներուն մէջ ինք «խստագոյն նեղէր զփաղաֆն քան զարտաֆոյսն» (ՄԻՔԱՅԷԼ ԱՍՈՐԻ , էջ 406) , ինչպէս Ասորի Պատրիարքին ԺԱՄԱՆԱԿԱԳՐՈՒԹԵԱՆ համառօտեալ թարգմանութեան մէջ այսպէս սեղմ տողով մը թարգմանուած է :

Բնագիրին մանրամասն բացատրութենէն կը տեսնուի թէ Գաբրիէլ ինչպէս գրգռած էր Մալաթիոյ բնակիչներուն ատելութիւնը :

«Քաղաքին ներսը Գաբրիէլ թուրքերէն աւելի կը հարստահարէր աղքատները : Երբ Հեթումի որդի Թորոս Կիւրապաղատը սպաննուեցաւ Շղեսիոյ բնակիչներուն կողմէ , Ֆրանքները եկան եւ իշխեցին Շղեսիոյ , եւ Գաբրիէլ աշխատեցաւ այդ Ֆրանքները բերել եւ Մելիտինէ մտցնել (Michel le Syrien, Գ. , էջ 187) :

Գաբրիէլ Մելիտինէի մէջ Դանիշմենտի ճնշումին ենթարկուած երեք անգամ երդումով կը խոստանայ Ֆրանքներուն իրենց յանձնել քաղաքը : Անտիոքի իշխանը Պոհեմունդը հաւատալով Գաբրիէլի խոստումին՝ վստահութեամբ եկաւ Մելիտինէ , զայն գրաւելու համար :

«Երբ Հայոց կողմէ գրաւուած տեղերը հասաւ , Հայերը անոր դարաններ լարեցին , որովհետեւ կը վախնային որ մի գուցէ զիրենք հեռացնէ այն տեղերէն՝ երբ ինք իշխէ : Հետեւաբար Հայերը գաղտնաբար մարդ ղրկելով լուր տուին Դանիշմենտի : Եւ նոյն ինք անիծեալ Գաբրիէլ , երբ տեսաւ որ թագաւորը (Պոհեմունդը ըսել կ'ուզէ) Gafina ըսուած տեղը հասած է , զղջաց եւ չուզեց թողուլ որ քաղաք մտնէ , այլ ջանաց անոր յառաջանալը յապաղեցնել , զայն խաբելով սուտ խօսքերով , մինչեւ որ Դանիշմենտ կարենար հասնիլ , դարան լարեց թագաւորին եւ զայն բռնեց : Այն ատեն , Գաբրիէլին եւ Հայերուն յանցանքով , թուրքերը շատ զօրացան : Դանիշմենտ Պոհեմունդը թագաւորը Սեբաստիա ղրկեց եւ Մելիտինէն պաշարեց :

Ապիրատ Գաբրիէլ այս չարիքներուն վրայ աւելցուց նաեւ ուրիշ չարիքներ : Անգթօրէն կը կողոպտէր , կը կապտէր եւ կը կոտորէր : Ասոր համար է որ երկու զինուոր քաղաքը յանձնեցին թուրքերուն , եւ Դանիշմենտ քաղաք մտաւ 18 Սեպտ. 1101-ին<sup>1</sup>» (Michel le Syrien, Գ. , էջ 188) :

Միքայէլ Ասորիի հայ թարգմանութեան մէջ «յայսմ ամի ետ Գաբրիէլ յոյն զՄելիտինէ ի Դանիշման եւ ստեաց Ֆռանֆին եւ ոչ ետ ի նոսա ըստ խոստմանն» գրուած է շատ համառօտելով անցքերը :

Գաբրիէլի իր խօսքը դրժելուն պատճառը բացայայտ է : Հաւանական է նոյնիսկ մտածել թէ Գաբրիէլ երեք իրարու հակառակորդ ոյժերու — Սելճուկներու , Բիւզանդացիներու եւ Խաչակիր Լատին իշխաններու միջեւ սեղ-

(1) Այս թուականը ճիշդ չի թուիր . հաւանօրէն 1103—4-ին պէտք է ըլլայ :



մուած շուարած էր ի՛նչ ընելը եւ դարձեալ իր սովորական խաբէութիւններով անելէն դուրս ելլել կը փորձէր: Բայց դժբախտաբար Գաբրիէլ քաղաքին բնակիչներուն ատելի եղած էր, վերը բացատրուած պատճառներով:

Այնպէս որ երբ 1100 (ճիշդ 1102) աշնան Կիւմիւշթէկին Մալաթիոյ առջեւ եկաւ, քաղաքացիք Գաբրիէլը յանձնեցին Դանիշմենտ Կիւմիւշթէկինի, որ Մալաթիա մտաւ 18 Սեպտեմբերին (Michel le Syrien, Գ., 188, Recueil des Historiens de Croisades, Historiens Orientaux, I, 5, 203, III 522, 526, ՄԱՏԹԻՈՍ ՈՒՌՀԱՅԵՅԻ, էջ 333—335. E. I. Գ., էջ 211):

Վեր. Եղիա Քասունի այնպէս կը ներկայացնէ թէ Պոհեմունդի եւ Ռիչարտի զերութենէն ետք, Գաբրիէլ Յոյնը ստիպուած էր Մալաթիան յանձնել Դանիշմենտի եւ ընտանեօք Կ. Պոլիս անցնիլ 1101-ին (Կոմմազենացի, ՓԻԼԱՐՏՈՍ ՀԱՅԸ, էջ 88—9), սակայն Միքայէլ Պատրիարքը իր ժամանակագրութեան մէջ (Michel le Syrien, Գ., 188) բոլորովին տարբեր վախճան մը վերապահուած ցոյց կու տայ անոր:

Ան կը գրէ թէ «Թուրքերը գայն անգթօրէն չարչարեցին: Քանի մը քրիստոնեաներ (այս չարչարանքները) աւելի սաստկացուցին եւ իրենց չարչարանքներուն վրէժը լուծեցին հարուածելով գայն եւ անոր յիշեցնելով սուրբ եպիսկոպոսին սպանութիւնը եւ այլ ոմիրները: Զայն անարգանքի ենթարկեցին եւ թունալից խօսքեր ընելէ ետք, գայն տարին Galya ամուրքերդին առջեւ, ուր կը գտնուէր իր կինը: Երբ Թուրքերը իրեն հրամայեցին կնոջը ըսել որ ամբոցը յանձնէ, իր դիւային խորամանկութեամբ, ուզեց տակաւին գանոնք խաբել եւ ըսաւ. «Փոքր Միտասը իբրեւ նշան դրկեցի, որ բերդը յանձնէ»:

Արդ, այս «մի տաս» բառը հայերէն լեզուով կը նշանակէ «մի՛ տար»: Երբ Թուրքերը հասկցան թէ զիրենք կը խաբէ, սպաննեցին եւ մարմինը նետեցին շուներուն առջեւ, ուր գայն կերան» (Michel le Syrien, Գ., էջ 188—9):

Ինչպէս կը տեսնուի, չատ կասկածելի է Գաբրիէլի Կ. Պոլիս ապաստանած ըլլալու պատմութիւնը, որ Միքայէլ Պատրիարքի այս տողերով կը հերքուի:

Նոյնպէս այս տողերը կը թխտեն նաեւ այն տեղեկութիւնը, զոր օտար աղբիւրներ կու տան, որոնց համաձայն Գաբրիէլ քաղաքին գրաւումէն անմիջապէս ետք սպաննուած է Դանիշմենտ Ահմէտ Ղազի Կիւմիւշթէկինի (1084—1106) կողմէ:

Ամէն պարագայի մէջ Մալաթիոյ Դանիշմենտէն գրաւումը կը հաստատուի բազմաթիւ աղբիւրներէ: Ի մէջ այլոց Իպն էլ Աթիր պատմագիրն ալ կը հաստատէ թէ Պոհեմունդի զերի բռնուելէն ետք, Դանիշմենտ Ահմէտ Ղազի կամ Մուհամմէտ Իսմայիլ Կիւմիւշթէկին զանազան յաջողութիւններ եւ ճախողութիւններ կ'ունենայ եւ վերջապէս կը տիրէ Մելիտինէի, Սերաստիոյ եւ ուրիշ քաղաքներու, որոնք կ'ենթարկուէին մահմետական տիրապետութեան



եւ մաս կը կազմէին Դանիշմենտ իշխանութեան<sup>1</sup> :

Մալաթիոյ գրաւումէն ետք «Թուրքերը քաղաքին ամբողջ հարստութիւնը եւ ինչ որ գտան դժբախտ քաղաքին մէջ, կողոպտեցին, որովհետեւ Դանիշմենտ իր գործերուն ձգած էր անոր բոլոր հարստութիւնները, բացի մարդոցմէ : Արդարեւ թոյլ չտուաւ որ մէկը սպաննուի, որովհետեւ ինքը [գերի] առաւ բոլոր բնակիչները, զորս իրենց տունները դարձուց : Իր երկրէն հաց, կով եւ ուրիշ անհրաժեշտ բաներ բերել տալով՝ անոնց բաժնեց : Անոնցմէ շատերը ազատ արձակեց, որոնք իր երկիրին մէջ գերի էին երկար տարիներէ ի վեր եւ զանոնք Մելիտինէ դրկեց : Եւ Մելիտինէ բազմաթիւ բարիքներ տեսաւ Դանիշմենտի օրով<sup>2</sup> :

Առատութիւնը եւ բարգաւաճումը աւելցան : Հոն Գաթեպան դրաւ Վասիլիկ<sup>3</sup> անուն սրտոտ եւ աստուածավախ մէկը» (Michel le Syrien, Գ., էջ 188) :

Մելիտինէի Դանիշմենտ տիրապետութիւնը անդորր ու խաղաղ չեղաւ դժբախտաբար, եւ քաղաքը երկար չմնաց իրենց ձեռքը : Մոհամմէտ Իպն Կիւմիւշթէկինի մահէն (1104 կամ 1106)<sup>4</sup>, զահակալութեան վէճերէ եւ իր 11 եղբայրներուն սպանութենէն ետք, յաջորդեց իր անդրանիկ որդին, էմիր Ղազի Պէն Մոհամմէտ Կիւմիւշթէկին կամ պարզապէս Միր կամ էմիր Ղազի կամ Մելիք Ղազի (1106—1136), որուն զահակալութեան դէմ ելած էր Սելճուկ Սուլթան Գլըճ Ասլան Ա. ի չորս որդիներէն մին՝ Արապ, որ սպաննուած է էմիր Ղազիէն :

Այս պատճառով Դանիշմենտ եւ Ռումի սելճուկ իսլամ երկու պետութիւնները թշնամացան իրարու հետ եւ իրարու հետ մաքառեցան, զինակցելով քրիստոնեայ իշխանութիւններու հետ : Այսպէս Սելճուկները՝ Բիւզանդիոնի եւ Դանիշմենտները՝ Անտիոքի Լատին դքսութեան հետ զինակցեցան եւ իրարու դէմ կռուեցան :

Այս պայքարը աղիտաբեր եղած է մասնաւորապէս Դանիշմենտի տան համար, որ տկարացաւ եւ ուժասպառ եղաւ (հմմտ. ՊԱՏՄՈՒԹԻՒՆ ԵՒԴՈՒԿՈՅ ՀԱՅՈՅ, էջ 200—1) :

(1) Դանիշմենտեանց բուլական քաղաքացի եւ լրիւ պատմութիւնը տեսնել՝ Պատմութիւն Լուդոկիոյ Հայոց-ի մէջ (էջ 188 - 217) :

(2) Միքայէլ Ասորի Պատրիարքի Ժամանակագրութեան հայերէն համառոտուած թարգմանութեան մէջ կը կարդանք թէ Դանիշմենտ Մալաթիան գրաւելէն ետք «արար դիւրութիւն եւ շինութիւն... եւ խնամ արկ ի վերայ նոցա տալով նոցա հաց եւ անասունս եւ ազատութիւնս եւ շինեցան» (Միքայէլ Ասորի, 1871, Երուսաղէմ, էջ 406) :

(3) Այս անունը ենթադրել կու տայ թէ Մելիտինէի քրիստոնեայ կառավարիչ մը նշանակած էին Դանիշմենտեանք, շահելու համար զանոնք :

(4) Ըստած է որ Մելիտինէի գրաւումէն երկու տարի ետք մեռած է Կիւմիւշթէկին : Արդ Մալաթիա եթէ 1101-ին գրաւուած է, Կիւմիւշթէկին մեռած պէտք է ըլլայ 1103-ին, մինչդեռ անիկա մեռած է 1106-ին, ուրեմն Մալաթիա գրաւուած է 1104-ին : Ժամանակագրական շփոթութիւն մը կայ, լուծումի կարօտ :



Ամէն պարագայի մէջ Փիլարտոսի անկումէն ետք, 15 տարի, այսինքն մինչեւ 1101, Մալաթիա տակաւին ապրած է Գաբրիէլ Յոյնին իշխանութեան տակ:

Գաբրիէլ Հայ-Հոռոմ կը թուի թէ Փիլարտոսի տեղ իշխանապետ դառնալ ուղող Մարաշի Թաթուլ իշխանին տեղ ուղած է ինքն իշխանապետի դեր կատարել, բայց ինչպէս տեսնուեցաւ, չէ յաջողած եւ Մալաթիա Սելճուկ Ռումի Սուլթանութեան կցուած է:

Դանիշմենտ էմիրին մահը իմանալով Գլըճ Ասլան 1106 Յունիս 28-ին յարձակած է Մալաթիոյ վրայ եւ քաղաքին բոլորակաձեւ աշտարակին առջեւ, որ հիւսիս-արեւելեան կողմը կը դռնուէր, դրաւ պաշարման մեքենաներ եւ բազմաթիւ բուն յարձակումներէ ետք քաղաքը ստիպուեցաւ անձնատուր ըլլալ» (տես Michel le Syrien, Գ., էջ 192):

Գլըճ Ասլան Ա. 2 Սեպտեմբեր 1106-ին մտաւ Մալաթիա, իսպուրի ճակատամարտին մէջ իր սպանութենէն տարի մը առաջ:

ԺԴ.

## ՔԵՍՈՒՆԻ ԻՇԽԱՆՈՒԹԻՒՆԸ ԵՒ

### ԱՅԼ ՄԱՆՐԱՊԵՏՈՒԹԻՒՆՔ ԵՓՐԱՏԱՑԻՈՅ ՄԷՋ

Մալաթիոյ Գաբրիէլ իշխանին ժամանակակից, նոյն շրջանակին մէջ եւ գրեթէ համանման ծագումով, գոյութիւն ունէր Քեսուճի իշխանութիւնը, որ Փիլարտոսի ստորադաս իշխանութիւններէն մին էր, որ հաստատուած էր իշխանապետէն եւ անոր ստորադասուած իշխանութիւններէն ամենէն կարեւորը կը հանդիսանար:

Փիլարտոս այս իշխանութիւնը տուած էր Գող Վասիլի<sup>1</sup>, որ որդին էր հաւանօրէն Գաղրիկ անուն Հայու մը, որուն շուրջ 1065-ին, Անիի գրաւումէն ետք, հաւաքուած էին 300-ի չափ հայ գողեր, աւելի ճիշդ աւազակներ, որոնք

(1) Վեր. Եղիա Քեսուճի ինչպէս Փիլարտոսի նոյնպէս նաեւ Գող Վասիլի մասին ունի շատ արժէքաւոր ուսումնասիրութիւն մը, լի շահեկան մանրամասնութիւններով եւ ուշագրաւ տեսութիւններով (տես ԱԿՕՍ, Իթ., էջ 101-112, Ը., էջ 88-101, եւ ճրդ տարի, Թ. 1, էջ 114-123): Այս ուսումնասիրութենէն օգտուած եմ Քեսուճի իշխանութեան պատմութեան համար: Լատին մատենագիրներէն ոմանք Covasilius կամ Corovassilius կը կոչեն Վասիլը:



Մելիտինէի լեռներուն մէջ գտնուող գաւառները կը կողոպտէին, եւ ասորի վանքերը կը թալլէին, ինչպէս կը նկարագրէ Բարհեբրէոս (Աբուլ Ֆարաճ) ասորի պատմագիրը:

Մելիտինէի կառավարիչները կ'որոշէն անոնց ձգել Գուլոսի եւ Կղաւտիայի<sup>1</sup> անմշակ մնացած հողերը, եւ Բիւաղնդիոնի կայսրէն հրովարտակ բերել կու տան, անոնց տալու համար չորս գիւղեր՝ ալլեւս աւաղակութիւն չընելու պայմանով (ԲԱՐՀԵԲՐԷՈՍ, անգլ. թրգ., էջ 217 եւ Michel le Syrien, Գ., էջ 163—5):

Այս Անիէն փախստական 300 Հայերու մէջ էին Գող Վասիլ, իր եղբայրը Բադրատ եւ այս վերջինին որդին Սմբատ, Անեցի Գորգ Շիրակացի եւ ուրիշներ: Անոնք կայսերական շնորհի արժանացան բարեխօսութեամբ Փիլարտոսի եւ անոր գործակիցներուն, այսինքն Եղեսիոյ Հեթումի որդի Թէոդորոս կամ Թորոս իշխանին եւ Մարաշի Թաթուլ իշխանին եւ Մալաթիոյ Գաբրիէլ Յոյնին, եւայլք, որոնք 7—8 տարի առաջ պաշտօնի անցեր էին նմանօրինակ վիճակէ մը (Վեր. Եղիա Քասունի, ԱԿՕՍ, ԻԹ. էջ 105), այսինքն յելուզակութենէ:

Այս Անեցիները քիչ յետոյ Մելիտինէէն ուրիշ տեղեր փոխադրուեցան եւ Ուռհայի, Անտիոքի, Մարաշի եւ այլ տեղերու մէջ զինուորական բարձր պաշտօններու արժանացան (Քասունի, նոյն): Կիրակոս (էջ 53) եւ Սամուէլ Անեցի (էջ 109) պատմիչները կը խօսին Վանանդի կամ Կարսի թագաւոր՝ Գագիկի 1065-ին բիւզանդական երկիրներ փոխադրութեան վրայ, Կիրակոս այս առթիւ կ'ըսէ թէ «Եւ միւս եւս Գագիկ Վանանդեայ եւ Կարուց, ... գնաց առ Յոյնս, սակայն գլխաւորն դադարեաց յամուրս Գագիայ, եւ այլքն անձնատուր եղեն ընդ ձեռամբ վիշապին (Ալփասլանայ) եւ կէսփ փախստական գրնացին առ կայսրն Յունաց... Իսկ Յոյնք գնացելոցն ետուն երկիրս եւ քաղաքս կալուածոյ» (Հմմտ. ՍԱՄՈՒԷԼ, էջ 109):

Ասոնցմէ մէկն ալ Գող Վասիլն էր, որ թերեւս 1068-ին Ռոմանոս Դ Տիոփէն կայսեր բիւզանդական կայսրութեան արեւելեան սահմանադիւխին պաշտպանութեան գործը հիմնովին վերակազմելու համար կատարած կարգադրութիւններէն օգտուած էր, հող մը ստանալով:

Գող Վասիլի մասին, Միքայէլ Ասորի որոշ կերպով կ'ըսէ թէ «Փիլարտոսի օրերէն ի վեր» կարգ մը տեղերու իշխող հայերէն մէկն էր եւ «կը գրաւէր Քեսունն ու Ռապանը» (Michel le Syrien, Գ., 187. Հմմտ. ԲԱՐՀԵԲՐԷՈՍ, 1230): Գող Վասիլ 1075-էն 1082 Փիլարտոսի ձեռքին տակ գործած է իբրեւ զինուորական պետ եւ 1080-ին Փիլարտոս զայն ղրկած է Ռուբէնի հետ, Անտի-

(1) Կղաւտիա=Glaudia կը յիշուի Goubbas-ի հետ. կը գտնուէր Մալաթիոյ հարաւ-արեւմուտքը, Եփրատի եզերքը: Հոն 1065-ին Հայերը կ'ապստամբին եւ աւաղակութեան կը ձեռնարկեն շրջականերու մէջ: Կղաւտիա Եղեսիոյ կոմսութեան ստորադաս Կարկառի հողատիրութեան ենթակայ էր: (Տես Պատմութիւն Կաթողիկոսաց Կիլիկիոյ, էջ 249):



տաւրոսի երկիրը:

Իսկ 1082-ին անոր տուած է Քեսունը եւ Ռապանը իբրեւ ճորտական իշխանութիւն, իր աւատական իշխանապետութեան կեդրոնական մասին մէջ, ինչ որ ցոյց կու տայ Փիլարտոսի Գող Վասիլի վրայ ունեցած մեծ վրաստահութիւնը:

Գող Վասիլ վերաշինեց Քեսունի պարիսպը, որ քանդուած էր Արաբներու տիրապետութեան շրջանին (Michel le Syrien, Գ., 187):

Ըստ Քասունիի՝ Փիլարտոս 1086ին կը քաշուի ասպարէզէն՝ յանձնարարելով իր ստորադասներուն որ համակերպին սելճուկ վերին իշխանութեան հրամանին եւ անջատ-անջատ կառավարեն իրենց հողերը:

Երեւոյթները այնպէս ցոյց կու տան թէ այդ թուականէն սկսեալ Գող Վասիլ կը դառնայ իշխանապետ (ԱԿՕՍ, ԻԹ. էջ 108) կամ աւատապետ մը, Մելիք Շահի գերիշխանութեան տակ, իր իշխանութեան տակ ունենալով Քեսունէն<sup>1</sup> Հիւսնի Մանսուր<sup>2</sup>, Պեհեսնի<sup>3</sup>, Հռոմկլայ<sup>4</sup> եւ Մարաշ բերդերը եւ անոնց միջեւ գտնուող բնակավայրերը, մեծ մասամբ գիւղեր եւ գիւղաքաղաքներ:

1092-ին Մելիք Շահ երբ մեռաւ, Վասիլ աշխատեցաւ չէզոք մնալ սելճուկ պետութեան ներքին խռովութիւններուն մէջ եւ յաջողեցաւ Ռուբէնի պէս իր երկիրը զերծ պահել աւերումէ: Այս պատճառով իբր ասպահով եւ խաղաղ վայր, Գող Վասիլի քով հաւաքուեցան իշխանական տուներ (ՈՒՌՀ., էջ 381, 405—6) եւ իր հրամանին ենթարկուեցան «ազատագունդի Հայոց» «ֆաջագունդի Հայոց», «ամենայն գորֆի Հայոց» (ՈՒՌՀ. էջ 372, 380, 382, 403): Այնպէս որ Փիլարտոս իշխանապետին եւ մանրապետութիւններուն վարիչի դիրքը փոխանցուեցաւ իր ամենէն կարող աջակիցին Գող Վասիլի (ԱԿՕՍ, ԻԹ., էջ 108): Ասիկա լաւ յարաբերութիւններ ունէր Բիւզանդիոնի հետ, որ ճանչցած էր իր իշխանութիւնը, ինչպէս որ կը հաստատուի շնորհուած Սեւաստոս տիտղոսով, զոր Ալեքս Կոմնէն կայսրը (1081—1118) տուած էր (ՈՒՌՀ. էջ 561): Ասկէ կարելի է հետեւեցնել որ Գող Վասիլ պահ մը եղած է ներկայացուցիչը բիւզանդական կայսրութեան, Եփրատացիներու (=Կոմմա-գինէ) շրջանակին մէջ, եւ այդ կողմերուն համար դրեթէ կը կատարէր դեր մը յար եւ նման Լամբրոնի Օշին իշխանին՝ Կիլիկիոյ մէջ կատարածին:

Գող Վասիլ, այսպէս մէկ կողմէն Բիւզանդացիները եւ միւս կողմէն Սելճուկեանները սիրաշահելով անոնց սահմանադրութիւն վրայ ամրապնդեց իր իշխանութիւնը:

Վասիլ, որ մեծ կարողութիւններ ունեցող անձ մը կը թուի ըլլալ, շա-

(1) Քեսուն = Քասուն = Հասուն բառերը կը նշանակեն բերդ:

(2) Հիւսնի Մանսուր կը նշանակէ Մանսուրի բերդ:

(3) Պեհեսնի = Պէթհասնա կը նշանակէ «Տուն բերդի» (Մանուէլ Քասունի, Յուսաբեր, 1 Ապրիլ 1953):

(4) Հռոմկլայ յայտնի է թէ կը նշանակէ Հռոմի բերդ կամ Հռոմի բերդ:



քունակեց Փիլարտոսի գործը եւ անոր աւատապետական վարչաձեւով իշխանապետութեան աւերակներուն վրայ հիմնեց իր տէրութիւնը, որ անոր ընդարձակութիւնը չունէր — վասնզի կարգ մը մասերը գրաւուած էին — բայց երեսուն տարի ապրեցաւ Փիլարտոսէն ետք:

Վասիլ (1082—1112) իր պետութեան կեդրոն ունենալով Քեսունը՝ տիրեց Մարաշի, Բերդուսի, Հաճընի, Ռապանի (=Կապան) Թոտէլի, Ուրեմնի, իրենց շրջանակներով (ՈՒՌՀ., էջ 372, 380—2, 463), Եփրատացիներու շրջանակը, մինչեւ Դ. Հայքի կողմերը, որուն հնօրեայ անկախ իշխանները — որոնք երբեմն Բիւզանդիոնի եւ երբեմն Տիգրոնի կը հպատակէին — ճանչցած էին իր հեղինակութիւնը, ինչպէս Պիրի, Արեւընտանի, Կարկառի իշխանութիւնը (ՈՒՌՀ., էջ 422—3), որոնք Գող Վասիլի մահէն ետք նուաճուեցան Անտիոքի լատին տուններուն կողմէ (1116):

Գող Վասիլ, Մելիք Շահի մահէն (1092) ետք, առիթէն օգտուելով դէպի արեւելք տարածեց իր հողերը եւ գրաւեց Հռոմկլան՝ Եփրատի վրայ (Ա.ԿՕՍ, ԻԹ., էջ 110), ինչպէս եւ օգնեց Ապլղարիպի եւ Լիկոսի, որ գրաւեն Թլպաշարը եւ Պիրը (ՈՒՌՀ., էջ 422):

Գող Վասիլ մինչեւ Անտիոքի գրաւումը կրցաւ խոհեմութեամբ վարուիլ եւ հեռու մնաց Խաչակիրներէն, որոնց չգործակցեցաւ, սակայն յետոյ ակամայ խառնուեցաւ անոնց պայքարներուն իր Բագրատ եղբօրը պատճառով, որ անոնց հետ յարաբերութիւններ ունեցաւ:

Բագրատ համոզեց Պաղտուինը որ արշաւէ դէպի Եփրատացւոց երկիրը եւ գրաւէ Ռաւրնդանը կամ Արեւընդաժը (Քիլիսի մօտ), որպէսզի իրեն դարձնէ (Քասունի, Ա.ԿՕՍ, Լ., էջ 89. ՈՒՌՀ., էջ 383, 423) Թլպաշարը (ՈՒՌՀ., էջ 316, Լօռան, ՀԱՆԴԷՍ ԱՄՍՕՐԵԱՅ, 1927, էջ 897) եւ Նիկողիմոս անուն իշխանի մը հողերը (Լօռան, նոյն), Սրունը, Եդեսիան եւայլն:

Սակայն ո՛չ ինք եւ ո՛չ իր եղբայրը տեւական բարեկամներ չեղան Խաչակիրներուն (Ե. Քասունի, Ա.ԿՕՍ, Ը., էջ 88—91):

Գող Վասիլ ԿոտրՓրուայի եւ Պոտուինի յարձակումին դիմադրեց եւ ակամայ խառնուեցաւ Խաչակիրներու ներքին վէճերուն, բնական դաշնակիցը ըլլալով Պոհեմունդի, որ կը գնահատէր այն օթանդակութիւնը, զոր կրնային հայթայթել իրեն երկիրին բնիկները եւ մանաւանդ հայ իշխանները, որոնց վրայ կ'ուզէր որ կռթնէր իր իշխանութիւնը:

Արդարեւ Գող Վասիլ օգնեց Խաչակիրներուն կողմնակից դառնալով Պոհեմունդի, իր Բագրատ եղբօրը պէս: Թէեւ պատմական փաստեր չկան որ հաստատեն Գող Վասիլ-Պոհեմունդ դաշնակցութիւն մը, սակայն Պոհեմունդի եւ անոր քեռորդի Ռիչարտի ազատագրութեան համար տրուած փրկանքին իր քով հաւաքուիլը եւ 20.000 տինարով իրեն մասնակցիլը անուղղակի կը հաստատեն դոնէ սերտ բարեկամութեան մը գոյութիւնը իրենց միջեւ:

Գող Վասիլ միշտ կասկածով վերաբերուելով հանդերձ Լատիններու հետ, ուրիշ օգնութիւններ ալ ըրած է Խաչակիրներուն, որոնք սակայն դէշ



վարձատրած են իր ծառայութիւնը :

Գող Վասիլի իշխանութիւնը, որ ոյժ մը կը ներկայացնէր, թերեւս տողալ կարենար, եթէ Ծրանքները չդաւէին իր գոյութեան դէմ եւ Լատիններու Արմենիան<sup>1</sup> արեւմուտքէն եւ արեւելքէն հաւասարապէս յարձակումներու չենթարկէին :

Անոնք այնքան դէշ վարուած են իրենց օժանդակող Հայերուն հետ որ անոնք երբեմն նոյնիսկ իսլամական տիրապետութիւնը նախընտրած են : Այսպէս, Ալպիստանի եւ Զահան գաւառի Հայերը Փռանկներու ճնշումէն ձանձրացած կ'ապստամբին եւ իկոնիոնի Գլըճ Ասլան Ա. Սուլթանէն (1092—1107) օգնութիւն կը խնդրեն :

Գող Վասիլ, նոյնպէս օգտուելով այդ դժգոհութիւններէն, գրաւեց Մարաշը, Հիւսնի Մանսուրը եւ այլ քանի վայրեր, որոնք Խաչակիրներու կը պատկանէին (ԱԿՕՍ, Զ. տարի, Թ. 1, էջ 116) :

Նաեւ այս դժգոհութիւններէն օգտուելով իսլամ բանակ մը 1108-ին Տաւրոս լեռներէն անցնելով կը հասնի Անարզաբա եւ կը կողոպտէ «Ռուբէնի որդի Թորոսի ամբողջ երկիրը», ինչպէս կը պատմէ Ուռհայեցի (էջ 379—380) :

Այդ արշաւող բանակը ապա կու գայ Մարաշի դաշտը եւ անթիւ գերիներ առնելով կը հասնի Գող Վասիլի երկիրը, Բերդուս : Վասիլ փառաւոր յաղթանակ մը կը տանի անոնց վրայ եւ ուրախութեամբ կը դառնայ Քեսուն :

Գող Վասիլ 1108—1109-ին կը դաշնակցի Պոտուին տը Պուրկի, Ճոսլինի եւ Էմիր Ճասուքի հետ՝ դիմադրելու համար Տանգրէտին, որ չէր ուզեր տալ Եդեսիոյ կոմսին եւ Ճոսլինի այն հողերը, զորս գրաւած էր անոնց գերութեան ատեն (ՈԽՌՀ., էջ 382—4) :

Յաջորդ տարին (1109), Խլաթի Սուգման Էլ Գութպին, Շահի Արմէն վեհապետը կը յարձակի Հիւսնի Մանսուրի կողմը, եւ անխնայ կը կոտորէ կամ կը դերէ արտերու մէջ հունձքով զբաղող մշակները եւ կ'իջնէ մինչեւ Հարթան բերդին առջեւ : «Այն ատեն Վասիլ 500 ընտիր քաջերով միայն «գողաբար» եկաւ անոնց վրայ, ինքը, իր քեռին Պետրոս, քսանամեայ Տղայ Վասիլ, Տարօնեցի Ասլաասաթ Տաճատեան եւ Տիգրան Քաջ, իւրաքանչիւրը 100 մարդով, հինգ կողմերէ միանգամայն Գեդէոնեան ոճով խոյացան թշնամիին վրայ : Այլազգիք այս անակնկալ յարձակումներէն շուարած ի փախուստ դարձան, «քաջագունդ Հայոց ... յաղթեցին զօրաց այլազգեացն մեծաւ յաղթութեամբ եւ արարին սաստիկ կոտորած գնուսա, եւ կալան գժուլթանն Հայոց եւ գայլ բազում իշխանս Պարսից (Իմա Սելճուկ) եւ Վասիլն ի գերութիւն վարէր գնու-

(1) Խաչակիրները երբ Փոքր Ասիան ձեռքբեւէ ետք հասան Եփրատացիք կամ Կոմմագինէ եւ Տաւրոսեան շրջանները, հոն գտնելով ստուարաթիւ Հայութիւն մը, երկիրը կոչեցին Արմենիա, իսկ բուն Հայաստանը անոնք կը կոչէին Իրերիա, այսինքն՝ Վրաստան, վասնզի այդ երկիրը կը պահէր իր անկախ թագաւորութիւնը :



սա առաջի իւր» : (ԱԿՕՍ, Ա., 1, էջ 117. հմմտ. ՈՒՌՀ., էջ 380—2 եւ էջ 572. Ծանօթ. 235) :

Նոյն տարին, 1109, ինչպէս կը պատմէ Ուռհայեցի (384—5), Ֆրանկ իշխաններուն իրարու դէմ մղած մէկ կռիւին՝ Վասիլ, Անտիոքի իշխանին դէմ կողմ բռնած ըլլալով՝ անիկա վրէժխնդիր կ'ուզէր ըլլալ, բայց անոր ոյժէն կը վախնար եւ չէր համարձակեր :

Գող Վասիլ 1111-ին օգնեց Լատիններուն՝ Իկոնիոյ Մագսուտ սուլթանին դէմ, եւ 1112-ին՝ կրկին պայքար բացաւ Անտիոքի իշխանին դէմ :

Տանգրէտ այն ատեն գրաւեց Ռապանը եւ քալեց Քեսունի վրայ եւ առաջացաւ մինչեւ Թիւր : Գող Վասիլ ստիպուեցաւ թողուլ Ռապանը՝ յաղթողին :

Ֆրանկներու իրարու եւ Իսլամներու դէմ մղած յաջորդական կռիւներէն որքան կարելի է հեռու մնալով՝ մինչեւ իր մահը Գող Վասիլ պահեց իր իշխանութիւնը :

Գող Վասիլը, զոր Ուռհայեցի «մեծ իշխանի հայոց» կը կոչէ, իր իշխանութիւնը կազմակերպած է աւատապետական վարչաձեւի վրայ, ունենալով իրեն իբրեւ ճորտ՝ իր հողերուն հարաւային եւ արեւելեան կողմը մեծ ու պզտիկ հայ իշխանութիւններ, որոնք կարօտ էին Գող Վասիլի օգնութեան, որպէսզի կարենային իրենց գոյութիւնը պահել թէ՛ Սելճուկ եւ թէ՛ բիւզանդական յարձակումներուն դէմ, վասնզի իր իշխանութիւնը շատ ընդարձակած էր, նոյնիսկ իր մէջը առնելով Եփրատի արեւելեան կողմը, Եդեսիան եւ Սեւերեկը, ինչպէս նաեւ Թլխումի, Արզնիի եւ Շպղթանի (= Թլկուրան) շրջանները, որոնք ունէին հայ իշխաններ, թէեւ այդ վայրերուն բնակչութիւնը մեծ մասամբ Ասորի էր :

Գող Վասիլ մեռաւ 12 Հոկտ. 1112-ին, անորդի, եւ իրեն յաջորդեց իր քեռորդին Վասիլ Տղայ (1112—1117), որ կարճ իշխանութենէ մը ետք դաւով կորսնցուց իր տէրութիւնը (տես ՊԱՏՄ. ՀԱՅ ԳԱՂԹԱԿԱՆՈՒԹԵԱՆ, Բ. հտ., էջ 420) եւ Մալաթիոյ շրջանին մէջ կազմուած այս իշխանութիւնն ալ ջրնջուեցաւ :

Վասիլ Տղայի իշխանութիւնը կ'ընդգրկէր Քեսունը, Ռապանը, Մարաշը, Հիւսնի Մանսուրը եւ Սամոսատը :

Վասիլ Տղայ լաւ յարաբերութիւններ չունէր Եդեսիոյ կոմսին հետ, ինչպէս նաեւ Կիլիկիոյ Լեւոն իշխանապետին հետ, զոր թերեւս մրցակից մը եւ թշնամի մը կը նկատէր :

Վասիլ Տղայ՝ 1116-ին՝ երբ Լեւոն իշխանին տուաւ իր աղջիկը, հարսանիքէն ետք, Լեւոնին եղբօր՝ Թորոսին նիւթած դաւովը ձերբակալուեցաւ եւ յանձնուեցաւ Եդեսիոյ Պոտուին կոմսին :

Վասիլ Տղայ իր աղատութիւնը ստանալու համար ստիպուեցաւ Պոտուին տը Պուրկի թողուլ իր հողերը (1117) եւ քաշուիլ նախ իր փեսին՝ Լեւոնի քով (ՈՒՌՀ., էջ 403—4) եւ ապա անցնիլ Կ. Պոլիս, ուր կայսրը սիրով



ընդունեցաւ զինք եւ իր հաւատարիմները (ԱԶԳԱՊԱՏՈՒՄ, էջ 1317—8, ՉԱՄ., Գ., էջ 31) :

Վասիլ Տղայի իշխանութիւնը ջնջուելէն ետք իր կողմնակիցներէն շատեր եւս ստիպուեցան Եղեսիոյ կոմսին քովէն խոյս տալ եւ ապաստանիլ Կ. Պոլիս : 1120-ին Որտոքեան Էլ-Ղազի, Եղեսիոյ եւ Քեսունի շրջանակը աւերեց եւ մեծ կոտորած ըրաւ եւ բազմաթիւ անձեր գերի վարեց եւ Խարբերդ տարաւ (ՉԱՄ., Գ., էջ 42) :

Քիչ յետոյ Քեսունը գրաւեց Եղեսիոյ Ճոսլին Բ. կոմսը, որմէ յափըշտակեց Պաղտին : Անտիոքի Ռեմոնդ իշխանի եղբայրը սակայն չկրցաւ զայն պահել :

Հայերը Անտիոքի Ռեմոնդ իշխանի հետ դաշնակցելով Յովհաննէս Բ. Կոմնէն (1118—1143) կայսեր դէմ պատերազմ բացին :

Կայսրը անձամբ գնաց անոնց դէմ եւ տիրեց Կիլիկիոյ եւ Անտիոքի Ռեմոնդ իշխանը խոնարհեցուց (Գելցեր, նոյն, էջ 338) :

Սակայն քիչ ետք Անտիոքի իշխանը, Իկոնիոյ սելճուկ սուլթանին եւ անոր դաշնակից դարձած Դանիշմենտ Էմիրի հետ միացած, Բիւզանդական կայսրութեան դէմ յարձակումներ գործել սկսաւ : Երեք դաշնակիցներէն Դանիշմենտ Մելիք Մոհամմէտ Տուլաթի սուլթանը (1135—1143) 1136 աշնան պաշարեց Քեսունը, սակայն երբ Պաղտին Բիւզանդիոնի Յովհաննէս Կոմնէն կայսեր (1118—1143) դիմեց, թողուց հեռացաւ (ՉԱՄ., Գ., էջ 48), Պաղտին ալ անապահով զգալով լքեց եւ գնաց Եփրատի կողմերուն ամրոցները գրաւելու : Հայերը Քեսունի մէջ մնացին իրենք իրենց զլխուն եւ Վահրամ անուն Հայու մը — որուն դուքս տիտղոսը տրուած է (ԳՐԻԳՈՐ ԵՐԷՅ, ՄԱՏԹԷՈՍ ՈՒՌՀ., էջ 460) — առաջնորդութեամբ անկախ եղան :

Վահրամի օգնականը եւ քաջալերողն էր Գրիգոր Երէց պատմագիրը (չարունակողը Մատթէոս Ուռհայեցիի) : Այս հայ իշխանին տիրապետութիւնը շատ կարճ տեւեց, հազիւ երկու տարի (1138—1140), վասնզի Խարբերդի Դանիշմենտ տիրապետը Գարա-Ասլան եկաւ Քեսունի վրայ եւ զայն կրակի մատնեց :

Յովհաննէս Բ. Կոմնէն կայսրը ստիպուեցաւ Փոքր Ասիա երթալ բանակով մը ընդդէմ Սելճուկ-Դանիշմենտ դաշնակիցներուն : Ան 1139-ին յաղթական հասաւ Դանիշմենտ մայրաքաղաքը՝ Նէոկեսարիա (Նիկսար) եւ յաջորդ տարի ուժգին հարուած մը տուաւ Իկոնիոյ սելճուկ սուլթանին (Գելցեր, էջ 338) :

Յաջորդ տարին կայսրը կրկին գնաց Փոքր Ասիա (1140), սակայն չկըրցաւ իր նպատակին հասնիլ, վասնզի որսի ատեն վիրաւորուած մեռաւ :

Լատինները սակայն վերագրաւեցին Քեսունը, որուն իշխեց Պաղտին կամ Սիր Պաղտին (1142-ին) (ԳՐ. ԵՐԷՅ, էջ 472) :

Գրիգոր Երէց Պաղտինը կը կոչէ «տէր Քեսնոյ եւ Մարաշայ եւ գաւա-



նաց նոցա, ի սինոռէ<sup>1</sup> Մելտինոյ մինչեւ ի դուռն Անտիոֆու» (ԳՐ. ԵՐԷՅ, էջ 469), ինչպէս նաեւ «տէր երկուց աշխարհաց Գերմանիկեցոց եւ Քեսունի» (նոյն, էջ 472) :

Պաղտին (= Պաղտուն = Բոտուն), որ շատ լաւ հայերէն գիտէր, կերպով մը յաջողած էր Հայերու վրայ հիմնուած իշխանութիւն մը կերտել, բայց չկրցաւ զայն տեւականացնել, վասնզի Եդեսիոյ օգնութեան փութալու գնաց (1144) եւ պատերազմին մէջ սպաննուեցաւ :

Յովհաննէս Կոմնէն կայսրը (1118—1143), որ Կիլիկիա արշաւած էր քանի մը անգամներ, ինչպէս տեսանք, չկրցաւ վճռական արդիւնքի մը հասնիլ. ուստի գիմեց նենգութեան : Սելճուկ Մազսուտ սուլթանը որսաց իր կողմը, ինչպէս նաեւ Անտիոքի իշխանը, եւ զանոնք թորոսի դէմ արշաւել դրդեց :

Այս խառնակութեանց միջոցին 1150-ին Ռումի Սելճուկ Մազսուտ Սուլթանը կը գրաւէ Քեսունը, Պեհեսնին, Ռապանը (ԳՐ. ԵՐԷՅ, էջ 504) : 1155-ին լատին իշխաններ կ'առաջանան Այնթապ, Ռապան եւ Քեսուն, բայց դարձեալ չեն կրնար պահել եւ քիչ յետոյ ետ կը քաշուին (ԳՐ. ԵՐԷՅ, էջ 529), եւ 1160-ին վերջապէս այդ շրջանակը թուրք Ամիրայի մը կը հնազանդի (ԳՐ. ԵՐԷՅ, էջ 340) :

Այսպէս վերջ կը գտնէ Քեսունի հայ իշխանութիւնը, որուն սահմաններուն մէջ Ասորիները մեծամասնութիւն էին եւ Հայերը եկուոր յափշտակիչներ կը նկատուէին, ինչպէս կը հասկցուի բնիկ Մարաշցի Դիոնեսիոս Բարձալիբի գրութիւններէն եւ ինչպէս Քասունի կը խորհրդածէ. Ասորիները հակառակ էին Հայոց եւ համակիր Պրանկներուն (ԱԿՕՍ, Թ., 1, էջ 122) :

Քանի մը տարի յետոյ Մանուէլ Կոմնէնի շրջանին (1143—1180) Kinnamos կը յիշէ երկու ձեռնարկներ Գող Վասիլի յաջորդներուն դէմ՝ յոյն բանակին կողմէ (Kinnamos, Դ. 24, էջ 119 եւ Զ. 7, էջ 2711) :

Կոմմագինէի շրջանակին մէջ Գող Վասիլի եւ Տղայ Վասիլի իշխանութիւնը վերահաստատել փորձող Վահրամին ու անոր պէս ուրիշներու դէմ էր որ կը կատարուէին այդ երկու ձեռնարկները՝ Մանուէլ Կոմնէն կայսեր ատեն :



Ինչպէս տեսնուեցաւ Գող Վասիլի իշխանապետութիւնը ժամանակին սովորութեան համաձայն աւատապետական իշխանութեան բնոյթ ունէր, եւ իրեն ենթակայ էին բազմաթիւ մանր ճորտ իշխաններ :

Այս մանր եւ ճորտ հողատիրութիւններէն կը գտնուէին Մալաթիոյ շրջանակին մէջ եւ ուրիշ մաս մըն ալ անկէ դուրս, Եփրատի արեւելեան կող-

(1) Սինոռ կը նշանակէ սահման :



մը, ինչպէս Եղեսիա, Սեւերեկ, Թլկուրան Սրուճ եւայլն:

Ասոնցմէ Մալաթիոյ մերձակայ հողամասին եւ Եփրատի արեւմտեան կողմը՝ Սամոսատի մօտ հաստատուած էին Կարկառի, Քեախթայի եւ Բէթ-Բուզայի հողատիրութիւնները, որոնք կրնան հաստատուած ըլլալ նոյնիսկ Փիլարտոսէն: Այս իշխանութիւնները թէեւ Քեսունի մօտ Գող Վասիլի իշխանապետութեան մաս չեն կազմած միշտ, այլ երբեմն կռուախնձոր ծառայած են ընդմէջ հայ, լատին եւ իսլամ շրջակայ իշխանութիւններուն եւ Քեսունի իշխանապետութեան միջեւ:

Ասոնցմէ Կարկառ, որ Եղեսիոյ եւ Մալաթիոյ կէս ճամբուն վրայ կը գտնուէր՝ երկու ու կէս օր հեռու երկու քաղաքներէն եւ կը գտնուէր Մալաթիոյ արեւելեան կողմը, առաջ ճորտութիւն էր Եղեսիոյ Թորոս Կիւրապաղատին իշխանութեան տակ (ՈՒՌՀ., էջ 316—7) եւ ապա Պաղտին Կոմսին: Michel le Syrien (Գ. հտ. 199) կը յիշէ Կոստանդին Միքայէլ եւ Յովհաննէս անուն երեք եղբայրները, որոնք կ'իշխէին Կարկառի, Քեախթայի եւ Բէթ-Բուզայի մէջ, երբ Սամոսատի կը տիրէր Պալտուխ Թուրքը:

Կոստանդին իշխան իբր Եղեսիոյ Թորոս Կիւրապաղատին ճորտ, անոր եւ անոր դաշնակից Լատիններու հետ, Պալտուխ ամիրային դէմ պատերազմած էր: Պալտուխ, որ առաջ խոհեմութիւն համարած էր պատերազմի չմըտնել, երբ տեսաւ թէ ջարդի եւ աւարի կը մատնուին իր հողերը, 300 զօրքով ինքն ալ յարձակեցաւ եւ Սամոսատէն մինչեւ Թլպաշար հազար հողի ջարդեց: Կոստանդին եւ Եղեսիոյ լատին կոմսը՝ Պաղտուին ապաստանեցան Եղեսիոյ Թորոս Կիւրապաղատին քով (ՈՒՌՀ., էջ 316—7):

Կոստանդին կ'օգնէ Պաղտուինի որ գրաւէ Եղեսիան դաւադրութեամբ եւ դառնայ իր աւատապետը:

Բայց Լատինները ինչպէս դաւած էին բազմաթիւ հայ իշխաններու եւ անոնց հողերը առնել տուած էին լատին իշխաններու, նոյնը ըրին Կարկառի: Եղեսիոյ Պոտուին Ա. Կոմսին յաջորդներէն Պոտուին Բ. 1017—8-ին Կարկառը պաշարեց եւ կողոպտեց: Կոստանդին իշխան սաստիկ դիմադրեց եւ ասոր համար չարաչար նեղութեամբ բանտարկուեցաւ Սամոսատի բերդին մէջ եւ հոն մեռաւ 1117—8-ին (ՈՒՌՀ., էջ 423—4, Օրմանեան, ԱԶԳ., էջ 1357):

Այսպէս Կարկառը Լատիններէն գրաւուեցաւ, բայց երբ Երուսաղէմի Պաղտին Բ. թագաւորը 1123-ին գերի ինկաւ Որթոքեան Պալաղ ամիրային ձեռքը, Կարկառը անոր տուաւ (ՈՒՌՀ., էջ 443), որ դարձեալ իսլամ տիրապետութեան ենթարկուեցաւ:

Կոստանդինի Միքայէլ որդին Կարկառը կը գրաւէ հաւանօրէն 1124-ին: Ուռհայեցի կը վկայէ թէ «Միքայէլ իշխան տէրն Կարկառայ, որդի Կոստանդնայ, ժողովեաց արս յիսուն եւ կացեալ ի վերայ մեծաւ աշխատութեամբ եւ նեղեաց զԹուրքն որ ի բերդին էր, եւ ոչ գտաւ ոք օգնական բերդին, անհարեալ գային ի հաւանութիւն, եւ տան զԿարկառ ի Միքայէլն» (ՈՒՌՀԱՅԵՅԻ, էջ 451):



Այսպէս Միքայէլ կը վերահաստատէ իր հօր իշխանութիւնը Կարկառի մէջ:

Սիւրիացի անանուն ժամանակագիր մը, որ Ա. եւ Բ. Խաչակրութիւններուն վրայ կը խօսի, Միքայէլը կը ներկայացնէ հպարտ երիտասարդ մը, որ շատ վնաս հասցուցած է պահելով աւազակներ եւ գողեր այս կողմերը (Առաջին եւ երկրորդ Խաչակրութիւնները ըստ Սիւրիացի անանուն ժամանակագրի մը, Թրգ. Յ. Քիւրտեան, էջ 13):

Ասոնք կ'երեւի Հայեր էին, որ հրոսակութիւն կ'ընէին Մալաթիոյ Պալաք ամիրային երկիրներուն մէջ: Պալաք, հայ հրոսակներուն ոտքը կտրելու համար, խոստացաւ տարեկան հազար բեռ ցորեն տալ Կարկառի բերդատէր Միքայէլին, որ չյարգեց համաձայնութիւնը. այնպէս որ օր մը, երբ Պալաք հազար բեռ ցորեն դրկեց Կարկառ, Միքայէլի հրոսակները այրեցին Հանձիթի երկու գիւղերը, կողոպտեցին, ցորեն բերող Թուրքերն ալ սպաննեցին, երբ անոնք ապահով նստած էին դաշտին մէջ: Պալաք սաստիկ զայրացաւ եւ ըսկըսաւ հետապնդել Հայերը: Շատ խիստ ձմեռ եղանակին, երբ լեռները ծածկուած էին ձիւնով եւ Կարկառեցիք անհոգ ու անպահակ կեցած էին, Պալաք անցաւ սառած Եփրատի վրայէն, յառաջացաւ Գուբբոս, խաբեց Կարկառեցիները, այնպէս կարծել տալով թէ կը հեռանայ իր մարդոց առջեւէն. հազարաւոր մերկ ձիեր արձակեց Քարիունա կոչուած սեպ լեռներուն վրայ:

Ձիւնը հալեցաւ ձիերու սմբակներուն տակ, մարդիկ դիւրութեամբ եւ մէկ օրուան մէջ հասան Ս. Պարսամի վանքի հանդէպ. գիշերանց կտրեցին Կարկառի լեռը եւ արշալոյսին յարձակեցան դժբախտ երկիրին վրայ, զոր Պալաք գրաւեց երկուշաբթի օր մը Քանունի 1. 1452 (= Յունուար 1122): Դուրս հանել տուաւ բոլոր մարդիկը, անասունները, երկիրը աւերակ եղաւ<sup>1</sup>, բայց Պալաք գթութեամբ վարուեցաւ ժողովուրդին հետ. ոչ գերի տարաւ զանոնք, ոչ ալ սպաննեց. ետ տուաւ անոնց իրենց կենդանիներն ու ինչքերը եւ բնակեցուց զանոնք Հանձիթի մէջ, որ իր իշխանութեան տակ էր, եւ երդում ընել տուաւ անոնց որ այլեւս պիտի չվերադառնան Կարկառ:

Բայց անոնք չպահեցին իրենց երդումը: Տարի մը յետոյ Պալաք դրաւ Կարկառը, գերեց բոլոր ժողովուրդը, այրեց գիւղերը, այգեստաններն ու ձիթաստանները: Այն ատեն Ճոսլին դէմ ելաւ Պալաքին, որ լեռները փախաւ: Ֆրանքներ չկրցան բան մը ընել:

Երբ Պալաք զօրացաւ, Թուրքերը հաւաքուեցան իր շուրջը եւ սկսան արշաւել Ֆրանկներու իշխանութեան տակ գտնուող երկիրներուն վրայ: Կարկառի իշխան Միքայէլ տեսնելով վտանգը, իր բերդը տուաւ Պօտուին թագաւորին եւ ինք ստացաւ Տլուքը (նոյն, էջ 15) անոր իշխանութեան մէջ: Պօտուին պահակախումբ մը դրաւ Կարկառ եւ ինք սկսաւ քշել Թուրքերը Հիւսնի

(1) Ուրիշ աղբիւրի մը համաձայն Պալաք ամիրան ազդարարած է Միքայէլի որ սանձէ գողերը, բայց անիկա չանսաց: 1122ին Պալաք կը յարձակի Կարկառի վրայ եւ աւարի կու տայ երկիրը (տես Քիւրտեան, նոյն, էջ 13):



Մասնուրէն եւ Քեսուռէն : Պատուին գերի ինկաւ, ազատեցաւ Հայու մը հնարքով : Իսկ Պալաք նետահար ինկաւ 1124 Մայիս 6-ին (Michel le Syrien, Գ., 205—6, 212) :

Միքայէլ Ասորի Պատրիարքին այս տեղեկութիւնը կասկածի տակ կը դնէ է. Բէյ, որ իր գործին<sup>1</sup> մէջ կ'ըսէ թէ 1138-ին Միքայէլ տուած է Կարկառի բերդը Ճոսլին Բ.ի (տես Բարգէն Կաթ., ՊԱՏՄՈՒԹԻՒՆ ԿԱԹՈՂԻԿՈՍԱՅ ԿԻԼԻԿԻՈՅ, էջ 248) :

Ճշդելու կարօտ հարց մը :

1138-էն տասը տարի ետքը 1148-ին, Վասիլ Պահլավունին (ԳՐ. ԵՐԷՅ, էջ 501—2) կը յիշուի իբր տէր Կարկառի եւ Ծովքի : Յայտնի չէ թէ ինչ պայմաններու մէջ իրեն անցած էր այս հողատիրութիւնը :

Արդարեւ այդ թուականին, Եղեսիոյ 1144-ին գրաւումէն եւ սոսկալի կոտորածէն ետք, երբ քրիստոնեաները տկարացած էին, Մասուտ Իկոնիոյ Սուլթանը (1116—1156) 1149 Սեպտեմբերի կիսուն կու գայ ինքն ալ գրաւել Մարաշը, եւ որովհետեւ բերդին մէջ զօրք չկար, կ'ասպատակէ մինչեւ Թըլպաշար, ամէն կողմ սուրի ճարակ կը դարձնէ ով որ կը գտնէ եւ սուտ երգումով անձնատուր ընելով բերդերու պահապանները, ամէնն ալ գերի կը վարէ : Երկիրին տէրը Ճոսլին Թլպաշարի մէջ կը հանդիպի Մասուտին, որ չկարենալով դիմադրել՝ փախուստ տուաւ եւ հեռացաւ իր առած գերիներով :

Ճոսլին ասոր վրայ ապահոված՝ իր մնացեալ զօրքերը Վասիլին հետ կը ղրկէ Կարկառ պարենաւորելով զայն, որպէսզի իր բերդին մէջ ամրանայ (ՈՒՌՀ., էջ 501—2) : Սակայն Խարբերդի իշխողը Խարա-Ասլան յանկարծական յարձակումով Վասիլը իր 400 մարդերով գերի կը բռնէ (նոյն) եւ կը տանի Կարկառի բերդին առջեւ, եւ կը սլահանջէ բերդը : Վասիլի կինը եւ զաւակները յանձն կ'առնեն բերդը յանձնել իբր Վասիլի փրկանք : Խարա-Ասլան սակայն չ'արձակեր Վասիլը, այլ կը պահէ իրեն հետ «մեծաւ փառաւորութեամբ» եւ անոր «տուեալ երկիր որպէս սիրելի եղբօր իւր» (ԳՐԻԳՈՐ ԵՐԷՅ, էջ 502) :

Իսկ Վասիլի կինը եւ զաւակները անտէր մնացած՝ կ'ապաւինին Հռոմ-կըլայ բերդը, որ Ճոսլինի կը պատկանէր :

Այսպէս վերջ կը գտնէ նաեւ Կարկառի իշխանութիւնը :

\*\*

Կարկառէն զատ Մալաթիոյ աշխարհադրական սահմաններուն մէջ հաւանօրէն կային նաեւ ուրիշ մանրապետութիւններ, որոնք չեն յիշատակուած՝ թերեւս իրենց անկարեւոր եւ աննշան դիրքին համար :

Ասոնցմէ մէկուն յիշատակութիւնը անցողակի եղած է մեր պատմութեան մէջ :

(1) E. Rey, Les Colonies Franques de Syrie aux XIII<sup>ème</sup> et XIII<sup>ème</sup> siècles, Paris, 1883.



Այսպէս յիշուած են որ Մար-Պարսումայի վանքին դրացի լերան վրայ, Կոստանդին, Դաւթուկ եւ Քրիստափոր, երեք եղբայրներ, «որդիք Սանբելի» (ըստ Քասունիի՝ Հաբելի), որոնք հայացած Ասորիներ էին եւ Հայերու յարած՝ երբ Կարկառի մէջ Հայերը կ'իշխէին, բայց աւելի բան մը չենք գիտեր իրենց մասին:

\*  
\*\*

Մալաթիոյ Գաբրիէլ «Յոյն» իշխանին եւ Քեսունի Գող Վասիլ իշխանին բաւական զօրաւոր իշխանութիւնները եւ անոնց ենթակայ ծանօթ եւ անծանօթ մանրապետութեանց գոյութիւնը բացորոշ ցոյց կու տան թէ Եփրատացիներու կամ Կոմմագենէի երկրամասը հայացած երկրամաս մը դարձած էր, ուր գոյութիւն առած էին աւելի կամ նուազ զօրաւոր հայ իշխանութիւններ, սկսեալ ԺԱ. դարու Ա. քառորդին վերջերէն՝ Ժամանակակից Փոքր Ասիոյ մուտքին վրայ Բիւզանդացւոց կազմած հայ իշխանութիւններուն, Հայաստանէն փախստական հայ արքայազուներու իշխանութեան տակ:

Տեսնուեցաւ որ հայ այդ անուանական թաղաւորները, ինչպէս նաեւ անոնց ենթակայ ճորտերը, Փիլարտոսի իշխանապետութիւնը եւ իրեն ստորադաս իշխանները կամ ճորտերը, բոլորն ալ դժբախտաբար երկար կեանք չեն ունեցած եւ ամէնքն ալ կա'մ ասիական բարբարոսներու դրոհով (1080) աւլուած են եւ կա'մ անոր յաջորդող իսլամ եւ քրիստոնեայ իշխանութիւններու իրարու դէմ մղած պայքարի միջոցին իրենց հողերը եւ իշխանութիւնները կորսնցուցած են: Հետեւաբար ամբողջ շրջանը ենթարկուած է Դանիշմեն-տեանց իմիրներուն, որոնք շատ երկար չեն տիրած այն դաւառին, տեղի տալով Սելճուկ Ռումիներուն, որոնք այս շրջանը կցած են իրենց Սուլթանութեան:





Ժ Ե .

## Մ Ա Լ Ա Թ Ի Ա

## ԴԱՆԻՇՄԵՆՏԵԱՆՑ ԻՇԽԱՆՈՒԹԵԱՆ ՏԱԿ

1124 — 1178

Մալաթիա այն քաղաքներէն մէկն էր որ ամենէն կանուխ նուաճուած է Դանիշմենտ Էմիրներու կողմէ, սակայն ինչպէս տեսնուեցաւ՝ անիկա բնաւ չունեցաւ անդորր կեանք մը, վասնզի իր աշխարհագրական դիրքին բերմամբ միշտ կռուախնձոր եղաւ:

ԺԱ. դարուն վախճանին մօտ Փոքր Ասիոյ մէջ կազմուած երկու իսլամ բաւական զօրաւոր տէրութիւններ, այսինքն Իկոնիոյ սելճուկ սուլթանութիւնը եւ Նիկսարի Դանիշմենտ Էմիրութիւնը, եղան այն երկու մրցակից ոյժերը, որոնք իրենց երկիրին ապահովութեան համար կը ցանկային Մալաթիոյ կամրջագլուխին, կամ Եփրատի այդ ամենակարեւոր անցքին:

Տեսնուեցաւ որ երբեմն զինակից եւ գործակից այդ երկու տէրութիւնները ինչպէս իրարու դէմ ելան եւ 2 Սեպտեմբեր 1106-ին Իկոնիոյ Սելճուկ Սուլթանը Գլըճ Ասլան Ա.<sup>1</sup> գրաւեց Մալաթիան, ուր սակայն սելճուկ սուլթանը միայն ժամանակաւոր տիրապետութիւն մը ունեցաւ, վասնզի Գլըճ Ասլանի (1092—1107) մահէն ետք իր իշխանութիւնը տկարացաւ, երբ իր որդիները իրարու հետ մաքառեցան իրենց հօրը գահուն տիրանալու համար:

Գլըճ Ասլան Ա. իր կենդանութեան, Սելճուկներու սովորութեան համաձայն իր պետութենէն մասեր տուած էր իր որդիներուն, որպէսզի կառավարեն:

(1) Գլըճ Ասլան Բայն Սիւլէյման ուղղակի չէր յաջորդած իր հօր՝ Սիւլէյման Բայն Գուրթուուի (1086), վասնզի առաջին յաջորդը եղած է Դավութ, որ 1092-ին իշխանութիւնը առած է Պարկիարուխի հրովարտակով եւ մինչեւ 1094-5 թուականը 2 կամ 3 տարի միայն թագաւորած (Ե. Քասունի, Փիլարտոս Հայր, յաւելուած, էջ ԺԱ—ԺԲ):

1097-ին երբ Ա. Խաչակիրները Փոքր Ասիա կը հասնէին, Գլըճ Ասլան Ռումի Սելճուկ գահը վաղուց գրաւած էր (նոյն): Պատմագիրներ կան, որոնք կ'ըսեն թէ «Սիւլէյմանի մահէն յետոյ իր անդրանիկ որդին՝ Դավութ թագաւորեց, մինչ ուրիշներ՝ ընդհարման շրջանէ մը վերջ Գլըճ Ասլան Ա. ի իշխանութեան անցնիլը կը գրեն» (նոյն): Ուրիշ ցանկի մը մէջ Դավութի իշխանութեան կը յատկացուին 1086էն 1092 տարիները, այսինքն՝ ուղղակի ընդհարման շրջանը, որ կը նշանակէ թէ անուանական թագաւոր մըն էր ան (նոյն): Ինչպէս վերը տեսնուեցաւ, 1092-ին Պարկիարուխի արտօնութեամբ եւ Դանիշմենտի օգնութեամբ Գլըճ Ասլան Ա. իր հօր գահուն եւ Փոքր Ասիոյ սիրտին վրայ անոր հիմնած պետութեան տիրացած է:



Այսպէս, իր անդրանիկ որդին Մասուտ ստացած էր Գոնիան եւ կրտսեր որդին՝ Տողրուլ Ասլան՝ Մալաթիան, անոր զրաւումէն 2 Սեպտ. 1106 անմիջապէս ետք:

Երբ Գլըճ Ասլան խապուրի ճակատամարտին մէջ սպաննուեցաւ, 1117-ին, Մասուտ, իբրեւ օրինաւոր զահաժառանգ չկրցաւ զահուն տիրանալ, վասնզի զայն յափշտակեց իր եղբայրը՝ Մելիք Շահ կամ Շահին Շահ կոչուած Ասիսան (1107—1116): Մասուտ ստիպուեցաւ Գոնիայէն ապաստանիլ Մալաթիա, իր եղբորը Տողրուլ Արսլանի քով (RNC HO, Գ., 534), որ Գլըճ Ասլանի կրտսերագոյն որդին էր եւ իր հօրը մահէն ետք բոլորովին անկախ եղած էր:

Անոր իշխանութեան ատեն Pizmuth կառավարիչին սպանութիւնը քաղաքին համար դժբախտութիւններու աղբիւր մը եղած է ըստ Michel le Syrien-ի (Գ. էջ 184):

Այս ներքին քաղաքային կռիւներէն օգտուելով Պոհեմունդ յաջողեցաւ իր իշխանութեան ենթարկել Ալպիստանը, Ջահանի ընթացքին վրայ գտնուող հողերը եւ Մալաթիոյ շրջակայքը ամբողջովին (Michel le Syrien, Գ. 195): Բայց 1111-ին Մալաթիոյ Տողրուլ Արսլան սուլթանին Աթապէկը<sup>1</sup> ետ առաւ Ջահանի եղերքներու հողերը:

Գլըճ Ասլանի այրին Մալաթիայէն կը մեկնի 1113-ին՝ ամուսնանալու համար քաջասիրտ էմիր Պալաքին հետ<sup>2</sup>, որուն համար ըսուած է թէ զօրացած էր եւ տիրած բազում գաւառներու (ՄԻՔԱՅԷԼ ԱՍՈՐԻ, 1871, էջ 410):

Հեծելախումբի մը թուրք պետը Մալաթիոյ իշխող Տողրուլ Ասլանին առաջարկեց գնել խարբերդը (=Զիյատ բերդը). Մալաթիոյ երիտասարդ սուլթանը չուզեց անկէ հրաժարիլ, բայց առանց կռիւի խարբերդը իրմէ կորուցեցաւ:

Տողրուլ Ասլան ենթարկուած էր Պալաքի եւ թերեւս իր մօր շնորհիւ,

(1) E. Honigmann (E. I., էջ 211) այս Աթապէկը հաւանական կը կարծէ որ Պալաքն էր. սակայն առ այս փաստ մը կամ աղբիւր մը ցոյց չէ տուած: Պալաք (բուն անունով Պալաք Իպն Պեհրամ Իպն Օրթոք) քեռորդին էր Որթոքեան Էլ-Ղազիի, որ մեծ Սելճուկէն (Մուհամմէտ Տափար, 1103—1148) ապստամբած էր: Տափար իր սպարապետը՝ Աք-Սունկուր Պուրսքին (Ոււհայեցիի Բուրսուիը) ղրկեց բանակով՝ զայն պատժելու համար, սովայն պարտուեցաւ Պալաքէն եւ խոյս տուաւ: Սուլթանին որդին գերի ինկաւ, բայց յետոյ արձակուեցաւ (Հմմտ. Ոււհ. 412—413):

Պալաք դրուեց նաեւ հիւսիսային Սիւրիան, Հալէսը, Անտիոքը եւ Հայկական Միջագետքը՝ Եդեսիան (նոյն, 419): Էլ Ղազի եւ Պալաք կը տիրեն եւ կը մաքառին խաչակիրներուն դէմ: Նոյնիսկ կը փորձեն Երուսաղէմը վերագրաւել (Արտաւազդ Արքեպ. Սիւրմէյեան, Հալէպ, 927—28):

(2) Հայերէն թարգմանութեան մէջ (էջ 410) կը կարդանք. «Եւ առ սա գնաց կինն իւրից Ասլանայ եւ եղեւ նմա կին, Թողեալ գորդիքն եւ յամեն Որթուիքն. չեղեւ ոք իբրեւ գՊաղակն»:



որ կինը եղած էր Պալաքի, Որթոքեանց պաշտպանութեան տակ կը պահէր իր իշխանութիւնը նոյնիսկ 1116-էն ետք: Շահին Շահ կամ Մելիք Շահ, որ սելճուկ գահը բռնադրուած էր, սպաննուեցաւ մատնութեամբ եւ գահուն օրինաւոր ժառանգը՝ Մանսուր Ա. (1116—1156) տիրացաւ իր իշխանութեան:

Միքայէլ Ասորի Պատրիարքը (Michel le Syrien, Գ. 204) իր ժամանակագրութեան մէջ կ'ըսէ թէ Մալաթիոյ Խաթունը՝ Եղեսիոյ տէր Ճոսլինի պաշտպանութիւնը խնդրեց՝ Մանսուր Ա. ի և Երզնկայի Մանկուճատի սերունդ Մանուչեաններու դէմ, որ 1118-ին Որթոքեանց յաջողութիւններուն հանդէպ վրդովուած եւ յարձակումէ մը վախճալով աւարի տուած էր Մալաթիոյ շրջանը:

Պալաքի օգնութեամբ 1119-ին Մալաթիոյ Սուլթանը՝ Տուղրիլ Ասլան Զահանի եւ Ալպիթանի շրջանները հնազանդեցուց իրեն եւ նուէր ստացաւ Քեախթէն ամրոցը (Michel le Syrien, Գ., 205): Ապա մտաւ Պալաքի հետ Մանկուճակի երկիրը եւ յառաջացաւ մինչեւ Քեմախ եւ նոյնիսկ յաջողեցաւ զայն գերի բռնել (Ալպոյաճեան, ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 319), ինչպէս նաեւ իր դաշնակիցը Տրապիզոնի դուքս Թէոտոր Կաւրասը (տես Յ. Քիւրտեան, ԵՐԻՁԱ ԵՒ ԵԿԵՂԵԱՅ ԳԱԻԱՌ, Ա. հտ., էջ 82 եւ 92):

Պալաք օգնեց նաեւ էլ Ղազի Իպն Դանիշմենտի, յաղթեց Յոյներուն, գրաւեց Խարբերդը (Հիւսն Ջիյատ) եւ Եփրատի վրայ յաղթեց Կարկառի Հայերուն (Michel le Syrien, Գ., էջ 285):

Տուղրիլ Արսլան իր յաջողութիւնները կը պարտէր Պալաքին, զոր Որթոքեան ընդարձակ պետութեան վերակացու-խնամակալ կարգած էր 1122-ին էլ-Ղազի Որթոքեան (ՈԻՌՀ., էջ 442) իր մեռած ատենը:

Պալաք<sup>2</sup>, որ Նուր էր Տովլէ (Լոյս Տէրութեան) տիտղոսը ստացած էր, Մեծ Սելճուկէն առած էր իբրեւ ճորտապետութիւն (ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 30) Խարբերդ (նոյն, էջ 311), բայց Պալաք Ֆրանքներու վրայ յաղթութիւններ տանելով, վերջապէս էլ-Ղազի Որթոքեանի հետ, գրաւեց նաեւ Հալէպը եւ անոր սուլթանը դարձաւ, Ֆրանկները մատնելով երկիւղի՝ իր յարձակումներով:

Պալաք սպաննուեցաւ Մանպիճի առջեւ 15 Ապրիլ 1124-ին (ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 318), եւ իր թագաւորութիւնը բաժան-բաժան եղաւ:

Այս խառնակութեան միջոցին Հալէպի Սուլթանութիւնը յափշտակեց Աք-Սուլեյմը Պուրսքի (1125—1127) (Արտաւազդ Արքեպս. Սիւրմէեան, ՀԱԼԵՊ, էջ 929):

(1) Խաթուն բառը պէտք է վեհապետուհի իմաստով գործածուած ըլլայ: Դժբախտաբար չէ ճշգրտած թէ Մալաթիոյ Խաթունը ո՞վ էր: Հաւանօրէն Գլըճ Ասլան Ա. ի կինը եւ Տուղրիլ Ասլանի մայրն էր:

(2) Ուղղագրուած է նաեւ Պալաք եւ Պալախ ձեւերով:



Դանիշմենտ Ամիր Ղազի երբ իմացաւ Պալաքի մահը, եկաւ Մալաթիա, բայց չկրցաւ դրաւել զայն եւ իր որդին հոն ձգելով՝ ինքն մեկնեցաւ (ՄԻՔ. ԱՍՈՐԻ, էջ 412—3) :

Շատեր խոյս տուին Մալաթիայէն եւ ապաստանեցան Խարբերդ, ուր հիւրընկալուեցան (ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 320) : Դանիշմենտի բանակը սովի մատնեց Մալաթիան, որ անձնատուր եղաւ :

Ամիր Ղազի մաքառեցաւ նաեւ Հալէպի Սուլթանութիւնը յափշտակող Աք-Սունկուր Պուրսքի որդւոյն եւ յաջորդին Մասուտ Սուլթանին (1127—1128) հետ եւ զայն սպաննեց :

Ահմէտ Ղազի ստացաւ Կարկառը եւ ուրիշ քանի մը վայրեր, բայց որովհետեւ իսլամ իշխանութիւններու միջեւ ալ սկսած էր մրցակցութիւնը, Խարբերդի տիրացող Սիւլէյման յարձակեցաւ իր վրան :

Սերաստիոյ Դանիշմենտ էմիրը Էլ-Ղազի եւ իր փեսան՝ Գոնիոյ Մասուտ Սուլթանը Մալաթիոյ վրայ քալեցին եւ զայն պաշարեցին 18 Յունիսէն մինչեւ 10 Դեկտեմբեր 1124 : Այս պաշարումի միջոցին քաղաքը շատ նեղուեցաւ սովէն եւ Խաթունին հաստատած սարսափի կառավարութենէն : Վերջապէս քաղաքը ինկաւ Դանիշմենտ վեհապետին ձեռքը (ՄԱՏԹԷՈՍ ՈՒՌՀԱՅԵՑԻ, էջ 454, ՄԻՔԱՅԷԼ ԱՍՈՐԻ, էջ 412, Ա. Ճեմալ, ԹՈԳԱՏ, էջ 23, ՊԱՏՄ. ՍԵՖԱՍՏԻՈՅ, էջ 176) : Բնակիչները շունչ առին երբ Խաթուն քաղաքէն մեկնեցաւ իր որդւոյն եւ բոլոր իր մարդերուն հետ (Michel le Syrien, Գ., 219) : Միքայէլ Ասորի (413) Մալաթիոյ մէջ անոր ունեցած յաջողութեան համար կը գրէ. «գօրացեալ Ամիր Ղազի՝ ջնջեաց զԹուրքսն, որ կային յերկրին Կապադովկիացոց եւ ինքն միայն քաղաւորեաց» :

Մելիք Ղազի (1106—1134) Դանիշմենտ վեհապետներէն ամենէն նշանաւորներէն մէկն էր : Ան բուռն կռիւներ մղած էր իսլամ եւ քրիստոնեայ դրացի երկիրներուն դէմ եւ յաղթանակներ չահած էր եւ ասոր համար խալիֆային եւ Մեծ Սելճուկին կողմէ պատուուած էր թաղաւորական աստիճանով :

Իր իշխանութեան օրով Մալաթիա վայելեց անվրդով խաղաղութիւն, բայց երբ մեռաւ 1134-ին, իր իշխանութիւնը երկուքի բաժնուեցաւ եւ երկու Դանիշմենտ իշխաններ նստան, մին՝ Սերաստիա եւ միւսը՝ Մալաթիա (ՊԱՏ. ԵԻԴՈԿԻՈՅ, էջ 202) :

Սերաստիոյ բաժինին իշխեց Մելիք Մուհամմէտ կամ Մելիք Մուհամմէտ Տուլաթի (1135—1143) կամ Մուհամմէտ Իպն Ղազի, որ Մալաթիայէն շուտով հեռացաւ երբ լսեց որ Բիւզանդիոնի Յովհաննէս Կոմնէն կայսրը կը մօտենար (Michel le Syrien, Գ., 237) : Արդարեւ Յովհաննէս Բ. Կոմնէն դրաւեց Կիլիկիան եւ յառաջացաւ մինչեւ Սիւրիա : Այն ատեն Գոնիոյ Մասուտ Սուլթանը Կիլիկիա խուժեց եւ Ատանայի բնակիչները գերի վարեց դէպի Մալաթիա (Michel le Syrien, Գ., 245) :

1139-ին, Մելիք Մուհամմէտ ալ Կիլիկիոյ վրայ քալեց եւ Յոյներէն



գրաւեց Վահկայի, իսկ Հայերէն՝ Կապանաբերդը:

Երկու տարի ետք՝ Կոիւի բռնուեցաւ Ֆրանքներուն հետ, որոնք մինչեւ Մալաթիոյ ենթակայ Zibatra, Arka եւ Ալպիստան քաղաքները յառաջացած էին եւ վեց ամիս բանակեցաւ առանց Կոիւի մտնելու, Նիկսարի մօտ Յովհաննէս կայսեր դիմաց, որ նորէն պատերազմի կը ձեռնարկէր Թուրքերու դէմ (Michel le Syrien, Գ., 248):

Մելիք Մուհամմէտ Իպն Ղազի կամ Տուլաթի երբ մեռաւ 6 Դեկտ. 1143, Դանիշմենտեան իշխանութեան մէջ իշխանութեան պայքար բացուեցաւ եւ երեքի բաժնուեցաւ երկիրը (տես Ալպոյաճեան, ՊԱՏՄ. ԵՒԴՈԿԻՈՅ ՀԱՅՈՑ, էջ 208):

Զիւնուն = Տընլուն = Տունուն կամ Իսմայիլ Տին Դուլնուն Մելիք Մուհամմէտ, դեռատի որդին Մէհէմմէտ Ղազիի, որուն կտակած էր հայրը իր դահը, մեռած ատեն թէեւ յաջորդեց իր հօրը իբր օրինաւոր ժառանգ, սակայն իր դէմ ելան ուրիշ երկու թեկնածուներ, որոնք էին՝ Եազը Պասան կամ Եազուպ Արսլան, կրտսեր եղբայրը Մուհամմէտ Ղազիի եւ Սունկուր իր հօրեղբորորդին, ըստ հայ պատմագիրներու, որ հաւանորէն նոյն է իսլամ մատենագիրներու Մալաթիոյ Այն ալ Դաուլա<sup>1</sup> Էմիրին հետ, որ Զիւնունի (Տունունի) եղբայր ներկայացուած է:

Այս Էմիրը իշխած է 1143—1152, օրինաւոր ժառանգէն յափշտակելով դահը, կամ անոր իշխանութիւնը սահմանափակելով միայն Կեսարիոյ մէջ:

Այն ալ Դաուլա կամ Դուլա (=Տուլա) կը քալէ Զիւնունի դէմ, եւ ամենէն առաջ կ'երթայ Մալաթիոյ վրայ, որուն Թուրք կայազօրքը կը բանայ Buraidiya դուռը եւ կը յանձնէ քաղաքը (Michel le Syrien, Գ., 258), որուն տէր կը դառնայ Այն ալ Դաուլա:

Այսպէս, Դանիշմենտ Էմիրութիւնը կը բաժնուի երեքի, ինչ որ տխուր հետեւանքներ կ'ունենայ երկիրին համար: Նոյն իսկ Դանիշմենտեանց պատմութիւնը կը կորսնցնէ իր պայծառութիւնը, վասնզի նոյն իշխանական տոհմէն ուրիշ անդամներ Դանիշմենտեան տիրապետութեան արդէն ենթարկուած քաղաքներու եւ ուրիշ գրաւուած վայրերու մէջ սղտիկ իշխանութիւններ կը կազմեն: Ուրեմն երկիրին աւատապետական կազմը աւելի կը շեշտուի, եւ դանդաղան Էմիրներ կ'իշխէին համադաշնակցութիւն մը կազմելով Սերաստիոյ սընդի այդ Էմիրները յաճախ չէին ճանչնար զայն: Այդ թուականէն ետք կը քայքայուէր իշխանութեան միութիւնը եւ կը տկարանար իր ոյժը՝ ներքին պայքարներով:

Դանիշմենտ կոտորակեալ Էմիրութեան մէկ կտորն էր Մալաթիոյ Էմիր-

(1) Dhul Nun-ը Արաբներու, Davun-ը Ասորիներու (Michel le Syrien, Գ., 258 եւ յաւելուած LXII). Dadouanes-ը Յոյներու: Michel le Syrien սարգապէս Դուլա կը կոչէ զայն:



ընթացումը, որոնք պետք է մնաց Այն ալ Դաուլա (1143—1152), բայց իր երկիրները սահմանափակուեցան իր իշխանութեան վերջերը, վասնզի Սիւրիոյ մէջ երեւան եկած էր Հալէպի Սուլթան Նուրետտինի նոր ոյժը, որ 1150-ին ձոնարկներ գերի բռնելէն ետք գրաւեց Ազէզը, Թլպաշարը, Պիրը, Ռապանը, Մարաշը, Պեհեսնին, Հիւսնի Մանսուրը, Սամոսատը, Կարկառը, Քաղթէն եւայլն, բացի Հոռմկլայէն, ուր կը մնար ձոնարկների կիներ իր աղջիկներուն հետ: Այս վայրերէն մէկ մասը Մալաթիոյ աշխարհագրական սահմաններուն մէջ էր եւ այսպէս կը կորզուէին անոր վեհապետէն: Սակայն Նուրետտին չկրցաւ պահել եւ ստիպուեցաւ թողուլ այդ տեղերը Սելճուկ Ռումի Սուլթան Մասուտ Ա.ին (1116—1156), որ Սեբաստիոյ Դանիշմենտ Եաղուպ Ասլանը (1143—1167) իրեն փեսայացնելով զօրացած էր (տես Մանուէլ Քասունի, ԱՅՆԹԱՊ ԽԱՉԱԿՐԱՅ ՇՐՋԱՆԻՆ, Յուսաբեր, 14 Մայիս, 1955):

Այս միութիւնը երկար չտեւեց, վասնզի Մասուտ Ա. (1116—1156) ուզեց իր գերիշխանութեան ենթարկել Դանիշմենտները:

Հետեւաբար պահանջեց Այն ալ Դաուլայէն որ հպատակի իրեն, բայց Մալաթիոյ տէրը մերժեց:

Այն ատեն Մասուտ Սուլթան արշաւեց դէպի Մալաթիա եւ նախ 17 Յունիսէն 14 Սեպտեմբեր 1143 եւ ապա 1144-ին պաշարեց Մալաթիան, բայց չկրցաւ գրաւել քաղաքը (Michel le Syrien, Գ., 254—8 եւայլն):

Այն ալ Դաուլայի մահէն ետք 12 Յունիս 1152 իր որդին Դուլ Կայնէյն (Dhul—Karnain) (1152—1160), որ տակաւին անչափահաս էր, յաջորդեց իրեն<sup>1</sup>: Իր մայրը՝ անոր տեղը իշխեց իբր խնամակալ, բայց չուտով վտարուեցաւ՝ երբ փորձեց դեռատի վեհապետը սպաննել (Michel le Syrien, Գ., 305):

Իկոնիոյ Մասուտ Սուլթանը դարձեալ փորձեց Մալաթիոյ տիրել (24 Յունիս 1152), բայց չյաջողեցաւ կրկին:

1153-ին Մասուտ Ա. Սուլթան Բիւզանդիոնի Մանուէլ Կայսրէն օգնութիւն գտնելով, գրաւեց Հալէպի Նուրետտինէն Այնթապի շրջակայքը:

Իսկ երբ Մասուտ Սուլթան մեռաւ 1154-ին, որդին՝ Գլըճ Ասլան Բ. գահակալեց, բայց որովհետեւ իր եղբայրը՝ Շահնշահ իր դէմ ելաւ եւ իրարու հետ պատերազմեցան, Նուրետտին առիթէն օգուտ քաղեց եւ իրմէ գրաւուած վայրերը եւ ուրիշ միջադեպեան քաղաքներ ալ գրաւեց, սակայն Խարբերդի Խարա-Ասլան Ամիրան<sup>2</sup> (1143—83) իրեն դէմ ելաւ եւ հարկադրեց որ ետ դառնայ (Մ. Քասունի, նոյն):

1157-ին Գլըճ Ասլան Բ. Խարբերդի Խարա-Ասլան ամիրայի հետ հաշտուելով, Միջագետք եկաւ եւ իր հօրը պատկանած տեղերը վերագրաւեց

(1) Պատմագիրներէն ոմանք զայն մեռած ցոյց կու տան 1169-ին:

(2) Խարբերդի մէջ հաստատուած Որթոքեան տան կը պատկանէր, եւ յաջորդած էր Խարբերդի Էմիր Տուար Ամիրայի (1124—1143) (Պատ. Հայաստանի Սահմանները, էջ 316):



(նոյն), բայց երբ 1158-ին Գլըճ Ասլան՝ Բիւզանդիոնի Մանուէլ Կայսեր հետ պատերազմի բռնուեցաւ, Նուբետտին զօրք հաւաքելով Գլըճ Ասլանի սեպհական Մալաթիոյ երկրամասէն Պեհեսնին եւ Ռապանը դրաւեց Մարաշի եւ այլ տեղերու հետ (Մ. Քասունի, նոյն), սակայն 1159-ին հաշտուելով անոր հետ իր դրաւած տեղերը դարձուց Գլըճ Ասլանին:

1160-ին Գլըճ Ասլան Բ. Դանիշմենտներու հետ կռիւի կը բռնուի եւ անոնց ձեռքէն կը խլէ Ալպիսթանը եւ Տարենտէն, որոնք երբեմն Մալաթիոյ էմիրին կը պատկանէին: Նուբետտին առիթէն օգտուելով հաւանօրէն վերստին կը գրաւէ Մարաշի շրջանակը (հմմտ. Մ. Քասունի, ԱՅՆԹԱՊ ԽԱՉԱԿՐԱՅ ՇՐՋԱՆԻՆ, Յուսաբեր 14 Մայիս, 1953):

Այս շրջանին Տու՛լ Գարնէյնի իշխանութիւնը Մալաթիոյ մէջ կը շարունակուէր, թէեւ շատ պղտիկցած, բայց կը պահէր արտաքին նշանները անկախ վեհապետութեան մը: Այսպէս, ան Մալաթիոյ մէջ հատած է պղնձադրամներ յունատառ, յոյն թուականով եւ միանգամայն արաբատառ: Անոնց առաջին երեսին վրայ կը կարդացուի՝

#### ΙΝΔΙΚΤΙΩΝΟΣ ΔΕΥΤΕΡΟΣ

(Երկրորդ ինդիկտիոնին)

Իսկ երկրորդ երեսին գրուած է արաբերէն՝

الواثق ذو القرنين بن عين الدولة

«Էլ Վաալի Տու՛լ Գարնէյն Պինի Այն-Ուտ-Դաուլա», այսինքն «[Աստուծոյ] ապաւէն Տու՛լ Գարնէյն, որդի Այն-Ուտ-Դաուլայի», իսկ շուրջը՝ ΟΜΕΤΑΣ ΑΜΗΡΑΣ ΛΟΥΧΑΡΝΑΙΝ որ է «Մեծ Ամիրան Դուլ Կարնէյն»:

1162 Հոկտեմբերին, Տու՛լ Գարնէյնի 10 տարեկան անչափահաս զաւակը՝ Նասեր-ալ-Տին Մուհամմէտ Պէն Տու՛լ Գարնէյն կամ պարզապէս Մելիք Մուհամմէտ Ամիրա (1162—9) յաջորդեց իր հօրը: Նասեր ալ Տին Մուհամմէտ Պէն Տու՛լ Գարնէյնի ատեն Դանիշմենտ էմիրներու մէջ դերազահը կամ աւատապետը դարձած էր Եաղուպ Ասլան, որուն նստոցն էր Սեբաստիա:

Նասեր ալ Տին Մուհամմէտ, Դանիշմենտ գերիշխան եւ ամենէն զօրաւոր այս վեհապետին հաւանութեամբ, ամուսնացաւ Շահի Արմէնի թոռ Սուլթանի փեսին Սուլդուխի աղջկան հետ:

Գոնիայի Ռումի սուլթաններու հակառակութիւնը, որ վերջ չէր գտած, այս ամուսնութեան պատճառով վերարժարժուեցաւ, վասնզի Գլըճ Ասլան ինք առնել կ'ուզէր այդ աղջիկը. ուստի պատրուակ ըրաւ ասիկա եւ յարձակեցաւ Եաղուպ Ասլանի վրայ:

Եաղուպ Ասլան յաղթեց եւ մտաւ Գլըճ Ասլանի բանակատեղին եւ առաւ «զգանձս ոսկեղէն եւ զամենայն պատրաստութիւն նորա» (ՄԻՔԱՅԷԼ ԱՍՈՐԻ, էջ 442—443), բայց յետոյ դարձուց եւ վեհանձնութիւն ցոյց տուաւ, սակայն



Գլըճ Ասլան Բ., որ կ'ուղէր անպատճառ կործանել Դանիշմենտ իշխանութիւնը, երբ չկրցաւ զէնքով իր նպատակին հասնիլ, ջանաց զայն պառակտելով կործանել:

Այս նպատակով իրեն գործիք ըրաւ Կեսարիոյ Տանուն Իսմայիլ Իմատէլ-Տին Տու'լ Նուն Մելիք Մուհամմէտ ամիրան, որ Գլըճ Ասլանի քեռայրն էր (ՊԱՏՄ. ԵՒԴՈԿԻՈՅ, էջ 209):

Փոխադարձաբար Եաղուպ Ասլան ալ աշխատեցաւ իր կողմը շահիլ Գլըճ Ասլանի ստորադաս ամիրանները եւ «ընկենուլ զնա ի քաղաւորութենէ եւ դնել զեղբայրն նորա» (ՄԻՔ. ԱՍՈՐԻ, էջ 444):

Գլըճ Ասլան վախցաւ եւ Դանիշմենտեան իշխանին դիմադրելու համար Բիւզանդիոնի Մանուէլ Կոմնէն կայսեր դիմեց (Ա. Ճեմալ, ԹՈԳԱՏ, էջ 27, ՄԻՔԱՅԷԼ ԱՍՈՐԻ, էջ 444) եւ օգնութիւն խնդրեց եւ ստացաւ, բայց Եաղուպ Ասլան ինքն ալ պատրաստուեցաւ եւ Միջագետքի շատ մը ամիրանները հաւաքելով պատրաստուեցաւ դիմադրելու Գլըճ Ասլանի:

Երկու բանակները իրարու դէմ եկան, բայց իրարմէ պատկառելով առանց ճակատելու դարձան իրենց տեղերը:

Բայց Եաղուպ Ասլան տեսնելով իր երկիրին մէջ գոյութիւնը անջատողական հակումներու, որոշեց պետութեան ներքին միութիւնը վերահաստատել: Եւ ամենէն առաջ ուղեց նուաճել Կեսարիոյ Տանուն ամիրան, որ Գլըճ Ասլանի ձեռքը գործիք եղած էր եւ պառակտած էր Դանիշմենտեան իշխանութիւնը:

Եաղուպ Ասլան զայն ընկճելէ ետք սպաննեց Կամախի ապստամբ Ամիրան: Նոյնպէս փորձեց գրաւել 1167-ին Մալաթիան, զոր պաշարեց եւ «նչ կարաց առնուլ եւ եթող ի վերայ նորա գօր եւ չոգաւ» (ՄԻՔ. ԱՍՈՐԻ, էջ 441):

Այս պատճառով շատեր կը փախչին Մալաթիայէն: Խարբերդի տէրը Խարա-Ասլան այդ փախստականները կ'ընդունի:

Եաղուպ Ասլան կը հաշտուի Մալաթիոյ գեռատի ամիրային հետ, որ իր եղբօրը որդին էր եւ անոր կը թողու Մալաթիան:

Եաղուպ Ասլան կը փորձէ նաեւ նուաճել Խարբերդի ամիրան՝ Խարա-Ասլանը, որ մինչեւ Ամիթ նուաճումներ ըրած էր ինքնագլուխ (ՄԻՔ. ԱՍՈՐԻ, էջ 448): Խարա-Ասլան կ'ուղէ համաձայնիլ, սակայն Եաղուպ Ասլան անոր համակերպութիւնը կեղծիք համարելով անոր երկիրը կը մտնէ եւ Չմշկածաղը գրաւելով 100.000 անձեր գերի կը տանի (ՄԻՔ. ԱՍՈՐԻ, էջ 448):

Եաղուպ Ասլան կը մաքառի նաեւ ուրիշ ապստամբ էմիրներու հետ, որոնք կը գրաւէին ըմբոստութեամբ Դանիշմենտ իշխանութեան քաղաքները՝ պարբերաբար ստեղծելով Փոքր Ասիոյ մէջ խառնակ վիճակ մը<sup>1</sup>:

Սակայն Եաղուպ Ասլանի (1143-1167) ջանքերը հակառակ իր կարողու-

(1) Մանրամասնութիւնները տեսնել ՊԱՏ. ԵՒԴՈԿԻՈՅ ՀԱՅՈՅ, էջ 205-211:



թեան եւ ճարպիկութեան անդօր եղան իշխանութեան միութիւնը վերաստեղծելու Դանիշմենտ էմիրութեան մէջ, այլ ընդհակառակը այդ միութիւնը բոլորովին քայքայուեցաւ, երբ մեռան Կեսարիոյ Զենուն կամ Տանուն, որդին Մեհեմմէտ Ղազիրի եւ Սեբաստիոյ մէջ Իսլահիմ՝ միւս որդին Մեհեմմէտ Ղազիրի (1167) : Ասոնցմէ զատ զանազան քաղաքներու մէջ այլ Դանիշմենտ իշխանութիւններ երեւան եկած էին, ինչպէս կը հաստատէ Միքայէլ Ասորի, որ 1166—1167 կը յիշէ Դանիշմենտ իշխանութիւններ Սեբաստիա, Կեսարիա եւ Ալպիստան կեդրոններով, առանց յիշելու Մալաթիոյ էմիրը, Նասիր ալ Տին Մուհամմէտ Իպն Տու՛լ Գարնէյնը (1162—9), որուն իշխանութեան սահմանները կը նեղնային դրացիներու դրաւումներով :

Այսպէս, 1168-ին Գլըճ Ասլան Դանիշմենտներէն յափշտակեց Կեսարիան եւ Ծամնդաւը :

Դանիշմենտ իշխող տունը շատ անկեալ եւ ապականեալ վիճակ մը ունէր :

Նասիր ալ-Տին Մուհամմէտ Իպն Տու՛լ Գարնէյն (1162—9) այնքան անժողովրդական եղած էր իր ցոփութիւններով որ ստիպուեցաւ հեռանալ Մալաթիայէն՝ 1170-ին :

Նասիր ալ Տին Մուհամմէտ Պէն Տու՛լ Գարնէյն եւս 1169-ին դրամներ հատած է, որոնց վրայ կը տեսնենք մէկ կողմը պատկերը Քրիստոսի, որ ձեռքը դրած է թագաւորի մը գլխուն վրայ, իսկ միւս կողմը կը կարդացուի արաբատառ իր անունը ու տիտղոսը «Մուհամմէտ Իպն Զի Էլ Գարնէյն» (Բասմաջեան, ՀԱՅԿ. ԴՐԱՄԱԳԻՏՈՒԹԻՒՆ, էջ 163) :

Իր որդին էմատետտին Դու՛լնուն (մեր պատմիչներուն Տունուն-ը կամ Տանունը), զոր հայրը Կեսարիոյ կառավարիչ նշանակած էր, 1169-ին իր հօրը աթոռը գրաւելու համար Մալաթիա դնաց, բայց հոն չկրցաւ հաստատուիլ եւ Գլըճ Ասլան Բ.էն հալածական փախաւ իսլամութեան պաշտպան Սիւրիոյ Նուրետտին Սուլթանի քով, որուն հետ դաշնակցելով 1172-ին սկսաւ կռուիլ Գլըճ Ասլանի դէմ, որ Նուրետտինէն վախնալով ետ քաշուեցաւ եւ Նուրետտին դրաւեց Մարաշը, Պեհեսնին, Քեսունը եւ այլ վայրեր մինչեւ Զահան (հմմտ. Մ. Քասունի, նոյն) :

Մալաթիան չկրցաւ գրաւել :

Իսկ Մալաթիոյ մէջ Մելիք Մուհամմէտի գահը գրաւեց իր եղբորորդին Ապուլ Գասըմ կամ Փախլ ալ Տին Գասըմ (1170—1172) որդին Տու՛լ Գարնէյնի (Y. H. Modtmann, ԻՍԼԱՄ ՀԱՄԱՅՆ. էջ 938), այսինքն եղբայրը Նուրետտին Մուհամմէտի Տու՛լնունի հօրը : Հետեւաբար տղան չկարենալով տիրել, եղբայրը յաջորդած էր :

Այս վեհապետն ալ իր նախորդներուն պէս, պղինձ դրամ հատած է Մալաթիոյ մէջ «յունատառ եւ քրիստոնէվայել», ինչպէս կ'ըսէ Բասմաջեան (ՀԱՅԿ. ԴՐԱՄԱԳԻՏՈՒԹԻՒՆ, էջ 114) :

Դանիշմենտ իշխանութեանց օրհասը սկսած էր :



Անոնց ամենէն զօրաւորին Եաղուպ Ասլանի իշխանութիւնն իսկ քայքայուիլ սկսած էր, վասնզի անոր մահէն (1167) ետք, ամէն կողմ ապստամբութիւններ ծագած էին: Իր որդւոյն՝ Ապու Մուհամմէտ ձեմալ Ղազիի (1167—9) իշխանութիւնը ներքին խռովութիւններով անցաւ: Ասկէ քաջալերուած Գլըճ Ասլան անգամ մըն ալ փորձեց գրաւել Մալաթիան, որուն վրայ յարձակեցաւ 1172-ին, սակայն դարձեալ չկրցաւ գրաւել քաղաքը (ՄԻՔԱՅԷԼ ԱՍՈՐԻ, էջ 468), վասնզի Սանուխ (Սայտալ Տին) ներքինիին գլխաւորութեամբ բնակիչները արագօրէն պատրաստած էին ինքնապաշտպանութիւն:

Գլըճ Ասլան ստիպուեցաւ նորէն քաշուիլ, բայց գերի տարաւ 30·000, ըստ ոմանց 12·000 հոգի Մալաթիոյ շրջակայքէն (ՄԻՔԱՅԷԼ ԱՍՈՐԻ, էջ 468):

Նուրետտին Դամասկոսի Սուլթանը, որուն օգնութեան ապաւինած էին իսլամ իշխաններ ընդդէմ Գլըճ Ասլան Բ.ի, իրեն հետ ունենալով Սեբաստիոյ Մելիք Իսմայիլ (1169—1173) Դանիշմենտ վեհապետը եւ Գլըճ Ասլանի ապրստամբ եղբայրը՝ Շահնշահը, արշաւեց մինչեւ Կեսարիա, բայց Գլըճ Ասլան չուղեց պատերազմիլ անոնց դէմ, այլ միայն Շահնշահի իր քով գտնուող հինգ զաւակներէն մէկը խորովելով հօրը դրկեց՝ սպառնալով միւսներն ալ այսպէս ընել եթէ չմեկնի:

Այսպէս Գլըճ Ասլան Բ. զանոնք հաշտութեան հարկադրեց (ՄԻՔԱՅԷԼ ԱՍՈՐԻ, էջ 468), եւ յաջորդ տարին (1174) օգտուելով Նուրետտինի մահէն գրաւեց Դանիշմենտ իշխանութեան հողերը իրենց Սեբաստիա մայրաքաղաքով 15 Փետր. 1175, մինչդեռ Մալաթիոյ մէջ կը շարունակուէր այդ քաղաքին տիրող տուներ, Ապուլ Գասըմի վեհապետութեան տակ:

Այս իշխանը 1172 Մայիսին, 15 տարեկան հասակին Հիւսն Հիյարի (Խարբերդ) իշխանին աղջկան հետ ամուսնացաւ: Հարսանեկան խրախճանութեանց ատեն, ձիաւորներու հետ մարտախաղի մը ատեն ձիէն ինկաւ եւ մեռաւ (Michel le Syrien, Գ., 343): Եղբօր որդին Ֆիրիտոն (Afridun), որ իրմէ ալ աւելի երիտասարդ էր, յաջորդեց իրեն եւ ստիպուեցաւ ամուսնանալ Ապուլ Գասըմի նշանածին հետ:

Բայց երբ Ֆերիտոն սպաննուեցաւ 15 Փետր. 1175-ին իր եղբօրը Մուհամմէտի կողմէ, որ բազմաթիւ արկածախնդրութիւններէ ետք համաձայնելով Զիյատի (=Խարբերդ) իշխանուհիին հետ — որ իր ամուսինը լքած էր — ծալտուած Մալաթիա մտած էր (Michel le Syrien, Գ., էջ 262—4):

Գլըճ Ասլան Բ., որ ամէն ջանք ըրած էր վերջ տալու Դանիշմենտ իշխանութեան, երբ այս եղելութիւնները իմացաւ, յարմար ժամանակը նկատեց վերջ տալու Դանիշմենտ իշխանութեան:

Արդէն Սեբաստիա գրաւած էր եւ միայն Մալաթիա կը մնար Դանիշմենտներու ձեռքը:

Գլըճ Ասլան Բ. զնաց պաշարեց նորէն Մալաթիան: Քաղաքին մէջ այնքան դժգոհ էին Մուհամմէտէն որ այլեւս կեանքը վտանգուած զգաց հոն եւ ստիպուեցաւ Հիսն Զիյար (Խարբերդ) քաշուիլ: Զորս ամսուան պաշարումէ



մը ետք, 25 Հոկտեմբեր 1178-ին, Գլըճ Ասլան մուտք գործեց Մալաթիա (Michel le Syrien, Գ., 373) :

Ապահովաբար այս վեհապետին համար են Միքայէլ Ասորիի հայերէն թարգմանութեան (էջ 482) սա տողերը, 1179 թուականով. — «Քրիստոնեայք որ կային ի Մելիտինէ՝ անկան ի մեծ նեղութիւն յերկուց պատնառաց, ի սովոյ եւ ի չարութենէ եւ ի խիստ բարուց ամիրային իւրեանց, որ մնացեալ էր յազգէն Դանիշմանայ» :

Ի վերջոյ կ'երեւայ թէ իր խստութենէն հրաժարած է այս ամիրան, որ «զղջացաւ ի գործս իւր եւ առաքեաց առ սուլթանն եւ առ ի նմանէ գանձ եւ ետ ի նա զՄելիտինի եւ ինքն ել եւ գնաց ի Խարբերդ, եւ եղեւ մեծ դիւրութիւն քրիստոնէից եւ առատութիւն հացի, եւ ամենայն իրաց ընդարձակութիւն» (նոյն, էջ 483) :

Ուրեմն Մալաթիա գրաւուած է Իկոնիոյ Սուլթանէն 1178-ին :

Հաւանօրէն այս վերջին իշխանն է որ, ըստ Զոննարիի եւ Նուխրէթ ալ Թաւարիի հեղինակին (յիշուած Համմերէ, Geschichte d'Osmen Reiches-ի մէջ, I, 622) Գլըճ Ասլանէն թունաւորուած է եւ անմիջապէս գրաւուած է Մալաթիան :

Այսպէս վերջ գտած է Դանիշմենտեանց այս ազագուն ճիւղն ալ :

## Ժ Զ.

### ՄԱԼԱԹԻԱ ՌՈՒՄԻ ՍԵԼՃՈՒԿ

### ՏԻՐԱՊԵՏՈՒԹԵԱՆ ՏԱԿ

(1178 — 1315)

Ասետտին Գլըճ Ասլան Բ. (1156—1191), երբ 1178-ին գրաւեց Մալաթիան, Ռումի Սելճուկ Իկոնիոյ Սուլթանութիւնը հասաւ իր փառքին կատարը, որովհետեւ իր ամենէն գլխաւոր մրցակիցը կը դադրէր գոյութենէ եւ ինք կը տիրակալէր Փոքր Ասիոյ սիրտին՝ Կարինէն մինչեւ Յոնիական եւ Սեւ ծովէն մինչեւ Միջերկրական : Բայց ինք չկրցաւ տեւականապէս պահել այս հողերը, վասնզի իր սահմաններէն դուրս Հայաստանի, Փոքր Հայքի, Միջագետքի եւ այլ վայրերու մէջ երեւան եկած էին դարուն սկիզբէն, զանազան թիւրքմէն իշխանութիւններ, որոնք հետզհետէ դէպի արեւմուտք՝ Փոքր Ասիա առաջանալու կը ձգտէին : Միւս կողմէ Եգիպտացիք Ասիա անցած դէպի հիւսիս կը յառաջանային՝ Սիւրիայէն Եփրատ եւ անկէ Հայաստան մտնելով : Թիւրքմէն իշխանութիւններուն ամենէն զօրաւորներէն մէկն էր Որթոքեանց



իշխանութիւնը, որուն վեհապետը Թիմուր տաշ Որթոքեան երբ մեռաւ 1153-ին, իր պետութիւնը երեք որդիներուն մէջ բաժնուեցաւ:

Այս երեքէն ամենէն զօրաւորը հանդիսացաւ Նեճմետտին Ալի, որ ստացած էր Մարտինը եւ Մուֆարղինը: Ասիկա էր «այր բարի եւ քաղցր ի վերայ քրիստոնէից» (ՄԻՒԱՅԷԼ ԱՍՈՐԻ, էջ 476) . 22 տարիներու (1154—1176) իշխանութենէ մը ետք մեռաւ եւ իրեն յաջորդեցին իր որդին Գուլթպետտին Էլ Կազի (1176—1184) եւ ապա այս վերջինին անչափահաս որդին Հիւսամետտին Եսլուք Ասլան (1184—1207):

Թիւրքմէն այս իշխանութիւնները հետզհետէ տարածուելով արդէն Եփրատ հասած էին:

Գլըճ Ասլան Բ. անշուշտ հաւանական բախումի մը նախատեսութեամբ, Մալաթիոյ ռազմական դիրքը նկատի ունենալով, հաւանօրէն կրկին վերանորոգեց քաղաքին երկու պարիսպները (1081) (Michel le Syrien, Գ., 388):

Այս էմիրներէն Թիմուր տաշ (1153), երբ տակաւին միահեծան կը տիրէր Որթոքեան Սուլթանութեան, Հասան Քէֆը գրաւեց Խարբերդի էմիրներուն ձեռքէն եւ իրեն հնազանդեցուց:

Խարբերդի ամիրան Նուրետտին Մահմուտ (1183—5) վերագրաւեց Հասան Քէֆը, ինչպէս նաեւ Ամիթը 1183—1184-ին եւ կրկին միացուց իր էմիրութեան (ՄԻՒԱՅԷԼ ԱՍՈՐԻ, էջ 448): Ան գրաւեց նաեւ Քեսունը:

Ճիշդ այդ օրերուն Մալահետտին Էյուպեան քիւրտը, որ Եգիպտոսի կը տիրապետէր, 1184-ին եւ 1185-ին — երկու անգամ — յարձակեցաւ Մուֆարղինի վրայ, Խլաթ գացած ատեն (ՄԻՒԱՅԷԼ ԱՍՈՐԻ, էջ 400):

Մալահետտին Մուֆարղինը գրաւելէ ետք հոն իրեն ներկայացուցիչ կամ փոխանորդ գրաւ էլ Մելիք էլ Անուատ Նեճմետտին Էյուպը (1201—1220), եւ այսպէս խառնուիլ սկսաւ Ասիոյ մէջ կազմուած Սելճուկ եւ Թիւրքմէն էմիրութիւններու գործերուն:

Անոնք արդէն երկպառակուած, Մալահետտինի օգնութեան կը դիմէին որ ընդարձակ երկիրներու տիրակալած էր եւ ամենէն զօրաւորն էր այդ շրջանակին մէջ տիրող իշխանութիւններուն:

Վերոյիշեալ Խարբերդի ամիրան Նուրետտին Մահմուտ (1183—5) մէկը եղաւ այդ էմիրներուն, որ Մալահետտինի դիմեցին:

Նուրետտին Մահմուտ փեսան էր Ռումի Սելճուկ Սուլթան Գլըճ Ասլան Բ. ի (1156—1193), բայց կ'ատէր իր կինը եւ ասոր համար պատերազմի մէջ էր Իկոնիոյ Սուլթանին հետ, յոյս դնելով Մալահետտինի վրայ:

Գլըճ Ասլան Բ. պատժելու համար իր փեսան «չոգաւ քակեաց գրեհուն» (ՄԻՒ. ԱՍՈՐԻ, էջ 487), այսինքն գրաւեց եւ քանդեց քաղաքը:

Մալահետտին օգնութեան հասաւ Նուրետտին Մահմուտի եւ զայն զօրացնելու համար գրաւեց Ամիթը, զոր նուիրեց Նուրետտինի, ապա դնաց Գլըճ Ասլանի դէմ՝ վրէժ լուծելու համար անկէ:

Հասան անուն ամիրան միջամտեց այս երկու իսլամ զօրաւոր ինքնա-



կալներուն միջեւ եւ «իմաստուն բանիւք արար խաղաղութիւն եւ ոչ կոռեցան եւ դարձան խաղաղութեամբ ի տեղիս իւրեանց» :

Հասան Քէֆ մնաց Խարբերդի Էմիրութեան, ոչ միայն Նուրեստին Մահմուտի, այլ նաեւ անոր յաջորդին՝ Էմատեստին Ապու Պեքիրի (1185—1205) իշխանութեան շրջանին :

Սակայն Որթոքեանք, հովանաւորուած Սալահետտինէն, սպառնալիք մը կը կազմէին Իկոնիոյ Սելճուկ Ռումի Սուլթանութեան համար : Միւս կողմէ թիւրքմէնները, ասիական բարբարոսներու նոր խումբ մը, կ'արշաւէին դէպի արեւմուտք եւ 1185-ին Փոքր Ասիոյ մեծ մասը կ'աւերէին, ի միջի այլոց Մալաթիոյ սահմաններն ալ խուժելով եւ աւարի մատնելով (Michel le Syrien, Գ., 402) : Սելճուկ Ռումի Սուլթանութիւնը ուրեմն վտանգի տակ էր եւ պէտք էր դիմադրել այս յարձակումներուն, մինչ ներքնապէս ալ զօրաւոր չէր եւ քայքայման նշաններ ցոյց կու տար : Գլըճ Ասլան Բ. ի որդիները կ'ապստամբէին իրեն դէմ եւ իշխանութիւնը յափշտակել կը ջանային :

Այս անբաղձալի վիճակը թերեւս պատճառ եղած է որ Գլըճ Ասլան Բ. փորձէ վերակազմել իր պետութիւնը, զոր ժամանակին տիրող վարչաձեւին համաձայն աւատական կարգերու պատշաճեցնել կ'ուզէ 1189-ին : Michel le Syrien-ի եւ այլ արաբ աղբիւրներու համաձայն՝ իր զաւակները իբրեւ ճորտ՝ իր գրաւած երկիրներուն կուսակալ եւ կառավարիչ նշանակեց, իսկ իր մահէն երկու տարի առաջ՝ 1191-ին իր պետութիւնը բաժնեց իր 10-12 զաւակներուն միջեւ :

Այսպէս, ռումի սելճուկ պետութիւնը կոտորակուեցաւ 11 իշխանութիւններու :

Այդ իշխանութիւններէն մէկուն կեդրոնը եղաւ Մալաթիան, զոր շըրջականերով ստացաւ Միւսղեստտին Քարսար Շահ (Michel le Syrien, Գ., 407, RHC. HO Բ. 56 եւ Գ. 269) :

Սակայն բաժանումը նպաստաւոր հետեւանք մը չունեցաւ, վասնզի Գլըճ Ասլան Բ. ի տասնեակ մը զաւակները սկսան արհամարհել իրենց հայրը եւ ինքնագլուխ գործել եւ իրենց սեպհական հաշուոյն նուաճումներ ընելով՝ ուղեցին իրենց սահմանները ընդարձակել, երբեմն դրացի օտար իշխանութիւններէ եւ երբեմն ալ իրարմէ հողեր կորզելով<sup>1</sup> :

Այնպէս որ Գլըճ Ասլանի անխորհուրդ կարգադրութեամբ պետութիւնը փոխանակ զօրանալու՝ աւելի տկարանալ սկսաւ : Հայոց Լեւոն Թաղաւորը (1185—1219) եւ Ֆրեսերիկ Շիկամօրուս (1182—1190), որ Խաչակիրներու բանակով մը Փոքր Ասիա եկած էր, կրցան յաղթանակներ չահիլ Ռումի Սելճուկ Սուլթանութեան դէմ (ՀԱՅ ԿԵՍԱՐԻԱ, էջ 506—7) :

Շիկամօրուս կայսրը յաջողեցաւ նոյնիսկ գրաւել Իկոնիան, սելճուկ

(1) Այս կռիւներուն շարքին յիշատակելի են մեր Կիլիկեան Թագաւորութեան դէմ մղուած կռիւները (տես ՊԱՏՄ. ՀԱՅ ԿԵՍԱՐԻՈՅ, էջ 504) :



մայրաքաղաքը, 1189-ին (De Hammer, *Histoire de l'Empire Ottoman*, հտ. 14) :

Գլըճ Ասլան Բ. ըմբռնելով իր գործած մեծ սխալը, ջանաց միացնել պետութիւնը իր անդրանիկ զաւակին՝ Խուլթպետտինի ձեռքին տակ, եւ անոր դիրքը զօրացնելու համար ամուսնացուց զայն հռչակաւոր Եուսուֆ Սալահետտինի աղջկան հետ :

Բայց չկրցաւ իր նպատակին հասնիլ, վասնզի իր զաւակները իրենց ստացած հողերէն չէին ուզեր հրաժարիլ եւ սաստիկ կը մաքառէին իրարու եւ իրենց հօրը դէմ (Ալեքսանդեան, ՊԱՏՄ. ՍԵՖԱՍՏԻՈՅ, էջ 194, ՍԻՍՈՒԱՆ, էջ 490, ՀԱՅ ԿԵՍԱՐԻԱ, էջ 507) :

Ասոնց մէջ ամենէն ձեռներէցը եւ յաջողակը հանդիսացաւ կրտսերագոյնը Ղայասետտին Կայ Խոսրով Ա. (1193), որ գրաւեց մայրաքաղաքը եւ հօրը իշխանութիւնը յափշտակեց : Սակայն միայն Լիկաոնիան եւ Պամփիլիան ունէր իր ձեռքը : Իսկ Թոգատի տէր Ռուքնետտին Սել ծովու եզերքը քանի մը ամրոցներ գրաւած էր եւ Խուլթպետտին Մալիճ Սալէճ՝ անդրանիկը՝ թէեւ վանուած էր մայրաքաղաքէն, սակայն տակաւին իր իշխանութեան տակ ունէր Կեսարիան, Մալաթիան, Սեբաստիան եւ Կողոնիան (=Շապին Գարա Հիսար) :

Մասուտ գրաւած էր Ամասիան, Էնկիւրին եւ Դորելիան (=Էսկի Շէհիր) եւ ուրիշ քաղաքներ Պոնտոսի մէջ (ՊԱՏՄ. ՍԵՖԱՍՏԻՈՅ, էջ 195) :

Այս խառնակութեանց միջոցին Գլըճ Ասլան ստիպուեցաւ Մալաթիան տալ իր Խուլթպետտին Մալէճ Սալէճ որդւոյն, առնելով Միւհեդետտին Քայսարչահէն, որ կ'երեւի թէ տկար արարած մըն էր :

Միւհեդետտին Քայսարչահ ապաստանեցաւ 1191—2-ին (հիճրէթի 587) Եգիպտոսի Սալահետտին Էյուպի Սուլթանին քով եւ անոր օգնութեամբ յաջողեցաւ պահել Մալաթիոյ վրայ իր վեհապետութիւնը (RHC. HO Ա. 57, 68 եւայլն. Գ., 264, Ե., 24) :

Գլըճ Ասլան Բ. ի մահէն (1192) ետք, իր բոլոր զաւակները, որոնք, ինչպէս տեսնուեցաւ, իր կենդանութեան իրարու հետ մաքառիլ սկսած էին (Ա. Ալպոյաճեան, ՀԱՅ ԿԵՍԱՐԻԱ, էջ 504 եւ ՊԱՏՄ. ԵԻԴՈԿԻՈՅ ՀԱՅՈՅ, էջ 226—7), ինքզինքնին սուլթան հռչակեցին եւ իրարու դէմ կռուեցան :

Ամենէն առաջ իրարու դէմ ելան Սեբաստիոյ Խուլթպետտինը եւ Կեսարիոյ Նուրետտինը, որ իր հողերէն վանուած էր : Խուլթպետտին մեռաւ ճակատամարտին մէջ, սակայն Նուրետտին չկրցաւ տիրանալ իր հողերուն, վասնզի Թոգատի Սուլթանը՝ Ռասետտին Սիւլէյման (1193—1204) ինք գրաւեց Կեսարիան, ինչպէս նաեւ մեռնողին երկիրը՝ Սեբաստիան, եւ զօրանալով գրաւեց նաեւ Իկոնիան՝ անկէ վանելով Ղայասետտին Կայ Խոսրովը, որուն տուաւ իբր ճորտութիւն՝ Ալպիսթանը : Սակայն Ղայասետտին չհամակերպեցաւ եւ նախ Հալէպ, ապա Կիլիկիա եւ վերջապէս Տրապիզոն եւ Կ. Պոլիս ապաստանեցաւ (ՀԱՅ ԿԵՍԱՐԻԱ, էջ 508) :



Ռուբնետտին Սիւլէյման դարձաւ Սուլթան (1193—1204)՝ ընդհանուր ռումի պետութեան եւ յաջողեցաւ փրկել կայսրութիւնը սպառնացող քայքայումի վտանգէն եւ պետութեան մեծ մասը միացնել իր վեհապետութեան ներքեւ, սակայն բաւականատէն Մալաթիան չկրցաւ միացնել իր պետութեան, վասնզի Միւսուրտին Քայսարչազ շնորհիւ Սալահետտինի կրցած էր իր վեհապետութիւնը պահել: Քայսարչազ, ամրապնդելու համար իր դերքը, ամուսնացաւ Սալահետտինի որդւոյն Մելիք էլ Ատիլի աղջկան հետ, եւ ընկերացաւ Սալահետտինի բանակներուն՝ անոր մղած պատերազմներուն մէջ ( RHC. HO Ե. 117): Սակայն հակառակ այս զօրաւոր պաշտպանութեան՝ ի վերջոյ Մալաթիան, 1200 Յունիսին, գրաւուեցաւ Թոգատի Ռուբնետտին Սիւլէյման սուլթանին կողմէ:

Միւսուրտին Քայսարչազ փախաւ եւ ապաստանեցաւ իր աներոջ՝ Մելիք Ատիլին քով (Բարհերէոս, ԺԱՄԱՆԱԿԱԳՐՈՒԹԻՒՆ, էջ 406, RHC. HO Բ. 71), որ իր փեսին չկրցաւ դրական աջակցութիւն մը ընծայել:

Ռուբնետտին Սիւլէյման սուլթան այնքան զօրացաւ որ իրեն հպատակեցուց 1203-ին Սալահետտինի միւս որդին եւ Մելիք Ատիլի եղբայրը՝ Մելիք էլ Չահիրը, որ իր ժառանգութենէն միայն Սամոսատը պահած էր (Բարհերէոս, Ի., էջ 408):

Տարի մը ետք Ռուբնետտին Սիւլէյման գրաւեց նաեւ Անդարան, բայց քանի մը օր ետք մեռաւ (ԲԱՐՀԵՐԷՈՍ, էջ 418) կամ սպաննուեցաւ, որովհետեւ անհաճոյ եղած էր մահամետական կրօնաւորներու, որոնք զինք իբրեւ անաստուած կ'ամբաստանէին (ՊԱՏՄ. ՀԱՅ ԿԵՍԱՐԻՈՅ, էջ 508): Սակայն Ռուբնետտին Սիւլէյման սուլթան (1192—1204) կատարած էր կարեւոր դեր մը՝ փրկելով սելճուկ ռումի կայսրութիւնը անոր սպառնացող քայքայումի վտանգէն:

Իր դեռատի որդին՝ Ասետտին Գլըճ Ասլան Գ. յաջորդեց իրեն (1204), բայց չուտով գահընկէց եղաւ եւ բանտ նետուեցաւ Ղայասետտին Կայ Խոսրով Ա.ի կողմէ, որ Կ. Պոլիսէն եկաւ Բիւզանդիոնի օգնութեամբ (ԲԱՐՀԵՐԷՈՍ, էջ 419) եւ վերագրաւեց իր գահը, որմէ վանուած էր, ինչպէս տեսնուեցաւ (Ա. Ալպոյաճեան, ՊԱՏՄ. ՀԱՅ ԿԵՍԱՐԻՈՅ, էջ 508 եւ ՊԱՏՄ. ԵՒԴՈԿԻՈՅ ՀԱՅՈՅ, էջ 228):

Այս կերպով երկար պայքարէ մը ետք պետութեան միասնականութիւնը վերստին կը հաստատուէր: Ղայասետտին Կայ Խոսրով հազիւ վերահաստատուած իր իշխանութեան մէջ, աշխատեցաւ ռումի սուլթանութենէն կորզուած հողերը վերագրաւել: Այսպէս, ան յարձակեցաւ Կիլիկիոյ Լեւոն Թազաւորին վրայ (ՍՄԲԱՏ ԳՈՒՏՍՏԱՊԼ, էջ 115, ՀԱՅ ԿԵՍԱՐԻԱ, էջ 508):

Նոյնպէս նաեւ յարձակեցաւ ռումի պետութենէն բաժնուած միւս իշխանութիւններուն վրայ:

Ղայասետտին Կայ Խոսրով Ա. Մալաթիոյ կուսակալ նշանակեց իր եղբէջ որդին Ասետտին Կայ Քաուսը, որ իրեն յաջորդեց եւ երկիրը կառավարեց



1211-էն 1220 :

Ղալասետտին Կայ Խոսրովի եւ իր որդւոյն Ասետտին Կայ Քաուսի իշխանութիւնները խաղաղ ժամանակամիջոց մը չէին ոչ միայն Իկոնիոյ կայսրութեան, այլեւ դրացի երկիրներու — ինչպէս Կիլիկիոյ Հայոց թագաւորութեան, Նիկիոյ յոյն կայսրութեան, Կ. Պոլսոյ լատին կայսրութեան, Պոնտոսի յոյն կայսրութեան եւ այլ մանր իշխանութեանց համար, որոնք իրարու դէմ կը կռուէին անընդհատ (տես մանրամասնութիւններ, ՊԱՏՄ. ՀԱՅ ԿԵՍԱՐԻՈՅ, էջ 508—512), սակայն անոնք ուղղակի Մալաթիոյ հետ կապ չեն ունեցած :

Արտաքին այս կռիւներուն հետ ներքին միութիւնն ալ կը պակսէր Իկոնիոյ Սուլթանութեան, վասնզի Ասետտին Կայ Քաուս Ա. ի (1211—1220) դէմ կը կռուէր իր կրտսեր եղբայրը՝ Ալայետտին Կայ Խոպատ, զոր իր հայրը՝ Ղալասետտին Կայ Խոսրով Թոգատի կուսակալ նշանակած էր :

Երկու եղբայրները իրարու դէմ մաքառեցան դահուն տիրանալու համար (ՊԱՏՄ. ԵԻԴՈԿԻՈՅ, էջ 228) : Բայց յաղթանակը մնաց Ասետտինի, որ Ալայետտինը գերի բռնելով Մալաթիոյ կողմերը բերդի մը մէջ բանտարկեց :

Ասետտին Կայ Քաուս իր իշխանութեան շրջանին բոլոր դրացի երկիրներու հետ պատերազմեցաւ շարունակ եւ զեղազարդեց իր նախասիրած Սեբաստիա քաղաքը (ՊԱՏՄ. ԵԻԴՈԿԻՈՅ, էջ 229) :

1220-ին, Մելիք էլ Աշրաֆի դէմ արշաւանքի մը ատեն Մալաթիոյ մէջ հիւժախտէ վարակուեցաւ եւ վերադարձին մեռաւ այս հիւանդութենէն (ԲԱՐՀԵԲՐԷՈՍ, էջ 437, RHC, HO Բ. 150, եւայլ), հաւանօրէն Մալաթիոյ մէջ<sup>1</sup> :

Իրեն յաջորդեց Մալաթիոյ մօտակայ բերդի մը մէջ բանտարկուած Ալայետտին Կայ Խոպատ Ա. (1220—1236), որ Սելճուկ Իկոնիոյ սուլթանութեան ամենէն փառաւոր դէմքն է եւ կոչուած «Մեծ» :

Իր օրով այս պետութիւնը իր ընդարձակագոյն տարածութեան հասաւ :

Անիկա տիրեց Միջերկրականի երկայնքը՝ հայ եւ լատին ասպետներու իշխանութեան տակ դառնուած ամրոցներուն եւ տարածեց իր իշխանութիւնը մինչեւ Սելեւկիա քաղաքը, ուրկէ անդին անցնելէ հրաժարեցաւ միայն այն

(1) Մալաթիոյ հին քաղաքէն մէկ քիլոմետր դուրս Մեծ Մուկիթին հարաւակողմը, նոր քաղաքին ճամբուն վրայ Սելճուկեան շրջանէն մնացած դամբարան մը կայ, որ կը թուի պատկանիլ այս Սուլթանին, վասնզի թէեւ արձանագրութիւնը անընթեռնի եղած էր, բայց Grenard կրցած է որոշել Քալքայուշի անունը եւ Զիւլլափատէ 610 թուականը (=1212), որուն 10-ն տարակուսելի էր՝ մաշած ըլլալով (Grenard, Note sur les monuments du Moyen Age de Malatia, Divrique, Sivas, Darende, Amasia et Tokat. Տես Journal Asiatique, XVII, 1901, էջ 551) : Այդ թիւին ընթերցումը արդարեւ սխալ կը թուի, վասնզի Քալքայուշ 1220ին մեռած է, որուն հիշրէթի համապատասխան թուականը պէտք է ըլլայ 618 եւ ոչ թէ 610 :



պայմանով որ հայ իշխանները հարկատու դառնային իրեն Տրապիզոնի Կոմս-նէններու պէս :

Հայոց Հեթում թագաւորը ինքն ալ ճանչցած էր Ալայետտին Կայ Խոպատի դերիշխանութիւնը եւ նորոգած այն դաշինքը, զոր Լեւոն թագաւոր կնքած էր իր մահէն քիչ առաջ, Ալայետտինի հօր հետ (հմմտ. ԿԻՐԱԿՈՍ ԳԱՆԶՍԿԵՅԻ, էջ 95 եւ ՍՄԲԱՏ ԳՈՒՆՏՍՒԱՊԼ, էջ 121, ՀԱՅ ԿԵՍԱՐԻԱ, էջ 512) :

Այս սուլթանը նաեւ դրաւեց Մալաթիոյ շրջակայքը բռնակալող ճորտական Արդիկ օղլուներու իշխանութեան մէջ գտնուող Քեախթէն եւ Չմշկածագը իրենց շրջականերով :

Իր զինուորական յաղթանակներուն փառաւորագոյնը եղաւ Խուարէզմի շահ Մուհամմէտ Ճելալ-էտ-Տինի դէմ Երզնկայի մօտ — 1230-ին — իր շահած ճակատամարտը՝ իրեն զինակից էյուպեան Աչրաֆ եւ Քեմալ իշխաններուն հետ, որոնք Ալայետտին Կայ Խոպատ Ա.ի պէս Մահմետականներ էին, եւ ասոր համար թերեւս դթութեամբ վարուեցան իրենց համակրօն թշնամիին դէմ եւ չհետապնդեցին անոր փախչող բանակը (ԿԻՐԱԿՈՍ, էջ 119—120, հմմտ. ՀԱՅ ԿԵՍԱՐԻԱ, էջ 513) :

Ալայետտինի այս յաղթանակը, որ մեծ խանդավառութիւն ստեղծեց իր պետութեան մէջ, քիչ յետոյ աղէտի մը պիտի վերածուէր, վասնզի այս յաղթանակով անիկա կը քանդէր միակ պատուարը, որ կը կանգնէր արեւելքէն սպառնացող նոր վտանգին՝ Մոնկոլներու արշաւանքին դէմ : Ինչպէս որ Բիւզանդիոն քանդած էր Հայաստանի հայ թագաւորութիւնները ԺԱ. դարուն սկիզբը եւ դիւրացուցած էր Սելճուկներուն մուտքը իր հողերուն մէջ, նոյնը ըրաւ Ռումի սուլթանութիւնը, որ անհեռատեսութեամբ մաքառեցաւ Խուարէզմի Շահ Ճելալետտինի հետ, Շահ Արմէններու մայրաքաղաքը Խլաթը դրաւելու համար :

Անոր յաղթելէն ետք վերջ տուաւ նաեւ Էրզրումի սելճուկեան կողմնական (Collateral) հարստութեան եւ անոր երկիրները կցեց իր պետութեան եւ պատուար մը եւս ջնջեց (ՀԱՅ ԿԵՍԱՐԻԱ, էջ 513) :

Այս նոր նուաճումը սակայն պատճառ եղաւ նոր պատերազմի մը, որովհետեւ Ալայետտին Կայ Խոպատի դաշնակից էյուպեան Մելիք Էլ Քամել սուլթանը նախանձիլ սկսաւ, եւ Սիւրիոյ ու Միջագետքի տասնեւվեց մահմետական իշխանները, մեծ մասամբ էյուպեան, առաջնորդեց մեծ ոյժերով դէպի Փոքր Ասիա Ալայետտինի դէմ : Բարբախտաբար անոնք չվստահեցան Եգիպտացիին ոյժին վրայ եւ փորձը ցոյց տուաւ որ դժուար դործ մըն էր լեռնային լաւ ամրացուած անցքերէն թափանցել Փոքր Ասիոյ ներքին մասերը. այնպէս որ առաւելութիւնը մնաց Ալայետտինի կողմը, որ Կարսի դրաւումէն ետք, ինչպէս Սմբատ Գունտսդապլ կը գրէ «նլորեցաւ անտի եւ երեկ էառ զՄելիտնի եւ զԽարբերդ եւ զՉմշկածագֆն եւ զԱմիթ եւ զԾոփֆն եւ մինչ Եփրատ Կտրէ, զամէնն մլֆեց եւ կորոյս զՍուլտնայֆն հայնց որ ելաւ, եկաւ Մըսրայ



Սուլտանն Անթափայ տիրոջն ի յօգն ու զկարայ իրք առնել, խանգարեաց զամենն ու փախոյց» :

Սակայն չկրցաւ պահել իր դրաւած վայրերը, զորս կորսնցուց եւ 1231-ին իր իշխանութեան վերջերը Մոնկոլները յառաջացան մինչեւ Հիւսն Զիյար (= Պարբերդ), մինչեւ Եփրատ, Մալաթիոյ մօտերը (ԲԱՐՀԵՐԻՈՍ, էջ 463) : Ալայետտին 1232-ին դրաւեց իւր Մելիք էլ Աշրաֆէն : Երբ յաջորդ տարին այս վերջինը Հիւսն Մանսուրը դրաւեց Եգիպտոսի Մելիք էլ Քամել եղբօրը հետ, Ալայետտին Մալաթիոյ մէջ հաւաքեց 100.000 հոգիէ աւելի բանակ մը, նուաճեց Հիւսն Զիյարը (Պարբերդ, նոյն, էջ 467) եւ պաշարել տուաւ 1233-ին Ալ-Րուհան (= Ուրֆա = Եդեսիա) : Պարբանի բնակիչները յարձակումէ մը վախնալով, իրեն՝ Մալաթիա ղրկեցին իրենց քաղաքին բանակիները (ԲԱՐՀԵՐԻՈՍ, էջ 468, Kamal-el-Din, Թրդմ. Blochet, *Revue de l'Orient Latin*, V. 88) : Այս կերպով առաջին անգամ ըլլալով Մոնկոլները թափանցեցին դէպի Անատոլիա :

Առաջին անգամ Զարմաղան Նուին մոնկոլ հրամանատարին առաջնորդութեամբ առաջացաւ մինչեւ Սեբաստիա, աւելլով եւ սրբելով Ալայետտին Կայ Պոպատի ռազմական կարեւոր վայրերու մէջ կառուցած բերդերը, որոնք անդօր եղան մոնկոլ հեղեղը կասեցնելու :

Ալայետտին Կայ Պոպատ ասոր վրայ խոհեմութիւն համարեց Մոնկոլներու առջեւ խոնարհիլ եւ ընդունեցաւ անոնց գերիշխանութիւնը :

Իր որդին եւ յաջորդը՝ Ղայասետտին Կայ Պոսրով Բ. (1236—1246), որ իր հայրը թունաւորելով սպաննած էր, ժառանգեց իր հօրմէն ընդարձակ կայսրութիւն մը, որ գրեթէ կ'ընդգրկէր ամբողջ Փոքր Ասիան, բացի Նիկիոյ եւ Տրապիզոնի յոյն կայսրութիւններէն եւ Կիլիկիոյ հայ թագաւորութենէն, որոնք սակայն հարկ կը վճարէին եւ կ'օգնէին սուլթանին զօրքով : Սակայն Մոնկոլները, որոնք ողողած էին իսլամական տիրապետութեան ենթարկուած արեւելեան աշխարհը, Հայաստանը եւ Վրաստանը (1232), ջախջախած Ռուսիան, եւ զգետնած՝ Հունգարիան, ահարկու սպառնալիք մը կը ներկայացընէին այս պետութեան համար :

Հետեւաբար Ղայասետտին Կայ Պոսրով Բ., Մոնկոլներու սարսափին առջեւ շփոթահար, իրեն զինակից ունենալու համար Փոքր Ասիոյ բոլոր իսլամ եւ քրիստոնեայ իշխանութիւնները, միացաւ եւ իր իշխանութեան առաջին տարիներուն իր թագաւորութենէն վտարեց իսլամները : Անոնք քաջուելու ատեն յաղթեցին Մալաթիոյ Սու Պաշիին (հրամանատար) Սայֆ-ալ-Տաւլայի եւ յետոյ Եփրատը անցան Մասարայի (տարբերակ Mukra = Մուզրա) մօտերը (ԲԱՐՀԵՐԻՈՍ, էջ 471) :

1239-ին պայթեցաւ թիւրքմէն ապստամբութիւն մը, զոր դրդած էր Պասլա Իսհազ, որ ինքզինք Մարգարէ կամ Մահտի հռչակած էր :

Թիւրքմէնները հակառակ իրենց վրայ ղրկուած բանակներուն՝ անզրսպելի կը մնային եւ կը յարձակէին քաղաքներու եւ գիւղերու վրայ : Անոնք կը



գրաւէին Մալաթիոյ, Թոգատի եւ Ամասիոյ շրջանները:

1241-ին Մալաթիոյ Էմիրը ջախջախիչ պարտութիւն մը կը կրէր մոլեռանդ Թիւրքմէններու ասպատակախումբէ մը, զոր կ'առաջնորդէր անձամբ Պապա Իսհազ: Վերջապէս սելճուկ ռումի սուլթանին բանակը մեծ դժուարութեամբ կրցաւ Պապա Իսհազը կալանաւորել եւ կախաղան բարձրացնել:

Սակայն պարտուած Թիւրքմէնները վերադրգուեցան իրենց պետին կախաղան հանուած ըլլալէն, զայն նկատելով մարտիրոսացած աստուածային առաքեալ մը (Րեսուլ Ուլլահ) եւ աւելի կատաղութեամբ կռուեցան եւ տաղնապի մատնեցին ռումի կայսրութիւնը, որ կը դժուարանար ընկճել այս ապրստամբութիւնը, որ բաւական ատեն շարունակուեցաւ<sup>1</sup>:

Ասիկա տեսնելով Մոնկոլները, որ ասկէ առաջ վարանած էին Ղայասետին Կայ Խոսրով Բ.ի Փոքր Ասիոյ իսլամ եւ քրիստոնեայ իշխանութիւններէն կազմած միութեան վրայ յարձակիլ եւ կանգ առած էին դէպի Փոքր Ասիա առաջանալէ, տեսնելով կայսրութեան այս ներքնապէս պառակտուած վիճակը, 1242-ին մտան Սելճուկ Սուլթանին հողերը Բաչու-Նուինի հրամանատարութեամբ եւ առաջին առթիւ պաշարեցին եւ գրաւեցին Մալաթիան եւ առատ աւարով եւ դերիներով դարձան (ՀԱՅ ԿԵՍԱՐԻԱ, էջ 515):

Ղայասետին Կայ Խոսրով Բ. սաստիկ զայրացած, 1243-ին Մոնկոլներուն դէմ գնաց, բայց Աշխար Օվայի դաշտին մէջ կամ Քէօնէ տաղի մօտ չարաչար պարտուեցաւ 1243 Յունիս 26-ին եւ պարտաւորուեցաւ հարկատու դառնալ Մոնկոլներուն (ՀԱՅ ԿԵՍԱՐԻԱ, էջ 515, ՊԱՏՄ. ԵՒԴՈԿԻՈՅ ՀԱՅՈՑ, էջ 233), անոնց թողլով Երզնկան, Կեսարիան<sup>2</sup>, Սեբաստիան, Տիւրիկը եւ Խարբերդը:

Երբ այս մեծ պարտութեան լուրը Մալաթիա հասաւ, Րաշիտ ալ-Տին Սուպաշին եւ արքունիքին միւս պաշտօնատարները արքայական դանձարանին դուռները խորտակեցին եւ դանձը բաժնեցին իրենց միջեւ եւ Հալէպ փախան: Քաղաքին ամենէն առաջնակարգ ընտանիքներուն պատկանող ստուարաթիւ քաղաքացիներ անոնց հետեւեցան, բայց Մալաթիայէն մէկ ժամ հեռու տեղ մը, յանկարծակի ենթարկուեցան Թաթարներուն յարձակումին, ոմանք ըսպաննուեցան, միւսները դերի ինկան: Քաղաքին բնակիչները, մահմետական եւ քրիստոնեայ, խնդրեցին Մար Դիոնեսիոս Անկուր Մետրոպօլիտէն, ըստանձնել քաղաքին պաշտպանութիւնը: Երկու ամիս ետք, որուն միջոցին քաղաքին շուրջը խիստ հսկողութիւն կատարուեցաւ, Թաթարները քաշուեցան:

1244-ին ալ, Թաթարներուն պետը Իսաւուր<sup>3</sup> Նուին բանակեցաւ Մալա-

(1) Թիւրքմէն այս ասպտամբութիւնը հաղիւ 1280ին արմատախիւ եղաւ: Ինչպէս կը կարծուի, Պապահներու շարժումը մէկ անդրադարձն էր Պաւլիկեան շարժումին, որ այդ շրջանակին մէջ ծագած էր եւ թէեւ ընկճուած, բայց բնաւ արմատախիւ չէր եղած (տես Պատմ. Եւդոկիոյ, 234-5):

(2) Կեսարիոյ անձնատուութեան մանրամասնութիւնները տես Պատմ. Հայ Կեսարիոյ, էջ 515-6:

(3) Տարբերակ՝ Նասավուր:



թիոյ առջեւ եւ աւերեց շրջակայքը, մինչեւ որ Սուլայի Բաշխտ ալ-Տին, ճոխ նուէրներով զայն հեռացուց (ԲԱՐՀԵՐԻՈՍ, էջ 477—9) :

Ղայասետտին Կայ Խոսրով Բ. ո՛չ Մոնկոլներէն կրցած էր ձերբազատուիլ եւ ոչ ալ Պապահներու ըստ երեւոյթին կրօնական մեծ ապստամբութիւնը կրցած էր զսպել, երբ մեռաւ 1246-ին Ալայայի մէջ, իր դահը թողլով իր երեք անչափահաս<sup>1</sup> եւ երեք տարբեր մայրերէ ծնած զաւակներուն՝ Ռուքնետտինի, Ասետտինի եւ Ալայետտին Կայ Խոսրատի, որոնք միաժամանակ իրենց կուսակիցներէն սուլթան հռչակուեցան : Ղայասետտինի վեղիրը<sup>2</sup> սուլթանին մահէն ետք, կնութեան առաւ անոր այրին, որ յոյն քահանայի մը աղջիկն էր եւ սուլթանին անկէ ծնած զաւակը՝ Ռուքնետտինը գահ բարձրացուց իր խնամակալութեան տակ, մինչ Ղայասետտին իրեն յաջորդ նշանակած էր իր նախընտրած կնոջը՝ Վրաստանի Ռուսուդան թագուհիի դուստր Թամարէն ունեցած զաւակը՝ Ալայետտին Կայ Խոսրատը, որուն հաւատարմութիւն ուխտած էին բոլոր էմիրները (Յ. Յակոբեան, ՈՒՂԵԳՐՈՒԹԻՒՆՆԵՐ, Ա., էջ 32) :

Իսկ երրորդ որդին՝ Աղետտին, որ Իկոնացի հարիւրապետի մը աղջիկէն ծնած էր, իբրեւ իսլամածին խումբ մը Թուրքերու եւ Թիւրքմէններու համակրութիւնը իրեն հետ ունէր, կը գաւազրէ եւ Մալաթիոյ սուլթան կը հռչակուի : Իր գաւազնները որոշած էին սպաննել Ղայասետտինի քրիստոնեայ կիներէն ծնած զաւակները, որոնք գահուն համար կը մաքառէին, եւ գահ բարձրացնել այս իսլամ կնոջմէ ծնած զաւակը :

Սակայն Աղետտին<sup>3</sup> պարտուեցաւ եւ իր հետեւորդներէն շատերը սպանուեցան (տես ՊԱՏՄ. ՀԱՅ ԿԵՍԱՐԻՈՅ, էջ 518, ՊԱՏՄ. ԵՒԴՈԿԻՈՅ ՀԱՅՈՅ, էջ 235—239) :

Աղետտին Կայ Քաուս երկրորդ բանակ մը կազմեց եւ դարձեալ պատերազմ մղեց, սակայն այս անգամ գերի ինկաւ Ռուքնետտին եղբօրը ձեռքը, որ զայն գահազուրկ ըրաւ եւ ինք իշխեց Մալաթիոյ (ԲԱՐՀԵՐԻՈՍ, էջ 482) :

Աղետտին 1253—1255 տակաւին կը պահուէր շղթաներու մէջ :

Ռուքնետտին Գըլըճ Ասլան Դ. եւ Ալայետտին<sup>4</sup> երկու եղբայրները կը համաձայնին գահը բաժնելու :

(1) Ռուբրուք, որ այդ օրերուն (1253—1255) Գոնիա գտնուած է, իր ճամբուն վերայ, հեգնօրէն պատմած է թէ երկիրը կը կառավարուէր «մանուկներով» (Յ. Յակոբեան, Ուղեգրութիւններ, Ա. հտ., էջ 30) :

(2) Կը կարծուի ըլլաւ Ռուքնետտին Սուլթանին Մուինետտին Սիւլէյման վեղիրը (Encyclopedia Britannica, New York, 1911, հտ. ԻԴ եւ Յ. Յակոբեան, Ուղեգրութիւններ, Ա., էջ 32) :

(3) Այս սուլթանին մէկ արձանագրութիւնը Կրէպիւլ Էվլէր 645 (= 6 Յուլիս 1247) թուականով հրատարակուած Grenard-էն (տես Journal Asiatique, XII, 1901, էջ 551) : Չայն կը կոչէ Ասետտին Տունիա վ'Էտտին :

(4) Ռուբրուք Ալայետտինը կը կոչէ «տկար արարած» եւ «փափկասուն» :



Եթէ այս բաժանումէն ետք կարելի ըլլար խաղաղութեամբ ապրիլ եւ ներքին կռիւներուն վերջ տալ, թերեւս կարելի ըլլար Մոնկոլներուն դիմադրել, սակայն դժբախտաբար ներքին վէճերը եւ կռիւները կը շարունակուէին, երբ միւս կողմէ Մոնկոլները հետզհետէ կ'առաջանային եւ երկիրը կ'ընկճէին:

Մալաթիա այս շրջանին երկու անգամ պաշարուեցաւ: Նախ 1251—1252-ին (հիճրէթի 649) եւ ապա 1252—1263 Յուլիսին (հիճ. 650) Իսաւուրի հրամանատարութեան տակ եւ քաղաքին շրջակայքը աւերուեցաւ (ԲԱՐՀԵ-ԲՐԻՈՍ, էջ 481):

Դիտուած ըլլալով որ Մոնկոլները ներողամիտ եղած են եւ խնայած են անոնց որ իրենց հնազանդած են, Ռուքնետտին Գըլըճ Ասլան Դ.՝ իր Ազետտին եղբայրը 1254-ին կը դրկէ Մոնկոլ Մանկու խանին, իր վրացի մօրը ազդականներուն փափաքով, սակայն անիկա ճամբան կը մեռնի (Յ. Յակոբեան, նոյն, էջ 32 եւ ԿԻՐԱԿՈՍ ԳԱՆՁԱԿԵՅԻ, էջ 188—9), հետեւաբար այս ձեռնարկը իր նպատակին չի հասնիր:

Հուլաղու խան (1256—1265), հիմնադիրը Իլխանեան հարստութեան, որ արեւմուտքի կ'իշխէր, բոլորովին ընկճելու համար սելճուկեան իշխանութիւնը, 1256-ին հրաման կը դրկէ բոլոր մոնկոլ իշխաններուն, որոնք Բաչու Նու զօրավարին հրամանատարութեան ներքեւ էին, որ թողուն իրենց բնակութեան կալուած երկիրները՝ Մուղանը եւ Աղուանից, Հայոց եւ Վրաց երկիրները եւ երթան բնակին իրենց կահարասիներով եւ ինչքերով սելճուկ Ռումիներու աշխարհը, «գի ինֆն նստցի փոխանակ նոցա ի բարի երկիրն, գի յոյժ բազմութեամբ եկեալ էր նա, մինչ գի ասեն՝ թէ ամիս մի հազիւ բովանդակեցաւ զօր նորա անցանել ընդ մեծ գետն Զհուն» (= Զահան):

Հուլաղուի հրամանը գործադրելու համար երբ մոնկոլ հրամանատարները գացին Ռումիներու երկիրը, Ռուքնետտին Գըլըճ Ասլան Դ. ընդդիմացաւ պատերազմով, բայց իր ոյժը անբաւական ըլլալով փախաւ Ալայա, Միջերկրականի եզերքը:

Իսկ թշնամիները անոր տէրութեան բոլոր գաւառներուն մէջ մինչեւ Միջերկրականի եւ Սեւ ծովու եզերքները, ահագին կոտորած տուին, գրաւեցին եւ ջարդեցին Կարինը, Երզնկան, Սեբաստիան, Կեսարիան, Գոնիան, Մալաթիան եւ անոնց շրջակայքը: Հուլաղու հրամայեց որ իրենց կահարասին ետ դարձնեն, որպէսզի երթան իջեւանները եւ իրենք նոյն կողմերը շրջեցան ասպատակութիւններով: Ասոնց քով հասաւ նաեւ Հեթում Հայոց թագաւորը, որ Մանգոյ խանին այցելութենէն կը դառնար եւ կեցաւ Բաչու Նուին քով, որ զինքը բազմաթիւ զօրքերով դարձուց Կիլիկիա՝ Սիս քաղաքը (ԿԻՐԱԿՈՍ, էջ 217—220):

Մոնկոլական այս արշաւանքները տկարացուցին ռումի սուլթաններուն իշխանութիւնը, որ ենթարկուեցաւ մոնկոլ գերիշխանութեան, ինչպէս կը հաստատէ Սուբրուք: Մոնկոլները միջամտել սկսան երկրին ներքին գոր-



ծերուն եւ զայն երկուքի բաժնեցին :

Ազեատին Կայ Քառու Բ. (1247—1266) արձակուելով իր գերութենէն, վերստին դահ կը բարձրանայ եւ կ'իշխէ Ալիսի արեւմտեան գաւառներուն վրայ, Ալայա մայրաքաղաքով, եւ Ռուքնետտին Գըլըճ Ասլան Դ. (1247—1267) կ'իշխէ արեւելեան նահանգներուն, Գոնիան ունենալով իրեն մայրաքաղաք :

Ազեատինի բաժինին մէջ էր Մալաթիա, ուր 1257-ին այս սուլթանը զրկեց թուղր Հաֆըսը այդ շրջանէն զօրք հաւաքելու համար :

Բայց թուղր Հաֆըս քաղաքին գլուխը երբ դրաւ Քիւրտերու պետը՝ Շարաֆ Էտ-Տին Ահմէտ Իպն Պիլասը, բնակիչները մերժեցին անոր հնազանդիլ, որովհետեւ հաւատարմութեան երդում տուած էին Ռուքնետտինի եւ կը վախնային թաթար Պայճուէն, որ կը պաշտպանէր Ռուքնետտինը :

Ազեատինի զրկած երկրորդ անձը՝ Պիհատուրը միայն ընդունեցան, բայց անիկա փախաւ Պայճուին առջեւէն եւ Մալաթիա դարձաւ միայն այն ատեն, երբ Պայճու քաջուեցաւ : Բայց դուռները դոց գտաւ եւ բնակիչները միայն այն ատեն թոյլ տուին որ քաղաք մտնէ, երբ սովը զիրենք ստիպեց՝ Պիհատուրի Մալաթիան պաշարելուն պատճառով (ԲԱՐՀԵԲՐԷՈՍ, էջ 489—500) :

1260-ին, Հուլաղու խան շինել տուաւ Եփրատի վրայ կամուրջներ՝ Մալաթիոյ, Հոռմկլայի (Գալաթ Էլ Րումի), Պիրի (ալ Պիրա = հիմա Պերե-ճիկ) եւ Գարգիսիայի (= անծանօթ) մօտերը՝ իր հսկայական բանակին համար (ԲԱՐՀԵԲՐԷՈՍ, էջ 509) :

Ապաղա Մոնկու Իլխանեան խանը (1265—1282), որ Հուլաղուի յաջորդած էր, նորէն բաժնեց ռումի սելճուկ սուլթանութիւնը երկու զարմիկներու միջեւ : Ասոնցմէ մէկը՝ Մանսուր, ստացաւ Երզնկան (Երզիճան), Կարինը (= Էրզրում), Սեբաստիան եւ Մալաթիան, Կայ Խոսրով Գ.ի կենդանութեանը (1282) :

Մանսուր, որ որդին էր Ասեատին Կայ Քառուի եւ թողը՝ Ղայասետտին Կայ Խոսրով Բ.ի, իր հօրը մեռած ատեն Խրիմ փախած էր, տեղւոյն մոնկու խանին մօտ :

Սելճուկ ռումի սուլթանութեան այս պառակտումէն եւ անոր հետեւանք տկարացումէն օգտուեցան բոլոր այս սուլթանութեան հակառակորդները եւ անկէ մասեր խլեցին :

Ասոնցմէ մէկն էր մեր Կիլիկիոյ Հեթում թագաւորը, որ իբր դաշնակից Մոնկուներու՝ անոնց բարեկամութեան վրայ յոյս դնելով, կը ջանայ վերադրաւել Անտիտաւրոսեան այն վայրերը, զորս Լեւոն դրաւած էր, եւ 1255-ին եւ 1259-ին երկու անգամ անցաւ Կիլիկեան դուռներէն (= Կիւլէկ պողազի) եւ դէպի Կապադովկիա, դէպի Արգէոսի փէշերը յառաջացաւ (ՍԻՍՈՒԱՆ, էջ 174, ՊԱՏՄ. ՀԱՅ ԿԵՍԱՐԻՈՅ, էջ 520), բայց իր նուաճումները տեւական



չեղան, վասնզի Սելճուկները շարունակ կը մաքառէին (ՀԱՅ ԿԵՍԱՐԻԱ, էջ 520—1) :

Վերջապէս Մոնկոլներու միջամտութեամբ Հայոց թագաւորը եւ Ռուսի Սելճուկները հաշտութիւն կնքեցին :

Ազեատին Կայ Քաուս Բ. իր եղբայրը Ռուքնետտինը վտարելու համար այն երկրամասէն, զոր Մոնկոլները անոր տուած էին եւ իր անկախութիւնը ձեռք բերելու համար, Եգիպտոսի մեմլուք սուլթանին հետ կը դաշնակցի եւ կը յաջողի զայն փախցնել :

Ռուքնետտին կ'ապաստանի Մոնկոլներուն քով, որոնք Ազեատին Կայ Քաուս Բ.ը պատժելու համար մոնկոլ բանակով մը կու գան եւ Ռուքնետտինի կը շնորհեն սելճուկ գահը :

Ազեատին կը փախչի Կ. Պոլիս, Մոնկոլներու ձեռքը գերի չիյնալու համար :

Ռուքնետտին Գըլըճ Ասլան Դ. սակայն կը դառնայ միայն անուանական վեհապետ մը, իրական իշխանութիւնը իր ձեռքերուն մէջ առած ըլլալով իր վեզիրը՝ Մուինետտին Սիւլէյման, որ 1267-ին Աքապայի մոնկոլ խանէն հրաման բերել տուաւ զայն գլխատելու համար :

Վեզիրը գահ բարձրացուց իր մանուկ որդին Ղայասետտին Կայ Խոսրով Գ.ը (1267—1284) եւ երկիրը կառավարեց դեռ տասը տարի (1267—1277), մինչեւ որ մասնակցեցաւ դաւադրութեան մը, զոր քանի մը էմիրներ սարքած էին Եգիպտոսի մեմլուք սուլթանին՝ Պիպարսի կամ Ֆուհտուգտարի օգնութեամբ Մոնկոլները հեռացնելու համար ուսմի սուլթաններու երկիրէն :

Պիպարս քալեց Փոքր Ասիա եւ Մոնկոլներուն յաղթեց Ալպիսթանի արիւնալի պատերազմին մէջ (1277), բայց երբ աւելի յառաջացաւ դէպի Կեսարիա, Մուինետտին Սիւլէյման քաջուեցաւ, վարանելով իրեն միանալ, գործելու բուն վայրկեանին : Պիպարս եւս ետ քաջուեցաւ մատնելու համար դաւաճան վեզիրը վրէժխնդրութեանը մոնկոլ խանին, որ շուտով հասկցաւ անոր դաւը եւ հրամայեց բարբարոս գլխատում մը (1277) կամ գերեվարութիւն մը (աւելի մանրամասնութեանց համար տեսնել ՀԱՅ ԿԵՍԱՐԻԱ, էջ 521—2) :

Մուինետտին Սիւլէյման վեզիրին գլխատումէն կամ տարագրութենէն ետք Ղայասետտին Կայ Խոսրով Գ. շարունակեց անուանապէս տիրել մինչեւ 1284, մինչ իրականին մէջ երկիրը կը կառավարէր մոնկոլ փոխարքայ մը :

Եգիպտոսի Մեմլուքները, որոնք Սիւրիոյ իրենց տիրապետութիւնը ընդարձակել կ'աշխատէին եւ հակառակ էին Մոնկոլներու, չէին հանդուրժեր Մոնկոլներու գերիշխանութեան սելճուկ սուլթանութեան վրայ, միշտ յարձակում կը գործէին դէպի Փոքր Ասիա, Եփրատէ անցնելով :

Այս յարձակումներէն մէկուն միջոցին, որ 1282-ին կատարուեցաւ, Ալ-Պիրայի (Պիր=Պերեճիկ) եգիպտացի կառավարիչը Հիտար (Khidr=



= իստը) աւերեց Մալաթիոյ շրջանը (ԲԱՐՀԵՐՐԷՈՍ, էջ 546): Այսպէս սելճուկ սուլթանութիւնը երկու սուրի միջեւ էր: Եգիպտոսի Մեմլուքները մէկ կողմէն եւ Մոնկոլները միւս կողմէն կը ճնշէին այս պետութիւնը իրենց ենթարկելու համար:

Մոնկոլները, որ արդէն դայն ընկճած էին, Եգիպտոսի օգնութեամբ անոր զօրանալէն վախճալով, դայն տկարացնելու համար, բաժան-բաժան ընելու կ'աշխատէին: Այսպէս, Ապաղա խանի մահէն (1282) ետք, երբ իր որդին՝ Ահմէտ խան (1282—1284) դահակալեց, բոլորովին ընկճելու եւ պառակտելու դիտումով Ռումի սուլթանութիւնը դարձեալ երկու մասի բաժնեց եւ Սեբաստիոյ, Մալաթիոյ, Երզնկայի եւ Էրզրումի կառավարութիւնը 1282-ին յանձնեց Ալետտին Կայ Քաուս Բ. ի որդւոյն՝ Մասուտի:

Մասուտ, որ ինչպէս տեսնուեցաւ իր հօրը մահուան ատեն իրիմէն փախած էր մոնկոլ խանին մօտ, երբ այս քաղաքները ստացաւ, եկաւ անոնց տիրանալու, բայց Ղայասետտին Կայ իր սորով Գ. չհամակերպեցաւ այս բաժանումին: Մոնկոլ խանը (Ահմէտ իսկ) սպաննեց դայն 1284-ին:

Այսպէս Մոնկոլները 1285-ին գրաւեցին Մալաթիան, որ տակաւին քրիստոնեայ քաղաքի երեւոյթը կը պահէր, վասնզի ունէր տակաւին բազմաթիւ Ասորի եկեղեցիներ, որոնց կ'առաջնորդէին եպիսկոպոսներ՝ ենթակայ Անտիոքի պատրիարքութեան: Այս գրաւման ատեն Մոնկոլները աւարի տըւին, մեծ մասամբ քանդեցին եւ հրկիզեցին այս եկեղեցիները (Մ. Որբերեան, ԲԻԻՐԱԿՆ, 1900, էջ 119):

Այսպէս ընկճելէ ետք երկիրը, Արկուն խան (1283—1287) սելճուկ դահը շնորհեց Մասուտի, որ անգօր եւ հեղինակութենէ զուրկ էր, եւ անկարող զսպելու այն թուրք էմիրները, որոնք անկախութիւն հռչակած էին: Մոնկոլները, երբ Մասուտը պաշտպանելու համար կը մտնէին սելճուկ սուլթանին երկիրը՝ այդ ապստամբ էմիրները նուաճելու համար, անոնք լեռները կը քաշուէին, Մոնկոլներուն մեկնելէն ետք կրկին երեւան ելլելու համար:

Մասուտ Բ. զոհ գնաց հաւանաբար 1297-ին (ըստ ոմանց՝ 1305-ին) վրէժխնդրութեանը իր էմիրներէն մէկուն, որուն հայրը մահուան դատապարտած էր:

Մասուտ Բ. ի սպանութենէն ետք, Ալայետտին Կայ իր օգնութեամբ, որ Մասուտի եղբօր՝ Փարամարդի որդին էր, Գոնիա մտաւ 1298-ին, բայց իր տիրապետութիւնը այնքան մթին է որ ոչինչ կրնայ ըսուիլ անոր մասին:

Կարգ մը հեղինակներ կը հաստատեն որ անիկա կառավարեց մինչեւ 1300, մինչ ուրիշներ՝ իր իշխանութիւնը մինչեւ 1307 եւ նոյնիսկ ոմանք մինչեւ 1315 տեւած ցոյց կու տան:

Իրմով վերջացաւ Իկոնիոյ Ռումի Սելճուկներու կայսրութիւնը, որ մօտաւորապէս երկու դարեր կեանք ունեցաւ:

Իր վերջին օրերուն երկիրը անիշխանութեան մատնուած էր եւ երկրին զանազան մասերը գրաւուած էր տէրէպէյիներէ, որոնք անիշխան կը կառավարէին երկիրը:



ԺԷ.

## ՄԱԼԱԹԻԱ ԹԻՒՐԳՄԷՆ ԿԷՍ - ԱՆԿԱԽ

## ԻՇԽԱՆՈՒԹԵԱՆ ՏԱԿ

(1315 — 1516)

Մոնկոլներու Փոքր Ասիոյ մէջ գերիշխան եղած շրջանին, ըստ Ապուլ ֆետայի, քրիստոնեաները եւ մահմետականները իրարու քով կ'ապրէին կատարեալ խաղաղութեամբ եւ համաձայնութեամբ:

Բայց ինչպէս ամենահին օրերէ սկսեալ՝ այս աշխարհամասին ճակատագիրը եղած է երկու մեծ ոյժերու միջեւ կռուադաշտ ըլլալ, այս շրջանին ալ դարձեալ Մոնկոլներու եւ Եգիպտոսի Մեմլուքներու միջեւ պայքարի առարկայ եղաւ:

Կոմմագինէն այս երկու ոյժերուն միջեւ չփռմի վայրերէն եւ կռուադաշտերէն մին էր, վասնզի Մեմլուքները հարաւէն գալով Սիւրիան նուաճած եւ Եփրատ հասած էին:

Հազիւ սելճուկ ուլմի սուլթանութիւնը Մոնկոլները կործանած էին երբ 1315-ին Եգիպտոսի սուլթանը՝ Մուհամմէտ Իպն Քալաուն էլ Նասր (1293, 1299—1309 եւ 1310—1341 գահակալած) Մալաթիոյ վրայ զրկեց մեծ բանակ մը՝ հրամանատարութեամբ Դամասկոսի Նաիպ՝ Սայֆ էլ տին Թունկուզի, որուն միացաւ նաեւ իր ճորտը՝ Համացի Ապուլ ֆետան:

Եգիպտական բանակը անցնելով Հալէպէն, Այնթապէն, Հիւսնի Մանսուրէն եւ Զիսլաթրայէն, 28 Ապրիլ 1315-ին բանակեցաւ Մալաթիոյ առջեւ:

Մալաթիոյ բնակիչները Պապ ալ Գատը հարաւային դուռնէն դուրս հանելով, իրենց Հաֆիմը՝ Ճամալ էլ Տին էլ Խտըրը, որուն հայրը եւ մեծ հայրն ալ նոյն պաշտօնը վարած էին, զրկեցին Թունկուզին:

Քաղաքը անձնատուր պիտի ըլլար պայմանով որ իրենց կեանքին ապահովութիւն տրուէր, ինչ որ Թունկուզ խոստացաւ տալ, բայց չկրցաւ յարգել իր խօսքը, վասնզի իր զինուորները չկրցան դիմանալ քաղաքը կողոպտելու եւ աւերելու փորձութեան:

Մեմլուք բանակը ասով ալ չբաւականացաւ, քաղաքին մեծ մասը հրկիզեց եւ աւերակի վերածեց, իսկ բնակչութիւնը գերի վարեց:

Այս գերիներու մէջ կը գտնուէին ականաւոր մարդիկ, ինչպէս Քերպուղա Թաթարը եւ Հիւսն Արկանայի Սահիպը՝ Շէյխ Մինտու:

(1) Փոխարքայ կամ կուսակալ իմաստով կը գործածէին այս բառը Եգիպտացիք:



Մալաթիա մէկ-երկու տարի սարսափներու ենթարկուած է, ինչպէս հայ յիշատակագիրներ ալ կը հաստատեն: Այսպէս 1315-ին Մելիտինէի մէջ գրուած Աւետարանի մը եւ 1316 Երուսաղէմի մէջ գրչագրուած Ճաշոցի մը գրիչը՝ Ստեփանոս «Երկայն» այս երկու ձեռագիրներուն յիշատակարաններու մէջ գրեթէ նոյն բառերով կը պատմէ Մալաթիոյ ենթարկուած աղէտը. «Զէ կար, կ'ըսէ, ումեք ըստ գրով արկանել զագգի ագգի վիշտս եւ զնեղութիւն, որ հասեալ է ընդհանուր ի վերայ ամենայն քրիստոնէից յանաւրէն եւ յանաստուած պիղծ եւ գարշելի ագգէն իսմայիլի՝ որ զամենեսեան մաշեցին ի սուր սուսերի եւ մնացեալսն ի գերութիւն վարեցին եւ ի սոյն ամին զմեծանուն մայրափաղափն Մելիտինի Հայոց առին յաւար եւ ի գերութիւն եւ զայլ բազում փաղափ եւ զգաւառս եւ զանմատչելի ամբոցս հիմն ի վեր տապալեցին» (Սիւրմէեան Արտաւազդ Արքեպս., ՄԱՅՐ ՅՈՒՅԱԿ ՀԱՅԵՐԷՆ ՉԵՌԱԳԼՐԱՅ ԵՐՈՒՍԱՂԷՄԻ, Ա. հտ., էջ 302 եւ Գարեգին Կաթողիկոս, ՅԻՇԱՏԱԿԱՐԱՆՔ ՉԵՌԱԳՐԱՅ, էջ 529-530): Սամուէլ Անեցի (էջ 116) նոյն դէպքին կ'ակնարկէ թուականի մէկ տարուան տարբերութեամբ մը (1317 նշանակելով), գրելով որ «ի սոյն ամին առաւ մայրափաղափն Մելիտինի ի Հայոց եւ ի Հագարացոց եւ խոտոր գերութեամբ վարեցին յեգիպտոս» (հմտ. Աստուածատուր Եպսկ. Ծ. Յովհաննէսեան, ՊԱՏՄՈՒԹԻՒՆ Ս. ԵՐՈՒՍԱՂԷՄԻ, Ա. հտ., էջ 203):

Օրմանեան (ԱԶԳԱՊԱՏՈՒՄ, էջ 816) կը հաստատէ թէ 1315-ին Մալաթիան եւ 1316-ին Տարենտէն գրաւուած եւ աւերուած են: Այսպէս ուրեմն, Մալաթիա եւ չրջակայքը ենթարկուեցան եգիպտական տիրապետութեան:

Եգիպտացիք իբրեւ ծայրագաւառ եւ սահմանադիւրսի մօտ նահանգ մը, զինուորականապէս զայն ամրացուցին, եւ եօթը չրջանակի բաժնեցին (Khalil al Zahiri, էջ 52):

Այս առթիւ Մալաթիոյ շուրջ հաստատուեցան եօթը ամրոցներ, որոնք էին. —

Mushar կամ Minshar  
Kumi  
Karahisar (Գարահիսար)  
Kadasbirt  
Kalah Akdja (Աղկճա բերդ)  
Kalet Newhamam  
Kalat al Akrad

(Տես Khalil al Zahirni Zubda. նոյն եւ Gandefroy — Demombzones, La Syrie à l'Epoque de Mamelouks, V. 97, Ա. 105):

Հակառակ այս նախազգուշութիւններուն եւ պատրաստութիւններուն, Մալաթիա զերծ չմնաց նոր աղէտներէն, իբրեւ պատերազմի թատերավայր: Մասնաւորապէս 1335-էն մինչեւ 1380 կէս դարու անիշխանութեան ժամանակամիջոցին (տես այս չրջանի մասին Ալպոյաճեան, ՊԱՏՄ. ՀԱՅԱՍՏԱՆԻ



ՍԱՀՄԱՆՆԵՐԸ, էջ 332—7), ուր մոնկոլ խաները Հայաստանի մէջ եւ թիւրք-մէն եւ թուրք էմիրները եւ պէկերը Փոքր Ասիոյ մէջ իրարու դէմ անընդհատ կը կռուէին, վասնզի թէ՛ Փոքր Ասիա եւ թէ՛ Հայաստան բազմաթիւ հողատիրութեանց բաժնուած էին:

Այսպէս, սուլթան Ալայետտին Գ. Կայ Խոպատի սպանութենէն (1107) ետք, իր պետութիւնը ստորաբաժնուեցաւ անկախ պէյուքիւններու, որոնք Խիւտեվենտիկեարի (Պրուսայի շուրջ), Գարասիի, Սարուխանի, Այտընի, Մենթեչէի, Թեքքէի, Համիտի, Կերմիանի, Գարամանի, Գասթեմունիի մէջ հաստատուած էին եւ յաճախ իրարու դէմ կը մաքառէին:

Ասոնցմէ ամենէն յաջողակը հանդիսացաւ Խիւտեվենտիկեարի իշխանութիւնը, զոր թուրք աշիրէթի մը պետը հիմնած էր:

Այս աշիրէթը (ցեղախումբ) կեդրոնական Ասիայէն արեւմուտք դադրաշարժ կատարած եւ պահ մը Հայաստանի մէջ կանգ առնելէ ետք եկած մտած էր սելճուկ ուումի Ալայետտին Ա.ի (1299—1335) հովանաւորութեան տակ (տես ՊԱՏՄ. ՀԱՅ ԳԱՂԹԱԿԱՆՈՒԹԵԱՆ, Բ. հտ., էջ 233—4) եւ ստացած աւատ մը Փոքր Ասիոյ էրթողրուլ գաւառին մէջ (Պիլեճիկի մօտ): Այս տասնտիրութիւնը հետզհետէ ընդարձակուեցաւ բիւզանդական հողեր նուաճելով: Աշիրէթապետը՝ էրթողրուլ մեռաւ 1288-ին եւ իրեն յաջորդեց Օսման, որուն անով կոչուեցաւ այս թուրք աշիրէթը, եւ եղաւ բոլորովին անկախ (1299), երբ գրաւեց Պրուսան (1324-ին):

Օսմանի իշխանութիւնը սելճուկ ուումի սուլթանութեան կործանումէն (1307 կամ 1314) մէկ տարի ետք, գրաւելով անոր զանազան մասերուն մէջ գոյութիւն առած վերոյիշեալ պէյուքիւնները ուումի սելճուկ սուլթանութենէն աւելի ընդարձակ եւ աւելի զօրաւոր պետութիւն մը դարձաւ, որ ԺԴ. դարուն վերջը արդէն մօտեցած էր Եփրատի:

Այդ մէկ դարու չրջանին Փոքր Ասիոյ արեւելեան մասին եւ Փոքր Հայքի մէջ ալ պատահեցան կարեւոր փոփոխութիւններ:

Իլխանեան Ղազան (1295—1304) եւ Խուտապենդէ (1304—1316) մոնկոլ խաներուն երբ յաջորդեց անչափահաս Ապու Սայիդ Պահատուր խան (1316—1336), մեմլուք եգիպտական յարձակումները եւ ներքին ապստամբութիւնները, որոնք գլխաւորաբար այս վայրերուն շուրջը կը կատարուէին, քայքայել սկսան մոնկոլ կայսրութիւնը:

Ապու Սայիդ Պահատուր խանի վեզիրը՝ էմիր Չոպան այս ապստամբ իշխաններէն մեծ մասը հպատակեցուց (Քեմալեդդին, ԱՐԳԵԱԵԱՆ ԿԵՍԱՐԻՈՅ ՊԱՏՄՈՒԹԵԱՆ ՎՐԱՅ ԱԿՆԱՐԿ ՄԸ, Թրքերէն, 1934, Կեսարիա, էջ 244) եւ ինքը կառավարել սկսաւ Փոքր Ասիան, եւ կրցաւ հաստատել Մոնկոլներու հեղինակութիւնը Փոքր Հայքի վրայ, հակառակորդ Յոյներու եւ Թուրքերու դէմ (տես (ԻՍԼԱՄ ՀԱՄԱՅՆԱԳԻՏԱՐԱՆ): Բայց նոր ապստամբութիւններ ծագեցան, որոնց մէջ ամենէն գլխաւորներէն մէկը ըլլալ կը թուի Ղուռումճիի յարուցածը 1319—1320-ին: Էմիր Չոպան պարտուած փա-



խաւ, մինչեւ որ Ապու Սալիւ օգնութեան եկաւ եւ Ղուռումճին վանեց եւ էմիր Չոպանը վերստին հաստատեց իր պաշտօնին մէջ (տես Գարեգին Կաթ. Յովսէփեան, ԽԱՂԲԱԿԵԱՆՔ, Ա., էջ 205 եւ ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 333) :

Ապու Սալիւի այս իմաստուն վեզիրը, իր իշխանութեան առաջին տարիներուն, 1316-էն 1326, կորովով եւ ճարտարութեամբ կառավարեց Անատոլուն եւ 1323-ին հաշտութեամբ վերջ տուաւ Եգիպտոսի Մեմլուքներու դէմ մղուած պատերազմին :

էմիր Չոպանի յաջորդն է իբր Ռումի կամ Հոռոմ երկիրներու կուսակալ, իր որդին Թիմուրթաշ, որ ժամանակ մը ետք ապստամբեցաւ Իլխանեանց դէմ (Քեմալետտին, նոյն) եւ անոնց զինակից Կիլիկիոյ հայ թաղաւորութեան երկիրները արշաւեց (ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 333) :

Ապու Սալիւ (1316—1336) իր վեզիրը՝ էմիր Չոպանը ղրկեց իր որդւոյն Թիմուրթաշի դէմ, որ փախաւ :

Իր դործակիցներէն ձերբակալուողները պատժուեցան մահուամբ (ՍԱՄՈՒԷԼ ԱՆԵՑԻ, էջ 167) :

Թիմուրթաշի փախուստը պատճառ եղաւ Չոպանի պաշտօնանկութեան եւ փախուստին եւ մահուան (տես ՍԱՄՈՒԷԼ ԱՆԵՑԻ, էջ 167) : Այն ատեն իր որդին Թիմուրթաշ, եկաւ Երզնկայի վրայ (նոյն), բայց երբ իմացաւ որ Ապու Սալիւ կու գայ, փախաւ Եգիպտոս, ուր գլխատուեցաւ (ՍՄԲԱՏ, էջ 131. ՍԱՄՈՒԷԼ, էջ 167 եւ ՊԱՏ. ՀԱՅ. ՍԱՀ., էջ 333) : Թիմուրթաշի տեղ Ապու Սալիւ՝ «Պարոն Հոռոմոց» կամ ռումի հողերուն կուսակալ կարգեց Ալայետտին Արթինա պէյը, որ երբ Ապու Սալիւ խան սպաննուեցաւ (1326) եւ ամէն կողմ էմիրները ինքզինքնին անկախ հռչակեցին, ինքն ալ ինքզինքը ձերբազատելու համար իրարու դէմ մաքառող մոնկոլ խաներու իշխանութեանէն, մտաւ Եգիպտոսի էլ Մալիք էլ Նասր սուլթանին (1293—1341) հովանաւորութեան տակ (Քեմալետտին, նոյն, էջ 234) եւ օգտուելով առիթէն հետըզհետէ ընդարձակեց իր հողերը դէպի Երզնկա եւ Բաբերդ եւ այսպէս Ալիսէն մինչեւ Ճորոխ բաւական ընդարձակ պետութիւն մը կազմեց, իր սահմաններուն մէջ ունենալով, նաեւ Սեբաստիան, Եւդոկիան եւ Կեսարիան (ՍԱՄՈՒԷԼ, էջ 108) :

Իսկ երբ Եգիպտոսի սուլթանն ալ մեռաւ (1341), Արթինա անկախութիւն հռչակեց եւ կազմեց իշխանութիւն մը, որուն մայրաքաղաքն էր Կեսարիա :

Մոնկոլ խաներէն Սիւլէյման խան (1339—1350), որ Հայաստանի տիրակալութեան համար կը մաքառէր, Արթինան իրեն հնազանդեցնելու համար արշաւեց Սեբաստիա, բայց պարտուեցաւ եւ խոյս տուաւ (Տաշեան, ՄԱՅՐ-ՅՈՒՅԱԿ, էջ 489) :

Արթինա պէյ, որ ժողովուրդը կը կոչէր Քէօսէ Բէյդամպէր (Գոշ



Մարգարէ) կ'երեւի արդար մէկը ըլլալ, վասնզի իր իշխանութիւնը մեծ դոհունակութեամբ ընդունուած էր իր հպատակներէն:

Արթինա մեռաւ 1351-ին Կեսարիոյ մէջ եւ երկիրը կառավարեց իր կինը՝ Սուլի Սուլթան՝ իր որդւոյն Մեհմէտ Իպն Արթինայի հետ:

Ասոնց մահէն ետք այս երկրին բռնակալեց 1381-ին Գատը Ահմէտ Պուրհանետտին կամ Պուրհան Ղազի, որ Փոքր Հայքէն զատ կը տիրէր Հայաստանի Դ. Հայք եւ Բարձր Հայք նահանգներէն մասերու:

Գատը Ահմէտ Պուրհանետտինի եւ իր որդիին եւ յաջորդին Ապուլ Աբրահա Պուրհանետտինի իշխանութեան շրջանին, Մալաթիա պահ մը եզիպտական տիրապետութենէն անջատուեցաւ, վասնզի 1389-ին (հիճ. 731-ին), Հալէպի հետ օրօրանը եղաւ մեծ ապստամբութեան մը:

Այս երկու ծայրագաւառ նահանգներուն — Մալաթիոյ եւ Հալէպի — կուսակալները՝ Մինթաշ եւ Եէլպոզա, ամբոստացան Սուլթան Չահէր Պարգորդի (1387—1388) իշխանութեան վերջին տարիներուն: Պուրհանետտին եւ Ապուլ Աբրահա, որովհետեւ ապաւէն ընծայեր էին Կերմիանի եւ Մինթաշի՝ փախստական իշխաններուն, Օսմանեան սուլթան Պայազիտ Երլտըրըմ (1388—1403) թշնամացաւ անոնց հետ:

Եւ երբ Սուլթան Պայազիտ նուաճեց Գարամանը, իր վեզիրը Թիմուրթաշ անցնելով Ալիօը, գրաւեց Չանկըրըն, Տիվրիկը, Շապին-Գարահիսարը, Տարենտէն, Կամախը, Երզնկան, Պայպուրդը եւ այս կարգին նաեւ 1391—9-ին (հիճ. 796) Մալաթիան եւ Պեհեսնին իրենց շրջականերով (Համմեր, Չ. գիրք), եւ յառաջացաւ մինչեւ Երզնկա, ինչ որ ցոյց կու տայ թէ Եզիպտացիք վանուած էին Մալաթիոյ շրջանէն գոնէ ժամանակաւորապէս:

Պուրհանետտին թշնամի էր նաեւ Գարա Եուքլուք կամ Գարա Օսման, որ Պայընտըր նոր տոհմին կամ Ազ Գոյուըլու Թիւրքմէններու պետն էր եւ թէպէտ Սուլթան Պայազիտի չափ զօրաւոր չէր, բայց անկէ աւելի վտանգ կը սպառնար, իբրեւ անմիջական դրացի, վասնզի այս թիւրքմէն ցեղը, որ բռնակութիւն հաստատած էր Ամիթի շուրջը, կ'ապստակէր յաճախ իր հօտերով Մալաթիոյ եւ Սեբաստիոյ տափաստանները:

Ապուլ Աբրահա Պուրհանետտին տեսնելով որ ամէն կողմէ պաշարուած էր թշնամիներով՝ խոյս տուաւ Խարբերդի լեռները (Այվազովսքի, ՊԱՏՄ. ՕՍՄ., Ա., էջ 54), ուր ըստ ոմանց 1392-ին սպաննուած էր Սուլթան Պայազիտի դէմ կռուած ատեն (ՉԱՄ., Գ. հտ., էջ 138) կամ ըստ այլոց Գարա Եուքուլք Գարա Գոյուըլուէն (ՀԱՃԻ ԽԱԼԻՖԻ Ի ՀԱՄՄԷՏ, գիրք ԺԵ.) կամ 1397—9-ին Գարա Օսման Ազ Գոյուըլուէն (Քեմալետտին, նոյն, էջ 214, Այվազովսքի, ՕՍՄ. ՊԱՏՄ., Ա., էջ 54):

Ըսողներ ալ կան թէ Ապուլ Աբրահա իր իշխանութիւնը շարունակած է մինչեւ 1402 եւ չկրնալով դիմադրել Լենկթիմուրի՝ Սուլթան Երլտըրըմ Պա-



յազիտի քով ապաստանած է՝ իր երկիրը Օսմանեան Սուլթանին թողլով<sup>1</sup>։ Ինչ որ ալ եղած ըլլայ, ստոյգ է որ այս իշխանութիւնը վերջ գտած է ԺԵ. դարուն սկիզբը, երբ արդէն Անատոլիոս — տիրող երկարատեւ անիշխանութեան եւ խառնակութեանց հետեւանօք — ողբալի վիճակի մը մատնուած էր եւ հարստահարութիւններու, սովերու եւ համաճարակներու հետեւանքով կը հիւծէր, ինչպէս կը նկարագրեն ժամանակակից յիշատակագիրներ շատ դառն տողերով (տես ԽԱՂԲԱԿԵԱՆՔ, Ա., էջ 327, ՍԱՄՈՒԷԼ ԱՆԵՑԻ, էջ 169 եւ ՅՈՒՅԱԿ ԶԵՌԱԳՐԱՅ ՎԱՍՊՈՒՐԱԿԱՆԻ, էջ 203—4 եւայլն)։

Եփրատի արեւմտեան կողմը այսպէս խառնակ վիճակի մը մատնուած ատեն, անոր արեւելեան կողմը աւելի լաւ վիճակ մը չունէր, մանաւանդ կեդրոնական Ասիայէն նորանոր ցեղախումբեր գէպի արեւմուտք կը դիմէին եւ նոր իշխանութիւններ կը կազմէին։

Այսպէս, Մոնկոլ Արղուն խանի ատեն (1284—1289) արեւմուտք եկան երկու ցեղախումբեր — Ագ Գոյունլու եւ Գարա Գոյունլու — Եփրատի արեւելեան կողմը տարածուած երկիրներուն մէջ եւ իրենց գաղթաշարժէն դար մը ետք, օգտուելով պատեհութիւններէ կազմած էին մեծ ամիրայութիւններ։

Այս երկու ցեղախումբերուն Մերձաւոր Ասիոյ մէջ որոշ դեր մը կամ դիրք մը գրաւելէն քիչ ետք, այդ շրջանին մէջ երեւցաւ ասիական բարբարոսներու երեք մեծ զանգուածներէն վերջինը, Էօգպէֆ Թաթարականը, իր ահարկու պետին Լենկթիմուրի (1360—1405) առաջնորդութեամբ։

Լենկթիմուր, որ 1370-ին մեծ խան հռչակուած էր, մտադրած ըլլալով վերականգնել Ճենկիզ խանի մեծ պետութիւնը, Ասիան իր մականին տակ միացուց եւ կազմեց մեծ կայսրութիւն մը, որ Զինաստանէն մինչեւ Միջերկրական եւ Եգիպտոսէն մինչեւ Ռուսիոյ միջնաշխարհը կը տարածուէր։

Պարսկաստանը արիւնով ողողելէ, Հնդկաստանի մէջ մարդիկը անասուններու պէս մորթելէ ետք, 1380-ին եկաւ Միջին Ասիա, Ատրպատական եւ Հայաստան։

Այդ տեղերը տիրակալող բազմաթիւ ամիրաները եւ պէկերը սարսափած, ինքնաբերաբար հպատակութիւն յայտնեցին, իսկ անոնք, որ ընդդիմացան, չարաչար պատժուեցան։

Ագ Գոյունլու եւ Գարա Գոյունլու թուրքմէն իշխանութիւնները, որոնք Լենկթիմուրի արշաւողի ժամանակ կը գտնուէին, անխուսափելի էր որ գործ ունենային իրեն հետ։

Գարա Օսման կամ Գարա Սուլուգ (սեւ տգրուկ) Ագ Գոյունլուներու պետը, խոհեմութիւն համարեց հնազանդիլ Լենկթիմուրի եւ անոր բարեկամութիւնը շահելով՝ նոյնիսկ անոր քաջալերութեամբ գրաւումներ ըրաւ

(1) Ինչպէս կը տեսնուի, բազմատեսակ պատմութիւններ կան այս տէրութեան վախճանին մասին։



Փոքր Հայքի մէջ: Գարա Օսման Լենկթիմուրի օգնելով կը յուսար Փոքր Ասիոյ մէջ Սուլթան Պայազիտէն դրաւուած իր հողերը փրկել, եւ ասոր համար էր որ կը մտնէր Էօզպէք թաթար աշխարհակալին հօր պաշտպանութեան տակ:

Իսկ իր հակառակորդները Գարա Եուսուֆ, Գարա Գոյունլուներու յանդուգն պետը, որ 1375—1380-ին Սասունի լեռներուն վրայ անկախ իշխանութեան մը տիրացած էր, ընդդիմացաւ եւ միացաւ Լենկթիմուրի հակառակորդ Օսմանեան թուրքերուն: Սակայն Գարա Եուսուֆ չարաչար պարտուեցաւ եւ փախաւ Հայաստանէն եւ 1396-էն մինչեւ 1406 տարագիր եղաւ:

Լենկթիմուր երբ Մերձաւոր Ասիան իրեն հնազանդեցնելէ ետք արեւելք դարձաւ, իր նուաճած կամ պարտութեան մատնած երկիրները խլրտիւսկսան, եւ իրենց երկիրը դրաւեցին:

Լենկթիմուր երբ կրկին արեւմուտք դարձաւ (1399-ին), իր երկրորդ արշաւանքէն (1394—1396) ետք, անցնող կարճ ժամանակին մէջ քաղաքական փոփոխութիւններու ենթարկուած գտաւ Փոքր Ասիան: Ամենէն կարեւորը այդ փոփոխութիւններուն այն էր որ օսմանեան Սուլթանը Պայազիտ Ա. 1399-ին իր հօր պետութեան միացուցած էր Ագ Գոյունլուներու հողերը եւ անմիջական դրացի դարձած էր Լենկթիմուրի պետութեան:

Երզնկա քաղաքը եւ չրջակայքը կամովին հնազանդած էին Լենկթիմուրի 1394-ին եւ կը գտնուէին անոր տիրապետութեան տակ: Ուրեմն Պայազիտ Ա. ի կողմէ Երզնկայի դրաւումը պարզապէս մարտահրաւէր մըն էր՝ ուղղուած Լենկթիմուրի, որ պիտի չուշանար օսմանեան սուլթանին դէմ յարձակելու (Ալպոյաճեան, ՊԱՏՄ. ՀԱՅ ԳԱՂԹԱԿԱՆՈՒԹԵԱՆ, Բ., 203):

Լենկթիմուր երբ կրկին արեւմուտք դարձաւ, 1399-ին, առաջին տեղը, զոր թուրքերէն ետ առաւ, եղաւ Սերաստիան (1400), զոր դրաւեց պաշարումով եւ հոն սարսափելի նախճիրներ գործեց, պատժելու համար քաղաքը, որ օսմանեան սուլթանին հնազանդած էր:

Իր արշաւանքը շարունակելէ առաջ՝ Լենկթիմուր ուղեց ապահովել իր քանակին թիկունքը, Սիւրիոյ կողմէն եւ 1400-1-ին դրաւեց կրկին Մալաթիան, եւ ինչ որ մնացած էր անոր բերդերէն եւ մզկիթներէն՝ ամբողջ աւերեց:

Լենկթիմուր Մալաթիոյ պաշտպանութիւնը յանձնեց Ագ Գոյունլուներու պետին՝ Գարա Սուլուք Օսմանին, որ իրեն օգնած էր, երբ Գարա Գոյունլուներու պետ՝ Գարա Օսմանին դէմ կը կռուէր:

Գարա Օսման, Լենկթիմուրի պաշտպանութեան ապաւինած, կը յուսար Փոքր Ասիոյ մէջ Սուլթան Պայազիտէն դրաւուած իր հողերը փրկել:

Օսմանեան թուրքերը կը սպառնային նաեւ Տրապիզոնի Կոմնենեան կայսրութեան, որուն Ալեքսիոս կայսեր փեսան էր Գարա Օսման, վասնզի կայսեր Տեսփինա աղջիկը կնութեան առած էր (ՊԱՏՄ ՈՒԹԻԻՆ ՀԱՅ ԳԱՂԹԱԿԱՆՈՒԹԵԱՆ, Բ., էջ 204):



Այսպէս չափերու նոյնութեամբ եւ միութեամբ գոյացած էր Լենկթիմուրի, Գարա Օսմանի եւ Ալեքսիոսի միջեւ համաձայնութիւն մը ընդդէմ Օսմանեան թուրքերու: Միւս կողմէն, Գարա Գոյունլուներու պետը՝ Գարա Եուսուֆ, Լենկթիմուրի դէմ իր երկիրը պաշտպանելու համար՝ միայն Օսմանեան թուրքերէն աջակցութիւն կրնար ակնկալել. ուստի իր բախտը կապեց անոնց եւ այսպէս ստեղծուեցան երկու մեծ ոյժերու միջեւ տատանող փոքր իշխանութիւններով կազմուած խմբակցութիւններ:

Լենկթիմուրի առաջին խումբին գլխաւոր ոյժը արդէն սկսած էր հարուածել թուրքերը, անոնց հողերէն գրաւելով Սեբաստիան եւ Մալաթիան:

Լենկթիմուր Մալաթիոյ ռազմական կայանը գրաւելէ ետք Քիլիսի Ճակատամարտէն ետք մտաւ Սիւրիա, անցնելով Պեհեսնիէն եւ Այնթապէն, այս երկու քաղաքներն ալ կոտորելով եւ աւերելով (Գր. Գալուստեան, ՄԱՐԱՇ, էջ 212):

Արիւնով ողողուեցաւ ամբողջ Սիւրիան, եւ Հալէպ ու Դամասկոս սոսկալի խժոժութեանց եւ աւերներու մատնուեցան (1400 աշնան):

Սիւրիոյ մէջ ձմեռելէ ետք, 1401-ին գարնան մտաւ Միջագետք, ուր Մերտին եւ Պաղտատ ապստամբած եւ Մեմլուքներու միացած էին: Այս քաղաքներն ալ՝ իր ոճովը եւ հասկցած եղանակովը պատժուեցան:

1402-ին գարնան, Լենկթիմուր կրկին մտաւ Փոքր Ասիա, վճռական հարուած մը տալու համար Պայազիտ Ա.ի, որ իր բացակայութենէ օգտուելով, վերագրաւեր էր Սեբաստիան եւ Երզնկան:

Ճակատամարտի տեղի ունեցաւ 18 Յունիս 1402-ին Անկիւրիոյ դաշտին վրայ: Պայազիտ Ա. պարտուեցաւ եւ գերի ինկաւ, Փոքր Ասիան Լենկթիմուրի տիրապետութեան ենթարկուեցաւ եւ Սելճուկեան ամիրաներէ անոնք, որ Էնկիւրիի Ճակատամարտէն առաջ իր կողմը անցած էին, իրենց իշխանութիւններուն մէջ վերահաստատուեցան, իսկ միւսները պատժուեցան:

Այսպէս օսմանեան պետութիւնը կազմալուծուեցաւ եւ Եգիպտոսի սուլթանը մինակ մնացած, խոհեմութիւն համարեց ճանչնալ Լենկթիմուրի գերիշխանութիւնը: Բայց երբ 1405 Փետրուար 15-ին Լենկթիմուր մեռաւ եւ իր պետութիւնը քայքայուեցաւ, իր զօրութեան առջեւ ընկճուած բոլոր իշխանութիւնները վերստին իրենց կորսուած երկիրներուն տիրեցին. Մեմլուքները վերագրաւեցին հիւսիսային Սիւրիան (Հալէպ), իսկ Օսմանեան թուրքերու սուլթանութիւնը վերակազմուեցաւ:

Այս վերակազմուած պետութիւններէն մին ալ էր Գարա Գոյունլուներու իշխանութիւնը, վասնզի Գարա Եուսուֆ Հայաստան դարձաւ 1406-ին եւ նորէն երկիրին հարաւային մասին տիրելով վերականգնեց իր պետութիւնը (1408): Ան տիրեց գրեթէ բոլոր Հայաստանի, ինչպէս նաեւ Միջագետքի, եւ կազմեց բաւական ընդարձակ իշխանութիւն մը:

Նոյնպէս Գարա Օսման ինքզինք անկախ հռչակեց եւ տէր դարձաւ Եւ-



դուկիոյ եւ Սերաստիոյ շրջակայքին, եւ տիրեց նաեւ Հալէպի, Դամասկոսի եւ Մերտինի, որոնց իշխողները մէկ օրուան մէջ սպաննեց:

Ուրեմն այս իշխանութիւնն ալ բաւական ընդարձակ հողերու տէր էր:

Այս երկու թիւրքմէն իշխանութիւնները երկուքն ալ բազմաթիւ փոքրիկ հողատիրութիւններու համամիութիւններ էին պետի մը գլխաւորութեամբ, եւ այս պատճառով շատ զօրաւոր ներքին միութիւն մը չունէին. յաճախ իրենց ստորադաս պէկերուն եւ էմիրներուն դաւաճանութիւններովը եւ ապստամբութիւններով կը զբաղէին:

Երզնկայի տէրը՝ Փիր Օմարը երկու հակառակորդ թիւրքմէն պետերը, Ագ Գոյունլու Օսմանը հաշտեցուց Գարա Գոյունլու Եոսուֆի հետ եւ Հայաստան երկու իշխանութեանց միջեւ բաժնուեցաւ, եւ Ամիթը վերստին տրուեցաւ Ագ Գոյունլուներուն:

Մալաթիա, որ Ագ Գոյունլուներու սեպհականութիւնն էր, պէտք էր համեմատաբար նպաստաւոր վիճակ մը ունեցած ըլլայ այս շրջանին, վասնզի Ագ Գոյունլուներու այս պետը (Օթման) «սիրոդ յոյժ ազգիս Հայոց», «fıağ qoraklı» կը ներկայացնէ թովմա Մեծոփեցի (էջ 72):

Այս երկու իշխանութիւններու ժամանակակից կար նաեւ Զիւլգատրեան թիւրքմէն իշխանութիւնը, որուն ցեղապետը Զիւլգատր Զէյնեդդին Գարաճա, 1378-ին օգտուելով Եգիպտոսի Մեմլուքներուն տկարութենէն՝ զրաւած էր Մարաշը եւ ապա Ալալիսթանը:

Իր որդին Խալիլ պէյ (1385—1386) զրաւելով Մալաթիոյ եւ Խարբերդի շրջանակներն ալ, ընդարձակեց իր տէրութիւնը: Ասոր եղբայրը՝ Սիւլիլ պէյ (1386—1398) օգտուելով 1387-ին Մալաթիոյ եւ Հալէպի կուսակալներուն Եգիպտոսի Մեմլուքներուն դէմ ապստամբելէն՝ տարածեց իր իշխանութիւնը մինչեւ Համա, եւ կազմեց բաւական ընդարձակ իշխանութիւն մը, որ կը տարածուէր Մալաթիոյ քով Եփրատէն մինչեւ Այաս, եւ Մարաշը իրենց կեդրոնական քաղաքն էր (Գր. Գալուստեան, ՄԱՐԱՇ, էջ 213):

Այս երեք թիւրքմէն իշխանութիւններն ալ, ինչպէս կը տեսնուի, Եփրատի հովիտին եւ Փոքր Հայքի շուրջը կը գտնուէին եւ Մալաթիոյ շուրջը կը պայքարէին իրարու հետ:

Ասոնք որքան որ անկախ ըլլալ կը յաւակնէին, արբանեակ պետութեան վիճակի ենթարկուելու պատրաստուած էին, երբ մեծ ոյժեր իրարու բախէին:

Այսպէս, երբ Մոնկոլները եւ Մեմլուքները կը մաքառէին իրարու հետ՝ հիւսիսային Սիւրիոյ եւ Եփրատի հովիտին կամ Կոմմազինէի շուրջ, Մալաթիոյ եւ Խարբերդի տիրող թիւրքմէն Զիւլգատրեան իշխանութիւնը, որ ինչպէս տեսնուեցաւ, օգտուած էր Մեմլուքներու ժամանակաւոր տկարութենէն ու Եփրատէն մինչեւ Համա տարածուած էր, սակայն չէր կրցած կատարեալ անկախ ըլլալ:

Մեմլուք Սուլթան Պարդուզ էլ Զահր (1382—1388) յարձակած էր ա-



նոր վրայ եւ սպաննած զայն, եւ այս կերպով անոր ապստամբութիւնը զրսւած էր: Սակայն Եգիպտոսի սուլթանն ալ երկար չկրցաւ երկրին տիրել, վասնզի Օսմանեան Թուրքերու վեզիրը Թիմուրթաշ 1396-ին գրաւեց Մարաշը եւ Մալաթիան՝ Գարամանի իշխանին յաղթելէ ետք եւ օսմանեան տէրութեան կցեց:

Զիւլգատրեանք ամրացան դաշտային Կիլիկիոյ Կարս-Բազար աւանին շուրջը, ուր հաստատուեցաւ Սիւլիւ պէյի եղբօր՝ Խալիլի որդին՝ Նասրետտին Մուհամմէտ (1398—1442), որ իր մէկ աղջիկը կնութեան տալով Թուրքերու Զելէպի Մուհամմէտ Սուլթանի (1413—1421) որդւոյն Պայազիտի, եւ միւսը՝ Սերաստիոյ Գատը Պիւրանետտինի, հաշտուեցաւ անոնց հետ եւ յաջողեցաւ ետ առնել իր կորսնցուցած հողերը, որոնց մէջ էր Մալաթիան:

Սակայն Եփրատի հովիտին մէջ ո՛չ խաղաղութիւն եւ ոչ հաստատուն կացութիւն մը ստեղծուեցաւ: Զիւլգատրեան Նասրետտին Մուհամմէտ ինքզինք զօրաւոր զգալով այս խնամութիւններով, կռուեցաւ Եգիպտոսի Մելիք Միւսայպետի՝ սուլթանին հետ, բայց յետոյ հաշտուեցաւ եւ յարձակողական ու պաշտպանողական զինակցութիւն մը կնքեց: Մեմլուք սուլթանը հաւանաբար անոր զօրանալը եւ իբր արբանեակ Օսմանեան Թուրքերու՝ վտանգաւոր նկատելով անոնց հակառակութիւնը, համակերպեցաւ անոնց իշխանութեան վերահաստատութեանը՝ իր գերիշխանութեան տակ:

Այսպէս, Մալաթիա ենթարկուեցաւ կրկին Զիւլգատրեան իշխանութեան, որ Մեմլուքներու գերիշխանութեան տակ կը գտնուէր:

Զիւլգատրեան Նասրետտին Մուհամմէտ իբրեւ Եգիպտոսի սուլթանին ստորադաս իշխող մը՝ կռուեցաւ Կիլիկիոյ տիրող Ռամադանեաններու դէմ եւ գրաւեց Դաշտային Կիլիկիան:

Զիւլգատէր օղլու իշխանը նոյնպէս յաղթեց Գարամանի իշխան Մուհամմէտ պէյին եւ զայն գերի բռնելով շղթայակապ Եգիպտոս ղրկեց: Յետոյ օսմանեան սուլթան Մուրատ Բ. ի (1421—1451) օգնութեամբ յաղթեց Գարամանի իշխան Իպրահիմ պէյին եւ Կեսարիան ալ գրաւեց:

Եգիպտոս ալ դնաց եւ արտակարգ պատիւներու արժանացաւ: Իրեն յաջորդեց իր որդին Սիւլէյման պէյ (1442—1454), որուն դեսպան մը ղրկեց Մուրատ Բ. եւ իր որդւոյն՝ Մուհամմէտի<sup>2</sup> համար խնդրեց անոր գեղեցիկ մէկ աղջիկը՝ Սիթին:

Սիւլէյման պէյի յաջորդեցին կարգով իր չորս որդիները, որոնց իշխանութեան ատեն թիւրքմէն այս տէրութիւնը չկրցաւ իր անկախութիւնը պահել եւ մեմլուք եւ օսմանեան սուլթանութիւններու գերիշխանութեան ենթարկուեցաւ փոխ ի փոխ: Անոնցմէ Արսլան կամ Հասան պէյ (1454—1465) չառ չա-

(1) Ապու Նասր Շէյխ եւ Մօայէտ (1412—1421):

(2) Այն որ վերջը պիտի ըլլար Ֆաթիհ Սուլթան Մուհամմէտ Բ. (1452—1481) եւ պիտի գրաւէր 1453ին Պոլիսը:



ըրեքներ հասցուց Կիլիկիոյ:

Իր եղբայրը Շահ Պուտազ Եգիպտոսի սուլթանին կողմէ իշխանութիւն ստացած ըլլալուն համար, երկիրին մեծամեծները դիմեցին Ֆաթիհ Սուլթան Մուհամմէտին (1452—1481, Մայիս 3+), որ զօրք ղրկեց եւ վանեց Շահ Պուտազը (1467-ին) եւ անոր յաջորդ նշանակեց Շահսիւվար եղբայրը, որ Կիլիկիոյ մէջ իր նախորդին հարստահարութիւնները շարունակեց:

Վերջապէս Եգիպտոսի մեմլուք սուլթանը Գաթիպա կամ Գայեթա<sup>1</sup>, դրեց օսմանեան սուլթանին որ Շահսիւվարը ձգէ իր բախտին, որպէսզի անկէ իր վրէժը լուծէ եւ այս երկիրը նուաճելով օսմանեան պետութեան յանձնէ:

Սակայն 1470-ին երբ յաղթեց Շահսիւվարի եւ զայն Եգիպտոս տանելով կախաղան հանեց, իր խօսքը դրժեց, վասնզի Ֆաթիհ Սուլթան Մուհամմէտ զբաղած էր Պալքանեան երկիրներու մէջ, եւ անոր հակառակորդ Շահ Պուտազը վերահաստատեց Մարաշի մէջ:

Տասը տարի վերջը (1480) Ֆաթիհ Սուլթան Մուհամմէտ Բ. նուաճեց երկիրը եւ Շահ Պուտազը զրկեց իր իշխանութենէն, եւ իր տեղը դրաւ Ալայէտ-Տէօվլէ եղբայրը, որ երկար իշխեց (1480—1514): Եգիպտացիք վերստին մինչեւ Մարաշ առաջացան եւ սուլթան Պայազիտ Բ. թոյլ տալու համար որ անոնք ամրանան Տաւրոսի վրայ, յարձակեցաւ Եգիպտացւոց վրայ եւ յաջողեցաւ վերագրաւել Մարաշը (1493) (Գր. Գալուստեան, ՄԱՐԱՇ, էջ 238):

Բայց Ալայէտ-Տէօվլէ մերժած ըլլալով Եաւուզ Սուլթան Սելիմ Ա.ի (1512—20) օգնել ընդդէմ Պարսից, սուլթանը Չալտըրանի յաղթութենէ դարձին (1515) անոր վրայ զրկեց Սինան փաշան, որ Ալպիսթանի ճակատամարտին մէջ յաղթեց Ալայէտ-Տէօվլէին եւ սպաննեց զայն եւ գլուխը Եգիպտոսի սուլթանին զրկեց (1517) (Զիւլգատրեանց մասին տես Եղիա Քասունի, Անթիոյի ԵՒ ՇՐՋԱՆԱԿԻՆ ՊԱՏՄՈՒԹԻՒՆԸ, ՊԱՏՄՈՒԹԻՒՆ ԱՆԹԻՊԻ ՀԱՅՈՑ, էջ 288—293):

Զիւլգատրեանք այսպէս մինչեւ 1515 իշխեցին Մալաթիոյ:

1516-ին Գոչհիսարի ճակատամարտէն ետք, սուլթան Սելիմ Ա. տիրեց կրկին Մալաթիոյ, երբ քաղաքը աւերակոյտի մը վերածուած էր: Այդ թուականէն ետք այլեւս չկրցաւ քաղաքի մը կարգին բարձրանալ:

Սելիմ Ա. այս յաղթանակով դէմ դէմի կու դար թէ՛ Եգիպտոսի Մեմլուքներուն եւ թէ Պարսից, որոնց երկուքին ալ դէմ կռուիլ սկսաւ Օսմանեան կատաղի սուլթանը:

Մեմլուքներու դէմ կռուած ատեն երբ Մարճ Տապիզի ճակատամարտը չհաջեցաւ, Սելիմ Ա. որոշեց ջնջել Զիւլգատէր օղլուներու իշխանութիւնը, որ անվստահելի երկսայրի դեր մը կը կատարէր՝ յարում ցոյց տալով երբեմն Եգիպտացիներուն եւ Պարսիկներուն:

Ուստի երկիրը կատարելապէս նուաճեց եւ Զիւլգատրեան Շահսիւվար

(1) Հաւանորէն Քաթիթ պէյ Ապու ԷԼ Նասր ԷԼ Աշրաֆ (1467—1496):



օղլու Ալի պէյը Մարաշի կուսակալ ըրաւ :

Բաւական ատեն , այն էյալէթը (վիլայէթ = կուսակալութիւն) , որուն մասը կը կազմէր նաեւ Մալաթիոյ սանճազը , այդ տոհմին անունով կը կոչուէր Զիւլֆատրիյէ :

Երբ Եփրատի արեւմտեան կողմը եւ Տաւրոսեան լեռներու երկու զառիւժայրերուն վրայ այս կռիւները տեղի կ'ունենային , Եփրատի արեւելեան կողմը կը կատարուէին ուրիշ դէպքեր , որոնք Եփրատի արեւմուտքը՝ Լենկթիմուրի մահէն ետք իրենց անկախութիւնը ստացած երկիրներուն վրայ ալ իրենց անդրադարձութիւնը ունեցան :

Երբ Լենկթիմուր մեռաւ , իր որդին եւ յաջորդը Միր Մուային էտտին Շահրուխ (1404—1447) եւ Գարա Եուսուֆ (+1417) , որդին Իսկենտէր (1417—1438) , որ Շահի Արմէն (Հայոց Թագաւոր) տիտղոսը կը դործածէր , երկար ատեն մաքառեցան իրարու հետ :

Իսկենտէր 17 տարի (1421—1437) յամառութեամբ կռուեցաւ Շահրուխի եւ Ադ Գոյունլուներու դէմ (տես ՊԱՏՄ . ՀԱՅԱՍՏԱՆԻ ՍԱՀՄԱՆՆԵՐԸ , էջ 78) :

1436-ին անիկա արշաւեց նաեւ Սեբաստիա եւ Տիւրքիկ եւ Խարբերդն ու Դերջանը դերի վարեց : Հաւանական է որ Մալաթիան ալ յարձակման ենթարկուած ըլլայ : Իսկենտէրի մահէն (1435) ետք , երբ այսպէս կը շարունակուէր անիշխանութիւնը մերձաւոր Արեւելքի մէջ եւ տեղական իշխաններ իրարու հետ կը պատերազմէին շարունակ , յանկարծ անակնկալ կերպով կը ստեղծուէր նոր կացութիւն մը :

Զիհան կամ Զանան (1437—1467) Իսկենտէրի եղբայրը եւ յաջորդը , 1446-ին Շահրուխի հպատակութիւն կը յայտնէր եւ ՇԱՀԸ ԱՐՄԷՆ կամ Ատըրպատականի ամիրա կը նշանակուէր :

Զիհան Շահ օրէ օր աւելի կը զօրանար եւ կ'ընդարձակէր իր տիրապետութիւնը , եւ ի վերջոյ իրեն հարկատու կը դարձնէր նաեւ Ադ Գոյունլուներու Սուլթանը՝ Զիհանկիրը (1461) , որ թուրքմէն պետութեան վրայ իշխող երրորդ վեհապետն էր : Այսպէս , Գարա Գոյունլուներու Զիհան Շահ բովանդակ Հայաստանի եւ Պարսկաստանի տէր կը դառնար եւ բացառիկ բարեացակամութիւն մը ցոյց կու տար Հայոց նկատմամբ (ՊԱՏՄ . ՀԱՅԱՍՏԱՆԻ ՍԱՀՄԱՆՆԵՐԸ , էջ 80) :

Զիհան Շահի (1444—1467) այս սիրաշահող քաղաքականութիւնը փոխուեցաւ իր մահէն ետք , վասնզի Ադ Գոյունլուները կամ Պայրնտըրեանք զօրացան եւ Ուզուն Հասանի (1467—1478) վեհապետութեան տակ , բացուեցաւ այս գերազանցապէս զօրացած պետութեան համար միահեծանութեան շրջան մը : Գարա Գոյունլու եւ Ադ Գոյունլու իշխանութիւններու միութեամբ կազմուած այս մեծ պետութիւնը , որ կը յաւակնէր ըլլալ տէրը բոլոր արեւելքի՝ Պարսկաստանի պատմական հնօրեայ կայսրութեան իրր շարունակութիւնը , անխուսափելի էր որ պիտի ընդհարէր Օսմանեան Թուրքերու կայսրու-



թեան, որ տիրելով Փոքր Ասիոյ՝ կը յաւակնէր Արեւելեան Հռոմէական կայսրութեան տեղը գրաւել:

Այս երկու պետութիւններու ալ շփման վայրն էր դարձեալ Կոմմագինէն կամ Եփրատացիքը եւ անոր ամենէն մօտ մեծ քաղաքը՝ Մալաթիան, որ ոտնակոխ եղաւ իբր Եփրատի ամենէն գլխաւոր կամրջադուխը իր ռազմական կարեւոր դիրքին համար, երբ այս երկու մեծ ոյժերը մաքառիլ սկսան իրարու դէմ:

## ԺԸ.

### ՄԱԼԱԹԻԱ ՕՍՄԱՆԵԱՆ ՏԻՐԱՊԵՏՈՒԹԵԱՆ ՏԱԿ

Մալաթիա 1516-ին Օսմանեան Թուրքերու տիրապետութեան կ'ենթարկուէր այնպիսի ժամանակ մը երբ արդէն յիսուն տարիէ ի վեր սկսած էր ահարկու պայքար մը երկու իսլամ մեծ պետութիւններու, Պարսկաստանի եւ օսմանեան պետութեան միջեւ:

Պարսկաստան տեղական փոքր իշխանութիւններու ձուլմամբ կայսրութեան մը վերածուած էր՝ վեհապետութեանը տակ բնիկ դարձած Թուրք արքայական տան մը, որ ընդգրկած էր իբրեւ պետական կրօնք Պարսիկներու հերձուածը՝ Շիի իսլամութիւնը: Այս պետութիւնը իր կազմութենէն քիչ ետք, պայքարիլ սկսած էր օսմ. պետութեան դէմ, որ հաւատարիմ Սիւննի դաւանանքին կրօնական ատելութեամբ ալ լեցուած էր Պարսիկներու դէմ:

Բախումը սկսաւ 1473-ին երբ Գարամանի Իսահակ պէյը Պարսկաստանի վեհապետ Ուզուն Հասանի քով ապաստանեցաւ եւ անկէ օգնութիւն խնդրեց, եւ խրոխտ Ուզուն Հասան զայն վերահաստատելու համար իր իշխանութեան մէջ օսմանեան պետութեան դէմ պատերազմի ձեռնարկեց: Ասիկա եղաւ ըսկիզբը այն երկարատեւ կռիւններուն, զորս Թուրքերը եւ Պարսիկները մղեցին աւելի քան 250 տարիներ:

Այս պայքարին մէջ յաղթանակներ եւ պարտութիւններ իրարու յաջորդեցին, բայց առաւելապէս Օսմանցիք էին որ յաջողութիւններ ունեցան եւ հետզհետէ դէպի արեւելք առաջանալով՝ Հայաստանի զանազան մասերէն Պարսիկները վանեցին եւ իրենք տէր դարձան երկիրին, մինչեւ որ պարսիկ տիրապետութեան տակ մնաց հայկական հողէն աննշան մաս մը:

Դերջանի (1473) եւ Չալտրանի (1514) երկու վճռական ճակատամարտները չահելով Օսմանեան Թուրքերը, Հայաստանի արեւելեան մասին տիրեցին եւ մինչեւ Ուրմիոյ լիճը առաջացան: Որչափ ատեն որ Թուրք եւ պարսիկ պատերազմները կը շարունակուէին, այս երկու մեծ պետութիւններուն միջեւ գտնուող կարգ մը իշխանութիւններ երկընտրանքի մը մէջ էին եւ երբեմն մէկ՝



երբեմն միւս կողմին կը յարէին :

Գարամանի իշխանութեան նման երկու պետութիւններու սահմանին վրայ կը գտնուէր նաեւ Մալաթիոյ տիրող Թիւրքմէն Զիւլգատրեան իշխանութիւնը, որ Թուրք եւ պարսիկ պետութիւններէն զատ սահմանակից էր Եգիպտոսի Մեմլուքներու պետութեան, որ Սիւրիոյ կը տիրէր :

Զիւլգատրեանք երեք հզօր դրացիներու միջեւ ինկած, նախընտրած էին այդ երեքէն ամենէն աւելի զօրաւորին եւ անգութին՝ սուլթան Սելիմի (1512—1520) դէմ միանալ Պարսկաստանի եւ Եգիպտոսի :

Սուլթան Սելիմ Ա. տեսնելով որ Զիւլգատրեան Ալայիւտտէօվլէթ իշխանը, հաւատարիմ իր Պարսկաստանի հետ ունեցած դաշինքին, մերժած էր 1514-ին օգնել իրեն, Պարսկաստան արշաւած ատեն, որոշեց նուաճել այս Թիւրքմէն զօրաւոր իշխանութիւնը. ուստի անոր դէմ ղրկեց 1515-ին Սինան փաշա վեզիրը եւ Ալի պէյ Շեհսիւվար Օղլուն 10.000 ճիւղերներով : Ալայիւտտէօվլէթ պատերազմին մէջ սպաննուեցաւ եւ իր չորս զաւակները գերի ինկան : Սելիմ Ա. անոնց գլուխները ղրկեց Զիւլգատրեանց պաշտպան եւ գերիշխան Եգիպտոսի սուլթանին եւ երկիրը տուաւ Ալի պէյ Շեհսիւվարին, եւ ինք պատրաստուեցաւ Եգիպտոս արշաւելու :

Արդարեւ յաջորդ տարին (1516) կը ձեռնարկէ այդ կարեւոր արշաւանքին, իր բանակին համախմբման վայրը կ'ըլլայ Կեսարիա, ուր նախ կու գայ վեզիր Սինան փաշա 43.000 զօրքով (Այվազովսքի, ՕՍՄԱՆԵԱՆ ՊԱՏՄՈՒԹԻՒՆ, Ա., էջ 321) :

Գլխաւոր ճակատամարտը տեղի կ'ունենայ Հալէպի մօտ Տապըզի դաշտին վրայ : Եգիպտացիք կը պարտուին եւ ութսունամեայ Գանսու Ղաւրի Սուլթանը փախած ատեն ետեւէն իյնալով կամ իրեններէն սպաննուելով կը մեռնի (նոյն, էջ 323) :

Այս յաղթութենէն ետք Սելիմի առջեւ կը բացուի Սիւրիան եւ Պաղեստինը, որոնց տիրելէ ետք Սելիմ կ'անցնի Սինայի թերակղզին եւ Սուէզի պարանոցը եւ կը մտնէ Եգիպտոս եւ կը տիրէ այս երկրին :

Սելիմ Ա.ի մահէն (1520) ետք, երբ Սիւրիոյ կուսակալը Ճանպերդի Ղազալի ապստամբեցաւ՝ ուրիշ կուսակալներու աջակցութեամբ, Թիւրքմէնները, որոնք Տաւրոսի շուրջը հաստատուած էին, խլրտեցան եւ անոր միացան (Այվազովսքի, նոյն, էջ 351) : Սուլթան Սիւլէյման Ա. (1520—1566) Ֆերհատ փաշան ղրկեց այս ապստամբներուն դէմ եւ ընկճեց զանոնք, բայց Թիւրքմէնները սաստիկ սրտմտած այն հարստահարութիւններէն զորս կալուածահամարի մը պատրուակով Թուրք պաշտօնատարներ կը գործադրէին, ապստամբեցան (Jonquièrre, Ա., էջ 155, Այվազովսքի, Ա., էջ 373, Ա.ԶԳԱՏԱՏՈՒՄ, էջ 2225) եւ Փոքր Ասիան տակնուվրայ ըրին :

Իրարու ետեւէ յաջորդաբար ղրկուած բանակները յաղթուեցան եւ զօրավարները սպաննուեցան եւ մեծ դժուարութեամբ վերջապէս կարելի եղաւ խաղաղեցնել երկիրը 1526-ին, աւելի իմաստուն եւ խոհական միջոցներու կի-



բարեկութեամբ քան թէ ղէնքի ոյժով (տես նոյնք) :

Սակայն հազիւ այս Տաւրոսի հարաւակողմեան ապստամբութիւնը զըստուած էր, ուրիշ խառնակութիւն մը պայթեցաւ 1527-ին նոյն լեռնաշղթային հիւսիսակողմը՝ Գարամանի մէջ (Jonquière, Ա. 156) եւ տարածուեցաւ պետութեան զանազան կողմերը եւ մեծ համեմատութիւններ առաւ :

Այդ ապստամբութեան պետն էր Գալենտէր Օղլու, որ յաջողեցաւ Տերվիշներու, Աստալներու եւ Գալենտէրներու քարոզութիւններու շնորհիւ ըմբոստութեան մղել Փոքր Ասիոյ բնակչութիւնը եւ իր շուրջը հաւաքել խառնիճաղանճ բազմութիւն մը, զոր իր պատկառելի թիւով աննկատ կարելի չէր թողուլ (Jonquière, Ա., էջ 156) :

Անատոլիոյ պէյլէրպէյին, Պեհրամ փաշա, որուն կ'օգնէին նաեւ Գարամանի եւ Հալէպի կուսակալները, կատարելապէս պարտուեցաւ Թոգատի մէջ (նոյն) :

Բովանդակ Փոքր Ասիան շփոթի եւ խառնակութեան մատնուեցաւ եւ ըմբոստները օսմանեան բանակին դէմ կռիւներ մղեցին, որոնց մէջ յաճախ յաղթեցին քան յաղթուեցան (Այվազովսքի, Ա., էջ 373) :

Այս ապստամբութեան մէջ, որ այնքան մեծ ծաւալ գտած էր, դարձեալ լեռնային Կիլիկիոյ թիւրքմէնները կարեւոր դեր կատարեցին, մեծ թիւով մտնելով Գալենտէր Օղլուի բանակին մէջ : Մեծ վեզիրը՝ Իպրահիմ փաշա, ճարպիկ բանակցութիւններով եւ խոստումներով նախ իր կողմը շահեցաւ թիւրքմէնները եւ ապա կողմնակի ու պզտիկ կռիւներով ապստամբները յոգնեցուց եւ ուժասպառ ըրաւ եւ յաջողեցաւ վերջապէս յաղթել եւ սպաննել Գալենտէր Օղլուն եւ իր գլխաւոր աջակիցը՝ Վելի Տունտալը եւ խաղաղեցնել բոլոր երկիրը (Jonquière, Ա., էջ 156, Այվազովսքի, Ա., էջ 373—5) :

Սակայն խռովութիւններ իրարու յաջորդեցին եւ սուլթան Սիւլէյմանի ցոյց տուած կորովը պատժելու համար ապստամբութիւնները եւ անոնց գըլխաւոր պատճառ իր կեղեքիչ պաշտօնատարները անզօր էին պետութիւնը փրկելու համար ներքին անկարգութիւններէ, որ հետեւանքներն էին պատահական անկազմակերպութեան եւ վարչական անմիօրինակութեան : Անարդարութիւնը եւ անգթութիւնը պետութեան մէկ ծայրէր միւսը կ'իշխէր եւ Սիւլէյման Գանուլի այս բարբարոսութեանց հանդիսավայր երկրին մէջ իբր արդարութիւն բաշխող, շատ հեռու էր անատուեր ըլլալէ :

Պալատական խարդաւանքները եւ կնոջական-հարեմական նենդութիւնները նոյնպէս երկիրը դժբախտ ըրին (տես ՊԱՏՄ. ՀԱՅ ԿԵՍԱՐԻՈՅ, էջ 599) :

Իր զաւակները եւ իր վեզիրները զոհուեցան այդ դաւերուն : Իր Պայազիտ որդին Գարամանի մէջ ապստամբեցաւ թիւրքմէններու, Քիւրտերու եւ Ասորիներու 20.000-նոց բանակով մը : Սոգոլլու Մեհմէմէտ փաշա վեզիրը ընկճեց այս ապստամբութիւնը՝ ջախջախելով 30 Մայիս 1559-ին Գոնիոյ մէջ Պայազիտ իշխանին բանակը :



Թիւրքմէնները իրենց անառիկ լեռները ապաստանեցան՝ սպասելով նոր առիթներու, որոնք շուտով ներկայացան :

Այսպէս, 1575-1585 տասնամեայ թուրք եւ պարսիկ պատերազմէն ետք, ԺԶ. դարու վերջին տասնամեակին ծագեցաւ մեծ խռովութիւն մը, որուն միջոցին Հայաստան, Միջագետք եւ Փոքր Ասիա, այսինքն ընդհանուր առմամբ օսմանեան կայսրութեան ասիական բաժինը, ասպատակութեանց եւ հարստահարութեանց ենթարկուեցան : Վասնզի իրարմէ անջատարար, բայց գրեթէ միաժամանակ ապստամբական շարժումներ ծագեցան, որոնք տասնեակ տարիներով վտանգեցին օսմանեան կայսրութեան դոյութիւնը Փոքր Ասիոյ մէջ եւ պատճառ եղան երկիրին աւերման ու ամայացման :

Այս ապստամբները երկու անունով կը կոչուէին, ՃԵԼԱԼԻ եւ ՖԻՐԱՐԻ :

Ճելալի կոչուած են հաւանօրէն 1517-ին :

Թոգատի կողմերը ծագած կրօնական բնոյթով ապստամբութեան մը պատճառով, զոր յարուցած էր Ճելալ անուն աղանդաւոր մը, որ անձաւի մը մէջ ամրացեալ իր արբանեակներով, կ'ըսէր թէ կը սպասէր Մահտիին եւ աշխարհի կատարածը մօտ էր (Այլաղովսքի, ՕՍՄ. ՊԱՏՄՈՒԹԻՒՆ, Ա., էջ 340) : Այս աղանդին հետեւողներն ալ Ճելալի կը կոչուէին, ուստի անհաւանական չէ որ բոլոր Փոքր Ասիան շփոթի մատնողները ասոր յաջորդները նըկատուած ըլլան եւ ՃԵԼԱԼԻ կոչուած : Հայ ժամանակակից պատմագիրները՝ ՃԵԼԱԼԻ անունով կը ճանչնային զանոնք :

Իսկ թուրք պատմագիրները զանոնք կը կոչէին ՖԻՐԱՐԻ (փախստական, դասալիք), վասնզի 1596-ին Հունդարիոյ էրլաու (Հունդարերէն էգէր, թուրքերէն էկրի) քաղաքին գրաւումէն եւ Քերեսթէի ճակատամարտէն ետք, մեծեպարքոս իտալացի հաւատուրաց Ճըղալաղատէ Սինան փաշայի անտեղի խըստութիւնը պատճառ եղաւ որ բազմաթիւ Ննիչէրիներ փախչին եւ յետոյ Ֆիրարի անունին տակ գործեն շուրջ երեսուն տարի :

Այս ապստամբութեան առաջին աղղանշանը տուած է քիւրտ Ճելալի ցեղին պատկանող Թոփալ Օսման փաշա, որ հաւանօրէն Ճելալի աղանդին կը պատկանէր (ԴԱԻՐԻԺԵՅԻ, էջ 79—80) :

Թոփալ Օսման փաշա իր շուրջը հաւաքելով սրիկայ անձեր, հազարի չափ, Կարբին կայան կ'ընէ եւ կը սկսի կեղեքել ամբողջ շրջանը :

Այսպէս, Արարատի ստորոտէն ծագում առած այս շարժումը կը տարածուի եւ բոլոր Հայաստան, Միջագետք եւ Փոքր Ասիա, այս ընդարձակ տարածութեամբ հողերը ապստամբութեանց եւ հարստահարութեանց կ'ենթարկուին :

Ուրիշ պատմութեան մը համաձայն առաջին ապստամբը Գըզիր Օղլու Մուսթաֆան էր, որ 1591-ին ապստամբութեան գրօշը սլարղեց : Ան Տիվրիկի եւ Քեմախի միջեւ Տոսթալի գիւղէն էր :

Օրինակը վարակիչ եղաւ եւ օսմանեան կայսրութեան ասորական բաժ-



նին մէջ ուրիշ շատ մը վայրերու մէջ երեւան եկան ապստամբներ, որոնք թուրք կուսակալներ էին: Ասոնց միացած էին բանակէն դասալիք ենիչէրինները: Եւ անլուր խժդժութիւններ կը դործէին ասպատակութիւններով, կողոպուտներով եւ աւերածութեամբ, 1590-էն մինչեւ 1608, 18 տարի, առաւելապէս օսմանեան յլետութեան այն մասերուն մէջ, որոնք հազիւ թէ դարէ մը ի վեր թուրք սուլթաններու տիրապետութեան ենթարկուած էին:

Նախապէս ապստամբները որոշ տեղերու մէջ կղզիացած էին, եւ միացեալ ոյժերով չէին դործեր, եթէ ոչ, թուրք բանակը պիտի չկարենար ազատօրէն անցնիլ հայկական բարձրաւանդակէն՝ երթալ կռուելու համար Շահ Աբբաս Ա. ի (1587—1628) բանակներուն դէմ, որոնք պարտութեան մատնած էին թուրքերը Դաւրէժի մօտ Սուֆեանի մէջ եւ գրաւած Դաւրէժը, Երեւանը եւ Կարսը (1603), անշուշտ օգտուելով երկիրին տակնուվրայ վիճակէն, բայց յետոյ ստիպուած էին ընկրկիլ եւ քաշուիլ Արաքսէն անդին:

Ասիկա կ'ապացուցանէ թէ հակառակ բազմաթիւ ապստամբած վայրերու՝ օսմանեան կանոնաւոր բանակները ազատօրէն կրնային երթալ կայսրութեան արեւելեան սահմանները, ըմբոստացած բազմաթիւ շրջաններու մէջէն:

Այս ըմբոստութեանց ամենէն մեծը եղաւ այն, զոր Գարա Եազըճը Ապտիւլ Հալիմ եւ իր եղբայրը Տելի Հասան յարուցին:

Ասոնք պահ մը յաջողեցան կորզել Սուլթանէն ասիական բոլոր նահանգները եւ անկախ կառավարել իրենց գրաւած հողերը:

Գարա Եազըճը, որ ենիչէրիններու Սեկպան (որսորդ) գունդին պետօրէն էր, 1597-ին ապստամբեցաւ Եդեսիոյ մէջ: Հակառակ անոր որ «Ոչ մի քաղաւորական տոհմէ եւ ոչ մեծ ազգէ էր, այլ գոեհիկ եւ ոչինչ քան զամենայն մարդիկ» (ԴԱԻՐ., էջ 569) եւ չորումցի սոսկական մըն էր եւ նախապէս Սոփտա (կրօն. ուսմանց ուսանող) եւ ապա եղած էր զինուոր: Ան կը ներկայացնէր ինքզինք Պենի Շետտատ (Beni Cheddad) ընտանիքէն սերած եւ զրոյց հանած էր թէ մարդարէն իրեն երեւցած եւ խոստացած՝ Փոքր Ասիոյ վեհապետութիւնը (Jonquière, Ա., 224): Գարա Եազըճը ալ կ'երեւի ունէր կրօնական աղանդ մը, որուն հեղինակը ինքն էր թէ ուրիշ մը, չենք գիտեր:

Այս աղանդին հետեւողներուն արգիլուած էր կոյս աղջիկներու կամ կիներուն մերձենալ: Գարա Եազըճի յաջողեցաւ 20.000 քիւրտ եւ թիւրքմէն հաւաքել իր շուրջը (Այվազովսկի, նոյն, Ա., էջ 550):

Եւ շատ մը վայրերու տիրեց եւ երեք տարի յաջողութեամբ դիմադրեց կեդրոնէն ղրկուած զօրքերուն:

Իրմէ գրաւուած վայրերուն առաջիններէն մէկը եղաւ ՄԱԼԱԹԻԱ, ուր ձեւալիները եկած էին Ուրֆայէն, ինչպէս 1603-ի աւարտած ձեռագիր Շարականի մը յիշատակարանին մէջ գրուած էր թէ «ՂԱՐԱ ԵԱԶԸՃԻ ՈՄՆ ՅԱՐԵԱԿ ՀԱԿԱՌԱԿ ԹԱԳԱԽՈՐԻՆ ԵՒ ԺՈՂՈՎԵՅ ԻՒՐԵԱՆ ՀԱՄԱԽՈՀ ԻՌ. (20.000)



ԱՅՐ ՊԱՏԵՐԱԶՄՈՂ: Նախ էառ զՈւրփա փաղափ եւ տիրեց իւր բոլոր գեղի եւ մանր փաղափացն, եւ զամենեցուն զապրանփին եւ զմալն առեալ զոմանս ըսպանեալ եւ գտասն տարուն ի վեր եղած գտղայֆն գերի առեալ: Եւ տարի մի այլ եկեալ Մալաթիա բնակեալ եւ գաա ալ քալանեալ եւ մերկացուցեալ ի հոգեւոր եւ ի մարմնաւոր բարութեանց: Եւ անդի եկեալ բազում զօրաւֆ ի Սեբաստիա փաղափ եւ մտեալ անդ զփաշայն ի բերդն փախոյց եւ զբազումս ի անկիչարացն եւ սպառնցն եւ շատֆ ի գեղէ եւ ի փաղափէ սպանեաց եւ ի սուր մաշեաց, եւ գտունս եւ զբնակութիւնս, զպազաստան եւ զչարշուներս նախ քալանեցին եւ ապայ զամենեսեան հրով այրեցին, եւ զնոցա գտղայֆն այլ գերի առին եւ իւրեանց չար գործոցն կցորդ արարին»:

Այս յիշատակարանին շարունակութենէն կը հասկցուի թէ տարի մը յետոյ Գարա Եազըճին գրաւած է նաեւ Թոգատը եւ նոյն խժդժութիւնները գործադրած է նաեւ հոն, ինչ որ շատ աւելի մանրամասն նկարագրած է (տես ՅՈՅՍ, հանդէս, 1876, էջ 126—7 կամ Ալպոյաճեան ՊԱՏՄՈՒԹԻՒՆ ԵՒԴՈԿԻՈՅ ՀԱՅՈՅ, էջ 1575—7):

Ապստամբութիւնը, ինչպէս այս յիշատակարանին մէջ նկարագրած է Ստեփանոս Թոգատցի, այս Շարականին լրացնողը, ստացած էր աւազակային բնոյթ:

Գարա Եազըճիի մարդիկը, ինչպէս Դարանազցի ալ կը հաստատէ (էջ 25—6), ի սկզբան աւարառութիւն եւ թալան չէին ըներ եւ կամ մարդու վրէժնաւ չէին հասցներ, այլ միայն մարդոց պարէնը եւ անասուններուն կերը կ'առնէին:

Երբ Չորում եկան եւ հոն ձմեռեցին, ոչ ոքի վնաս հասցնել չէին ուզեր:

Կը տեսնուի թէ, գէթ ապստամբութեան առաջին շրջանին, շարժումը ուղղուած էր օսմանեան պետութեան եւ հարուստներուն դէմ եւ ոչ՝ գեղացիներուն դէմ եւ նոյնիսկ վաճառականներուն:

Դարանազցի տեղ մը որոչ կ'ըսէ արդէն թէ շատ աւելի կը վնասէին Թուրքերուն քան քրիստոնեաներուն: Այս վկայութիւնը կ'ենթադրուի թէ կը վերաբերի ապստամբութեան այն շրջանին, երբ սկզբնական յաղթանակներէ ետք զօրաւոր պետի մը չգոյութիւնը անիշխանութիւն ստեղծեց:

Ասկէ վերջն է որ կացութիւնը բոլորովին անտանելի դարձաւ Ասիական Թուրքիոյ:

Հայկ Պէրպէրեան, իր մէկ գրութեան մէջ՝ նուիրուած Ճելալիներուն ապստամբութեան, երկիրին վիճակը կը ներկայացնէ շատ դժբախտ. —

«Ճելալիները կը կռուպտէին, կը յափշտակէին, կ'առեւանգէին, կը չարչարէին, կը հրկիզէին եւ կը սպաննէին, եւ միեւնոյն ատեն իրարու հետ ալ կը կռուէին իրենց իշխանութիւնը տարածելու համար. մահմետական Ճելալիներուն միացած քրիստոնեաներ ալ, անշուշտ Հայեր եւ քերես Ասորիներ, որ օգտուելով երկիրին անտէր վիճակէն, սկսան «թէ յայտնի յափշտակութեամբ եւ թէ գաղտնի գողութեամբ» (ԴԱԽ. էջ 85) ժողովուրդը հարստա-



հարել, ինչպէս որ կ'ընէին միւսները:

Այս համատարած աւարտութիւններն ու կոիւները խանգարեցին երկիրին տնտեսութիւնը՝ հողագործութիւնը եւ խաշնարածութիւնը, որ Փոքր Ասիոյ տնտեսական կեանքին գլխաւոր աղբիւրներն էին. այնքան դժուարացան որ սոսկալի սով մը չուշացաւ տիրել ամբողջ երկիրին մէջ, մարդիկը մարդակերութեան մղելու աստիճան, եթէ մեր մատենագիրները չեն չափագանցած: Այս կացութեան հետեւանով, ժողովուրդին մէկ մասը ստիպուեցաւ հեռանալ ապստամբական շրջաններէն: Թուրքեր, Հայեր եւ Յոյներ ապաստանեցան ի Պոլիս եւ շրջակայքը, Պոնտոսի ծովեզերքը, Խրիմ. Եւրոպական Թուրքիա, Պարսկաստան, Ռումանիա եւ մինչեւ իսկ Լեհաստան» (Հմմտ. ԴԱԻ., էջ 88 եւ ԴԱՐԱՆԱՂՅԻ, էջ 18):

Գարա Եազըճիի ապստամբութիւնը այնքան ծաւալեցաւ որ մայրաքաղաքին դուռները հասաւ: Այս ընդարձակ տարածութեամբ երկիրին խաբանը (գլխահարկ) ինքը սկսաւ առնել եւ պետութեան գանձուն հասոյթները իւրացընել: Սուլթանը հարկադրուեցաւ արտասովոր միջոցներու դիմել՝ ընկճելու համար այս ապստամբութիւնը:

Ուստի Եզեսիոյ վրայ զրկեց իր վեզիրը, երբ Գարա Եազըճիի օրինակէն քաջալերուած բազմաթիւ ըմբոստութիւններ ծագեցան եւ անիշխանութիւնը համատարած հանդամանք մը առած էր:

Անոնք ահագին աւեր պատճառեցին պարսկական սահմաններէն մինչեւ Կ. Պոլսոյ մօտերը տարածուած երկիրներուն, որոնց գրեթէ տիրած էին, ինչպէս Դաւրիժեցի եւ Դարանազցի կը հաստատեն. «ի յԱմթայ կէս աւուր հողէն որ ելնուս, մինչ ի մեծ ֆաղաֆն Ստամբուլ աւերութիւն է, ուր ուրեկ գտանի շինութիւն» (ԴԱԻՐԻԺԵՅԻ, էջ 569, Հմմտ. նաեւ ԴԱՐԱՆԱՂՅԻ, էջ 15):

Այսպէս, օսմանեան պետութիւնը ամբողջական կազմալուծումի կ'ենթարկուէր, ինչպէս կը պատմէ Դաւրիժեցի (էջ 82), վասնզի ԺԶ. դարու վերջերէն սկսեալ ամէն կողմ ասպտամբները ինքնիշխան կը գործէին:

Գարա Եազըճիի հետ, ժամանակակից հայ երկու պատմագիրները, կը յիշեն անուններով 15—20 ուրիշ ապստամբապետներու (տես ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 428), որ «նչ տեղի ուրեք գկայ առեալ բնակէին, այլ աշխարհաւերք եւ աշխարհակործանք, եւ ուր եւ լսէին զհամբաւ շինութեան, դիմեալ անդր հասանէին, աւարեալ կողոպտէին ու զշինուածսն հրդեհեալ այրէին» (ԴԱԻ., էջ 87):

Գարա Եազըճիի դէմ զրկուած վեզիրը չկարենալով յաղթել, գործը իրաւախոհութեամբ կարգադրած էր, գուցէ կաշառքով ապստամբէն շահուելով:

Այս համաձայնութեամբ Գարա Եազըճին Ամասիոյ կուսակալ կարգուեցաւ (Jonquière, Ա., 224) եւ «տիրեաց Թոխաթոյ եւ Ամասիոյ եւ Մարդունու՝ Չոռումուն» (ԴԱԻ., էջ 634, Հմմտ. ԴԱՐ., էջ 75) եւ քիչ յետոյ վերստին զէնք առաւ եւ միացաւ Պաղտատի կուսակալ Տելի Հասանի հետ եւ



կազմեց ընդարձակ պետութիւն մը, որ Պաղտատէ մինչեւ Փոքր Ասիոյ սիրտը կը տարածուէր:

Այս տարածութեան մէջն էր նաեւ Մալաթիա, որ ենթարկուած է անոնց պատճառած չարիքներուն:

Գարա Եազըճի Շահ (= Թագաւոր) տիրողոսը առաւ եւ սոնքալ սկսաւ որ յաղթած էր օսմանեան ոյժին եւ իշխանութիւնը բացարձակ իրեն կը պատկանէր (Հմմտ. Jonquière, էջ 224):

Սոքքոլլու Հասան փաշայի կողմէ սպաննուելէ ետք եղբայրը՝ Տելի Հասան շարունակեց իր գործը, նոյն սաստկութեամբ (Jonquière, Ա., էջ 224. Այվազովսքի Ա., էջ 550. ԴԱՐ., էջ 26, ՊԱՏՄ. ՍԵՖԱՍՏԻՈՅ, ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 428—9):

1602-ին Թոգատ կը գրաւուի ապստամբներէն, որոնք մեծ չարիքներ կը հասցնեն Փոքր Ասիոյ բնակչութեան (Այվազովսքի, Ա., էջ 551): Տելի Հասան նոյնիսկ 1603-ին պաշարեց Քէօթահիան: Զինու զօրութեամբ գլուխ չկարենալով ելլել, Բ. Դուռը ոսկիով շրջուց Տելի Հասանը եւ համոզեց զէնքերը վար դնել (1603), բայց ապստամբութիւնը վերջ չգտաւ. նոր պետեր երեւան եկան:

Եղաւ ատեն որ սուլթանին իշխանութիւնը Պոլսոյ շրջանակին մէջ սահմանափակուեցաւ եւ բովանդակ Անատոլիոյ վերածուեցաւ պատերազմի դաշտի եւ սրածութիւններ, կողոպուտներ, աւարառութիւններ եւ սաստիկ հարկապահանջութիւններ իրարու յաջորդեցին:

Այս խռովայոյզ վիճակը արգելք եղաւ երկրագործական աշխատութեանց եւ զարհուրելի սով մը ծայր տուաւ, որ 1599-էն 1610 տեւեց, այնքան սաստիկ որ ոչ միայն շուները եւ կատուները կերան, այլեւ մեռած մարդիկը եւ նոյնիսկ ողջերը (ԴԱԻ., էջ 88—9):

Ճղալի Օղլու Սինան փաշայի (1604), բայց մանաւանդ խրոլատ Գուլյուճու Մուրատ փաշայի (1607 Յունուար — 1608 Դեկտեմբեր) ջանքերով վերջապէս այս ապստամբութիւնը վերջ գտաւ, երբ երկիրը խորապէս ցնցուած եւ պարտուած էր, եւ քաղաքներն ու գիւղերը դատարկացած ու ամայացած էին բնակչութենէ<sup>1</sup>:

Հազիւ 15 տարի եղած էր ճեւալիներու ապստամբութեան վերջ գտնելը, երբ Կարնոյ կուսակալ Ապազա փաշա, մնացորդ ապստամբներուն հետ ըմբոստացաւ Ենիչէրիներու պատճառով: Եւ Կարինէն մինչեւ Էնկիւրիւ արշաւեց կոտորելով եւ թափելով իր 40.000 զինուորներովը:

Սուլթան Մուրատ Դ. (1622—1639) մեծ դժուարութեամբ եւ Թուրք-մէններու դաւաճանութենէն օգտուելով, հազիւ կրցաւ Ապազան հնազանդեցընել (ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 430):

(1) Այդ պատճառով Մուրատ փաշա (1520—1611) եւ Սուլթան Մուրատ Դ. (1622—1639) ջանքեր ըրած են փախչելով Կ. Պոլսոյ շուրջը համախուճուած գաղթականները իրենց տեղերը դարձնելու:



Այս տեսակ ապստամբութիւններ սովորական էին օսմանեան պետութեան մէջ, ուր ամէն ատեն ըմբոստ տարրեր եւ պետութեան դէմ զէնք առնողները միշտ կային:

Այդ ապստամբութիւններէն շատերը, նոյնիսկ պատմութիւն չունին իբր ընթացիկ եղելութիւններ, որոնք պետութեան մէջ ամէն օր կը պատահէին, իսկ ոմանք երբեմն մեծ համեմատութիւններ կ'առնէին:

Այս վերջիններու շարքին կրնանք դասել, իբր հետաքրքրական մէկ դրուագ օսմանեան պատմութեան այն ապստամբութիւնը, զոր լատին կրօնաւոր մը յարոյց Անատոլուի մէջ:

Այդ կրօնաւորը՝ Դոմինիկեան քահանայ Ճիովաննի Պաթթիսթա Պոթթին էր, որ Մուսուլ զրկուած էր եւ տեղւոյն եպիսկոպոսին հետ խնդիր ունենալով բանադրուած էր Հռոմի Պապէն: Պոթթի այն ատեն թողուց իր եկեղեցականութիւնը եւ կազմեց ծրագիր մը՝ նոր կրօնք մը հիմնելու ու Փոքր Ասիան գրաւելու: Երկար տարիներու ուսումնասիրութիւններէ եւ պատրաստութիւններէ ետք Շէյխ Օղլու Օսլոյ անունը առած, 1785-ին Ամադիէի մէջ սկսաւ քարոզութեան, եւ քանի մը ամսուան մէջ յաջողեցաւ բոլոր Քիւրտերը իրեն կապել եւ գրաւել Կարինը, եւ անկէ ալ առաջանալ դէպի Սեբաստիա եւ Զմիւռնիա: Այս պատճառով 1785—1787-ին Փոքր Ասիան անգամ մըն ալ տակնուվրայ եղաւ:

Սակայն օճառի պղպջակի մը կեանք ունեցաւ այս շարժումը, զոր Բ. Դուռը կրցաւ ճարտարութեամբ մը խեղդել (ՊԱՏՄ. ՀԱՅԱՍՏԱՆԻ ՍԱՀՄԱՆՆԵՐԸ, էջ 430): Բայց բնաւ վերջ չգտան խռովութիւնները եւ օսմանեան պետութիւնը որեւէ ատեն չկրցաւ զօրաւոր կեդրոնական իշխանութեան մը ենթարկուած եւ պետութեան բոլոր մասերուն վրայ հաւասար հեղինակութեամբ կառավարուած պետութեան մը վերածուիլ եւ միշտ խռովութիւններու եւ խառնակութիւններու բոյն մնաց:

Այնպէս որ օսմանեան պետութեան պատմութիւնը եղած է շարք մը արտաքին եւ ներքին պատերազմներու, որոնք անվախճան եւ անվերջ շարունակուած են: Մալաթիա մինչեւ օսմանեան պետութեան ենթարկուիլը, իբր Եփրատի կարեւոր մէկ անցքը վաղուց շատ կարեւոր դեր կատարած էր, հարաւէն եկած արշաւանքներուն դէմ Անատոլուն պաշտպանելով:

Օսմանեան պետութեան կցուելէն ետք շատ կարճ ժամանակ մը եւս նոյն դերը կատարեց Սիւրիայէն եգիպտական բանակներու կատարած յարձակումներուն դէմ:

Բայց երբ օսմանեան պետութիւնը ԺԶ. դարուն դէպի արեւելք՝ Ուրմիոյ լիճը հասաւ եւ Սիւրիան ու Պաղեստինը եւ նոյնիսկ Եգիպտոսը նուաճեց, Մալաթիա կորսնցուց իր իբր սահմանադիւիսի քաղաք ունեցած ռազմական նշանակութիւնը, վասնզի իբր Անատոլուի կեդրոնական քաղաքներէն մէկը, սահմանադիւիսներէն հեռու կը գտնուէր: Այս պատճառով անուղղակի կերպով միայն կրած է արտաքին՝ մասնաւորապէս կեդրոնական Եւրոպայի կամ



Դանուբի շուրջը օսմանեան պետութեան մղած պատերազմներուն հետեւանքները եւ որոշ չափով միայն կրած է ազդեցութիւնը այն պատերազմներուն, զորս օսմանեան սուլթանները Պարսկաստանի եւ Ռուսիոյ, եւ ԺԹ. դարուն առաջին կէսէն վերջ եգիպտոսի փոխարքային՝ Մեհմէտ Ալի փաշայի դէմ մղելու պարտաւորուեցան:

Ասոնցմէ միայն վերջինին մէջ է որ եգիպտական բանակները հասան մինչեւ Մալաթիա, եւ, ինչպէս պիտի տեսնուի, ճակատագրական հետեւանք ունեցան քաղաքին պատմութեան վրայ, հին Մալաթիոյ քով Նոր Մալաթիոյ հիմնարկութեան եւ քաղաքին տեղափոխութեան պատճառ ըլլալով:

Մալաթիա մասնաւորապէս ազդուած է ներքին խռովութիւններէ եւ անոնց տխուր հետեւանքները կրած է խորապէս:

Մալաթիա կրած է վերը ներկայացուած բոլոր ապստամբութիւններուն խառնակութիւններուն եւ յելուզակային շարժումներուն հետեւանքները:

Մասնաւորապէս իր դիրքը իբրեւ Թիւրքմէններէ եւ Քիւրտերէ բնակուած հողերով շրջապատուած վայր մը, պատճառ մըն էր որ կրէր բոլոր անխուսափելի հետեւանքները այն թշուառութիւններուն, զոր այս ապստամբութիւնները առաջ պիտի բերէին անպատճառ:

Մալաթիա, մէկ խօսքով, ենթարկուած է օսմանեան երկիրներուն ընդհանուր կերպով ճակատագրուած վիճակին, եւ թուրք պետութեան դժոխային վարչութեան ստեղծած բոլոր չարիքներուն:

Կեղեքում, հարստահարութիւն, կաշառակերութիւն, յափշտակութիւն եւ հպատակներու արժանապատուութեան վիրաւորանք սովորական եղելութիւններ էին այս պետութեան մէջ, որ զինուորական կազմով, ոյժի վրայ հիմնուած կառավարութիւն մըն էր եւ կը միտէր դէպի կեդրոնացում, սակայն իրականութեան մէջ կը կառավարուէր աւատական կարգերու մէկ չարափոխութիւնը եղող վարչաձեւով մը:

Պետութիւնը բաժնուած էր նախապէս երկու խոշոր մասերու, որոնք էին երկիրին ասիական (Անատոլիոյ) եւ եւրոպական (Ռումելի) մասերը, իրենց գլուխը ունենալով մէկ-մէկ իշխանապետ (պէյլէրպէյի):

Անատոլիոյ պէյլէրպէյին կը նստէր մինչեւ Կ. Պոլսոյ գրաւումը Էնկիւրիւ, բայց յետոյ փոխադրուեցաւ Քէօթահիա:

Պետութեան այս երկու մեծ հատուածները բաժնուած էին կուսակալութիւններու, որոնք հին ատեն Էլայէթ կը կոչուէին եւ յետոյ Վիլայէթ կոչուեցան:

Ասոնց գլուխը դրուած էր մէկ-մէկ կուսակալ (վալի), որ բացարձակ ինքնիշխան կը կառավարէր իրեն վստահուած երկիրը: Կուսակալը իր պատասխանատու պաշտօնը կը ստանար ոչ թէ իր արժանիքներով, այլ իր դրամով, պարգապէս կապալով:

Ով որ շատ կը վճարէր, անիկա կը տիրանար պաշտօնին եւ իր առաջին



ճտահոգութիւնը կ'ըլլար կեղեքել ժողովուրդը իր տուած դրամը առնելու համար :

Ամէն էլայէք կամ փաշայութիւն կը բաժնուէր Սանճագներու կամ Լիւաներու , որոնք կառավարչութիւններ էին : Ասոնց պետերը կը կոչուէին Միւքեսելլիմ կամ Միւսելլիմ , որ փոխանորդի իմաստ ունէր : Վերջը այս բառը փոխարինուած է Գայմագամ բառով , որ Տեղապահ կը նշանակէ :

Լիւաները (զաւառ) բաժնուած էին Գատըլըգներու կամ Գագաներու (թեմ) , իսկ Գատըլըգները՝ Նահիէներու , զորս Ինճիճեան Վիճակ կը կոչէ , սակայն աւելի լաւ է կոչել Գիւղախումբ , ինչպէս հիմա կը թարգմանուի :

Փաշայութիւններու մէջ ամբողջ իշխանութիւնը կը գտնուէր կուսակալ-փաշային ձեռքը : Փաշային տրամադրութեան տակ կը գտնուէր զինուորական ոյժը մը , ծագած խռովութիւնները եւ անկարգութիւնները զսպելու համար :

Հին ատեն փաշան ինքն կը նշանակէր սանճագներու պետերը , կը բաժնէր հարկը սանճագներու վրայ եւ զայն կը գանձէր սանճագներու կառավարիչներուն եւ մասնաւոր հարկահաւաքներու միջոցով :

Փաշաները թէպէտեւ կ'ընդունէին կեդրոնական կառավարութեան հեղինակութիւնը եւ կ . Պոլսոյ սուլթանին կը հպատակէին , սակայն միշտ կը ձգտէին անկախօրէն վարել զործերը , եւ ըստ քմաց կառավարել :

Երբեմն ասով ալ չգոհանալով՝ բոլորովին անկախ ըլլալ կ'ուզէին եւ կը մերժէին ճանչնալ սուլթանին իշխանութիւնը եւ կ'ապստամբէին :

Մալաթիա մաս կազմած է Մարաշի պէյլէրպէյութեան կամ էլայէքին , իբր սանճագ , եւ երկիրը նախկին տէրերուն անունով կոչուած՝ ԶԻԻԼԳԱ ՏՐԻՅԷ : Իր կառավարիչները միւս կառավարիչներէն տարբեր չեն եղած իրենց ընթացքով եւ ապահովարար անոնց նման շարունակ կեղեքած են ժողովուրդը :

Եւ այս անխուսափելի էր , քանի որ փաշաները յաճախ կաշառքով կ'առնէին կուսակալութիւնները , որոնք կարծես աճուրդով կը ծախուէին եւ շատ տուողին կը տրուէին :

Շահագործութիւնը այնքան սաստիկ էր որ նոյնիսկ կեղծ պաշտօնատուութիւններ ալ կը կատարուէին :

Յաճախ փաշան պաշտօնանկ կ'ըլլար իր պաշտօնը աւելի շատ տուողի մը տրուելու համար : Ասոր համար երկար չէին մնար իրենց պաշտօնին մէջ :

ԺԵ .—ԺԷ . զարբերուն Թուրքիոյ վիճակը շատ լաւ ներկայացուցած են ժամանակակից մեր երկու եկեղեցական պատմիչները՝ Առաքել Դաւրիժեցի եւ Գրիգոր Դարանաղցի : Տիարպեքիրը «Ի վեց ամիսն ինն փաշայի ետուն» (ԴԱԻՐԻԺԵՅԻ , էջ 569) եւ «կաշառովի տային գիշխանութիւն գաւառապետութեանց եւ աշխարհալուծութեանց եւ դատաւորութեանց եւ տակաւին դրա ի տեղին ոչ էին հասեալ , մանչուլ առնէին եւ գտեղին նոր այլ ումեման տային» (ԴԱՐԱՆԱՂՑԻ , էջ 14—5) :



Սուլթանը «յորժամ... տայր ֆաղաֆ մի փաշայի մի, կամ պարոնի մը, յետ ժ. (10) աւուր կամ ի. (20) աւուր մայրն կամ ֆոյրն, կամ իւր կիւնն, կամ վեզիրն, տային այլ փաշային եւ առնէին բազում կարմիր դահեկան» (ԴԱԻՐԻԺԵՑԻ, էջ 560): Հետեւաբար անմիջապէս որ պաշտօնի ձեռնարկէին, կը սկսէին կեղեքել իրենց տուած դրամը դանձելու համար: «Կայր որ փաշայն կու գայր, կայր որ փաշա վաֆիլն կու գայր: Նոքա որ կու գային, գիտէին որ բանի յետքն փուչ էր, նոքա այլ կու սկսած էին ի կողոպտել. եւ ի քալանել գփաղաֆն եւ գերկիրն» (նոյն, էջ 569):

Այնպէս որ կուսակալներու գլխաւոր գործը թալանելն էր որչափ կարելի է չատ:

Ժէ. դարուն սկիզբը օսմանեան պետութիւնը մեծ աղէտներու ենթարկուած էր իր անկազմակերպ վիճակի բերմամբ եւ վնասուած մեծապէս, եւ դարուն վերջերը տակաւին չունէր զօրաւոր կազմակերպութիւն մը:

Recunt որ ժէ. դարուն անգլիական դեսպան եղած է Կ. Պոլիս եւ իր տեղեկութիւնները քաղած է թուրք պաշտօնական աղբիւրներէ, իր գիրքին մէջ (Histoire de l'Etat présent de l'Empire Ottoman, Paris, 1670, էջ 165-171. Լէօ, ՀԱՅՈՅ ՊԱՏՄՈՒԹԻՒՆ, Գ., էջ 53) ցոյց կու տայ թէ Մարաշի պէյլէրպէյութեան ենթակայ չորս սանձադներէն մէկն էր Մալաթիա<sup>1</sup>:

Մարաշի պէյլէրպէյի եկամուտն էր 628.458 ասպըր (ազճէ)՝ անշուշտ անուանական:

Recunt-ի համաձայն այն ատեն 17 կուսակալութիւններ կային Անատոլիոյ մէջ սակայն ինչպէս այդ թուականէն առաջ, նոյնպէս նաեւ վերջը, այդ կուսակալութիւնները միօրինակ կերպով չէին կառավարուէր:

Վայրեր կային այդ կուսակալութիւններու մէջ, որոնք կուսակալին չէին հնազանդեր եւ անկախութիւն կը վայելէին՝ անուանական կերպով կուսակալին ենթակայ մնալով: Ամէն տեղ մէյ մէկ տեսակ կառավարութիւն կար: Շատ մը տեղեր, երկիրին զանազան մասերուն մէջ որջացած էին կարգ մը ձորապետներ (տէրէպէյի) եւ ուրիշ բռնապետներ, որոնք կաշառքով կը գոհացընէին կուսակալը, որպէսզի զիրենք անհանդիստ չընէ եւ իրենք կարենան շարունակել իրենց կեղեքիչ գործը, եւ իրենց հարստահարութեանց արդիւնքէն կուսակալին կարեւոր բաժիններ հանել, եւ անոր ընչաքաղցութիւնը գոհացնել:

Բնակչութեան, մանաւանդ Րայաներու (հալատակ) ո՛չ կեանքը, ո՛չ պատիւը եւ ո՛չ ստացուածքը ապահով էր:

Պարզ քմահաճոյքով՝ անդատատան գլխատումներ, գեղեցիկ կիւներու, աղջիկներու եւ տղաներու յափշտակութիւններ, եւ հողերու ու տուններու գըրաւումներ սովորական բաներ էին օսմանեան երկիրներուն մէջ (տես մանրա-

(1) Միւս երեքն էին ԱԶԱԲ (?), ԿԱՐՍ (հաւանօրէն ԿԱՐՍ ԲԱԶԱՐ Կիւրեղոսյ) քէջ եւ ՍԱՄՍԱՏ (որ ապահովաբար Սամսատն է):



մասնութիւններ Լէօ, ՀԱՅՈՅ ՊԱՏՄՈՒԹԻՒՆ, Գ. հատոր եւ ՀԱՅԿԱԿԱՆ ՏԸ-  
ՊԱԳՐՈՒԹԻՒՆ, Ա. հատոր, 1901, Թիֆլիս, էջ 28—39 այլ եւ այլ) :

Կառավարութիւնը կազմակերպուած աւագակութիւն մըն էր, եւ ար-  
դարութեան նշոյլը գոյութիւն չունէր, վասնզի արդարութեան դործը կամ  
դատական իշխանութիւնը ձգուած էր մահմետական կրօնաւորներու, որոնք  
օրինական քաջքշուքներով (Հիլէի Շերիէ) կամ զեղծարարութիւններով քը-  
րիստոնեան անիրաւ կը հանէին, եթէ երբեք անիկա դատարանի դիմելու քա-  
ջութիւնը ունենար եւ զայն օրէնքի անունով ալ կը կեղեքէին ու կը կո-  
ղոպտէին :

Երկիրը կազմակերպուած եւ կարգաւորեալ վարչութեան մը ենթար-  
կուած չէր, այլ կային շրջանակներ, որոնք թէեւ կը ճանչնային սուլթանին  
գերիշխանութիւնը, բայց կը պահէին տեղական մասնաւոր առանձնաշնորհ-  
ներ եւ կը կառավարուէին բնիկ ժառանգական իշխողներու կողմէ, մէկ խօս-  
քով տակաւին նուաճուած չէին եւ պզտիկ կղզիացեալ միութիւններ կը կազ-  
մէին, որոնք շարունակ դրաղում կը հայթայթէին սուլթանին կառավա-  
րութեան, որ տարիներու ընթացքին պատեհութիւն ներկայացած ատեն զա-  
նոնք նուաճելու եւ պետական ընդհանուր կազմին մէջ ներմուծելու կ'աշ-  
խատէր :

Թուրքիա հետեւարար իր արտաքին թշնամիներուն դէմ սահմանագը-  
լուխի վրայ կուտած ատեն, ստիպուած էր պահել նաեւ ներքին ճակատ մը,  
ընդդէմ կարգ մը ինքնիշխան շրջաններու եւ անկարգ ու ըմբոստ ցեղախում-  
բերու՝ թիւրքմէն, քիւրտ, աֆշար եւայլք (տես Ալպոյաճեան, ՊԱՏՄԱ-  
ԿԱՆ ՀԱՅԱՍՏԱՆԻ ԱՐՏԱՔԻՆ ԵՒ ՆԵՐՔԻՆ ՍԱՀՄԱՆՆԵՐԸ, էջ 85) :

Մալաթիոյ շուրջը ապրող ըմբոստ տարրերու մէջ կարեւորը կը ներ-  
կայացնէին Քիւրտերը, որոնց գլխաւոր կայաններէն մէկն էր այս քաղաքը,  
որ մինչեւ մեր օրերը պահած էր իր քրտական կեդրոնի մը հանգամանքը :

Քիւրտերը, որ այս շրջանակին մէջ բաւական պատկառելի թիւ մը ու-  
նէին, այնպէս կը թուի թէ հեռուէն եկած հաստատուած եկուորներ էին մեծ  
մասամբ եւ ոչ թէ բնիկներ : Անոնք հաւանօրէն սելճուկեան արշաւանքներու  
ատեն դադրած էին դէպի արեւմուտք, անշուշտ հետեւելով անոնց յաղ-  
թական բանակներուն եւ բնակութիւն հաստատած էին, Մուշէն մինչեւ Փոքր  
Հայք եւ մինչեւ Սերաստիա եւ Կեսարիոյ մօտերը տարածուած երկրամասին  
վրայ :

Իրենց խիտ բնակութիւն ունեցած վայրերն էին Քղի, Խոռզուլջան,  
Չարսանճագ, Տերսիմ եւ Տուժիք :

Կը կարծուի թէ ասոնք խլամայցած Հայեր են, բայց աւելի հաւանական  
է կարծել թէ անոնք եկուորներ են որ եկած բնիկ ժողովուրդին՝ Հայոց խառ-  
նուած են եւ տիրապետող եղած են : Իսկ բնիկ տարրը անոնց մէջ ձուլուած է,  
պահելով հին հաւատքին եւ սրբատեղիներուն յարգանքը (տես Լեւոն Լիւլե-  
ճեան, Հայ եւ Քուրտ յարաբերութիւնները. Տերսիմի Քուրտերը, ՊԱՅՔԱՐ Օ-



րաթերթ, 14 Մարտ, 1923) :

Բայց միշտ գոյութիւն ունեցած է զուտ քիւրտ տարր մը, որուն կեդրոնը եղած է Տիարպեքիրը :

Հայաստան երբ Պարսկաստանի տիրապետութեան տակ էր ժե. դարուն, Շահ Իսմայիլ (1499—1525) ամբողջ քրտական շրջաններուն կառավարութիւնը յանձնած էր իրեն շատ անձնուէր քեռայրին՝ Կուստապէսալու Մահմուտ պէկին (Յովհաննէս Յակոբեան, ՈՒՂԵԳՐՈՒԹԻՒՆՆԵՐ, Ա., էջ 291) :

Գաղափար մը տալու համար թէ ո՞րքան ընդարձակ էր այդ քրտական շրջանը, ըսենք թէ Տիարպեքիրէն դատ, որ այդ շրջանին Գարա Ադա կը կոչուէր, անոր մաս կը կազմէին Մարտին, Ուրֆա (Եդեսիա), Ճեզիրէ, Հասան Քէֆ, Սղերդ, Խարբերդ եւ այլն. (The Travels of a Marchantine Persia, տես. Յովհ. Յակոբեան, նոյն, էջ 292) քաղաքները, որոնք կեդրոններ էին մէյմէկ աւատապետութեան : Օրինակի համար, Հասան Քէֆ, որ կեդրոնն էր աւատապետութեան մը, որ կը բաղկանար ժ. Դարուն առաջին կիսուն բազմաթիւ քիւրտ իշխանութիւններէ եւ կը հպատակէր պարսիկ Շահին (նոյն, Ա., էջ 294—5) եւ կը տիրէր մինչեւ Սղերդ եւ Սասուն տարածուող հողերուն :

Երբ Շահը ուղեց բարեկարգել այս երկիրները եւ աւաղակներէն մաքրել, Քիւրտերը դիմադրեցին եւ օսմանեան սուլթանին կողմը անցան այն յոյսով որ օսմանեան երկիրին մէջ իրենց ուզածը կրնային ընել :

Սուլթան Սելիմ Եաւուզի (1512—1520) ինքնաբերաբար օգտակար հանդիսացաւ քիւրտ մը՝ Մուլա Իտրիս, Բաղէշի քրտական իշխանութեան տունէն մէկը, որ մեծ հեղինակութիւն կը վայելէր քիւրտ ժողովուրդին մէջ : Անիկա օսմանեան հովանաւորութեան տակ քիւրտ անկախ իշխանութիւն մը ստեղծելու հեռապատկերը ունենալով, յաջողեցաւ շատ մը քիւրտ ցեղապետներ համոզել որ օսմանեան բանակին միանան (ՊԱՏՄԱԿԱՆ ՀԱՅԱՍՏԱՆԻ ՍԱՀՄԱՆՆԵՐԸ, էջ 436—7) :

Սուլթան Սելիմ շատ սիրով ընդունեցաւ իրեն դիմողները եւ անոնց իշխանութիւնները ճանչցաւ : Քիւրտերը կապուեցան օսմանեան կայսրութեան, որ կրցաւ անոնց միջոցաւ Հայաստանի տիրապետութիւնը ասլահովել (տես ՊԱՏՄԱԿԱՆ ՀԱՅԱՍՏԱՆԻ ՍԱՀՄԱՆՆԵՐԸ, էջ 437)՝ Քիւրտերը սիրաշահելով :

Տիարպեքիր եղաւ կեդրոն թրքական էլայէթի մը, որ Եփրատէն մինչեւ Պարսկաստանի սահմանադրութիւնը կը տարածուէր :

Այս վիլայէթը բաժնուած էր 19—20 գաւառներու, որոնցմէ 11-ը միայն ուղղակի Բ. Դուռէն կախում ունէին եւ 8-ը աւատառուներու տրուած էին (Տոմաշէկ, ՀԱՆԴԵՍ ԱՄՍՕՐԵԱՅ, 1896, էջ 301), որոնք կը պահէին իրենց առանձնաշնորհները : Անոնց թիւը հետզհետէ շատցաւ եւ եղաւ ատեն որ այնքան իշխողներ եղան, որքան կային լեռնային ամրոցներ եւ դղեակներ (Լէօ, ՀԱՅՈՅ ՊԱՏՄՈՒԹԻՒՆ, Գ., էջ 177—9) : Անոնք կը կազմէին մի քանի



աւատապետութիւններ :

Մոլլա Իտրիսի ծրագիրը անկախութեան կորիզ մը ստեղծելու համար ձախողեցաւ, վասնզի Քիւրտերը հասունութիւն չունէին եւ իշխանութեան հետամուտ կ'ըլլային միայն կեղեքելու համար :

Հետեւաբար հասարակաց թշնամին ձգած, իրարու հետ կռուեցան շարունակ : Եւ ասոր համար ոչ միայն Մոլլա Իտրիսի ծրագրած անկախութիւնը չունեցան, այլեւ կորուսին իրենց առանձնաշնորհները եւ պզտիկ իշխանութիւնները :

Օսմանեան կայսրութեան վարիչները որչափ որ կրցան, երբ առիթը ներկայացաւ, կրճատեցին Քիւրտերու առանձնաշնորհները, ջնջեցին անոնց ձորապետական իշխանութիւնները եւ աշիրէթներու պետերուն վայելած իրաւունքները :

Մալաթիա եւ շրջակայքը եւս՝ իբր խիտ քիւրտ բնակչութեամբ վայրեր, ունէին քիւրտ իշխանութիւններ, ինչպէս Տերսիմի, Խարբերդի, Բալուի եւ Էկլի կամ Ակլի մէջ կ'իշխէին քիւրտ Ամիրաներ կամ անկախ իշխաններ, որոնք ժամանակի ընթացքին հետզհետէ տկարացուած, ջնջուած կամ ընկճուած են : Մալաթիա ալ թերեւս ունեցած է իր քիւրտ ամիրան կամ պէկը, թէեւ չէ յիշուած :

Անոնցմէ ամենէն ուշ նուաճուածներէն մին էր Տերսիմ, զոր 1878-ին Սուլթան Համիտ միացուց նորակազմ Մամուրէթ Էլ Ազիզ կուսակալութեան, որուն մաս կը կազմէր նաեւ Մալաթիա :

Ըստ Տոմաշէկի՝ այս լեռնային անառիկ շրջանի մէջ Քիւրտերը Դաւղիեան կամ «Աւաղակ Քիւրտեր» են, որոնց ծագումը որոշ չէ :

Ասոնց կրօնքը Ալէվի (Գըզըլ պաշ) աղանդն էր, որ խառնուրդ մըն էր իսլամութեան եւ քրիստոնէութեան, աւելի մօտ ըլլալով երկրորդին :

Ասոնք մինչեւ մեր օրերը անկախ եւ աննուաճ էին եւ աւաղակութեամբ կ'ապրէին : Անոնց վարչութիւնը աշիրէթապետական էր եւ պզտիկ միութիւններու բաժնուած էին :

Քիւրտերը թէեւ շատ բան տուած էին իրենց ազատութիւններէն, սակայն անժխտելի իրողութիւն մըն էր որ անոնք կը ներկայացնէին չփայտած եւ անկարգ տարր մը, որ իր ղէնքերը պահած էր իբր մարտական ոյժ եւ ասոր համար օսմանեան պետութեան կողմէ միշտ հաշուի առնուած էր : Այս կերպով որոշ չափով մը անխոցելի կը մնար :

Ասկէ քաջալերուած Քիւրտեր շարունակ կը կեղեքէին երկրագործ եւ խաղաղ ժողովուրդը, երբ մանաւանդ Բ. Դուռը իր սաղայելական ծրագիրներուն գործիք կ'ընէր զանոնք, ինչպէս Սուլթան Համիտ ըրաւ եւ քիւրտ անկարգ տարր մը, որ իր ղէնքերը պահած էր իբր մարտական ոյժ եւ ասոր համար օսմանեան պետութեան կողմէ միշտ հաշուի առնուած էր : Այս կերպով որոշ չափով մը անխոցելի կը մնար :

Ասկէ քաջալերուած Քիւրտեր շարունակ կը կեղեքէին երկրագործ եւ խաղաղ ժողովուրդը, երբ մանաւանդ Բ. Դուռը իր սաղայելական ծրագիրներուն գործիք կ'ընէր զանոնք, ինչպէս Սուլթան Համիտ ըրաւ եւ քիւրտ անկարգ տարր մը, որ իր ղէնքերը պահած էր իբր մարտական ոյժ եւ ասոր համար օսմանեան պետութեան կողմէ միշտ հաշուի առնուած էր : Այս կերպով որոշ չափով մը անխոցելի կը մնար :

Քաջալերել կամ նուիրագործել :



Մալաթիոյ շրջանակին մէջ, ուր Հայերը թիւ մը կը կազմէին, ինչպէս նաեւ Քիւրտերը, Հեֆմէքը հեօֆիւմէքով իրարու դէմ հանուած այս երկու տարրերէն տուժողը անգէն Հայերն էին, որոնք իրր րայա, ոչխարներու պէս կը խուզուէին բռնակալ Քիւրտերէն:

Հետեւաբար Մալաթիոյ մէջ, ինչպէս այլուր Հայերը եւ Ասորիները չարաչար կը կեղեքուէին, վասնզի կը կողոպտուէին թէ՛ քիւրտ պէկերէն եւ թէ՛ պետական պաշտօնատարներէն:

Կեդրոնական կառավարութեան հեղինակութիւնը ոչինչ էր պետութեան կարգ մը մասերուն մէջ:

Մալաթիոյ շուրջը, ինչպէս այլուր, կային թիւրքմէն ձորապետներ (տէրէպէյիներ) եւ քիւրտ անկախ իշխանութիւններ, ինչպէս Տերսիմի լեռնային գաւառը, որ դրեթէ բոլորովին ազատ էր:

Այս կացութիւնը շարունակուած է մինչեւ մեր օրերը, մինչեւ 1938, ուր վերջին անգամ Թուրքերը ընկճեցին Տերսիմը, քրտական այս անկախ շրջանը<sup>1</sup>:

Գերման նշանաւոր զօրավար Մուլթքէ, որ իբրեւ մարդիչ օսմանեան բանակին մէջ ծառայած է 1830-ական թուականներուն, երբ եգիպտական բանակը Հալէպի ճամբով մինչեւ Սամոսատ եւ Հիւսնի Մանսուրի բերդը առաջացած եւ նոյնիսկ Մալաթիան գրաւած էր, Կեսարիա-Գոնիա ճամբով մինչեւ Պրուսա առաջացած, շատ իրաւամբ դիտել տուած է թէ օսմանեան պետութիւնը իր սահմանները ընդարձակելու աշխատելու տեղ, աւելի լաւ կ'ընէր եթէ իր սահմաններուն մէջ դնուող աննուաճ եւ բմբոստ շրջանները գրաւէր եւ անոնց տիրակալէր: Արդարեւ, Թուրքիոյ սահմաններուն մէջ բաղմաթիւ էին վայրեր, որոնք կատարելապէս նուաճուած չէին (տես ՀԱՅԱՍՏԱՆԻ ՍԱՀ-ՄԱՆՆԵՐԸ, էջ 85):

Երկրին մէջ տիրող անհանդուրժելի կացութեան հետեւանքով հպատակ քրիստոնեայ եւ մահմետական աղղեր մղուեցան ապստամբութեան եւ օսման պետութենէն բաժնուիլ եւ անկախ ըլլալ ուղեցին:

Եւրոպական մեծ պետութիւններն ալ, իրենց քաղաքական հաշիւներով օսմանեան պետութեան դործերուն խառնուիլ սկսան եւ անոնք, որ այս պետութեան դոյութիւնը հաւասարակշռութեան տարր մը կը նկատէին, անոր դոյութիւնը տեւականացնելու աշխատեցան, ուստի ջանացին Բ. Դուռը եւ սուլթանը համոզել որ բարեկարգ վարչութեամբ մը իր բոլոր հպատակներուն համար տանելի վիճակ մը ստեղծէ: Ասկէ առաջ եկաւ բարենորոգմանց խընդիր մը, որով Թուրք պաշտօնատարներէն շատ քիչերը լրջօրէն զբաղած եւ

(1) Տերսիմի նուիրուած թրքերէն հատորի մը մէջ անտոնաբոյժ Մ. Նուրի Տերսիմի (Dr. Viñ. M. Nuri Dercimi, Kurdistan Tarihinde Dersim, Հալէպ, 1952) ունի բաւական մանրամասնութիւններ Մալաթիոյ Քիւրտերու մասին (տես նոյն, էջ 59). ըստ Տոքթ. Տերսիմիի՝ Մալաթիոյ կուռակալութեան Քիւրտերը ծագումով Տերսիմէն են եւ Ալեւի կրօնքին հետեւող:



անհրաժեշտ նկատած են, իսկ անոնցմէ շատերը կեղծիք ի գործ դրած են, եւ պետութեան բաղկացուցիչ տարրերը, ինչպէս նաեւ եւրոպական պետութիւնները խաբելով, խաբխրելով ուղած են յաւերժացնել թուրք խայտառակ վարչութիւնը:

Սուլթաններուն մէջ Սուլթան Մահմուտ Բ. Ատիլ (1808—1839) միակ կարկառուն դէմքն է, որ ըմբռնած է թէ օսմանեան պետութիւնը կը կարօտէր վերանորոգութեան, եւ զայն իրագործելու համար աշխատած է եռանդով, գրեթէ միամիտակր: Իր իշխանութիւնը, ինչպէս շատ գեղեցիկ կերպով սահմանած է Jonquière, (Ա. 422), եղած է մաքառումը միակ անձի մը ամբողջ ազդի մը դէմ, առանց վայրկեան մը իսկ տկարանալու, եւ նոյնիսկ առանց վարանելու ստանալու «Կեաւուր Սուլթան» տիտղոսը, զոր իրեն տուին իր իսլամ հպատակները՝ երկիրը եւրոպական ձեւով վերակազմել ուղելուն համար:

Այս սուլթանին առած բարենորոգչական քայլերուն մէջ ամենէն գլխաւորը եւ կարեւորը Ենիշէրիներու բնաջնջումն էր (16 Յունիս 1820), որ արմատական քայլ մըն էր փրկելու օսմանեան պետութիւնը իր վրայ ծանրացող զարհուրանքէ մը, որ իր ծագումէն մինչեւ այս վախճանը՝ պետութեան համար պատուհաս մը եղաւ, հակառակ անոր որ կը ներկայացնէր մարտական ոյժ մը, բայց չունէր զինուորական կարգապահութիւն եւ անիշխանութեան հակամէտ եւ պետական գործերու խառնուող ըմբոստ տարր մըն էր, ինչպէս Հռոմի Պրետորեան գունդերը: Այնպէս որ Սուլթան Մահմուտ Բ. ի ջանքերը պետութիւնը վերակազմելու համար գրեթէ անզօր մնացին:

Ադրիանապոլսոյ դաշինքով՝ Յունաստանի անկախութեան ճանաչումէն ետք 7 Հոկտեմբեր 1829-ի Եգիպտոսի կոնսակալ Մեհեմէտ Ալի փաշայի ըմբոստութիւնը եւ իր բանակներուն իր որդւոյն՝ Իպրահիմ փաշայի հրամանատարութեամբ Սիւրիան նուաճելը եւ նոյնիսկ Տաւրոսը անցնելով Մալաթիան, Կեսարիան, Գոնիան եւ Քէօթահիան գրաւելը եւ մինչեւ Պրուսա առաջանալը (1831—1833), եւ եւրոպական միջամտութեամբ գոհացում ստանալէ ետք քաջուիլը եւ դարձեալ նոր պահանջներ ներկայացնելը եւ նոր յաղթութիւն մը չահիլը Նիզիպի մէջ 29 Յունիս 1839-ին, ազդարարութիւններ էին պետութեան վարիչներուն, որոնք Սուլթան Մահմուտի մահէն (1 Յուլիս 1839) ետք կոչուած էին այս ընդարձակ կայսրութիւնը կառավարելու:

Անոնցմէ միայն ոմանք ընդունեցան թէ պէտք էր երկիրին վարչութիւնը բարենորոգել եւ աշխատեցան այս ուղղութեամբ՝ հակառակ իրենց դէմ ցցուած դժուարութիւններու, որոնց քիչ անգամ կրցան յաղթել եւ հետեւաբար իսկական բարենորոգութիւններ ի գործ դնել չյաջողեցան (տես ՊԱՏՄ. ՀԱՅ ԿԵՍԱՐԻՈՅ, էջ 610—631):

Եւ հարկադրանքի տակ կամ վտանգ մը անցնելու համար հռչակուած երկու Սահմանադրութիւնները (1876 եւ 1908) խաբուսիկ նկարագիր մը ունեցան եւ երկիրը վերակազմուեցաւ եւ իր հին վիճակովը սպրեցաւ, մինչեւ



1919—1920, Մուսթաֆա Քեմալի մեծ յեղաշրջումը, որ իր արտաքին պատեանով իրապէս մեծ քայլ մըն էր, որ սակայն անկարող էր թուրքին հոգին բարձրացնելու եւ քաղաքակրթելու ազգը որ կը մնար նոյնը, ինչպէս ցոյց տուաւ 6 Սեպտեմբեր 1955-ին օրը, 35 տարի ետք թուրք Հանրապետութեան հռչակումէն:

Թուրքը մէկ պատմութիւն ունի ամէն ժամանակներու եւ ամէն պարագաներու համար, եւ Հայերը զայն շատ լաւ կը ճանչնան իրենց վեց դարերու դրացնութեան հետեւանօք:

Այդ պատմութիւնը ամէն Հայու ծանօթ է եւ այս տողերը գրողը զայն ներկայացնելու առիթ ունեցած ըլլալով իր գործերուն մէջ՝ քանի մը անգամներ, հոս վերստին կրկնելու պէտք չի տեսներ:

(1) Փափաքողներ կրնան կարգաւ 1. Պատմութիւն Հայ Գաղթականութեան, Ա. եւ Բ. հատոր, 2. Պատմական Հայաստանի արտաքին եւ ներքին սահմանները, 3. Պատմութիւն Հայ Կեսարիոյ, 4. Պատմութիւն Եւդոկիոյ Հայոց, Եւայլն եւայլն:

